

元人雜劇全集



04023



由國家圖書館數位化、典藏

# 元人雜劇全集




第一輯

第二十二種

金陵盧氏欽虹笈輯本

貝葉山房張氏藏版

本書封面題簽：吳瞿安先生



852  
854  
24

鄭

廷

玉

雜

劇



1100815

8904019



鄭廷玉雜劇

楚昭公疎者下船

布袋和尚忍字記

包龍圖智勘後庭花

看錢奴買冤家債主

崔府君斷冤家債主

鄭廷玉雜劇五種





# 楚昭公疎者下船

## 第一折

【冲末扮吳王領卒子上詩云】太伯當年曾遜避。至今子姓居吳地。延陵何事慕高風。幾使孤家不承繼。某乃吳王闔廬名姬光者是也。昔年征伐越國時。獲得寶劍三口。一曰魚腸。二曰純鉤。三曰湛盧。某常佩之。夫此劍者。昔聞越國允常使歐冶子監製。採五山之鐵精。煉六合之金氣。感得兩師灑塵。雷師擊節。蛟龍捧鑪。天帝焚炭。候天伺地。陰陽同體。久而成功。帶之有威。用之無敵。真乃世之奇寶也。一向在庫中收藏。忽然湛盧失其所在。聞知此劍飛入楚國。被昭公收得。某數次遣使多將金幣索取。不肯付還。更待干罷。令人與我喚將孫武來者。【卒子云】理會的。孫武安在。【外扮孫武子上詩云】新書著就十三篇。篇篇兵法妙通玄。君王不信親相試。宮中賜出女三千。某乃孫武是也。本齊國人。以兵法得見吳王。教練女兵。

數千驅之水火莫敢逃避。皆因某號令嚴威所致。兵法有云。約束不明。申令不熟。將之罪也。既已明而不如法。吏士之罪也。法令熟行。君命有所不受。某如今現爲吳國大將。主公呼喚。須索走一遭去。令人報復去道。有孫武來了也。〔卒子報科云〕軍師到。〔做見科〕〔孫武云〕主公呼喚。有何事商議。〔吳王云〕且一壁有者。令人與我喚將伍子胥伯嚭來者。〔卒子云〕伍子胥安在。〔外扮伍子胥淨扮伯嚭同上〕〔伍子胥詩云〕千里間關棄楚歸。短簫開向市中吹。可憐不遂英雄志。辜負當年舉鼎威。某姓伍名員。字子胥。現爲吳相國。這是伯嚭。皆楚人也。某因費無忌讒譖。害我父兄。不得已棄楚投吳。思圖報復。恰遇伯嚭也來投吳。一者爲同是鄉里。二者又爲同是避讐。以此舉薦於朝。爲太宰之職。今日主公呼喚。不知有甚事。須索走一遭去。令人報復去道。有伍員伯嚭都來了也。〔卒子報科云〕相國太宰到。〔見科〕〔伍子胥云〕主公呼喚。有何事商議。〔吳王云〕軍師請您衆將來。不爲別事。則爲湛盧寶劍。飛入楚國。某數次差人多將金幣索取。不肯付還。今請軍師衆將商議。有何計可以得此寶。

劍【孫武云】主公多聞這盧湛之劍。乃越國歐冶子所製。斬鐵截石。斷水吹毛。真爲無價之寶。這個不可不取。【伍子胥云】主公在上。今楚國有二將。乃是子期子常。論子期廉而愛士。頗知兵法。奈有智而少勇。子常怙勢而驕。不惜軍士。有勇而無智。皆不足爲慮。況有奸臣費無忌當權。必然暗行讒譖。未必用他。主公何不先差人下將戰書去。然後統兵征伐。有何難哉。【伯嚭云】若是楚昭公用那費無忌老頭兒對陣。也不消伍相國費力。只我伯嚭身上包殺的他尿流屁滾。【吳王云】相國言者當也。我如今先差人下將戰書去。着孫武爲軍師。相國爲先鋒。統領四十萬雄兵。與他交戰去。則要您小心在意。成功而回。【伍子胥云】則今日辭別了主公。教場中點就四十萬雄兵。一來爲楚昭王收了我家寶劍不還。二來有費無忌害我父兄之讐。誓當報復。管取馬到成功。奏凱回來也。【詩云】棄楚奔吳幾度秋。可憐猶未雪冤讐。今朝統領雄兵去。不斬奸臣誓不休。【同下】。【吳王云】軍師同相國太宰三人去了。吾觀此一戰破楚必矣。【詩云】伍相國智勇無雙。馬到處誰敢相當。將郢城踰爲平地。取湛

盧重返吳邦【下】正末扮楚昭公同外扮芊旋領卒子上【正末云】某乃楚昭公是也。數年前正寢之間忽聞一聲響亮俄而素光照室爽氣逼人驚起視之見一口寶劍墜於榻下遍問朝臣皆莫能測其來歷有司馬子期他言隱士風胡子能辯此劍遂請視之風胡子曰此劍號爲湛盧聞越國允常使歐冶子鑄此寶劍後歸于吳此劍乃五金之英太陽之精帶之有威用之無敵真希世奇寶某聞而大喜佩服在身未嘗輕離誰想吳王闔廬屢屢遣使索取某不肯還他但吳國方強倘若再來相索可怎了也【芊旋云】哥哥您兄弟想來此劍元是吳國之寶他既來索取不如做個人情送還了他兩國和諧可不好那【正末云】兄弟你那裏知道此劍非同小可既到吾國也是天使其然豈可便與他去【唱】

【仙呂點絳脣】這劍呵冰刃霜寒玉華光燦孜孜看怎飛來坐榻之間委實的紫氣冲霄漢

【芊旋云】哥哥量此物強殺者波則是一口劍那裏取神光冲射牛斗之上聽那風胡子做

甚麼【正末唱】

【混江龍】這劍真爲奇幻。世人休做等閒看。我則見英英結秀。湛湛生斑。這劍本在東方平百越。今日個飛來南國鎮荆蠻。這劍按陰陽斡運。順天地循環。採銅出耶溪之水。取錫在赤堇之山。下雷雨消融塵滓。有神鬼守護。鑪間這劍他抱精靈多氣爽。助神威真乃是免憂愁絕驚恐除危難。現如今河清海晏。國泰的這民安。

【使命上詩云】人去似星馳。江隔如天塹。親捧一緘書來索千金劍。小官乃吳國使命是也。奉主公的命。差往楚國下戰書。走一遭去。可早來到也。小校報復去。道有吳國使命在於門首。【卒子報科云】喏。報的大王得知。有吳國使命求見。【正末云】道有請。【使命做見科】

【正末云】使命此來。有何公事。【使命云】小官是吳國來的使命。有書在此。【正末云】將書來我看。原來爲這一口劍不與他。果然下將戰書來。似此可怎了也。【唱】

【油葫蘆】久與吳國姬光阻面顏。【芊旋云】哥哥既是他下將戰書來。憑着俺這裏兵多將廣。馬壯人強。量吳國姬光到的那裏。就怕着他哩。【正末云】我不怕姬光。怕的是那個人。【唱】怕的那伍盟府天下罕。【芊旋云】量子胥有何英雄。哥哥直這般怕他。【正末唱】止是良才奇寶在人間。我則道重脩訊問傳書簡。原來他相期惡戰呈公案。【芊旋云】雖然那子胥多有本事。憑着俺這名山大川。九江險阻。那伍子胥怎便容易到的俺國來。【正末唱】你休道是阻着大川。隔着大山。便有那波濤滾滾長江限。假若是無敵手戰應難。

【芊旋云】哥哥。若當初依着您兄弟。早早送還了這劍。也不到今日。事已至此。不如會集衆官商議。保舉一員名將。領兵與伍子胥交戰。可不好也。【正末唱】

【天下樂】哎。抵多少惡語傷人六月寒。無也波端着俺把劍還到如今事。已在前悔後晚。現放着擇士宮拜將壇。那裏有出羣材真楚產。

【云】本待把這廝殺壞了。古云兩國相持，不斬來使。你回去，則說選日交兵便了。【使命云】理會的。出的這門來，不敢久停，久住回主公話走一遭去。【詩云】楚昭公十分氣賭，恰待要將咱鑿鼓，便不怕堂堂使臣也。隄防伍家盟府。【下】【芊旋云】使命去了也。哥哥，這戰書上怎麼寫着來。【正末云】這戰書上寫着道：孫武爲軍師，伍子胥爲元帥，伯嚭爲先鋒，領兵四十萬，與俺交戰。爭奈俺國將老兵驕，怎生是好也。【芊旋云】哥哥，豈不聞古云：軍來將敵，水來土堰。俺這裏有司馬子期、子常、申包胥，皆是南楚有名之將，請將來與他商議，有何不可。【正末云】兄弟，你那裏知道。【唱】

【那吒令】我端坐在朝堂這間，聚集着英才這班。怎比的會臨潼那番。

【芊旋云】這伍子胥當初在臨潼會上，怎生般英雄。哥哥是說一遍，您兄弟聽咱。【正末唱】那裏取這般忠義人英雄漢。他舉鼎時多敢有神力相關。

【芊旋云】哥哥，你兄弟想來，秦國文有百里奚，武有姬輦，可怎生都不如那子胥，倒讓他做

個盟府【正末唱】

【鵲踏枝】他他他說的那秦姬輦怎敢遮攔。百里奚只瞪眼偷看他向那鬪寶筵前頓劍搖環。【芊旋云】聞他當初在臨潼曾救姬光之難。到今日投吳伐楚可知道來。【正末唱】便休題吳姬光顛碎了溫涼玉盞。他直着秦公子曲躬躬親送出潼關。

【云】令人與我喚將申包胥來者。【卒子云】申包胥安在。【外扮申包胥上詩云】憶與伍員別時語。他要覆楚我復楚。回頭已隔數年餘。前事今皆棄如土。小官申包胥是也。官封上卿之職。方今春秋之世。首稱強楚爲中國盟主者久矣。自伍子胥去後。始覺本國微弱。今日主公呼喚。不知有甚事須索走一遭去。令人報復去。道有申包胥在於門首。【卒子報科云】申包胥到。【申包胥見科云】主公呼喚小官。有何事商議。【正末云】今有吳國下將戰書來。拜孫武爲軍師。伍子胥爲元帥。伯嚭爲先鋒。領兵四十萬。與俺決戰。特請大夫計議。何以應之。



【申包胥云】主公論本國止有司馬子期子常二員大將子期智高勇怯子常有勇而無智。若吳國果用孫武爲軍師子胥爲元帥其鋒不可當也。【正末唱】

【寄生草】從來道要得千軍易。偏求一將難。閒時故把忠臣慢。差時不聽忠臣諫。危時却要忠臣幹。誰當這借吳雪恨伍將軍。我則索求那扶周攝政姬公旦。

【申包胥云】主公若子胥領兵前來。切不可與他交戰。你則深溝高壘。緊守城池。等小官直至西秦。借他兵來。那其間內外夾攻。方能取勝。【正末云】則怕秦昭公不肯借與。嚙兵怎生是好。【申包胥云】主公想秦楚舊爲親戚之邦。必然肯借與。嚙兵不必疑慮。【正末唱】

【幺篇】你須想着歸期急。休言他去路艱。止不過船臨古渡垂楊岸。路經險道邛邛坂。小可如君騎羸馬連雲棧。【申包胥云】小官旣爲國解難。怎敢避的途路之苦。【正末唱】你休辭山遙水遠路三千。我專等你堅甲利刃那兵十萬。

【云】大夫你此一去何日可回。【申包胥云】主公我去只消一箇月使回也。【正末唱】

【金盞兒】你道是一個月借兵還。三十日報平安。但願你曉行晚宿無辭憚。休着我懸望的惡心煩。你只看風傳金柝遠。霜照鐵衣寒。【申包胥云】主公放心。小官若見了秦昭公。借的軍馬。即便回也。【正末唱】我可爲甚着賢人投敵國。也則怕那猛將過昭關。

【申包胥云】那吳國孫武子。深知兵法。又加以子胥之勇。俺國中無能勝之者。小官去後。只願主公堅壁不戰。以待秦兵。休聽一時之言。坐失萬全之策。【正末唱】

【醉扶歸】你道是伍盟府能雄悍。孫武子又非凡。只要我高壘深溝緊閉關。專等待秦邦返。我只怕你人疲意懶。早淹的過了程期限。

【申包胥云】小官則今日辭了主公。便索長行也。【正末唱】

【賺煞】你去後我夜憂到明。明憂到晚。若是那秦公子將卿傲慢。你則索

將火性兒全然都放坦。是必休便冒瀆容顏。那其間借的些金鼓旗旛。將你那洗塵酒開懷兒做了送路盞。【申包胥云】主公我這一去若借得秦兵來時。料那伍子胥恐怕前後受敵。必解兵而歸矣。【正末云】只要借得秦兵呵。【唱】恁時節吳兵自還楚城無患。生則怕你別時容易見時難。【唱】

【申包胥云】二公子。您緊記者。若伍子胥領兵來時。休聽費無忌那短見。就要與他家廝殺。有誤大事。我即日往秦邦借兵去也。【詩云】千里暗征塵。之秦借救軍。【芊旋詩云】家貧顯孝子。國難識忠臣。【同下】

### 第一一折

【淨扮費無忌上。詩云】人有好的我偏害。人有歹的我倒愛。我的分毫不與人。人的我會白廝賴。小官費無忌是也。現爲楚國上大夫之職。奉主公的將令。着老夫爲帥。與吳國伍子胥拒敵。我想來他的父兄尙然被我殺了。這一箇逃走短命的弟子孩兒。有甚本事。我正要与

他耍一耍。怕他怎麼。【詩云】老夫本領甚可誇。子胥本是我讐家。不愁巨斧當頭劈。也只結的碗口一箇大瘡疤。【下】伍子胥孫武伯嚭領卒子上。【伍子胥云】某伍子胥領兵伐楚。如今已到郢城。大小三軍擺開陣勢。遠遠的塵土起處。楚家軍馬敢待來也。【正末同芊旋費無忌領卒子上】【正末云】某乃楚昭公是也。大小三軍將陣脚射住。我與二公子在將臺之上。看費無忌與伍子胥決戰去來。【唱】

【越調鬪鶴鶉】他走樊城兀自紅顏。過昭關早成皓首。只道他暮景蕭蕭。依還的雄威赳赳。他本爲楚國縈心。權借這吳兵應手。現如今太宰嚭敢突前。孫武子爲合後。只待要投鞭兒截斷長江。探囊兒平吞了俺這夏口。【紫花兒序】他他他懷着那幾年的怨恨。倚着這蓋世的才名。來尋問俺往日的根由。我只見征塵不散。殺氣如浮。颼颼四下裏寒風不住的吼。大剛來也。則是冤讎深厚。落得這撲騰騰鞞鼓驚魂。明晃晃劍戟侵眸。

【伍子胥云】兀那來將莫非是費無忌麼【費無忌云】然也來將何人【伍子胥云】某乃伍子胥是也父兄之讐今日須報你可早早下馬來請死者【費無忌云】哇量你到的那裏且與你鬪三百合耍子【做調陣子科】【正末唱】

【調笑令】你每做的來不周結下了父兄讐抵多少不是冤家不聚頭今日在殺場上面爭馳驟費無忌你索擔憂他只待摘了你心肝標了你首可兀的便肯干休

【伍子胥云】出馬來出馬來【戰科】【正末唱】

【小桃紅】只見他旗門開處躍驊騮高叫道誰敢來和咱鬪早着俺千軍萬馬都驚走急難收兀的般威風不信人間有淹的呵拋下了戈矛氳的呵遮漫了宇宙莫不是劍氣上斗牛

【費無忌云】你看這小畜生好無禮也全然不省的有個前輩後輩則你那伍奢老頭兒也

還讓着我哩【伍子胥云】我今日不拏你這老匹夫剉屍萬段誓不收軍【戰科】【正末唱】  
【金焦葉】那一個錦征袍窄窄的把獅蠻款兜這一個鳳翅盔律律的把  
紅鸚亂丟那一個點鋼鎗支支的把黃幡狠揪這一個鐵胎弓率率的把  
雕翎穩扣

【天淨紗】俺只道他兩個都一般狀貌搗搜都一般武藝滑熟管殺的慘  
迷離神嚎鬼愁可元來半合兒不彀早一個先納了輸籌

【云】呀費無忌却輸了也【唱】

【禿廝兒】俺只見馬吼處和人倒縮鎗着處鮮血漂流可不是空戴南冠  
你個活楚囚兩下裏不相投休休

【費無忌云】我敵不過他只是逃命的好走走走【伍子胥云】你這老匹夫走那裏去【追

科】【正末唱】

【聖藥王】你你你非敵手強賣口。只待要戰爭酣處討迴頭。他他他怎放走。緊逼逐。早殺的俺人亡馬倒。積成丘。恰便似落葉盡歸秋。

【伍子胥云】早將那老匹夫拏倒了也。大小三軍就此殺向前去。休教走了楚王者。【下】  
【芊旋云】哥哥。俺家兵大敗了。我保着你走了罷。【正末唱】

【收尾】眼睜睜見死可也無人救。索把這潑殘生告天保佑。則被那借吳兵的伍相逞盡十分強。【芊旋云】怎得這申包胥救兵到來。可也好也。【正末唱】遙望俺復楚國的包胥。且耐着一時守。【同下】

### 第二折

【龍神領鬼力上詩云】長江浩浩顯威靈。風浪孤舟誰敢行。直待險時纔救護。方知暗裏有神明。吾乃漢江龍神是也。掌管着萬里長江。有楚昭公弟兄妻子四口兒。明日到此駕着漁船一隻過江逃難。明日正是四耗九醜之日。合起大風。眼見得都該淹死了的。吾神奉上帝

勅令。但有下水者。救護至岸。如今在此等候。這早晚他敢待來此。【丑扮稍公上。嘲歌云。】月落烏啼霜滿天。江楓漁火對愁眠。也弗只是我裏稍公。稍婆兩箇。倒有五男二女團圓。一個尿出子。六個弗得眠。七個一齊尿出子。艍板底下好撐船。一撐撐到姑蘇城下寒山寺。夜半鐘聲到客船。自家是個稍公。每日在這江邊捕魚爲生。今日風平浪靜。撐着這船慢慢的打魚去來。【正末同芊旋旦兒僚兒慌上。】【正末云。】兄弟也。走走走。【唱。】

【中呂粉蝶兒】則聽的兵起東吳。可撲撲膽驚心懼。早則不二戰殺人王。都說得我亂慌慌。忙劫劫不成活路。偏生的望眼模糊。悄不見那西秦遠來相助。

【旦兒云。】大王後面吳兵追趕的至近。你休顧俺子母每。你和小叔叔則逃您的性命咱。

【正末唱。】

【醉春風】則俺這妻子似瑟和琴。弟兄如手共足。【芊旋云。】俺怎肯撇下了嫂。



嫂姪兒也。【正末唱】俺一家四口兒盼程途。俺端的苦苦幾能勾罷息干戈。還歸宮闕。撫安黎庶。

【芊旋云】哥哥想俺申包胥與那伍子胥元是故友。兩個會打賭賽來。一個要覆楚。一個要復楚。若俺申包胥借得兵來。必然退了吳兵。重安楚國也。【正末唱】

【迎仙客】一個報冤讐。稱了子胥。一個打賭賽去了包胥。何處也濟困扶危。重復楚。慌速速的強逃生。急煎煎的甘受苦。【內發喊科】【正末唱】腦背後鬧炒炒的起軍卒。【芊旋云】哥哥兀的不是追兵漸近了也。前面又阻着大江。江水泛漲。無船可渡。怎生是好。【正末唱】眼前面翻滾滾野水無人渡。

【芊旋云】哥哥兀的江岸邊有一隻漁船。我是喚他一聲。唱兀那稍公你快將船撐過來。我有的賞你。【稍公云】來也。來也。【芊旋云】兀那稍公將你這船渡俺四口兒過江去。到了岸上。我還你的船錢可也不少。【稍公云】客官則是船小渡不的。【正末唱】

【紅繡鞋】不得已。及你個漁父。【稍公云】肯載不肯載。也則由的我。【正末唱】似這般粧着勢待要何如。我與你也是近。隣庄共鄉閭。【稍公云】怕不是鄉閭。大家要看個風水。實是船小載不起這幾個人。【正末唱】你道是船兒小。難裝載。則要你量兒大。救俺家屬。早早的過長江。無間阻。

【芊旋云】兀那稍公。你認不得俺哥哥。就是楚昭公。被吳兵追趕至近。你若肯渡將俺過去。久後平定了楚國。那其間將你官封三品。賞賜千金。不强似你在此捕魚爲活。你是尋思咱。【稍公云】你可不早說。既是楚昭公。我須是管下的百姓。便是船小。也只得載將過去。上船上船。【芊旋云】哥哥請上船去。【衆上船科】。【稍公云】仔細船兒小。可都坐定了。你看偌遠的江面。幾時擺得到那岸邊。纔放心也。【正末唱】

【石榴花】俺只見雲濤雪浪接天隅。這的是海闊洞庭湖。【稍公云】我說不載不載。您强要上這船來。還不開的半里。早風起了。你看潑天也似的大浪。可不苦也。【正末唱】

你看這大驚小怪潑村夫。那裏便叫苦。說的俺魄散魂無。【稍公云】風浪越

大了。船兒又小。滄上水來了也。不着親的快請一個下水去。纔救的一船人性命。【衆做悲科】

【正末唱】他道是不關親者當身故。俺四口兒那一個爲疎。則被這一家

老小同奔赴。【帶云】稍公你小心在意者。【唱】到今日只仗的你做護身符。

【芊旋云】哥哥這風浪越大了。船隻較小。不堪重載。似此怎了也。【正末唱】

【鬪鷓鴣】兄弟是同氣連枝。妻子是多情伴侶。【芊旋云】哥哥則保你的前程。休

顧戀你兄弟罷。【正末唱】眼睜睜弟覷着兄。【旦傑做悲科】【正末唱】悲切切子隨

着母。好教我穰穰勞勞意不舒。【稍公云】不着一個下水呵。再一會兒連船都沒了也。

【正末唱】他道是霎時間都命卒。【芊旋云】哥哥好覷當嫂嫂姪兒。您兄弟拜別了哥

哥下水去也。【正末云】兄弟不爭你下水呵。【唱】着誰人買馬招軍。重與俺揚威耀

武。

【稍公云】風狂浪猛。看看的滄上水來了。快着一個下水去。【正末唱】

【普天樂】俺只見掩掩潑潑畫船兒歪。囊囊突突稍公絮。【稍公云】這風把

船掀過來。滄上水了。還不着個下水去。敢多要死哩。【正末唱】便直恁般險惡待不的

須臾。【旦兒悲科云】兒也則被你痛殺我也。【正末唱】兒悲啼爲母離。娘痛哭拋兒

去。哎你個掌命司的。稍公可便休催促。百忙裏割不斷他子母每腸肚。但

保全了孩兒的身軀。怎顧得夫人的性命。【芊旋云】哥哥。您兄弟下水去也。【正末

云】兄弟你住者。【唱】緊揪住俺這兄弟的衣服。

【芊旋云】哥哥。稍公道疎者下船。您兄弟想來嫂嫂姪兒與哥哥正是着親的。惟您兄弟是

個疎慢些的。理當下水。【正末扯芊旋科云】兄弟。咱兩個須親。還有不親的哩。【旦兒云】孩

兒。眼見的我顧不的你也大王。這兄弟同胞共乳。一體而分。妾身乃是別姓不親。理當下水。

【正末云】夫人。你說的是。【唱】

【上小樓】我着你名標萬古。那裏也相隨百步。你待要留了嬰孩。替了親叔。救了兒夫。你道不共族。稍似疎。何妨的從新革故。【旦兒云】大王。我囑付你。咱好生看顧我這孩兒。我下水去也。【詩云】半生空記百年恩。苦爲波濤沒漢津。眼看兒夫難共守。生拋幼子若無親。手足自今同一處。姻緣到底屬何人。幽魂定不隨風去。飛上青山更化身。【下】【龍神云】鬼力將夫人救上岸者。【鬼力云】理會的。【芊旋哭科云】可惜了嫂嫂也。【正末唱】久以後史書中又新添個節婦。

【稍公云】船便輕了些。爭奈風浪越越的大了。再請一個下水去。還有救哩。【芊旋云】哥哥。風浪越大可怎了也。稍公道再請一個下水。還有可救。您兄弟則索辭別了哥哥下水去也。【正末云】兄弟。咱兩個須親還有不親的來。【傑兒云】爹爹眼見的不親的。是您孩兒也。【正末唱】

【幺篇】兒也略兩個是親骨肉。【芊旋云】哥哥留着姪兒。休絕了俺楚家後代。你則放

了手。您兄弟情願下水去。〔正末唱〕兄弟也。我和你是一父母。〔徠兒云〕爹爹。你則好看戲叔叔。您孩兒辭別了下水去也。〔正末云〕兒也。你那叔父呵。〔唱〕他和我着疼。我和他着熱。你比他還疎。〔徠兒下水科。云〕爹爹。我下水去也。〔詩云〕母親一命喪波瀾。兒便投江也不難。地下相逢說前事。知他何日更探環。〔龍神云〕鬼力與我將這小公子救了者。〔鬼力云〕理會的。〔正末唱〕兒也。但願你去水府。往地獄。好尋娘去。〔芊旋云〕哥哥。你着姪兒下船。可怎忍也。〔正末唱〕又何妨死的來不着墳墓。

〔芊旋云〕可惜嫂嫂姪兒剛下水去。這風浪就寧息了。雖然安穩無事。使我不勝傷感。〔正末唱〕

〔滿庭芳〕哀哉子母。如今希有。從古應無。又不是進膠舟。那日昭王渡。怎生的也共爲魚兒也。你捨性命投江。伴母妻也。你可便守貞烈。出嫁從夫。似這等難相顧。總只是皇天喪楚。教你去龍領下探明珠。

【稍公云】渡過江了。攬下腳踏板。請登岸。【做上岸科】【芊旋云】解這金魚下來賞了稍公。後面有人追來時。若非本國之人。你是必休渡他過江也。【稍公云】理會的。等您回來時。我另打一隻大海船在此等候。【下】【正末云】謝天地上的岸來。兄弟也。這兩條路。您自那往一條路去。【芊旋云】哥哥現今嫂嫂姪兒都無了也。則有的您兄弟一人相隨。可怎生又教我那一條路去。不知哥哥主着何意。【正末云】兄弟。你那裏知道。【唱】

【耍孩兒】本待要相隨相從相將去。也則爲我膽兒自虛。我只見前山掩映蒼蒼樹。那其間必有埋伏。小路行怕撞着孫都統。大路走須防他伍子胥。兄和弟誰防護。可不是免魚鱉纔離江上。逢豺虎又斷送山谷。

【芊旋云】既然這等。您兄弟則往這小路上。抄出大路相會。且辭別了哥哥去也。哥哥受您兄弟一拜。只願哥哥穩登前路。無驚無恐。【正末唱】

【二煞】兄弟也。嗒相逢時。有限期。別離了無限苦。【正末走科】【芊旋追上云】

哥哥您兄弟再送哥哥幾步【正末唱】兩下裏欲去也頻回覷好教我痛煞煞提  
着膽向刀尖過倒不如悄悄促促低着頭在劍下誅兄弟也哭一聲行一步  
俺兄弟情氣吁成雲霧他子母恨淚滴滿江湖

【芊旋云】哥哥但若打聽的救兵來時便當重還楚國再整江山休便挫折了志氣者【正  
末唱】

【煞尾】俺如今一程程逐去途一心心懷故土大都來是一興一敗天之  
數但不知肯分的秦兵幾時到得楚【下】

【芊旋云】哥哥去了也我往這小路兒去罷【神龍引鬼力上云】那賢婦孝子都救了吾神  
不敢久停久住回上帝話去來【詩云】漢水東連揚子江幾多舟楫此中亡凡事勸人休碌  
碌舉頭三尺有龍王【下】



【外扮秦昭公領卒子上詩云】輕分一旅出函關。列國會無匹馬還。自古秦中多紫氣。爭教不想佔江山。某乃秦昭公是也。昔年我父穆公因與楚結親。世爲鄰好。近因吳國有一口寶劍。飛入楚國。那吳王屢次索劍。楚王只不肯還。以此惹動刀兵。幾至滅國。有楚大夫申包胥前來借兵求救。某堅意不允。不意包胥在驛亭中依牆而哭。七晝夜不絕。遂將郵亭哭倒。我想此人真烈士也。我如今要借兵與他。未曾與百里奚商議。令人與我喚將百里奚來者。【卒子云】百里大夫安在。【外扮百里奚上詩云】先事虞君後佐齊。還因陪嫁入秦西。曾向養牲家自賣。人號羊皮百里奚。老夫乃百里奚是也。有秦王呼喚。須索走一遭去。令人報復去道。有百里奚來了也。【卒子報科云】百里奚大夫到。【百里奚做見科云】主公呼喚小官。有甚事來。【秦昭公云】大夫。因爲申包胥借兵一事。特請你來商議。還是借的是。不借的是。【百里奚云】想伍子胥在於臨潼會上。對着十七國諸侯比試。文過小官。武勝姬輦。此段冤讐。未曾相報。今有申包胥來借兵。我想子胥深入敵境。兵老將驕。可不戰而破。所謂取威定

霸在此一舉。主公若不借兵與他。可不自失了。這個機會。【秦昭公云】既然如此。令人與我請將申包胥來者。【卒子云】理會的。【申包胥上詩云】千里而來借救兵。秦王何事不相應。可憐七日號幾絕。血淚斑斑在驛亭。小官申包胥到於秦國借兵爭奈秦王不允。將小官羈留驛亭。小官恐負前言。楚國有失。乃倚牆而哭。七日七夜。水漿不曾到口。如今秦王呼喚須索見來。若再不肯時節。我拚的紐住秦王將頸血蘸他衣服之上。必然肯發救兵。不負我復楚之誓。令人報復去。道有申包胥來了也。【卒子云】喏。報的大王得知有申包胥到於門首。【秦昭公云】着他過來。【卒子云】着過去。【申包胥做見科云】俺楚王懸望大國救兵。不啻饑渴。大王怎生不念親好。忍坐視乎。【秦昭公云】大夫。因你日夜號哭。忠烈動人。某今借與你十萬雄兵。命姬輦爲帥。即日救楚。你意下如何。【申包胥云】多謝了大王。俺主公必當重報。【秦昭公云】令人與我喚將姬輦來者。【卒子云】姬輦安在。【淨扮姬輦上詩云】千鈞力氣生來有。單被子胥出盡醜。直自當年舉鼎來。至今閃了右邊手。某乃姬輦是也。官封大將。

軍之職。主公呼喚。不知有甚差遣。令人報復去道。是俺姬輦來了也。〔卒子報科云〕姬輦到。〔姬輦做見科云〕主公喚姬輦那廂使用。〔申包胥云〕久聞元帥大名。如雷貫耳。今蒙大王憐愍。敝國肯發救兵。有勞元帥領兵前赴。真乃小官萬幸。〔姬輦云〕不敢不敢。〔秦昭公云〕姬輦。我今撥與你十萬雄兵。同申包胥救楚去。你可小心在意者。〔姬輦云〕主公。某想伍員在臨潼會上。拳打崩瓚。脚踢卞莊。文賽百里奚。武過末將。主公着他做了盟府。又與他一口寶劍。筵前舉鼎。欺人太甚。某今領十萬雄兵。一來救楚。二來就擒拏伍員。雪我臨潼之恥。〔秦昭公云〕只願你馬到功成。奏凱而還。某當與百里奚大夫迎勞。函關之外。你則小心着志者。〔詩云〕出函關。鳴笳疊鼓。至郢都。揚威耀武。破伍員。誓滅強吳。助包胥。重扶弱楚。〔同百里奚下〕〔申包胥云〕元帥。你早到楚國。一日解俺一日之難。不可遲延。有失本望。〔姬輦云〕即日傳令大小三軍。拔營而起。直赴楚國救援去來。〔申包胥詩云〕千里投人實是難。甘心就死不空還。〔姬輦詩云〕若非七日牆邊泣。焉得雄兵便出關。〔同下〕〔正末領卒子

上云】某楚昭公只爲一口湛盧劍不與吳國惹的伍子胥兵來伐楚好生危急今幸申包胥借得秦兵與子胥交戰誰想子胥爲有盟誓在前即便收兵罷戰而去目今楚國重安皆申包胥之力也【唱】

【雙調新水令】包胥烈氣子胥知聽的道借軍來他可便引兵先退那借兵的如從天上下那收兵的那裏也凱歌回這兩個誰是誰非真乃是忠孝各完備

【云】令人與我請將申包胥來者【卒子云】申包胥安在【申包胥上云】小官申包胥借起秦兵與子胥交戰誰想子胥不忘舊交將城池地面復還與楚即日班師還他本國去了今幸楚國無恙主公着人來請須索走一遭去令人報復去道有申包胥來了也【卒子云】申包胥到【正末云】快請過來【卒子云】請過去【申包胥做見科】【正末云】此一場大功多虧了大夫也【申包胥云】托賴主公洪福小官何功之有【正末唱】

【駢馬聽】伍員無敵人楚地鞭屍尙恨遲。包胥有智借秦兵復國偏能疾。  
【申包胥云】子胥若不想舊交之情憑着他武藝量小官到的那裏。【正末唱】雖然他會臨  
潼八面虎狼威。怎如你倚蕭牆七日的英雄淚。【做悲科】【申包胥云】主公爲何  
發起悲來。【正末唱】我今日安居寶殿裏。猛想起渡江時不覺心如碎。

【申包胥云】主公吳兵已退。楚國重安。此乃如天之喜。且省煩惱。【芊旋上云】某芊旋自從  
江邊與哥哥別後。一向避於隨地。可早半年光景也。聽的申包胥借起秦兵重扶楚國。我如  
今回去見我哥哥。令人報復去道有芊旋在於門首。【卒子云】喏報的大王得知有二公  
子來了也。【正末云】快有請。【卒子云】請進去。【芊旋做見悲科】【正末云】兄弟也。你在那  
裏來。【芊旋云】您兄弟自與哥哥相別之後。流落隨國。聽知哥哥復楚。一徑的尋將來也。【  
正末唱】

【沉醉東風】自間別伯夷叔齊。我常只是坐想行悲。【芊旋云】許久不見哥哥

請受您兄弟幾拜。〔正末唱〕

既然爲兄弟情講甚賓朋禮。想當年在小船中寸

步難移。

〔芊旋打悲科云〕您兄弟豈望今日與哥哥相見也。〔正末云〕令人安排酒果來與

兄弟拂塵者。〔唱〕今日相逢有限期。我又恐怕是南柯夢裏。

〔云〕兄弟你滿飲一杯。〔芊旋云〕你兄弟吃不下這酒去。〔正末云〕兄弟你爲甚麼吃酒不

下。〔芊旋云〕您兄弟心下則想着嫂嫂和姪兒哩。〔正末云〕兄弟你嫂嫂有。〔芊旋云〕既然

有嫂嫂何不請將出來相見。〔正末云〕令人請將夫人來者。〔卒子云〕夫人有請。〔二旦

上云〕妾身乃楚昭公繼室夫人。大王呼喚須索見去來。〔做出見科〕〔正末云〕兄弟兀的

不是您嫂嫂。〔芊旋做認科云〕哥哥。這個那裏是我那嫂嫂也。〔正末云〕兄弟也可知不是

你那嫂嫂哩。〔唱〕

〔落梅風〕他身喪在波濤內。名標在書傳裏。死便死猶存生氣。我今日正

椒房怕沒有結髮的妻。〔云〕兄弟也。當初我棄了嫂嫂姪兒。留得你在哥哥今日還有嫂

嫂少不得的生下姪兒。若無了你呵。〔唱〕那裏去再尋個同胞兄弟。

〔旦兒領俵兒上云〕妾身自同孩兒下水之後。謝天地可憐。將俺母子救于岸上。投到一箇人家。喚做申屠氏。見說是楚昭公的夫人。將我十分供養。不覺過了半年光景。聽知俺大王已復楚國。我如今引着孩兒認他去。這便是宮門外了。令人報復去道。有大王的親眷在於門首。〔卒子云〕喏。報的大王得知。有兩個親眷在門首求見哩。〔正末云〕我有什麼親眷在那裏。兄弟待我自看去。〔唱〕

〔甜水令〕幸的個宜弟宜兄。無災無難。同歡同會。我這裏那步出宮闈。遠聽聲音。近觀相貌。端詳仔細。〔旦兒云〕大王萬福。〔正末做驚科〕〔唱〕呀。原來是俺詠雉鳩窈窕元妃。

〔云〕您母子每在何處來。〔旦兒云〕妾身自與大王離別之後。投於漢江。料無生理。不想水中金光閃爍。冷氣逼人。一位神聖將妾身救于岸上。都是漫漫的蘆葦。正在徬徨之際。則見

孩兒也從江中爬上岸來問其緣故。原來爲着風浪越猛。相繼下水。也見一位神聖救了性命。俺母子投到一個申屠氏家住了半年。大王今日復立家邦。那知俺母子每在漢江中受盡苦楚。說兀的做甚。〔詩云〕當年母子沒風湍。爲保君王玉體安。雖然幸得神明護。只恐後人奪却故人歡。〔正末唱〕

〔折桂令〕我則道你趁橫波一去無消息。可正是堂上糟糠。休猜做牆上泥皮。想當日船小江深。風高浪湧。雲鎖天低。若不是賢達婦三從。四德。若不是仁孝子百順千隨。我則道夫婦分離。父子乖違。怎能彀再得團圓。還見這笑眼歡眉。

〔芊旋云〕哥哥當日在漢江之上。情願捨了嫂嫂姪兒。留您兄弟。豈知嫂嫂姪兒安然無事。可見天道無親。常與善人。信不誣也。〔秦百里奚上云〕某乃秦國百里奚是也。奉主公的命。要將金枝公主與楚昭王小公子爲婚。遣某親送吉帖來此。令人報復去道。有秦國使命在。



於門首【卒子報科云】喏報的大王得知有秦國使命求見【正末云】快請進來【卒子云】請進【百里奚做見科】【正末云】前者多得秦王借兵救援使寡人復還楚國感恩非淺只因喪敗之後百事未理有失報謝今日重勞大夫遠涉敵地益增惶恐【百里奚云】救災恤鄰乃是常禮何足爲謝小官今此一來不爲別事乃奉主人之命有金枝公主願與大王小公子結婚遣小官親齎吉帖送上倘勿棄嫌實爲萬幸【正末云】寡人有何德能敢勞秦王如此錯愛也【唱】

【沽美酒】謝大王憐下國借猛將解重圍也只爲喪敗初還百無備尚未及酬恩報德非是俺急時佞緩時棄

【太平令】自鬪寶臨潼赴會賜無祥公主來歸曾對天割襟爲記願世世無相違背這信誓在彼怎悔難得見今朝這日

【百里奚云】小官聞知大王避難漢江因風浪陡作將夫人小公子都送下水可怎生又得

完聚。敝國僻遠不知其詳。請大王試說一遍。容小官洗耳拱聽。【正末唱】

【錦上花】當日個避難臨江。扁舟同濟。陡遇風波。稍子驚啼。【云】他道是船小不能重載。內中有疎者請一位下水。方纔有救。【唱】他道所未傾危。剛爭半米。疎者非親。請其下水。

【幺篇】夫人先拜辭稚子。繼沉溺。也只爲兄弟情深。難忍拋離。誰想龍神暗中呵衛。死者重生。生者不愧。

【百里奚云】有這等事。可也難得。【正末唱】

【清江引】可又得金枝公主成配匹。豈不是天緣美。永爲唇齒邦。萬古干戈息。將着甚的般花紅酬謝你個秦百里。

【芊旋云】今日俺一家團圓。又得與秦國結親。永爲唇齒。真乃天大的喜事。就此殿庭之上。擺設起滿堂花。遍地錦。椎番牛。宰下酒。做個慶喜筵席。款待百里奚大夫。到明日仍遣申包

胥入秦報謝者【正末唱】

【收尾】殿庭中擺設下千金席。列兩行鸞歌鳳吹。不爭爲青鋒劍攬惹了。那場災。還落的赤繩書接受了這重喜。

題目 伍子胥一戰入郢

正名 楚昭公疎者下船

楚昭公疎者下船

三六

楚昭公疎者下船雜劇終



# 布袋和尚忍字記

楔子

【沖末扮阿難上。詩云】明心不把幽花撚。見性何須貝葉傳。日出冰消原是水。回光月落不離天。貧僧乃阿難尊者。是也。我佛在於靈山會上。聚衆羅漢。講經說法。有上方貪狼星。乃是第十三尊羅漢。不聽我佛講經說法。起一念思凡之心。本要罰往酆都受罪。我佛發大慈悲。罰往下方汴梁劉氏門中投胎。託化爲人。乃劉均佐是也。恐防此人迷却正道。今差彌勒尊佛化做布袋和尚。點化此人。再差伏虎禪師。化爲劉九兒。先引此人回心。後去嶽林寺修行。可着定慧長老傳說。與他大乘佛法。若此人棄却酒色財氣。人我是非。功成行滿。貧僧自有個主意。則爲他一念差。罰去塵埃。貪富貴。不捨資財。發慈悲。如來點化。功行滿。同赴蓮臺。【下】【正末扮劉均佐領旦兒。俵兒雜當上。正末云】自家汴梁人氏。姓劉名圭。字均佐。嫡親

的四口兒家屬。妻乃王氏某今年四十歲。所生一兒一女。小廝兒喚做佛留。女孩兒喚做僧奴。我是汴梁城中第一個財主。雖然有幾文錢。我平日之間。一文也不使。半文也不用。若使一貫錢呵。便是挑我身上肉一般。則爲我這般慳吝。苦尅上。所以積下這家私。如今時遇冬。天紛紛揚揚。下着國家祥瑞。有那般財主。每紅爐暖閣。賞雪飲酒。恁般受用快樂。我劉均佐。怎肯這般受用。却是爲何。則怕破敗了這家私也。【旦兒云】員外。常言道。風雪是酒家天。雖然是這等。堪可飲幾杯也。【正末云】大嫂。我待不依你來。可又不好。待依你來。呵又要費用。罷罷。罷。將就的飲幾杯。【旦兒云】員外。飲幾杯可不好那。【正末云】小的們打些酒來。我與妳妳喫一杯。你來。我和你說。你休打多了。則打兩鍾兒來。勾了。【雜當云】理會的。【遞酒介】【旦兒云】員外。你先飲一杯。【正末飲酒科云】再將酒來。大嫂。你也飲一杯。【旦兒飲酒科云】再將酒來。【雜當云】無了酒也。【旦兒云】則斟了兩鍾兒。便無了酒。再打酒來。【正末云】酒勾了也。老的每說來。酒要少飲。事要多知。俺且在這解典庫裏閒坐。看有甚麼

人來。〔外扮劉均佑上。詩云〕腹中曉盡世間事。命裏不如天下人。小生洛陽人氏。乃劉均佑也。讀幾句書。因遊學到此。囊篋消乏。時遇冬月天道。下着大雪。我身上無衣。肚裏無食。兀的不是一箇大戶人家。我問他尋些茶飯喫。早來到這門首。無計所奈。唱箇蓮花落。咱一年家春盡一年家。春兀的不天轉地轉。我倒也。〔做倒科〕〔正末云〕大嫂。俺雖然在這裏飲酒。俺門首凍倒一箇人。孩兒每那裏與我扶將那君子進來。討些火炭來。盪些熱酒與他喫。劉均佐也要尋思波。大嫂。我平日不是箇慈悲人。每常家休道是凍倒一箇。便凍倒十箇。我也不管他。這箇人好關我心也。我試問他咱。兀那君子。你這一會兒比頭裏可是如何。〔劉均佑云〕這一會覺過來了些兒也。〔正末云〕君子。你那裏人氏。姓甚名誰。因甚麼凍倒在俺門首。你試說一遍咱。〔劉均佑云〕長者。小生洛陽人氏。姓劉名均佑。也讀幾句書。因遊學到此。囊篋消乏。身上無衣。肚中饑餒。見長者在此飲酒。無計所奈。唱箇蓮花落。不想凍倒在員外門首。若不是員外教了。小生那得有這性命來。〔正末背云〕劉均佑。你尋思波。我問他那

裏人氏他道是洛陽人氏。姓劉名均佑。可不道一般樹上無有兩般花。五百年前是一家。既是關着我這心呵。兀那劉均佑。我有心待認義你做個兄弟。不知你意下如何。【劉均佑云】員外休鬪小生耍。【正末云】我不鬪你耍。【劉均佑云】既是這般呵。休道是兄弟。在家中隨驢把馬。願隨鞭鐮。【正末云】兄弟。我便是你親哥哥。一般這箇便是你親嫂嫂哩。你拜你拜。【劉均佑拜科云】嫂嫂請坐。受恁兄弟兩拜咱。【旦兒云】小叔叔免禮。【正末云】兩個孩兒過來拜你叔叔者。【傑兒拜科】。【劉均佑云】不敢不敢。免禮。【旦兒云】員外。你與小叔叔共話。我回後堂執料茶飯去也。【下】。【正末云】兄弟。我今日認義了你。我有件事與你說。【劉均佑云】哥哥有甚事。對恁兄弟說咱。【正末云】你恰纔在雪堆兒裏凍倒了。你若不是我呵。那裏得你那性命來。我又認義你做兄弟。你心裏便道這個員外。必是箇仗義疎財的人。你若是這等呵。你差了也。你哥哥爲這家私。早起晚眠。喫辛受苦。積成這箇家私。非同容易。聽你哥哥說一遍咱。【劉均佑云】哥哥說一遍與你兄弟聽咱。【正末唱】



【仙呂賞花時】如今人則敬衣衫不敬人。不由我只共錢親人不親。恰纔那風凜凜這雪紛紛。你在長街上便凍損。【云】兄弟我是個財主認義你這等窮漢做兄弟。你自尋思波。【唱】我可也忒富貴你可忒身貧。

【劉均佑云】您兄弟身上襤褸則怕人笑話哥哥麼。【正末唱】

【幺篇】你貧呵生受淒涼活受窘。我富呵廣有金珠勝有銀。【云】兄弟家私裏外勤苦要你早晚用心。【劉均佑云】您兄弟理會的。【正末唱】你在這解典庫且安身。【云】兄弟也不爭我今日認義你做兄弟我是好心若俺那一般的財主每便道你看那劉均佐平日之間一文不使半文不用這等慳吝苦尅平白的認了個閒人。【唱】一任教傍人將我來笑哂。罷罷罷我權破了戒今日箇養閒人。【同下】

### 第一折

【劉均佑領雜當上云】小生劉均佑自從哥哥認義我做兄弟可早半年光景也原來我這

哥哥平日是個慳吝苦尅的人。他一文不使半文。不用放錢舉債。都是我。今日是哥哥生日。他平昔間不肯受用我。如今臥翻羊。安排酒果。只說道是親戚朋友街坊鄰舍送來的。他纔肯食用。他若知道是我安排的。就心疼殺他。小的每酒果都安排了。也不曾【雜當云】都停當了。【劉均佑云】既然都停當了。請哥哥嫂嫂出來。哥哥嫂嫂有請。【正末同旦兒傑兒上云】自家劉均佑自從認義了兄弟。可早半年光景也。我這兄弟十分的幹家做活。早起晚眠。放錢舉債。如此般殷勤。我心中甚是歡喜。大嫂今日是我生辰之日。大嫂你知道的。我每年家不做生日。你休對兄弟說。他知道呵。必然安排酒食。可不破費了我這家私。【旦兒云】今日你兄弟請。不知有甚事。你見兄弟去來。【正末見科云】兄弟請俺兩口兒有甚事。【劉均佑云】哥哥請坐。今日是哥哥生辰之日。您兄弟安排下些酒食。拜哥哥兩拜。盡您兄弟的心。【正末云】嗨。大嫂如何。我說兄弟知道了。安排酒食。可不費了我這家私。兀的不痛殺我也。【劉均佑云】哥哥。你不知道。這東西都是親戚朋友街坊鄰舍送來的。不是嚙將錢

買的我恰纔管待他每都回去了。如今擺將來，都是見成桌面，請哥哥嫂嫂喫幾杯。〔正末云〕哦，原來如此，你可早說波。既然是這等呵，嚙飲幾杯。〔旦兒云〕員外，你直是這等慳吝。喫用的多少也。〔劉均佑云〕將酒來，我與哥哥遞一杯，則願的哥哥福壽綿綿，松柏齊肩者。〔正末云〕有勞兄弟。〔唱〕

〔仙呂點絳脣〕感謝知交，五更絕早都來到，他道我福壽年高，着我似松柏齊肩老。

〔混江龍〕觥籌交錯，我則見東風簾幙舞飄飄，則聽的喧天鼓樂，更和那聒耳笙簫。〔劉均佑云〕哥哥滿飲一杯。〔正末云〕兄弟好酒也。〔唱〕俺只見玉盞光浮，春酒熟，金爐烟裊，壽香燒。〔云〕說與那放生的。〔唱〕着他靜悄悄，休要鬧炒炒。〔劉均佑云〕小的每說與那放生的，着他遠着些，不要在此喧鬧。〔正末云〕兄弟，您哥哥爲甚積攢成這個家私來。〔唱〕則爲我平日間省錢儉用，到如今纔得這富貴奢。

豪。

【外扮布袋和尚領嬰兒姪女上云】佛佛佛。南無阿彌陀佛。【做笑科。偈云】行也布袋。坐也布袋。放下布袋。到大自然。在世俗的人。跟貧僧出家去來。我着你人人成佛。個個作祖。貧僧是這鳳翔府嶽林寺住持長老。行脚至此。此處有一個劉均佐。是個巨富的財主。爭奈此人貪饕賂。慳吝苦尅。一文不使。半文不用。貧僧特來點化此人。這是他家門首。兀那劉均佐看財奴。【做笑科。劉均佑云】哥哥。門首是甚麼人大驚小怪的。我試看咱。【見布袋科云】好個胖和尚也。【布袋笑科云】凍不死的。叫化頭。你那看財奴有麼。【劉均佑背云】我凍倒在哥哥門首。他怎生便知道。【布袋云】你那看財奴在家麼。【劉均佑云】我對俺哥哥說去。【見正末笑云】哥哥。笑殺我也。【正末云】兄弟。你爲何這般笑。【劉均佑云】哥哥。你說我笑你出門去見了。你也笑。【正末云】我試看去。【見科】。【布袋云】劉均佐看財奴。【正末笑科云】哎呀。好個胖和尚笑殺我也。【布袋云】你笑誰哩。【正末云】我笑你哩。【布袋念偈云】

劉均佐你笑我無我笑你有無常到來大家空手〔正末云〕兄弟笑殺我也這和尚吃甚麼來這般胖那〔唱〕

〔油葫蘆〕猛可裏擡頭把他觀覷了將我來險笑倒〔布袋云〕嬰兒姪女休離了左右也〔正末唱〕引着些小男小女將他廝搬調〔云〕他這般胖呵我猜着他也〔唱〕莫不是香積廚做的齋食好〔布袋云〕你齋我一齋〔正末唱〕更和那善人家齋得禪僧飽他腰圍有篋來麤肚皮有二尺高便有那駱駝白象青獅豹〔布袋云〕要那駱駝白象青獅豹做甚麼〔正末唱〕敢可也被你壓折腰

〔布袋云〕他嚙嗑貧僧哩〔正末唱〕

〔天下樂〕這和尚肉重千斤不算膘〔云〕他喫甚麼來〔唱〕我這裏量度將他比並着〔布袋云〕將我比並着甚麼〔正末唱〕恰便似快活三恰將頭剃了〔云〕兀那和尚你這般胖似兩個古人〔布袋云〕我似那兩個古人〔正末唱〕你肥如那安祿山

甫胖如那漢董卓。〔云〕你這般胖。立在我這解典庫門首知的囉。是箇胖和尚。不知的囉。〔唱〕則道是箇夯神兒來進寶。

〔布袋云〕劉均佐。你愚眉肉眼不識好人。則我是釋迦牟尼佛。〔正末云〕誰是釋迦牟尼佛。〔布袋云〕我是釋迦牟尼佛。〔正末云〕你是釋迦牟尼佛。比佛少多哩。〔唱〕

〔那吒令〕你偌來胖。箇肉身軀呵。你怎喂的飽。那餓鳥。你偌來麤的腿脰。呵。你怎穿的過。那蘆草。你偌來大箇光腦呵。你怎壘的住。那雀巢。〔布袋云〕貧僧憂你這塵世的人。不聽俺如來教。〔正末唱〕你道爲俺這塵世的人。不聽你這如來教。都空喫飯。不長脂臙。

〔布袋云〕劉均佐。貧僧非是凡僧。我是箇禪和尚。兩頭見日。行三百里田地哩。〔正末唱〕

〔鵲踏枝〕你不敢向佛殿。遶周遭。你不敢禮三拜朝。〔云〕你這等肥胖呵。〔唱〕你穩情取滾出山門。踏上青霄。〔布袋云〕劉均佐。你齋貧僧一齋。〔正末唱〕這裏面

要飽呵得多少是了。〔云〕和尚你這般胖呵。有一樁好處。〔布袋云〕有那一樁好處。〔正末唱〕你端的便不疲乏。世不害心嘈。

〔布袋云〕劉均佐貧僧神通廣大。法力高強。則我便是活佛也呵。〔正末唱〕

〔寄生草〕呀。你道是神通大。可惜你這肚量小。〔云〕兀那和尚你聽者。〔唱〕不想這病維摩人定參禪。早誰想你是箇瘦阿難。結果收因好。不想你箇沈東陽。削髮爲僧了。〔云〕兀那和尚我憂你一半兒。愁你一半兒。〔布袋云〕你憂我甚麼。愁我甚麼。〔正末唱〕我愁呵。愁你去南海。南挾不動柳枝瓶。我憂呵。憂你去西天。西坐損了那蓮花萼。

〔布袋云〕劉均佐。你若齋我。一齋呵。我傳與你大乘佛法。〔正末云〕如何是大乘佛法。〔布袋云〕將紙墨筆硯來。我傳與你大乘佛法。〔正末云〕我無紙。〔劉均佑云〕哥哥有紙。我取一張來。〔正末云〕兄弟也。一張紙又要一箇錢買。則喫你破壞我這家私。〔布袋云〕既無紙。

呵將筆硯來。就手裏傳與你大乘佛法。【劉均佑磨墨科】。【正末唱】

【醉中天】我見他墨磨損烏龍角。【布袋做蘸筆科】。【正末唱】他那裏筆蘸着

一管紫霜毫。【布袋云】將你手來。我傳與你大乘佛法。【正末云】我與你手。【布袋做寫科

云】劉均佑。則這個便是大乘佛法。【正末做看科云】我倒好笑。【唱】我只見刃字分明

把一箇心字挑。【布袋云】這忍字是你隨身寶。【正末唱】他道這忍字是我隨身

寶。【云】寫下這個忍字。又要我費哩。【布袋云】可費你些甚麼。【正末唱】又費我半盆水

一錠皂角。巧言不如直道。我謝你箇達磨。俵把衣鉢親交。

【布袋云】劉均佑。你齋貧僧一齋。【劉均佑云】哥哥放着許多的家私。嗜齋他一齋。怕做甚

麼。【正末云】兄弟。你看他那肚皮。兩石米的飯也喫他不飽。【劉均佑云】我這裏無有素齋。

【布袋云】貧僧不問葷素。便酒肉貧僧也喫。【正末云】那箇出家人喫酒肉來。【劉均佑云】

有酒肉拿來與他喫。【正末云】兄弟將一盞酒來與他喫。【劉均佑斟酒科正末云】兄弟淺



着些忒滿了也。【布袋云】將來我喫。【奠酒科】南無阿彌陀佛。【正末云】嗨。可惜了。百米不成一滴。可怎生澆奠了也。【布袋云】劉均佐再化一鍾兒喫。【正末云】無了酒也。【劉均佑云】哥哥再與他一鍾喫。【正末云】則喫你這等。【劉均佑斟酒科】正末云。兀的喫喫喫。【布袋云】貧僧不喫與我那徒弟喫。【正末回頭科】在那裏。【布袋云】兀的不是。【下】。【正末云】呀。可那裏有人。和尚那壁無人。可怎生連他也不見了。【劉均佑云】哥哥。那和尚那裏去了。【正末云】好是奇怪也呵。【唱】

【河西後庭花】他賺的咱回轉頭。又不曾那動脚。我恰纔斟玉罍相邀命。呀呀呀。他可早化金光不見了。【云】好奇怪也。【唱】我這裏自猜着。多管是南方在道。他故將人來廝警覺。

【云】兄弟。我正耍喫酒。走將箇胖和尚來攪了俺一席好酒也。【劉均佑云】哥哥。風僧狂道信他做甚麼。咱家裏飲酒去來。【正末云】那胖和尚去了也。要這忍字做甚麼。將些水來洗

去了。【劉均佑云】小的每將水來與哥哥洗手。【正末洗科云】可怎生洗不下來。將肥皂來。【劉均佑云】有。【正末擦洗科云】可怎生越洗越真了。將手巾來呀。兄弟也可怎生揩了一手巾忍字也。【劉均佑云】真個蹺蹊。【正末云】好是奇怪也。【唱】

【金盞兒】這墨又不曾把鰓膠來調。這字又不曾使繡鍼來挑。可怎生洗不下。擦不起。揩不掉。這和尚故將人來撒皂。直寫的來恁般牢。我若是前街上猛撞見。若是後巷裏廝逢着。我着兩條漢拿到官。直着一頓棒拷折他腰。

【劉均佑云】哥哥信他做甚麼。【正末云】兄弟是好奇怪也。嗒且到解典庫中間坐一坐。咱。【淨扮劉九兒上云】衆朋友每。你則在這裏。我問劉均佑那弟子孩兒討一貫錢便來也。劉均佑看財奴。少老子一貫錢。怎生不還我。【劉均佑云】是甚麼人。這般大驚小怪的。我去看咱。【見科劉九兒云】劉均佑叫化頭。你家看財奴。少老子一貫錢。怎生不還我。【劉均佑云】

這個窮弟子孩兒。要錢則要錢。題名道姓怎的。哥哥聽了。又生氣也。我對俺哥哥說去。【見正末云】哥哥門首有那叫化頭劉九兒。說哥哥少他一貫錢。【正末云】兄弟你過來。我看去。【見劉九科云】劉九兒。爲甚麼在我這門首大驚小怪的。【劉九云】劉均佐看財奴。還老子一貫錢來。【正末云】你看我那造物波。恰纔那胖和尚攪了我一場。又走將一個窮弟子孩兒來。兀那劉九兒。你和人說。我是個萬貫財主。倒少你這窮弟子孩兒一貫錢。【劉九云】你有錢。你學老子這等快活受用。你敢出你那解典庫來麼。【正末云】你敢進我家裏來麼。【劉九云】我便來。你敢把我怎的。【正末打科云】我不敢打你那。【劉九做倒科】【正末云】這個窮弟子孩兒。我倒少你的錢。你倒在地下賴我兀的不氣殺我也。【劉均佑云】哥哥。休和他一般見識。你請坐兀那廝。你起來。你要錢怎生毀罵人。【做驚科云】哥哥。你打的他口裏無了氣也。【正末云】你看這廝。我推了他一推便死了。我不信。【劉均佑云】哥哥。你看上去。【正末云】過來。我看上去。這廝輕事重報。【叫科云】劉九兒。討錢便討錢。你又罵我。則

少一貫錢。你好好的討起來起來。〔摸劉九口科云〕兄弟真箇死了也。〔唱〕

〔河西後庭花〕我恰纔胸膛上撲地着。他去那輒街上不的倒。不爭你這窮性命登時死。哎。將我這富魂靈險說掉了。只見他齣嘍嘍的冷涎潮。他可早血流出七竅。冷冰冰的僵了手脚。

〔云〕兄弟也爲一貫錢打死了這個人。我索償他性命兄弟。可憐見救您哥哥咱。〔劉均佑云〕哥哥放心。人命事您兄弟替哥哥當。哥哥這死的人心上還熱哩。不得死。等我看去。〔看科云〕哥哥他胸前印下箇忍字也。〔正末云〕兄弟真箇你過來我看去。〔看科云〕兄弟真箇印下箇忍字也。〔唱〕

〔憶王孫〕這字他可便背書在手掌。恁般牢。〔云〕兄弟你看我手裏的和他胸前的一般哩。〔唱〕可怎生番印在他胸脯。可怎生便無一畫兒錯。兩箇字肯分的都一般大小。〔帶云〕到的官司三推六問呵。〔唱〕我索把罪名招。〔劉均佑云〕哥哥

放心我替你承當去【正末云】兄弟你替不的我也【唱】你看亦緊的我手裏將咱自  
證倒。

【云】兄弟也我將這家業田產嬌妻幼子都分付與你你好生看管我索逃命去也【布袋  
衝上云】劉均佐你打殺人走到那裏去【正末云】師父救您徒弟咱【唱】

【金盞兒】我從今後看錢眼辨箇清濁愛錢心識箇低高我從今後棄了  
家財禮拜你個真二寶【布袋云】我着你忍着你怎生打殺人也呵【正末唱】自從這  
個忍字在手內寫今日個業果眼前招【布袋云】你肯跟我出家去麼【正末唱】  
您徒弟再不將狠心去錢上用凡火向我腹中燒學師父清風袖裏藏做  
師父明月在杖頭挑。

【布袋云】劉均佐我着你忍着你怎生不忍打殺人劉均佐【喝云】你得忍且忍得耐且耐  
不忍不耐小事成大我救活了他他跟我出家去麼【正末云】師父若救活這箇人我便跟

師父出家去。【布袋云】要道定者。休要番悔。【布袋叫劉九科】疾。劉九兒。【劉九起見衆科云】一覺好睡也。【布袋念佛云】南無阿彌陀佛。【劉九云】劉均佐。還老子一貫錢來。【正末云】兄弟快與他一貫錢。【劉均佑與錢科劉九云】可原來還老子一貫錢。衆兄弟每。我可討了一貫錢。跟我喫酒去來。【下】【正末云】兄弟。他去了也。與了他多少錢。【劉均佑云】與了他一貫錢。【正末云】嗨。兄弟也。既是活了。與他五百文也罷。【布袋云】劉均佐。跟我出家去來。【正末云】師父可憐見。我怎生便捨的這家業田產。嬌妻幼子。您徒弟則在後園中結一草菴。在家出家。三頓素齋。念南無阿陀彌佛。則便了也。【布袋云】劉均佐。你捨不的出家。凡百事則要你忍着。只念南無阿彌陀佛。【正末云】師父。您徒弟理會的。兄弟也。我將這家緣家計。且分付與你。則好生看我這兒女也。【劉均佑云】哥哥。只管放心。都在我身上。【正末唱】

【賺煞】則這欠債的有百十家。上解有二十號。【帶云】我爲這錢呵。【唱】使的

我晝夜身心碎了。將我這花園樓臺并畫閣。我今蓋一座看經修煉的團標。我也不怕有賊盜。提防着水火風濤。【帶云】劉均佐你自尋思波。【唱】我看着我這轉世浮財。則怕你守不到老。【做看忍字科】【唱】我將這忍字來覷了。謝吾師指教。【布袋云】只要你忍的。【正末云】師父我忍者。我忍者。【唱】哦。原來俺這貪財人。心上有這殺人刀。【下】

【布袋云】誰想劉均佐見了小境頭。如今在家出家。等此人凡心去後。貧僧再來點化。【偈云】學道如擔擔上山。不思路遠往難還。忽朝擔子兩頭脫。一個閒人天地間。【下】【劉均佑云】那師父去了也。俺哥哥在家出家。將家緣家計都交付與我。我須往這城裏外索錢走一遭去。【下】

## 第二折

【正末上云】自家劉均佐。自從領了師父法旨。在這後花園中結下一個草菴。每日三頓素

齋食則念南無阿彌陀佛。過日月好疾也呵。【唱】

【南呂一枝花】恰纔那花溪飛燕鶯。可又早蓮浦觀鵝鴨。不甫能菊天飛塞鴈。可又早梅嶺噪寒鴉。我想這四季韶華。撚指春回頭夏。我想這利名心都畢罷。我如今硬頓開玉鎖金枷。我可便牢拴定心猿意馬。

【梁州第七】每日家掃地焚香念佛。索強如恁買柴糴米當家。【帶云】若不

是師父呵。我劉均佐怎了也呵。【唱】

謝諸尊菩薩摩訶薩。感吾師度脫。將俺這弟子

來提拔。我如今不遭王法。不受刑罰。至如我指空說謊。瞞咱這一場了身脫命虧他。我我我謝俺那雪山中無榮無辱的禪師。是是是傳授與我那蓮臺上無岸無邊的佛法。來來來我做了個草菴中無憂無慮的僧家。一回家火發。我可便按納。心頭萬事無牽掛。數珠在手中招。我這裏靜坐無言嘆落花。獨步烟霞。



【云】南無阿彌陀佛我這裏靜坐者。【徠兒上云】自家是劉均佐的孩兒。俺父親在後園中修行俺叔叔與俺姝姝每日飲酒做伴我告知俺父親去開門來。【正末云】是甚麼人喚開門哩。【唱】

【罵玉郎】我將這稀刺刺斑竹簾兒下。俺這裏人靜悄不喧嘩。那堪獨扇門兒呀。【徠兒云】開門來。【正末唱】我這裏疑慮絕。觀覷了聽沈罷。

【徠兒云】開門來。【正末唱】

【感皇恩】呀。他道是年小渾家。這些三時不曾把他門踏。我將這異香焚。急將這衣服整。忙將這數珠拿。【徠兒云】開門來。【正末唱】莫不是誰來添淨水。莫不是誰來獻新茶。我這裏侵階砌。傍戶牖。近窗紗。

【徠兒云】開門來。【正末云】可是甚麼人。【唱】

【採茶歌】日耀的眼睛花。莫不是佛菩薩。【徠兒云】開門來。【正末開門見科唱】

呀。原來是癡頑嬌養的這小冤家。必定是他親娘將孩兒無事打我。是他親爺腸肚可憐他。

【云】孩兒也。你來這裏做甚麼來。【傑兒云】您孩兒無事不來。自從父親修行去了。俺母親和俺叔叔每日飲酒做伴。我特來告與父親知道。【正末云】哦。你娘和叔叔在房中飲酒做伴。是真個。【傑兒云】是真箇不說謊。【正末怒科云】這個凍不死的窮弟子孩兒。好無禮也。想着你在雪堆兒裏凍倒。我救活了。你性命。我又認義做兄弟。我見他家私裏外倒也。着意將這萬貫家財都與他掌管着。我恨不的手掌兒裏擎着。【見忍字科云】嗨。孩兒你且要去。【傑兒云】爹爹。你只回家去罷。【正末唱】

【牧羊關】你休着您爺心困。莫不是你眼花。【傑兒云】我不眼花。我看見來。【正末唱】他莫不是共街坊婦女每行踏。【傑兒云】無別人。則有俺妳妳和叔叔飲酒。

【正末唱】這言語是實麼。【傑兒云】是實。【正末唱】你休說謊。咱。【傑兒云】不敢說謊。

【正末怒科云】是實我真箇忍不的也。【唱】也不索一條粗鐵索。也不索兩面死囚枷。不索向清耿耿的官中告。【帶云】忍不的了也。【唱】放心波。我與你便礮可可的親自殺。【並下】

【劉均佑同日兒上云】自家劉均佑的便是。自從哥哥到後花園中修行去了。如今這家緣過活兒女都是我的。倒大來索是受用快活也。【旦兒云】叔叔正是這等說我早安排下酒食茶飯兩口兒快樂飲幾杯。可不是好。【劉均佑云】我正要飲幾杯哩。我關上這臥房門飲酒者。【飲科】【正末上云】我手中無刃器。廚房中取了這把刀在手。來到這門首也。我試聽咱。【旦兒云】叔叔這家私裏外早晚多虧你滿飲一杯。【劉均佑云】嫂嫂之恩我死生難忘也。嫂嫂請。【正末云】原來真個有這勾當。兀的不氣殺我也。【唱】

【哭皇天】見無吊窗心先怕。他若是不開門。我脚去踏。不由我怒從心上起。刀向手中拏。【做看科云】我試看咱。【旦兒云】叔叔你再飲一杯。【正末唱】他兩個

端然在那坐榻。〔云〕開門來。〔劉均佑云〕兀的不有人來了也。〔下〕布袋暗上。〔旦兒開門科云〕員外你來家了也麼。〔正末唱〕我把這房門來緊靠。把姦情事親拏。〔旦兒云〕你要拏姦情姦夫在那裏。街坊鄰舍劉均佐殺人哩。〔正末唱〕何須你唱叫。不索你便高聲。〔拏旦兒叫科〕〔正末唱〕呀。來來來。我和你箇浪包婁。〔推旦兒科〕〔唱〕浪句婁兩箇說話咱。〔見刀靶上忍字科〕〔唱〕呀。猛見這忍字畫畫兒更不差。〔烏夜啼〕我則見黑模糊的印在鋼刀靶。天那則被你纏殺我也忍字冤家。〔旦兒云〕好出家人如此行兇。劉均佐殺人哩。〔正末唱〕你可休叫叮叮。一迷裏胡撲搭。咱可便休論王法。且論家法。〔旦兒云〕劉均佐可不道你出家來。你看經念佛剗地殺人。〔正末唱〕那裏有皂直掇披上錦袈裟。那裏也金刀兒削了青絲髮。休廝纏。胡遮刺。我是你的丈夫。你須是我的渾家。

〔云〕我且不殺你。那姦夫在那裏。〔旦兒云〕你尋姦夫在那裏。〔下〕〔布袋在帳幔裏打嚏

科【正末云】這廝原來在這裏面趨着哩更待干罷【唱】

【紅芍藥】我一隻手將繫腰來採住向前掐。可便不着你趨閃藏滑。【布袋云】劉均佐你忍着。【正末見布袋科】【唱】我這裏猛擡頭覷了自驚呀。說的我這兩手便可刺答。恨不的心頭上將刀刃扎。【布袋云】劉均佐心上安刃呵是箇甚字。【正末想科云】心上安刃呵。【唱】哦他又尋着這忍字的根芽。把姦夫親向壁衣拿。眼面前海角天涯。

【云】我恰來壁衣裏拿姦夫。不想是師父好躑躅人也。【唱】

【菩薩梁州】兩模兩樣鼻凹。一點一般畫畫。磕頭連忙拜他。則被你躑躅我也救苦救難菩薩。些三兒失事眼前差。先尋思撇掉了家私罷。待將爺娘匹配的妻兒嫁。便恩斷義絕罷。雖然是忍心中自詳察。【布袋云】劉均佐休了妻棄了子。跟我出家去。【正末云】他看我休了妻子出家去。【唱】我且着些三箇謊話兒瞞

他

【布袋云】劉均佐我着你忍着。你又不肯忍。提短刀要傷害人。可不道你在家出家。則今日跟我出家去來。【正末云】師父劉均佐一心待跟師父出家去。爭奈萬貫家緣。嬌妻幼子。無人掌管。但有箇掌管的人。我便跟師父出家去。【布袋云】劉均佐。你道無人掌管家私。但有人掌管的人來。你便跟我出家去。你道定者。【劉均佑上云】自家劉均佑。恰纔索錢回來。見哥哥走一遭去。【見科】哥哥。您兄弟索錢回來了也。【正末云】兄弟。便遲些兒來也罷。【布袋云】劉均佐兀的不管家私的人來了也。便跟我出家去。【正末云】兄弟索錢如何。【劉均佑云】都討了來也。【正末云】好兄弟。不枉了幹家做活。兄弟。我試問你咱。【布袋云】劉均佐忍着念佛。【正末云】是是是。南無阿彌陀佛。【唱】

【牧羊關】這分兩兒輕和重。【劉均佑云】也有十兩五錢不等。【正末唱】金銀是真共假。【劉均佑云】俱是赤金白銀。【正末唱】他可是肯心肯意的還咱。【劉均佑云】

都肯還。若不肯還呵。連他家鍋也拿將來。〔正末云〕正是恩不放債。南無阿彌陀佛。兄弟將一箇來我看。〔劉均佑遞銀科云〕哥哥。雪白的銀子你看。〔正末接銀子印忍字驚科〕〔唱〕我這裏恰纔便湯着。却又早印下。又不曾有印板。也須要墨糊刷。〔布袋云〕這忍字須當忍者。〔正末唱〕師父道忍呵。須當忍。〔劉均佑云〕這個銀子又好。〔正末唱〕擡去波。我可是敢拿。也不敢拿。

〔布袋云〕劉均佑。管家私的人來了也。你跟我出家去。劉均佑。你聽者。〔偈云〕休戀足色金。和銀。休想夫妻百夜恩。假若是金銀堆北斗。無常到來與別人。不知棄了家活計。跟着貧僧去修行。你本是貪財好賄。劉均佑。我着你做無是無非。窗下僧。〔正末云〕罷罷罷。自從認義了兄弟。我心中甚是歡喜。我爲一貫錢。打殺一個人。平白的拿姦情也沒有。爭些兒不殺了。一個人。我如今將這家緣家計。嬌妻幼子。都交付與兄弟。我跟師父出家去也。兄弟好生看管我這一雙兒女。我跟師父出家去。罷罷罷。〔唱〕

【黃鍾尾】我說的是十年塵夢三生話。我啜的是兩腋清風七盞茶。非自談非自誇。我是這在城中第一家。我道喫了窮漢的酒。閒漢的茶。笑看錢奴忒養家。嘆看錢奴忒沒法。謝吾師度脫咱。我將家緣盡齎發。將妻兒配與他。謝兄弟肯留納。我將那撥萬論千這回罷。深山中將一箇養家心來。按奈僧房中將一箇修行心來自發。【布袋云】你念佛【正末云】依着師父每日則念南無阿彌陀佛。【唱】到大來無是無非快活殺。【下】

【布袋云】誰想劉均佐又見了一個境頭。將家計都撇下。跟我往嶽林寺出家去。那其間貧僧再傳與他大乘佛法便了。【下】

第二折

【外扮首座上。詩云】出言解長神天福。見性能傳佛祖燈。自從一掛袈裟後。萬結人緣不斷。僧貧僧乃汴梁嶽林寺首座定慧和尚是也。想我佛門中自一氣纔分。三界始立緣。有四生



之品類遂成萬種之輪迴。浪死虛生。如蟻旋磨。猶鳥投籠。累劫不能明其真性。女人變男。男又變女人。死爲羊。羊死爲人。還同脫袴着衣。一任改頭換面。若是聰明男女。當求出離于羅網。人身難得。佛法難逢。中士難生。及早修行。免墮惡道。想我佛西來傳二十八祖。初祖達磨禪師。二祖慧可大師。三祖僧燦大師。四祖道信大師。五祖弘忍大師。六祖慧能大師。佛門中傳三十六祖。五宗五教正法。是那五宗。是臨濟宗。雲門宗。曹溪宗。法眼宗。潯山宗。五教者。乃南山教。慈恩教。天台教。玄授教。祕密教。此乃五宗五教之正法也。【偈云】我想學道猶如守禁城。晝防六賊。夜惺惺。中軍主將能傳令。歲歲年年享太平。今奉我佛法旨。此處有一人。姓劉名圭。字均佐。此人平昔之間。好賄貪財。只戀榮華富貴。不肯修行。今被我佛點化。着此人看經念佛。參禪打坐。這早晚不見到來。劉均佐誤了功課也。【正末上云】南無阿彌陀佛。自家劉均佐。跟師父出家。每日則是看經念佛。師父有個大徒弟。着他看管我修行。我若凡心動。他便知道就打。如今須索見他走一遭去。【見科】【首座云】劉均佐。我奉師父法

旨着你清心寡慾。受戒持齋。不許凡心動。如若凡心動者。只打五十竹篋。凡百的事。則要你忍。你聽者。忍之爲上。【偈云】忍之一字。豈非常。一生忍過。却清涼。常將忍字。思量到。忍是長生不老方。念佛念佛。忍着忍着。【做睡科】【正末云】是忍着念。南無阿彌陀佛。南無阿彌陀佛。他睡着了也。嗨。劉均佐。我當初一時間。跟師父出家。來到這寺中。每日念佛。雖我口裏念佛。想着我那萬貫家緣。知他是怎的也。【首座喝云】喂。劉均佐。那個坐禪處。有甚萬貫的家緣。便好道。萬般將不去。只有業隨身。我師父法旨。教你參禪打坐。抖擻精神。定要討個分曉。不可胡思亂想。須要綿綿密密。打成一片。只如害大病一般。喫飯不知飯味。喫茶不知茶味。如癡似醉。東西不辨。南北不分。若做到這些功夫。管取你心華發現。徹悟本來。生死路頭。不言而到。生死事大。無常迅速。如十人上山。各自努力。便好道。【偈云】人人有個夢。千變萬化鬧。覺來細思量。一切惟心造。息氣受境禪。迷惑若顛倒。發願肯修行。寂滅真常道。念佛念佛。忍者忍者。【睡科】【正末云】是念佛。南無阿彌陀佛。南無阿彌陀佛。又睡着了也。天那。萬

貫家緣不打緊。棄了一個花朵兒渾家。【首座云】喂。劉均佐那個坐禪處。有甚麼花朵兒渾家。我師父着你修行養性。要鎖住心猿。拴住意馬。呆漢。【偈云】自理會。自理會。自不理會。誰理會。十二時中。自着肩。莫教落在邪魔隊。一點靈光是禍胎。做出不良空懊悔。我笑世人閒理會。爭人爭我情。不退損他利。已百千般生。鉄心腸。應粉碎。眼光落地業根深。爐炭鑊湯難。避。閻羅老子無人情。始覺臨期難理會。劉均佐念佛念佛。忍者忍者。【睡科】【正末云】是念佛。忍者。南無阿彌陀佛。南無阿彌陀佛。他又睡着了也。花朵兒渾家不打緊。有魔合羅般一雙男女。知他在那裏。【首座云】喂。劉均佐那個坐禪處。有甚麼魔合羅般孩兒。我師父着你修行。先要定慧心。定慧爲本。不可迷着。定是慧體。慧是定用。卽慧之時。定在慧。卽定之時。慧在定。若識此言。卽是慧定。學道者莫言先慧而發定。定慧有如燈光。有燈卽光。無燈卽暗。燈是光之體。光是燈之用。名雖有二。體用本同。此乃是定慧了也。念佛念佛。忍者忍者。【正末擗數珠科】師父。我忍不的了也。【唱】

【雙調新水令】我如今跳離人我是非鄉。【帶云】師父也想俺那妻子呵。【唱】到大來間別無恙。我識破這紅塵戰白蟻。都做了一枕夢黃梁。我這般急急忙忙。今日個都打在我頭上。

【首座云】劉均佐你聽者。你那一靈真性。湛若太虛。五蘊色身。死如幻夢。果是頂門具眼。便知虛裏無花。直下圓成。永超生滅。染緣易就。道業難成。不了前因。萬緣差別。風景浩浩。凋殘功德之林。心火炎炎。燒壞菩提之種。道念若同情念。自然佛法時時現前。爲衆如同爲身。怕不煩惱塵塵解脫。【偈云】便好道。念佛彌陀福最強。刀山劍樹得消亡。自作自招還自受。莫待臨時手脚忙。念佛念佛忍者忍者。【正末云】是念佛。南無阿彌陀佛。南無阿彌陀佛。【睡科】【首座云】劉均佐睡着了也。着他見個境頭。疾此人魔頭至也。【旦兒同僚兒上云】自家劉均佐。渾家便是。我看員外去。【見科云】員外。【正末云】大嫂。你那裏來。【旦兒云】員外。我領着孩兒望你來。【正末云】大嫂。則被你想殺我也。【唱】

【鴈兒落】不由我不感傷。不由我添悲愴。嗜須是美眷姻。爭奈有這村和尚。

【旦兒云】你怕他做甚麼。【正末云】大嫂。你那裏知道。【唱】

【得勝令】他則待輪棒打鴛鴦。那裏肯吹玉引鸞凰。【旦兒云】員外。則被你苦痛殺我也。【正末唱】你道是痛苦何時盡。我將你這恩情每日想。【印忍字旦兒手上科】【旦兒云】你看我手上印下個忍字也。【正末唱】我這裏斟量。恰便似刀刃

在心頭上放。不由我參詳。大嫂也。這的是絕恩情的海上方。

【旦兒云】兩個孩兒都在這裏看你來也。【正末云】孩兒也。想殺我也。【唱】

【水仙子】眉尖眼角恰纔湯。【做印忍字俚兒眉額上科】【唱】也似我少吉多凶歹字樣。更做道壺中日月如翻掌。大嫂也。我則看你手梢頭不覷手背上。【見忍字科】【唱】如今這天台上。差配了劉郎。孩兒印在眉尖上。女兒印在

眼角傍〔看忍字科〕〔唱〕忍的也你生割斷了俺子父的情腸。

〔首座云〕速退〔旦兒同俵兒下〕〔布袋同旦兒俵兒上轉一遭下〕〔正末見科云〕師父纔來的那個不是俺老師父〔首座云〕是俺師父〔正末云〕那兩個夫人是誰〔首座云〕是俺大師父娘二師父娘〔正末云〕那兩個小的是誰〔首座云〕是師父一雙兒女〔正末怒科云〕好和尚也他着我休了妻棄了子拋了我銅斗兒家私跟他出家兀的不氣殺我也師父休怪休怪我也不出家了我還我家中去了也〔唱〕

〔川撥棹〕他原來更荒唐好也囉你可便坑陷了我有甚麼強我有那稻地池塘魚泊蘆場旅店油房酒肆茶坊錦片也似房廊畫堂我富絕那一個地方那一日因賤降相識每重重講

〔云〕正飲酒間兄弟道哥哥門首一個胖和尚〔唱〕

〔七弟兄〕我出的正堂庫房正看見你這和尚沒來由喫的偌來胖把這

個劉員外賺入火坑傍。【首座云】忍者。【正末云】休道我。【唱】便是釋迦佛惱下蓮臺上。

【梅花酒】你送了我這一場。休了俺那紅粧。棄了俺那兒郎。他倒有兩個婆娘好打這點地脚。他可甚麼出山像。又攪下這師長。【首座云】劉均佐忍者。休慌。【正末唱】你不慌我須慌。【首座云】忍者。你休忙。【正末唱】你不忙我須忙。我從來可燒香。他着我禮當陽。我平生愛經商。他着我守禪床。我改過這善心腸。他做出那惡模樣。吾師行得明降。

【云】師父。這出家人尙然有妻子呵。【唱】

【喜江南】天那送的。我人離財散。怎還鄉。不想這釋迦佛到。做了畫眉郎。想俺糟糠的妻子。倚門傍。今日箇便往。免了他短金釵。畫損在綠苔牆。

【首座云】劉均佐。你不修行。你往那裏去。【正末云】師父。你休怪。我不出家了。則今日還我

那汴梁去也【首座云】你既要回你那家鄉去呵。你則今日便索長行也【正末唱】

【鴛鴦煞】我早知道他有妻孥。引入銷金帳。我肯把金銀船。沈入那驚人浪。他剗地抱子攜男。送的我家破人亡。暢道好教我懶出這山門。羞歸我那汴梁。映衰草斜陽。回首空惆悵。我揣着個羞臉兒還鄉。從今後我參甚麼禪宗。聽甚講【下】

【首座云】嗨。誰想劉均佐見了些小境頭。便要回他那汴梁去。這一去見了那酒色財氣人。我是非貪嗔癡惡後。遇我師父點化。方能成道。【偈云】我佛將五派分開。參禪處討個明白。若待的功成行滿。同共見我佛如來【下】

第四折

【淨扮李老領俵兒上云】老漢汴梁人氏。姓劉名榮。祖年八十歲也。我多有兒孫。廣有田產。我是這汴梁第一個財主。我的父親曾說我那祖公公劉均佐。被個胖和尚領着他出家去。



了。手心裏有個忍字。是俺祖公公的顯證。至今我家裏留下一條手巾。上面都是忍字。我滿門大小拜這手巾。便是拜俺祖公公一般。時遇着清明節令。我帶着這手巾去那祖宗墳上燒紙走一遭去。【下】【正末上云】自家劉均佐便是。誰想被這秃廝閃我這一閃。須索還我家中去也。【唱】

【中呂粉蝶兒】好教我無語評跋。誰想這脫空禪客僧瞞過。乾丟了銅斗兒家活。則俺那子和妻。心意裏定道我在蓮臺上穩坐。想必我坑陷的人多。着這個看錢奴受這一場折挫。

【醉春風】我堪恨這寺中僧難消我心上火。則被他偌肥胖那風魔。倒瞞了我。我趕不上龐居士海內沈舟。晉孫登蘇門長嘯。我可甚麼謝安石東山高臥。

【云】我自離了寺中數日。這搭兒是俺祖上的墳。可怎生別了。我再認咱。險些兒走過去了。

正是俺的祖墳也。我入的這墳來。【唱】

【迎仙容】我行來到墳地側。【云】怎生這等荒疎了。【唱】長出些三棘針科。【云】去時節那得偌大樹來。【唱】去時節這一科松柏樹兒高似我。至如道是長得疾。莫不是雨水多。我去則有三箇月期過。可怎生長得有偌來大。

【云】去這墳裏面看一看。我走了一日光景也。我這裏坐一坐。咱。【孝老上云】老漢劉榮祖。可早來到這墳前也。一個後生在那裏坐着。我試問他。咱儿那後生你來俺這裏做甚麼。【正末云】是俺家的墳。不許我在這裏坐那。【孝老云】這弟子孩兒。是俺家的墳。你在這裏坐。你倒又說是你家的墳。【正末云】這老子無禮也。俺家的墳。不由我坐。【孝老云】怎生是你家墳。你說我聽者。【正末唱】

【上小樓】我和你個莊家理說。也不索去官中標撥。誰着你便石虎石羊。周圍邊箱種着田禾。【孝老云】既是你家墳。有多少田地。【正末唱】這裏則是五畝。

來多大一塢你常好是心蠱膽大。你把俺這墳前地倚強耕過。

【李老云】是俺家的墳。【正末云】正是俺家的墳。【李老云】既是你家的墳可怎生排房着哩。【正末唱】

【么篇】正面上排祖宗。又不是安樂窩割捨了我打會官司。唱叫揚疾。便待如何。【李老云】兀那弟子孩兒。你敢打我不成。【正末云】我便打你呵有甚麼事。【唱】我這裏便忍不住氣撲撲向前去。將他扯擺。休休休我則怕他布衫襟邊又印上一箇。

【云】既是你家祖墳。你可姓甚麼。【李老云】我姓劉。【正末云】你姓劉。可是那個劉家。【李老云】我是劉均佐家。【正末云】是那個劉均佐家。【李老云】被那胖和尚引去出家的劉均佐家。【正末背云】恰是我也。【回云】那劉均佐是你的誰。【李老云】是我的祖公公哩。【正末云】你這墳前可怎生排着哩。【李老云】這個位兒是俺祖公公劉均佐的虛塚兒。

【正末云】這個位是誰？【孛老云】這是我祖公公的兄弟劉均佑。【正末云】敢是那大雪裏凍倒的劉均佑麼？【孛老云】呀，你看這廝怎生這般說。【正末云】這個是誰？【孛老云】是我的父親。【正末云】可是那佛留麼？【孛老云】可怎生喚俺父親的小名兒？【正末云】這個位兒是誰？【孛老云】是我的姑娘。【正末云】可是僧奴那妮子麼？【孛老云】你收着俺一家兒的胎髮哩。【正末云】你認的你那祖公公劉均佑麼？【孛老云】我不認的。【正末云】睜開你那眼，則我便是你祖公公劉均佑。【孛老云】我是你的祖爺爺哩，你怎生是我的祖公公？【正末云】我說的是你，便認我，我說的不是你，你休認我。【孛老云】你試說，我聽咱。【正末云】當日是我生辰之日，被那個胖和尚在我手心裏寫個忍字，水洗不下，揩也揩不掉，印了一手巾忍字，我就跟他出家去了。我當初去時留下一條手巾，上面都是忍字，可是有也是無。【孛老云】手巾便有，則怕不是。【正末云】你取那手巾我認。【孛老云】兀的不是手巾，你認。【正末認科云】正是我的手巾，怕你不信呵，你看我手裏的忍字，與這手巾上的可一般兒。

【李老云】正是我的祖公公下次小的們都來拜祖公公【衆拜科】祖公公你可在那裏來  
【正末云】你起來【唱】

【滿庭芳】您可便一齊的來拜我。則俺這親親眷眷。鬧鬧和和。您當房下  
輩兒誰年大【李老云】則我年長【正末唱】他可便髮若絲窩【云】這個是誰【李老  
云】公公。這個是俺外甥女兒哩【正末唱】則這外甥女倒老如俺嬖嬖【云】這個是  
誰【李老云】這個是重孫子哩【正末唱】則我這重孫兒倒做得我哥哥將此事  
都參破。人生幾何。恰便似一枕夢南柯。

【李老云】公公你怎生年紀不老也【正末云】你肯依着我念佛便不老【李老云】怎生念  
佛【正末云】你則依着我念南無阿彌陀佛。臨劉均佐也。原來師父是好人。我跟師父去了  
三個月塵世間。可早百十餘年。弄的我如今進退無門。師父你怎生不來救您徒弟也【唱】

【十二月】師父你疾來救我。這公事怎好收撮。我想這光陰似水。日月如

梭每日家不曾道是口合。我可便剩念了些彌陀。

【堯民歌】呀。那裏也脫空神語浪舌佛。我倒做了個莊子先生鼓盆歌。師父也不爭你昇天去後我如何。【云】罷罷要我性命做甚麼。【唱】我則索割捨了殘生撞松科。【撞松科布袋上云】劉均佐你省了也麼。【正末云】師父您徒弟省了也。

【布袋云】徒弟你今日正果已成纔信了也呵。【正末唱】說的是真也波哥。皆因忍字多。【云】師父你再一會兒不來呵。【唱】這坨兒連印有三十個。

【布袋云】劉均佐你聽者。你非凡人。乃是上界第十三尊羅漢寶頭盧尊者。你渾家也非凡人。他是驪山老母。一化你一雙男女。一個是金童。一個是玉女。爲你一念思凡。墮于人世。見那酒色財氣人。我是非。今日個功成行滿。返本朝元。歸于佛道。永爲羅漢。你認的貧僧麼。【正末云】不認的。師父是誰。【布袋偈云】我也不是初祖達摩。我也不是大唐三藏。則我是

彌勒尊者。化爲做布袋和尚。【正末拜科云】南無阿彌陀佛。【唱】

【煞尾】不爭俺這一回還了俗却原來倒做了佛。想當初出家本爲逃災禍。又誰知在家也得成正果。【同下】

題目 乞兒點化看錢奴

正名 布袋和尚忍字記

布袋和尚忍字記雜劇終





# 包龍圖智勘後庭花

## 第一折

【沖末扮趙廉訪引祇從上詩云】一片忠勤抱國憂。漸看白髮已蒙頭。可憐恩賜如花女。非我初心不敢留。老夫汴梁人氏。姓趙名忠。字德方。嫡親的三口兒。夫人張氏有一箇家生的孩兒。是王慶。爲某居官頗有政聲。加老夫廉訪使之職。今日早間。聖人賜老夫一女。小字翠鸞。着他母親隨來近身伏侍老夫。尙不知夫人意下如何。未敢便收留他。我今着王慶領的去見夫人。看道有何話說。左右那裏。與我喚將王慶來。【祇候云】理會的王慶那裏老爺呼喚。【淨扮王慶上云】自家王慶在這趙廉訪老相公府內。做着箇堂候官。家私裏外都是我執掌。一應人等。誰不懼怕我。今日老相公呼喚。不知有甚事。須索走一遭去。不必報復。徑自過去。【做見科云】老相公呼喚王慶那廂使用。【趙廉訪云】王慶。你近前來。我問你聖人賜

我的那娘兒兩箇在於何處。【王慶云】現在府中。【趙廉訪云】你與我喚將來。【王慶云】翠鸞子母二人安在。【旦扮翠鸞同卜兒上詩云】數日府門下無緣得自通。承恩不在貌。教妾若爲容。妾身姓王名翠鸞。這是俺母親聖人將俺子母二人賜與趙廉訪大人。到此數日。不蒙呼喚。哥哥你喚俺做甚麼。【王慶云】您見相公去。【見科】。【趙廉訪云】王慶這是那子母兩箇麼。你如今領的他去見夫人。若說甚麼便來回老夫的話者。【下】。【王慶云】你子母二人跟我見老夫人去來。【同下】。【旦扮夫人上】。【詩云】夫主爲官在汴京。祿享千鍾爵。上卿一生不得閨中力。若個相扶立此名。妾身是趙廉訪的夫人。嫡親的三口兒。有箇家生孩兒王慶。我平昔性不容人家中內外事務。都來問我。這兩日怎麼不見王慶來。【王引旦卜上云】奉老相公言語。教我領他二人見夫人去。你兩個只在門首待我先見過了夫人出來喚你。【旦云】理會的。【王見夫人科云】今有聖人御賜翠鸞女子母二人伏侍老相公。老相公不敢收留。教王慶領來見夫人。【夫人云】你喚來我看。【王慶云】您子母二人見天

人去〔旦下見科〕〔夫人云〕這年紀小的女孩兒是生的好。教他伏侍老相公。假若得一男  
半女。那裏顯我。則除是這般。王慶你來。你如今將他子母二人。或是勒死。或是殺死。我只要  
死的。不要活的。只在你身上幹得停當。待死了呵。回我話來。〔下〕〔王慶云〕可有甚麼難  
處。將他兩個所算了。便是。您子母且去這耳房中安下者。〔旦下〕〔王慶云〕且住。我欲待  
害了他兩個。奈我下不的手。如今有一人。乃是李順。他是個酒徒。他渾家與我有些不伶俐  
的勾當。我如今到他家去。若不在時。和他渾家說句話。我自有個主意。〔下〕〔搽旦扮張氏  
上云〕妾身姓張。夫主李順。有個孩兒。喚做福童。是個啞子。不會說話。我不幸嫁了這箇漢  
子。他每日只是吃酒。家私不顧。在這衙門中做着箇祇候人。又有個王慶。管着俺李順。我與  
他有些不伶俐的勾當。這兩日怎生不見王慶來。〔王慶上云〕來到門首也。李順在家麼。  
〔搽旦云〕家裏來。李順不在。〔王見科〕〔搽旦云〕王慶。怎生這幾日不見你。〔王慶云〕這  
幾日家裏事忙。〔搽旦云〕有甚麼事。〔王慶云〕如今聖人賜與俺廉訪相公翠鸞子母兩個。

伏侍相公教我領去見夫人。夫人教我所算了他。我可下不的手。我如今待着李順所算他去。【搽旦云】王慶你來。欲要嚙兩個長久做夫妻呵。我有一計。你如今見了李順。則道夫人看你所算他子母二人。則要死的不要活的。則三日便要回話。他必定領來家中所算他。我見了呵。便道休要害了他。我將他兩個的首飾頭面都拿了。我着他將子母二人放了。到第三日你可來問李順。那子母二人安在。他必然說所算了也。你便說兀那廝說你要了他首飾頭面放的他走了。他必然支吾。你便道你渾家必定知情。你便將着大棍子誑我。我便道休打我。俺丈夫要了他首飾頭面放的他二人走了。你便道是實呵。拖你見夫人去來。那廝害慌。你便道李順你要饒麼。他道可知要饒哩。你道要饒呵。休了你那媳婦。他道休呵。誰要。你道我要。若是他休了我呵。嚙兩口兒永遠做夫妻如何。【王慶云】此計大妙。【搽旦云】我回房中去。李順敢待來也。【正末扮李順上云】自家李順的便是。衙門中回來。到俺家門首也。【王慶云】兀那李順說甚麼哩。你又醉了也。【正末云】是王慶哥喚我做甚麼。【王打

科云。這廝不辦公事。則是吃酒。正末云。哥你休打我。不曾吃酒。我若吃酒吃血。王慶云。你看這廝現醉了。只賭咒。又打科云。你這廝則吃酒不幹公事。正末云。哥也。唱。

【仙呂點絳脣】你但來絮的頭昏不嫌口困。施呈盡抖擻精神。做一箇燻煎滾。

【王慶云】你這廝每日家在那裏來。正末唱。

【混江龍】我從撞鐘時分。王慶云。撞鐘時你在那裏做甚麼。正末唱。我立欽欽誰敢離衙門。常懷着心驚膽戰。滴溜着脚踢拳墩。哎你個身着紫衣堂候官。欺負俺這面雕金印射糧軍。王慶云。你這廝緊使着緊不去。慢使着慢不去。正末唱。哥也把小人緊使緊去。慢喚慢來。誰敢道違了方寸。何須發怒。不索生噴。

【王慶云】兀那廝我如今分付你一件事。便與我所算了兩個人去。【正末云】哥也。小人不敢去。教別人去罷。【王慶打科云】我使着你怎生不去。【正末唱】

【油葫蘆】你直恁的倚勢挾權無事狠。【王慶打科云】好打。這弟子孩兒。【正末唱】  
脊梁上打到有五六輪。似這等潑差使。誰敢道賺分文。【王慶云】你這廝有酒  
肉吃處。便去的緊也。【正末唱】我只道。噎酒吃肉。央的人困。元來是殺生害命。  
揣的咱緊。【王慶云】你每日將錢鈔。則是吃酒。【正末唱】誰有閒錢補筮籬。【王慶云】  
你這廝貪酒。溺腳跟。一世兒不得長俊。【正末唱】誰貪酒。溺腳跟。若是你那殺人也。  
一地裏將咱尋趁。【帶云】若是殺人處。不教別人去。則教李順去。【唱】哥也。偏怎生  
我手裏有握刀紋。

【王慶云】你看這糟頭。則是強嘴。【正末唱】

【天下樂】哥也。你可甚自己貪盃惜醉人。【王慶云】兀那廝你跟的來。【正末跟走】

科【唱】我罵你個遭瘟。【王慶做回頭科云】兀那廝做甚麼【正末唱】哥也你可也喚甚麼村我將這快刀兒把你來挑斷那脊筋。有一日掂折你腿脰。打碎你腦門。【王慶云】兀那廝你罵誰哩。【正末唱】我覷你直我甚脚後跟。

【王慶云】兀那廝我將你罵我的罪過且饒了。如今有老夫人的言語。【正末做驚科云】呀。聽的道老夫人呵。說的我一點酒也無了。敢問哥哥有甚麼事。【王慶云】如今有子母二人。在這耳房裏安下。老夫人分付着你領去所算了他。或是勒死。或是殺死。則要死的不要活的。限三日後便來回話。我去也。【下】。【正末云】似此怎生區處。天色將晚了也。【唱】

【醉中天】可又早日落殘霞隱。天色恰黃昏。【云】我開開這門。那子母兩個在那裏。【旦下見科】。【旦云】哥哥做甚麼。【正末云】跟我來快行動些。【唱】。【唱】。【帶云】這非是我私下來。【唱】。我奉着廉訪夫人處分。留不到一更將盡。則登時將你來送了。三

魂。

【云】你且跟我家中去來【做行到科云】這是我家門首也。你則在這裏【做叫科】【搽旦引俸兒上云】李順。你又醉了也【正末云】如今說的我一點酒也無了【搽旦云】爲甚麼。

【正末云】如今廉訪夫人分付。教我將那子母兩個所算了。限三日便要回話。我來取一條繩子。將他勒死也。留個完全屍首【搽旦云】李順。你領過來我看咱【旦卜見科】【旦云】姐姐萬福【搽旦云】一個好女子也【正末云】孩兒取繩子來【俸兒遞繩子】【正末做勒旦推科】【搽旦云】好個女孩兒。李順。我和你說那裏不是積福處。嚙如今把他首飾頭面都拿了。放的他走了。有誰知道這些東西。嚙一世兒盤纏不了【正末云】噤聲【唱】

【金盞兒】你口快便施恩。則除是膽大自包身。我其實精皮膚。捱不過那批頭棍。你大古裏言而有信。你休惱犯那女魔君。可知道錢是人之膽。則你那口是禍之門【搽旦云】便有誰知道【正末唱】豈不聞隔牆還有耳。窗外豈



無人。

【搽旦云】你則依着我。不妨事。【正末云】大嫂也。中也不中。我則依着你。【搽旦向旦兒云】兀那小娘子。我對丈夫說饒了你性命。你把你那首飾頭面都拿下來。與我放你兩個走了。罷你心下如何。【旦兒云】若肯饒了俺性命呵。這個打甚麼不緊。久後犬馬相報。【做與首飾科】【搽旦云】李順你看這釵環頭面。【正末云】將來我看。【唱】

【一半兒】這釵釧委的是金子。委的是銀。【搽旦云】是金子的。【正末云】兀那婆子。我問你唱。【唱】你兩個端的是家奴。端的是民。【卜兒云】哥哥俺是好百姓。【正末唱】似這般俺夫妻心不忍。【帶云】大嫂。【唱】若有那拿粗挾細踏狗尾的。但風聞這東西。一半兒停將一半兒分。

【云】兀那婆婆俺兩個饒了你性命。你可休忘了俺這恩念。你則牢記在心者。【旦兒云】哥哥的恩念。俺死生難忘。【正末唱】

【後庭花】俺渾家心意真。您母子性命存。那壁廂歡喜殺二貞婦。這壁廂  
鑊鐸殺五臟神。你可也莫因循天色兒。初更時分。你今宵怎睡穩。俺夫妻  
同議論。敢教你免禍。您來朝到早晨。快離了此郡門。向他州尋遠親。往  
鄉中投近鄰。向山中影占身。但有日逢帝恩。却離了一庶民。小娘子爲縣  
君。老婆婆做太郡。食珍羞。臥錦裯。列金釵使數人。似這般有福運。

【旦兒云】怎敢想望這個福分。但留得性命。便死生難忘也。【正末唱】

【青歌兒】呀。是必常思常思危困。我則怕有人有人盤問。夫人意教咱算  
你一人。我教你遠害全身。放你私奔。則要你好好安存。我使盡金銀。投托  
你們。說起原因。有活命之恩。那時節。你休道不因親者強來親。是必將咱  
認。

【旦兒云】俺娘兒兩個想哥哥。思念死生難忘也。【正末云】您則今日便索逃走。【旦兒云】

多謝哥哥【正末唱】

【賺煞】您兩個快離了汴梁城。我與你速出了夷門郡。人問你則推道是探親。你可休淹淚眼。新痕壓舊痕。你且粧些古儼溫淳。有一日嫁夫君。顯耀精神。將你那綠慘紅愁證了本。俺夫妻口穩。您子母們心順。這其間是必休忘了我這大恩人【下】

【旦下走被巡卒沖散科下】【卜兒上云】俺子母兩個正行中間。被巡城卒驚散。不見了我女兒翠鸞。我不問那裏尋將去【下】【旦慌上云】正和俺母親走着。被巡城卒驚散。不見了我母親。【做悲科云】我今不揀那裏尋母親去來。【詩云】子母私奔若斷蓬。半途驚散各西東。我今拚死尋將去。便是黃泉路上要相逢。【做叫科云】母親。母親。兀的不苦殺我也【下】

### 第一折

【搽旦上云】早間李順拿金釵兒賣去了。還不見回來。我這裏等着。敢待來也。【正末帶酒

上云】衆兄弟少罪少罪改日回席。恰纔多吃了幾盃天色將晚了也。我索還家去來。【唱】  
【南呂一枝花】不覺的日沉西。不覺的天將暮。不覺的身趔趄。不覺的醉  
模糊。則我這眼展眉舒。蓋因是一由命。二由做。我則要千事足。百事足。常  
言道。馬無夜草不肥。人不得外財不富。

【梁州第七】他兩個忙忙如喪家之狗。急急似漏網之魚。他兩個無明夜  
海角天涯去。單注他合有命。俺合粧孤兀的不歡喜殺俺子父。快活殺俺  
妻夫。我則道盡今生久困窮途。永世兒陋巷貧居。他他他天也有晝夜陰  
晴。是是是。是人也有吉凶禍福。來來來。我也有成敗榮枯。【帶云】我來到後巷裏  
舞一回。唱【做舞科】。【唱】自歌自舞。那些兒教我心寬處。倚着花朵般好媳  
婦。說甚麼九烈三貞孟姜女。他可也不比其餘。

【做到見搽旦科云】大嫂我來家了也。【搽旦云】你賣的那金釵呢。【正末背云】我是鬪他

要唱。【回云】我掉了也。【搽旦云】你看這廝波。我家吃的穿的都靠着。他你怎生掉了那。  
【正末云】我鬪你要來。我賣了也。【搽旦云】你謊我一跳。你賣了呵。那金釵重幾錢。賣了多  
少鈔。你說來我聽。【正末唱】

【牧羊關】那金釵兒重六錢半。三折來該九貫五。你從明朝打扮你兒夫。  
你與我置一頂紗皂頭巾。截一幅大紅裏肚。與孩兒做一箇單絹褲。遮了  
身命。做一箇布上衣蓋了皮膚。【搽旦云】您爺兒兩箇都有了也。怎麼樣打扮我唱。  
【正末云】大嫂。【唱】你買取一付蠟打成的銅釵子。更和那金描來的棗木  
梳。

【搽旦云】李順。你有酒了。你歇息咱。【正末睡科】【搽旦云】這些時怎麼得王慶來纔好。  
【王慶上云】我教李順勒死翠鸞子母二人。今日三日光景。不見來回話。我問那廝去。元來  
這廝關着門哩。李順開門來。【搽旦云】好了好了。這是王慶來了。【做叫正末科云】李順有

人叫門哩。〔正末醒科云〕甚麼人打門住了你那驢蹄是您家裏我來也。〔王慶云〕這廝又醉了。開門來。開門來。〔正末唱〕

〔賀新郎〕這門前喚的語音熟。莫不是李萬張千。〔搽旦云〕我去開門。〔正末搽旦科〕〔唱〕和大嫂你來我去。〔帶云〕好渾家也。常言道家有賢妻。〔唱〕如今有日

頭却又早關了門戶。他不道的教別人說言道語。〔云〕我開開這門是誰好打

這廝。〔王慶云〕咄兀那廝你打誰。〔正末見王怕科〕〔唱〕哥哥你有甚事。誰敢道是支吾。教把誰所伏。便所伏。教把誰虧圖。便虧圖。有甚惡差使。情願替哥哥做。〔正末跪倒科〕〔王慶云〕你看這廝又醉了也。你待要那裏去。〔正末唱〕遮莫去大蟲口中奪脆骨。驪龍頷下取明珠。

〔王慶云〕這廝又醉了。你怎敢罵我。〔正末云〕哥到小人家吃鍾茶。怕做甚麼。〔王慶云〕兀那廝。你教我去你家吃茶。我這等人可往你家裏去。〔正末云〕若哥哥到小人家裏吃一盃

茶兒呵。外人道管李順的官人來他家吃茶。教人也好。看波。【王慶云】這廝醉則醉。倒說的好。我去你家吃茶。與你家長些節槩。我去吃茶。怕做甚麼。【王入門坐科】【正末云】哥。小人有個醜媳婦。教來拜哥哥咱。【王慶云】不中。你的渾家。教來拜我。外觀不雅。休教來罷。【正末云】哥。不妨事。【王慶云】既然你好心。教他來見。【正末向搽旦云】大嫂。有管我的那王慶哥來。嚙家吃茶。你拜他一拜。【搽旦云】李順。敢不中麼。【正末云】大嫂。不妨事。【搽旦出見拜科云】哥哥萬福。【王慶云】李順。我分付你的翠鸞母子二人呢。【正末云】哥哥分付我的那子母兩個。我怎敢推辭。將兩條繩子勒死他。丟在汴河裏。這其間流三千里遠也。【王慶云】兀那廝。有人看見說。你要了他錢鈔。放的他走了。【正末慌科云】小人不會。【唱】

【牧羊關】並無一箇人知道。可端的誰告與。你則一聲問的。我似沒嘴的葫蘆。【王慶云】你怎敢違誤了官司。放了他去。【正末唱】小人怎敢違悞了官司。縱放了他子母。【王慶云】有人說你受了他買告也。【正末唱】若是受了他買告。咱當

罪。若是有證見便承伏。我可也甘情願餐刀刃。我可也無詞因上木驢。

【云】小人並然不敢。若有證見小人便當罪。【王慶云】你不肯招認。他渾家必然知情。叫他渾家過來。【搽旦上跪科云】不干我事。【王慶云】兀那婦人。你丈夫賣放了人。你必然知情。你若實說呵。萬事罷論。你若不說呵。我不道的饒了你哩。【做打科】【搽旦云】住住住。你休打我。我與你說。俺丈夫拿了他首飾頭面。放的他子母走了也。【王慶云】好也。你道不會放了。他麼。【正末唱】

【哭皇天】好不忍事。桑新婦好不藏情也。魯義姑。又不曾麻搥下腦箍。你怎麼口聲的就招伏。【王慶怒採正末頭髮科】【正末唱】他把我頭稍頭稍摺住。【帶云】哥也。小人出於無奈。【唱】小人也則爲家私窮暴。妻子熬煎。因此上愛他錢物。釋放了囚徒。待要。你十拷九棒。萬死千生。打殺這個射糧軍。哥也。你可甚麼那得甚福。【王慶云】兀那厮。你要饒你麼。【正末云】可知要饒哩。【王慶云】兀那



嘶。你要饒呵。把你那渾家休了者。【正末云】一箇醜媳婦子。便休呵。誰要。【王慶云】你休了呵。我要。【正末唱】哥也。你何須致怒。小人怎敢做主。

【云】哥也。小人怕不肯。未知俺那婦人心裏如何。【王慶云】你和你那婦人商量去。【正末唱】

【烏夜啼】我向前體問俺渾家去。【向搽旦云】大嫂。王慶哥哥道要我饒你。休了你那媳婦者。我便道休了呵。誰要。他便道我要。我不知你心裏肯也不肯。【搽旦云】你休顧我。則顧你的性命。【正末唱】好也囉。枉做了二十年兒女妻夫。這孩兒又不曾人言語。他可又性痴愚。不識親疎。你不尋思撇下的我孤獨。天也生挖支的割斷這娘腸肚。這壁廂爺受苦。那壁廂兒啼哭。哥也。你可憐見同衙共府。你休要運計鋪謀。

【王慶云】兀那厮。快休了者。【正末云】小人要寫休書。爭奈無筆。【搽旦云】我這裏有描花

兒的筆【正末云】無紙【搽旦云】有剪鞋樣兒的紙【正末云】無硯瓦【搽旦云】便碟兒也磨得墨【正末云】他可早準備下了也罷罷罷【唱】

【鬪蝦蟆】我這裏書名字畫手模便有你待何如。想着想着做出真然真然淫欲。瞞着瞞着丈夫窩盤窩盤人物。說着說着起初今日今日羞辱不由我滴羞跌屑怕怖乞留兀良口絮。他別抽秃刷廝覷迷留沒亂躊躇。想起來想起來殺人可恕。將咱欺侮並不糊塗。早則招取【云】醜弟子你將去波。【唱】這一紙絕恩斷義的休書。【搽旦假哭科】【正末唱】你休那裏雨淚如珠。可不道鳳凰飛上梧桐樹。見放着開封府執法的老龍圖。必有個日前見血劍下遭誅。

【云】你放心我直開封府裏告他去。【搽旦云】不中王慶。你可不聽見。【王慶背云】那廝說出來必然做出來。我如今不先下手。倒着他道兒。【回云】李順。我不要吃你這媳婦。我則要你

一件東西〔正末云〕哥也。你要甚麼。〔王慶云〕只要你那顆頭。〔正末云〕可連着筋哩兀的不有人來也。〔王慶看科〕〔正末走〕〔王拿住科〕〔正末云〕罷罷罷。〔唱〕

【黃鍾尾】早則這沒情腸的兇漢。衝跋扈更打着有智量的婆娘。更狠毒。難分說。怎分訴。做納下廝欺負。要行處便行去。由得你愛的做。似這般倚官府。生有地死有處。奪了俺妻兒。送了俺子父。揉碎胸脯。磕破頭顱。我把那不會雪恨的孩兒。覷一覷。我見他手搯着巨毒。把我這三思臺摺住。〔帶云〕我好冤屈也。〔唱〕兀的不沒亂殺我這喉嚨。我其實叫不出這屈。〔王慶殺正末科下〕

【王慶云】殺了他。也將一個口袋來裝了。丟在井裏。大嫂我和你永遠做夫妻。憑着我這一片好心。天也與我半碗兒飯吃。〔搽旦云〕休說閒話。咯和你後房中快快活活的做生活去來。〔同下〕

第二折

【淨扮店小二上詩云】酒店門前七尺布。過來過往尋主顧。昨日做了十瓮酒。倒有九缸似頭醋。自家是這汴梁城中獅子店小二哥的。便是開着這一座店。南來北往。經商客旅。都來俺這店中安下。今日天晚。看門前有甚麼人來。【旦上云】正走間。被巡城卒衝散了。俺母親不知所在。天色晚了。我去這店裏尋一箇宵宿處。【做見小二科云】哥哥。我來投宿。【小二云】小娘子。頭間房兒乾淨。【旦云】你與我一箇燈。【小二云】我與你點上這燈。【做看科。背云】好箇女子也。天又晚了。人又靜了。他又獨自一個。我要他做個渾家。豈不是好。【回云】小大姐這裏也無人。我和你做一對夫妻如何。【旦云】哇。你說那裏話。【小二云】你如今落在圈裏。飛也飛不出去。我不怕你不與我做夫妻。【旦云】我至死也不肯。【小二云】你真箇不肯。【旦云】我不肯。【小二背云】他說不肯。我取出這斧頭來。誑他。他是箇女孩兒家。必然害怕。我好歹要了他。【做拿斧科云】你真箇不肯。我一斧打死了你。【旦做倒

科。【小二云】怎麼半晌不言語。【看科云】原來唬死了。怎生是好。這暴死的。必定作怪。我門首定的桃符。拿一片來插在他鬚角頭。將一個口袋裝了。丟在這井裏。【扶旦下云】把一塊石頭壓在上面。省得他浮起來。【卜兒上云】誰想翠鸞孩兒。到處尋覓不見。天色晚了。我且去獅子店裏覓個宵宿去。【見科云】小二哥。我來投宿。【小二云】後面那間房兒乾淨。婆婆你歇息去。【卜兒云】我到後面歇息去也。【下】【小二云】嗨。做這等勾當。我且再坐一坐。怕還有人來。【外扮劉天義上。詩云】埋頭聚雪窗。文史三冬足。今日一寒儒。明朝食天祿。小生姓劉名天義。洛陽人氏。學成滿腹文章。未曾進取功名。目今春榜動。選場開。收拾琴劍書箱。上朝取應。來到汴京。天色晚了。且去那獅子店中覓一宵宿。【見淨科云】小二哥。我來求宿。【小二云】頭間房裏安歇去。【劉天義云】小二哥。與我點一箇燈來。【小二與燈科云】燈在此。【劉天義云】小二哥。安排些酒殺來。等我自己酌一盃。明日連房錢一併還你。【小二將酒上云】酒殺都有了。我自去睡也。【下】【劉天義云】我關上這門。自飲幾盃。咱

【旦魂子上云】我乃王婆婆的女兒翠鸞。去那店房中點箇燈。咱秀才開門來。【劉天義云】更深夜靜。有人喚門。好是奇怪。兀那喚門的是誰。【旦云】我是王婆婆女兒。我來點個燈。咱。【劉天義云】兀那女子。我點與你。門縫較寬。小娘子接燈。【旦吹滅科云】秀才。風大刮殺了。【劉天義云】我再點與你。【旦又吹滅科云】又滅了。【劉天義云】我與他燈。兩次三番刮殺了。既然如此。我開門。你自己點。【開門旦入科】【劉天義云】小娘子點燈。我開了門。他可去了。只是鬪小生要來。我還關上這門。【回身見旦拜科云】秀才萬福。【劉天義云】好一個女子也。小娘子誰氏之家。姓甚名誰。【旦云】我是王婆婆的女兒。聞知秀才在此。特來探望。【劉天義云】小生有何德能。敢勞小娘子垂顧。若不棄嫌。同席共飲數盃。未審雅意如何。【旦云】願從尊命。【坐科】【劉把盞科云】小娘子滿飲此盃。【旦飲科云】敢問秀才姓甚名誰。那裏人氏。因何至此。【劉天義云】小生姓劉名天義。洛陽人氏。因上朝取應。天色已晚。到此店中投宿。不期相遇小娘子。實小生之幸也。【旦云】敢問秀才告珠玉。咱。【劉天義云】

小生不才。怎敢在小娘子跟前獻醜。聊作後庭花一闋。小生表白一徧。小娘子試聽。【詞云】  
雲鬢堆絲鴉。羅裙窸絳紗。巧鎖眉顰柳。經勻臉襯霞。小粧髻。凌波羅襪。洞天何處家。詞寄後  
庭花。劉天義作。【旦云】好高才也。我依韻也和一首。【寫科云】寫就了也。我表白一徧。與秀  
才聽。【詞云】無心度歲華。夢魂常到家。不見天邊雁。相侵井底蛙。碧桃花。髻邊斜。插件人  
憔悴。殺詞寄後庭花。翠鸞作。【劉天義云】妙哉妙哉。小娘子再飲一盃。【卜兒上云】我心  
中悶倦。再睡不着。起來閒走一閒走。【做聽科】【旦云】秀才。你則休負心。【劉天義云】小生  
豈敢負心。【卜兒云】兀的不是我翠鸞孩兒說話哩。【做叫科云】翠鸞翠鸞。【旦應科走下】  
【卜兒云】我推開這門。【見劉科云】我孩兒在那裏。【劉天義云】無有人。小生獨自在此。  
【卜兒見詞科云】你道無有。這兩篇詞是誰做的。有我女孩兒名字在上。你藏了我女兒。更待  
干罷。明有王法。我和你見官去來。【劉天義云】你看我這命波。【同下】。【趙廉訪引祇從上  
云】老夫趙忠。前者聖人賜與我翠鸞母子二人。我着王慶領去見夫人。數日光景。不見來

回話。左右的喚王慶來者。【祇從云】王慶安在。老爺呼喚。【王慶上云】老相公呼喚。不知有甚事。須索見去咱。【見科】【趙廉訪云】王慶。日前那子母二人。我教你領去見夫人。至今不曾回話。如今那子母二人在那裏。【王慶云】王慶領的與了夫人也。【趙廉訪云】既然如此。請的夫人來。【王慶云】老夫人。相公有請。【夫人上見科云】老相公喚妾身。不知爲何。【趙廉訪云】夫人。我教王慶領的那翠鸞子母二人。見你去。如今在那裏。【夫人云】王慶領的那子母二人來。見了我。我分付王慶就領去了。【趙廉訪云】王慶。夫人說道。分付與你了。如今可在那裏。【王慶云】是相公教小人領去見夫人。夫人交付與我。我可交付與李順也。【趙廉訪云】他說交付與李順。這樁事。其中必有暗昧。夫人且回後堂中去。【夫人詩云】一點妬心生。斷送女娉婷。任他沒亂煞。只做不知情。【下】【趙廉訪云】老夫待親自問來。有些難問。則除是開封府尹包待制。此人清廉正直。可問這樁事。左右的。請包府尹來者。【祇候云】理會的。府尹大人。老相公有請。【正末扮包龍圖引張千上云】老夫姓包名拯。字希文。



廬州金斗郡四望鄉老兒村人氏官拜龍圖閣待制正授開封府尹有趙廉訪着人相請不知甚事須索去見咱【唱】

【雙調新水令】欽承聖敕坐南衙掌刑名糾察姦詐衣輕裘乘駿馬列祇候擺頭踏憑着我懶劣村沙誰敢道僥倖姦猾莫說百姓人家便是官宦賢達綽見了包龍圖影兒也怕

【云】左右報復去道包拯來了也【祇從報科云】報的老爹得知有包待制在於門首【趙廉訪云】請他進來【祇從云】請進【見科】【正末云】相公喚包拯有何分付【趙廉訪云】待制我煩你一件事數日前聖人賜我王翠鸞子母二人我教王慶領去見我夫人不見回話我問夫人夫人道分付與了王慶王慶又道分付與了李順這樁事其中必有暗昧你與我仔細究問多因是我夫人做下違條犯法也【正末唱】

【沉醉東風】相公道老夫人違條犯法怎敢就教他帶鎖披枷【帶云】相公

【唱】你侯門似海深。利害有天來大。則這包龍圖怕也不怕。老夫怎敢共夫人做兩事家。【帶云】若是被論人睜起眼來。【唱】枉把村老子就公廳上說殺。【云】相公小官職小斷不的。【趙廉訪云】你也說得是。與你勢劍銅鑵限三日便與我尚成這樁事。若問成了呵。老夫自有個主意。【詩云】這樁事莫得消停。三日裏便要完成。若問出子母下落。我與你寫表箋申奏朝廷。【下】【正末云】是好一口劍也呵。【唱】

【風入松】這劍冷颼颼。取次不離匣。這惡頭兒揣與咱家。我若出公門。小民把我胡撲搭。莫不是這老子賣弄這勢劍銅鑵。【帶云】我出的這門來。【唱】覷了王慶呵。慌張勢煞。這漢就裏決謫札。

【云】王慶這樁事都在你身上。【王慶云】你看這大人干我甚麼事。【正末云】噤聲。【唱】

【胡十八】這話兒你休對答。莫虛詐。【云】張千牽馬來。【張千做牽馬科云】請大人上馬。【正末上馬科】【唱】我將這寶躡來踏。把韁鞵來拿。我扭回頭見他左右

眼觀咱。〔云〕張千與我拿下王慶者。〔張千云〕理會的。〔做拿王慶科〕〔王慶打張千科云〕你敢拿誰。〔正末唱〕您如今直恁般怕他。〔帶云〕三品官尙然到開封府裏量你到的那裏。〔唱〕您一火祇從人將王慶快拿下。

〔云〕張千回衙門去來。〔旦魂子上旋風科〕〔正末云〕一陣好大旋風也。〔唱〕

〔鴈兒落〕見一箇旋風隨定馬。不由我展轉生疑訝。〔帶云〕兀那鬼魂聽者

〔唱〕你去到黃昏插狀來。啗兩箇白日裏難說話。

〔云〕兀那鬼魂到晚間開封府裏來。速走速走。〔旋風下〕〔卜兒扯劉天義上云〕冤屈相公與老婆子做主咱。〔正末唱〕

〔掛玉鈎〕則聽的唱叫揚疾鬧怎麼。我與你觀絕罷。〔帶云〕張千。〔唱〕你教他近向前來我問咱。你休喝掇休驚詫。便膽寒心驚怕。你與我盡說緣由。細訴根芽。

【云】兀那婆子你告甚麼。【卜兒云】這個秀才藏了我的女孩兒翠鸞告相公與老婆子做主咱。【正末云】誰是翠鸞女的母親。【卜兒云】則我便是。【正末云】慚愧一椿問做兩椿事。張千將這一行人都拿到開封府裏去。【做到排衙科】。【正末云】張千將那一行人拿過來者。【張千云】理會的。【衆跪科】。【正末云】王慶兀那厮你怎麼不跪。【王慶云】我無罪過。【正末云】你無罪過來俺這開封府裏做甚麼。【王慶云】我跪下便了也。【王跪科】。【正末云】兀那婆子說你那詞因。【卜兒說】。【王攙科云】老相公教我領見夫人。夫人分付與王慶王慶可分付了李順也。【正末云】兀那厮誰問你來。兀那婆子說你詞因來。【卜說】王又攙科云。老相公教我領見夫人。夫人分付與王慶王慶可分付了李順也。【正末云】張千將王慶拿下與我打着者。【張千打科】。【正末唱】

【川撥棹】我敢搨碎你口中牙。不刺這是你家裏說話那。恰便似一部鳴蛙。絮絮答答。叫叫叮叮。覷了他精神口抹。再言語還重打。

【云】張千着那廝咬着棍子者【張千云】理會的【王咬棍子科】【正末云】兀那婆子你說你那詞因【王丟棍子攙說科云】老相公教我領見夫人夫人分付與王慶王慶可分付了李順也【正末云】這廝直恁般好說話【卜兒云】老婆子夜來晚間在獅子店裏安下只聽的這秀才和我翠鸞孩兒說話我踏開門不見我女孩兒明明是他藏了相公與我做主咱的【正末云】兀那廝可說你那詞因【王慶云】老相公教我領見夫人夫人分付與王慶王慶可分付了李順也【正末云】再呢【王慶云】無了也【正末云】似這般怎生是好【唱】

【夜行船】三下裏葫蘆提把我來倏倏殺【帶云】這公事少呵【唱】連累着七八十家兀的是人命爭差恰便似金鋼廝打佛也理會不下

【云】張千將王慶監下者【張千云】理會的【押王慶下】【正末云】兀那婆子你說他藏了你女兒有何見證【卜兒云】有兩首詞在這裏【正末云】將來我看【卜兒出詞正末念科云】雲鬢堆綠鴉羅裙簌絳紗巧鎖眉顰柳輕勻臉襯霞小粧髻凌波羅襪洞天何處家

詞寄後庭花劉天義作【唱】

【殿前歡】你道是不曾見他女嬌娃。這的是誰人題下這首後庭花。須不是把你來胡遮刺。莫不我雙眼昏花。【云】再看這首詞咱。無心度歲華。夢魂常到家。不見天邊鴈。相侵井底蛙。碧桃花。鬢邊斜插。伴人憔悴殺。詞寄後庭花。翠鸞女作。【正末再念科】【唱】我從頭兒再念咱。【帶云】不見天邊鴈。相侵井底蛙。【唱】我這裏啞詳罷。【云】不見天邊鴈。相侵井底蛙。嗨。這女孩兒那得活的人也可憐可憐。【唱】這孩兒敢死在黃泉下。這官司無頭無尾。那賊人難捉難拿。

【云】則除是這般張千把這婆子監下者。【張千云】理會的。【押卜兒下】【正末云】兀那劉天義。你休驚莫怕。我放了你。你今夜還去那店裏宿歇。若是那女子來呢。你問他那裏人。姓氏甚名誰。有甚信物要些來。我便饒你。【劉天義云】知道。我這一去好歹要些信物來。【正末唱】

【沽美酒】爲甚麼將原告人倒監押。哎你個被論人莫驚說。你與我還似  
昨宵臨臥榻。你可也若教得見他。用心兒討回話。

【太平令】我見他扭身子十分希詫。須是我賞發與一夜歡洽。嗜欲要兩  
家都罷。赤緊的我領得三朝嚴假。若事發教咱救拔。你穩情取功名科甲。  
【云】兀那秀才他不是人是箇鬼魂。【劉天義怕科】【正末唱】

【鴛鴦煞】我說破陰魂莫更潛身怕。只要你秀才肯做迷心耍。不須今夜  
遭囚。免了每日隨衙。暢道殺人賊不在海角天涯。我先知一箇七八。【帶云】  
【張千唱】你與我傳語他家將冤恨都銷化。到明朝管取擒拿。看那鬧市  
雲陽木驢上副。【下】

【張千同劉天義行科云】來到這獅子店裏。兀那秀才那間房兒是。【劉天義云】是這一間。  
【張千云】你自在這裏宿。我明早來討回話。【下】【劉天義云】天那兀的不說殺我也我則

道他是人誰想他是箇鬼可早三更了你聽那牆上土撲簌簌的房上瓦斷琅琅的兀的不  
說殺我也【做睡科】【旦魂子上云】我今夜再望那秀才走一遭去【見科】【旦云】秀才  
秀才【劉天義驚走】【旦扯住科】【劉天義云】你靠後說你是箇鬼【旦云】我不是鬼【劉  
天義云】如今包龍圖大人問你那裏人氏姓甚名誰【旦云】我是那家【劉天義云】那家  
可是那裏【旦云】在那家井裏【劉天義云】你有甚麼信物與我些【旦云】我髻邊有一朵  
嬌滴滴碧桃花你自取咱【劉取花旦閃下】【劉天義云】兀的不說殺我也當真是個鬼既  
然有了信物等不到天明便回包大人話去【詩云】分明見昨夜嬌娃取與我髻上桃花且  
休提上朝取應先說得膽戰身麻【下】

第四折

【正末上云】老夫包拯爲這件事用盡心力也呵【唱】

【中呂粉蝶兒】這些三時廢寢忘食眼睜睜一宵無寐坐早衙便待施爲喚



張千刑案裏喚該房司吏別公事且勿行提只那樁最耽干繫

【迎仙客】不由我心似痴意如迷那樁事不分箇虛共實好着我怎參詳  
難整理準備下六問三推快與我喚過來劉天義

【張千同劉天義上跪科】【正末云】兀那秀才你昨夜看見女子來麼【劉天義不語科】

【正末云】他怎生不言語張千你着他說【張千云】他還昏迷着哩【正末唱】

【快活三】偏前夜笑吟吟的似魚水今日箇戰兢兢的怕做夫妻正是得  
便宜翻做了落便宜教你試探那佳人的意

【朝天子】你可也盡知就裏昨夜箇正使着鴛鴦會【帶云】兀那秀才【唱】你  
從頭至尾說真實可怎生只恁的難分細我問在當廳無言抵對他和你  
可曾說來歷你明知是鬼怕他來纏你常言道愛他的着他的

【云】兀那秀才那女子誰氏之家姓甚名誰【劉天義云】他是那家【正末云】那家可是誰

家好。僉倖殺人也呵。【唱】

【紅繡鞋】那家居居住在東村西地。那家委實的姓甚名誰。這似般幾時得個分明白。你休得要硬抵諱。休得要假疑惑。我索合從頭推勘你。

【云】張千把這廝監下者。等他省時問他。【張押下】【正末云】張千拿過王慶來者。【張

千云】理會的。【拿王慶上見科】【正末云】兀那廝將翠鸞女分付與誰了也。【王慶云】老

相公教我領見夫人。夫人分付與王慶。王慶分付了李順也。【正末云】既然分付了李順。張

千拿將李順來者。【張千云】李順在逃了。【正末云】李順在逃。似此可怎了。張千且將王慶

拿在一邊者。【押王下】【正末云】張千。李順在逃。須有他家裏人。你去他家看去。或有溝

渠。或有池沼。若是有井呵。你就下去打撈。可是爲何。他道李順在逃。不在井裏。却那裏尋他。

【張千云】理會的。我出的這衙門來。轉過隅頭。抹過裏角。來到李順家裏。也無一箇人。我自

進去看來。到這院後。怎麼靜悄悄的好怕人也。我開開這後門。【做撞倒科云】有鬼有鬼。

【做起身科云】原來是這晒衣服的繩子。倒說我一跳。我是再看咱。這是一眼井。好包待制。通神真箇一眼井。我試看咱。怎麼這般臭氣。待我下去看。怎生下的去。可有這晒衣服的繩子。我解下來。一頭拴在井欄上。一頭料下去。我拽着繩子下去。井裏試看咱。【做下井看科云】這是一箇口袋。不知是甚麼東西。我將繩子拴住。等我出到井口上。我再拽上這繩子來。【做出井拽科云】拽上這口袋來了。不知是甚麼物件。須索將着見老爺去。【做背走】

【僚上扯住科】【張千云】是誰扯住我。【做回頭看科云】原來是箇小弟子孩兒。【做打僚兒下】

【行科云】可早來到府中也。【丟下口袋科云】稟爺。真個通神。是有一眼井。小的下去。打撈出這箇口袋來。不知是甚麼物件。老爺試看咱。【正末云】好好。這廝能幹事。你打開口袋我看。【張解開科】

【正末云】原來是個屍首。張千你喚那婆子來教他認。【張千喚科】

【卜兒上認云】大人。這屍首不是俺女兒。是一個有髭鬚的。【正末云】張千。你怎生撈將一箇有髭鬚的屍首來。【張千云】老爺。這是井裏的。小的怎生知道。【正末唱】

【剔銀燈】聽說道荆棘列半日。猛覷了呆打顫一會。兀那婆婆。不是你女孩兒身軀殼。且別尋覓這一箇尸首。可是誰的。兀那婆婆。你休瞞我。我問你這尸首如何不識。

【卜兒云】相公。這尸首不是俺女兒的。【正末云】張千。你在誰家井裏撈出這尸首來。【張千云】我在李順家井裏打撈出來的。【正末唱】

【蔓菁菜】可則去李順家裏訪踪跡。【帶云】張千。我再問你。【唱】你下井去井根底。那時節有誰人見你。【張千云】小的不曾見甚麼人。去到李順家後院內。見一眼井。下的井去。撈出這尸首來。我背着便走。哦。小的想起來了。我見箇小廝來。【正末云】張千。兀的不有了也。【唱】則去那小廝根前取箇真實。十共九知詳細。

【云】張千。你去尋將那小廝來。【張千云】理會的。那小廝走了呵。怎生是好。我出的這衙門來。走了一會。我依舊到李順家後院看咱。這是口井。【見俚兒云】兀的不是那小廝。你還在

這裏我背着你見老爺去來。【做背徠行科云】早到了也。稟爺。這便是那小廝。【正末云】張千休驚誑着他。你看這小廝到這開封府裏誑的他眼腦剔抽禿刷的。兀那小廝你近前來。我問你咱是誰家的。【徠打手勢科】【正末云】這小廝是箇啞子。張千你怎生尋了個啞子來。【張千云】這便是李順家裏住的。小的怎生知道他是啞子。【正末云】那小的你雖然啞。你心裏須明白。你認那尸首咱。【徠兒見尸哭科】【正末云】好可憐人也。【唱】

【乾荷葉】你猛見了痛傷悲。兀的不有蹺蹊。【云】兀那小的。我問你咱這個是你甚麼人。【徠打手勢科】【正末云】似這般可怎生是好。【唱】好教我不解其中意。起初道眼迷奚。他如今則把手支持。真箇是啞子做夢說不的。落可便悶的人心碎。

【云】那小的。我如今問你。若問的是你。便點頭。若不是你。便擺手。你記着。【徠做聽科】【正末問云】這個敢是你叔叔。【徠擺手科】【正末云】是你伯伯。【徠擺手科】【正末云】是你

父親【俛點頭就拜科】【正末云】原來是你父親。兀那小的誰殺了你那父親來。【俛打手勢科】【正末云】是一條大漢拽起衣服扯出刀來殺了你父親丟在井裏好可憐人也。兀那小的我再問你咱【唱】

【上小樓】兒也你親娘如今在那裏。【俛指科】【正末唱】他可又不知端的。似這般殺壞平人怎生乾休。他待至死無對。【俛拖住張千科】【張慌科】【正末云】兀那小的莫不是張千殺了你父親來。【俛擺手科】【正末云】哦我知道了。兀那小的【唱】你待要共張千相尋相覓。【張千云】我和你同出去尋你娘來。【俛點頭科】【張千云】則被你說殺我也。【正末唱】也是你爲爺娘孝當竭力。

【云】張千你和他尋去。【張千云】理會的。兀那小的我和你尋去。出的這門來往那裏尋他去。【搽旦帶酒上云】他吃了幾盃酒醉了也。【俛扯科】【張千云】這正是那婦人。【張千打科】【搽旦云】哥哥哥哥你爲甚麼打我。【張千云】開封府裏勾喚你哩。【搽旦云】我又無罪

過我去見便了。【同見末科】搽旦云：相公，我又無罪過，喚我來做甚麼？【正末云】這婆娘兀的不醉了也。兀那婦人，你認的那尸首麼？【搽旦認假哭科云】兀的不是我丈夫李順，怎生死了來？【正末云】兀那婦人，你丈夫死了，你須知道。【搽旦云】不知怎生死了俺丈夫來。【正末唱】

【滿庭芳】你休推東主西，可甚麼三從四德，那些箇家有賢妻。若是拋一塊瓦兒，須要着田地，你與我快說真實。【云】兀那婦人，我問你咱，你在家呵？【唱】決有些嗔忿忿，眉南面北。【搽旦云】俺兩口兒並不曾。【正末唱】你莫不氣沖沖，話不投機。【搽旦云】俺夫妻最說的着。【正末唱】你休則管裏胡支對，我當廳問你。【帶云】我不問你別的。【唱】則問你誰是殺人賊。

【云】兀那小的，誰殺了你父親來？【俛依前比手勢科】【正末云】你認的那個人麼？【俛點頭科】【正末云】張千將這一行人提在一壁，押過那秀才來。【張押劉天義上見科】【正

末云。兀那劉天義我教你夜來問那女子個詳細。要他一件信物。你又不將來。這官司都問在你身上。【劉天義云】大人。我劉天義問他要一件信物來了。【正末云】是甚物件。【劉天義云】是一朵嬌滴滴碧桃花。【正末云】將來我看。【劉懷中取出正末接看科云】原來是一根桃符。上寫着長命富貴。這殺人賊有了也。【唱】

【倘秀才】我則道殺人賊不知在那壁。則他這翠鸞女却元來在這裏。他門定桃符辟邪祟。增福祿。畫鍾馗。知他甚娘報門神戶尉。

【呆骨朵】兀的是自作自受。身當罪。【云】張千。【唱】你把殺人賊快與我勾追。【張千云】着小的去勾喚誰。【正末唱】你排門兒則尋那宜入新年。我手裏現放着長命富貴。這言語表出人凶吉。這桃符泄漏春消息。怎瞞那掌東嶽。速報司。和這判南衙。包待制。

【云】張千。你將這一根桃符與我尋對那一根兒去。【張千云】理會的我出的這門來。轉過



隅頭抹過裏角來到這飯店門首桃符都有來到獅子店門首我試看咱可怎生則有宜入  
新年一個無那長命富貴我將這一根比咱【做比科云】正是一對兒我都拿着見老爺去  
來【做見科云】稟爺桃符有了也【正末云】是那裏的【張千云】在獅子店門首【正末云】  
你與我到獅子店左右看去若有井便下去打撈必有下落【張千云】我出的衙門來早到  
店中也呀後面真個一眼井我下去打撈咱【做撈尸首上科云】又一個尸首我將的見老  
爺去【見科云】稟爺又一個尸首【正末云】教那婆子來認【卜兒上】【正末云】兀那婆婆  
你認那尸首【唱】

【倘秀才】這潑官司連累着我哩敢是這尸首又不是你的【卜認科云】大  
人這尸首正是我女孩兒的【正末云】既是呵張千你去將那店小二一步一棍打將來者【張  
千云】理會的【做拿小二打上見科】【正末云】兀那廝從實說你怎生所算了這女孩兒來你  
若說的是萬事罷論若是說的不實呵張千準備下大棍子者【小二云】是我殺了來【正末

云】這殺人賊既有了【唱】那王慶如何肯招罪【云】張千【唱】你去喚王慶至堦基。試聽我省會。

【云】張千與我拿過王慶來【王慶上云】喚我做甚麼【正末云】王慶你歡喜麼這殺人賊有了也不干你事你回去罷【王慶云】可道不是我我回家去來【王走俵上扯住科】【正末云】兀那小的莫不是他殺你父親來【俵打手勢科云】正是他與俺母親如此如彼做出來的【正末云】這廝可不啞了張千與我拿下王慶者【唱】

【滾繡毬】我則道連累着我便教放了你。你可在那壁廂不伶不俐。常言道天網恢恢。你則待廝摘離。暗歡喜對清官磕牙料嘴。古自道無憂愁無是無非。怎想這金風未動蟬先覺。暗送無常死不知。準備着拷打凌遲。

【云】張千你領着這一行人跟着我見廉訪大人去來【同下】【趙廉訪引祇從上云】事不關心。關心者亂。我教包府尹問那件事。今三日光景。怎生不見來回話【正末引衆上見科】

【趙廉訪云】包府尹那事體如何。【正末云】小官問成了也。誰想一樁事問做兩樁事。【趙廉訪云】你說我聽。【正末唱】

【伴讀書】告相公自知會。這都是王慶把詞因起。他共李順渾家姦情密。教平人正中拖刀計。把兒夫殺在黃泉內。強嚇了休離。

【趙廉訪云】這一件可是怎麼。【正末唱】

【笑和尚】是是是這一箇開店的。他他他強要人妻室。嗨嗨嗨想這廝狠。情理我我我論到底。休休休待推辭。來來來索請夫人敢與這招伏罪。

【趙廉訪云】這樁事元來如此。我盡知了也。一行人聽老夫下斷。【詞云】果然是包待制剖決精明。便奏請加原職三級高陞。王婆婆可憐見賞銀千兩。劉天義准免罪進取功名。翠鸞女收骸骨建墳營葬。還給與黃籙醮超度陰靈。這福童着開封府富民恩養。店小二發市曹明正典刑。因王慶平日間姦淫張氏。假官差謀李順致喪幽冥。這兩個都不待秋後取決。纔

見的官府內王法無情。便着寫榜文去四門張掛。諭知我軍民共如右施行。【正末謝科】

【唱】

【煞尾】他則待明明將計策施。不承望暗暗的天地知。今日個勘成了因  
姦致命一兇賊。還報了這負屈銜冤兩怨鬼。

題目 老廉訪恩賜翠鸞女

正名 包待制智勘後庭花

包龍圖智勘後庭花雜劇終

# 看錢奴買冤家債主

楔子

【正末扮周榮同旦兒張氏俵兒上云】小生汴梁曹州人氏。姓周名榮祖。字伯成。渾家張氏。孩兒長壽。小生先世廣有家財。因祖父周奉記。敬重釋門。起蓋一所佛院。每日看經念佛。祈保平安。至我父親。一心只做人家。爲修理宅舍。這木石磚瓦無處取辦。遂將那所佛院盡毀。廢了。比及宅舍工完。我父親得了一病。百般的醫藥無效。人皆以爲不信佛教之過。我父親亡後。家私裏外都是小生掌把。小生學成滿腹詩書。現今黃榜招賢。開放選場。大嫂我待要應舉。走一遭去。你意下如何。【旦兒云】秀才不知好着俺領了長壽孩兒。一路同去麼。【正末云】這也使的。大嫂有俺那祖財攜帶不去。且埋在後面牆下。房廊屋舍。着行錢看守着。俺和你帶了孩兒上朝取應去。但得一官半職。改換家門。可不好也。【旦兒云】旣如此便當

收拾行李隨你同去則個【正末云】大嫂想俺祖上信佛俺父親偏不信佛到今日都有報應也呵【唱】

【仙呂賞花時】也曾將釋典儒宗細講習無非是積善脩心爲第一則俺這家豪富祖先積他爲甚施仁布德也則要博一個孝子和賢妻

【幺篇】可不道湛湛青天不可欺舉意之前悔後遲空內有神祇【帶云】俺父親呵【唱】不合興心兒折毀今日個客路裏怨他誰【同下】

第一折

【外扮靈派侯領鬼力上詩云】赫奕丹青廟貌隆大分五岳鎮西東時人不識陰功大但看香烟散滿空吾神乃東嶽殿前靈派侯是也。想東嶽泰山者羣仙之祖萬峯之尊天地之孫神靈之祚在于兗州地分古有金輪皇帝妻乃瀾輪仙女夜夢吞二日覺而有孕所生二子長曰金虹氏次曰金蟬氏金虹氏乃東嶽聖帝是也聖帝在長白山有功封爲古歲太嶽真

人漢明帝時封爲泰山元帥。管十八地獄七十四司生死之期。自唐虞三代。歷秦漢以來。有都天府君之位。在唐武后垂拱三年。七月初一日。封爲東嶽之神。至開元十三年。加爲天齊王。宋眞宗朝。封爲東嶽天齊大生神聖帝。這的是天地循環。周而復始。便好道不孝。謾燒千束紙。虧心空爇萬爐香。神靈本是正直做。不受人間枉法賊。如今陽世有一人。乃是賈仁。此人在吾神廟中埋天怨地。告訴神明。只說不憐愍他。想他今日必然又來告訴。吾神自有個顯應。這早晚敢待來也。〔淨扮賈仁上。詩云。〕又無房舍又無田。每日城南窰裏眠。一般帶眼安眉漢。何事手中偏沒錢。小可曹州人氏。賈仁的便是。幼年間父母雙亡。別無甚親眷。則我單身獨自。人見我十分過的艱難。都喚我做窮賈兒。想人生世間。有那等富貴奢華。喫好的穿好的。用好的。他也是一世人。偏賈仁喫了那早起的無那晚夕的。每日燒地眠。炙地臥。衣不遮身。食不充口。可也是一世人。天那。你也睜開眼波。兀的不窮殺賈仁也。我每日家不會做甚麼營生。則是與人家挑土築牆。和泥托坯。擔水運漿。做全工生活度日。到晚來在那

破窖中安身今日替人家打着一堵兒牆打起半堵兒只爲氣力不加還有半堵兒牆不會打的。我如今困乏了且歇一歇這裏有一所東嶽靈派侯廟我去那廟中訴我這苦楚去。天那兀的不窮殺賈仁也。【做到廟跪科云】我也無那香只是捻土爲香禱告神靈可憐見小人是賈仁想有那等騎鞍壓馬穿羅着錦喫好的用好的他也是一世人我賈仁也是一世人偏我衣不遮身食不充口喫了早起的無那晚夕的燒地眠炙地臥窮殺賈仁也。上聖但有些小富貴我也會齋僧布施蓋寺建塔修橋補路惜孤念寡敬老憐貧我可也捨的則是聖賢可憐見我說話中間覺得身體有些困倦我且在這虛簷下暫時歇息咱。【做睡倒科】

【靈派侯云】鬼力與我攝過賈仁來者。【問云】兀那賈仁你爲何在吾神廟中埋天怨地怪恨神靈你主何緣故。【賈仁做拜科云】上聖可憐見小人怎敢埋天怨地我想賈仁生于人世之間衣不遮身食不充口喫了早起的無那晚夕的燒地眠炙地臥窮殺賈仁也。上聖可憐見但與我些小衣祿食祿我賈仁也會齋僧布施蓋寺建塔修橋補路惜孤念寡敬老憐



貧。我可也捨的。上聖則是可憐見咱。〔靈派侯云〕這樁可是增福神該管。鬼力與我喚的增福神來者。〔正末扮增福神上云〕小聖增福神是也。掌管人間生死貴賤。高下六科長短之事。十八地獄。七十四司。我想塵世人心性迷癡。不知爲善。只看那柰河潺潺金橋之上。並無一人也呵。〔唱〕

〔仙呂點絳脣〕這等人輕視貧乏。不恤鰥寡。天生下一種姦猾。將神鬼都瞞誑。

〔正末云〕常言道。人間私語。天聞若雷。暗室虧心。神目如電。信有之也。〔唱〕

〔混江龍〕你休要虛貪聲價。但存的那心田一寸。是根芽。不肯道甘貧守分。都則待僥倖成家。自拏着殺子殺孫笑裏刀。怎留的好兒好女眼前花。你則看那陽間之事。正和俺陰府無差。明明折挫。暗暗消乏。這等人動則是忘人恩。背人義。昧人心。管甚麼敗風俗。殺風景。傷風化。怎能勾長享着。

肥羊法酒異錦的這輕紗

【做見科云】上聖呼喚小神有何法旨【靈派侯云】今陽世間有一賈仁每日在吾廟中埋天怨地怪恨俺神靈你與我問他去【正末云】理會的【做問科云】兀那賈仁是你怪恨俺這神靈來麼【賈仁云】上聖可憐見俺賈仁怎敢怪恨您這神靈我則說世上有那等富貴的人有衣穿有食喫又有錢鈔使他也是一個人偏我賈仁衣不遮身食不充口喫了早起的無那晚夕的燒地眠炙地臥兀的不窮殺賈仁也則怨我小人的命薄怎敢埋天怨地上聖可憐見但與我些小衣祿食祿我也會齋僧布施蓋寺建塔修橋補路惜孤念寡敬老憐貧我可也捨的上聖則是可憐見咱【正末云】噤聲【回云】上聖此人平日之間不敬天地不孝父母毀僧謗佛殺生害命當受凍餓而死上聖管他做甚麼【靈派侯云】尊神則怕注的他這衣祿食祿差了麼【正末唱】

【油葫蘆】那一個紅臉兒的閻王不是耍捏胎兒依正法則他注生的分

數幾曾差。這等人向官員財主裏難安插。好去那驢騾狗馬裏剛投下。又不曾將他去油鍋裏燻。又不曾將他去劍樹上殺。據着那阿鼻地獄天來。大但得個人身體便可也不虧他。

【靈派侯云】尊神論此等人在世不知怎生貪財好賄害衆成家也。【正末唱】

【天下樂】這等人何足人間掛齒牙。他前世裏奢華那一片貪財心沒亂煞。則他油鍋內見錢也去搗。富了他這一輩人窮了他那數百家。今世裏受貧窮還報他。

【賈仁云】上聖休聽增福神說。念小人不是這樣人。也是個看經念佛喫齋把素行善事的。人上聖怎生可憐見。與小人些小富貴可也好也。【正末云】你這廝平昔之間紐曲作直。拋撒五穀傷殘物命。害衆成家。你怎生能勾發跡那。【靈派侯云】尊神此人前生拋撒淨水。作賤五穀。既然這等。今世凍死餓死也不爲過。【正末唱】

【那吒令】你前世裏造下。今世裏折罰。前世裏狡猾。今世裏叫化。前世裏拋撒。今世裏餓殺。【賈仁云】我平昔間也是個敬天地。尊法度。和弟兄睦六親。信佛法。禮三光。孝父母。不偷盜。我是個心慈好善的人。現如今喫長齋哩。上聖但是與我些小富貴。我做本分營生買賣去也。【正末唱】你使的是造惡心。但說的是虧心話。不肯做本分生涯。

【靈派侯云】正是虧心折盡平生福。行短天教一世貧。吾神自有點檢。怎瞞的過也。【正末唱】

【鵲踏枝】虧心也儘由他。造惡也怎瞞咱。上面有湛湛青天。下面有漫漫黃沙。請上聖鑒察。枉將他救拔。俺可便管他甚貧富窮達。

【賈仁云】上聖我爺娘在時也。還奉養他好好的。從亡化之後。不知甚麼緣故。顛倒一日窮一日了。我也在爺娘墳上燒錢烈紙。澆茶奠酒。我這淚珠兒至今不會乾。至是一個孝順的。

人【正末云】噤聲【唱】

【寄生草】你爺娘在生時耽饑餓。死了也奠甚茶。則您那淚珠兒滴盡空瀟灑。瀟灑了些漿水飯。那裏肯道停時霎。巴的那紙錢灰燒過無牽掛。你可便澆了那百壺漿也濕不透墓門前。澆的那千鍾茶怎流得到黃泉下。

【靈派侯云】尊神。這等窮兒乍富。瞞心昧己。欺天誑地。只要損別人安自己。正是一世兒不能勾發跡的。【正末唱】

【六么序】這人沒錢時無些三話。纔的有便說誇。打扮似大戶豪家。你看他聳起肩胛。迸定鼻凹。沒半點和氣謙洽。每日在長街市上把青驄跨。只待耍弄柳拈花。馬兒上紐捏着身子兒詐。做出那般般樣勢。種種村沙。

【么篇】則說街狹。更嫌人雜。把玉勒牢拿。玉鞭忙加。攬行花踏。喧喧嘩嘩。問甚麼先達。那肯道攀鞍下馬。直將窮民來傲慢殺。【賈仁云】上聖。我賈仁不

是這等人。你但與我些小富貴。我也會和街坊敬隣里。識尊卑。知上下。只願上聖可憐見咱。〔正末唱〕他雖則消乏。也是你隣家。須索將禮數酬答。則你那自尊自貴無高下。真乃是井底鳴蛙。似這等待窮民肚量些。兒大則你那酸寒乞儉。怎消得富貴榮華。

〔靈派侯云〕尊神據着賈仁埋天怨地。正當凍死餓死。便好道天不生無祿之人。地不長無名之草。吾等體上帝好生之德。權且與他些福力咱。〔正末云〕既如此。待小聖看去波。〔做看科云〕上聖據着這厮正當凍死餓死。今奉上聖法旨。權且借些福力與他。看的有曹州曹南周家莊上。他家福力所積陰功三輩。爲他一念差池。合受折罰。我如今將那家的福力。權且借與他二十年。待到二十年後。着他雙手兒交還本主便了。〔靈派侯云〕這個使的。〔正末云〕兀那賈仁。〔賈仁做應科〕〔正末云〕你本當凍死餓死。上聖可憐見。借與你些福力。今有曹州曹南周家莊上。所積陰功三輩。只因一念差池。合受折罰。我如今將那家福力。

權且借與你二十年。待到二十年後。你兩隻手兒交付還他那本主。你記者。比及你去呵。索錢的可早等着你也。【賈仁做拜謝科云】謝上聖濟拔之恩。我便做財主去也。【正末云】噤聲。【唱】

【賺煞】則你這成家子未安身。那一個破家鬼先生下。【賈仁云】我若做了財主呵。穿一架子好衣服。騎着一匹好馬。去那三山骨上。贈上他一鞭。那馬不刺刺。【正末云】做甚麼。【賈仁云】沒我則這般道。【正末做笑科唱】我則是借與你那錢龍兒入家。有限次的光陰。你權掌把。【賈仁云】上聖可憐見。不知借與我幾十年。【正末唱】我則是借與你二十年。仍舊還他。【賈仁云】上聖。怎麼可憐見。則借得小人二十年。左右是個小字兒。高處再添上一劃。借得我三十年可也好也。【正末云】噤聲。這廝還不足哩。【唱】你還待告增加。怎知這禍福無差。貧和富都是前緣。非浪假。爲甚麼桃花向二三月奮發。菊花向九秋開罷。【帶云】你道爲甚麼那。【唱】也則爲這天公不放

一時花。

【靈派侯云】兀那賈仁。據着你正當凍死餓死。吾神體上帝好生之德。權且借與你二十年福力。二十年之後。交還與那本主。便好道善有善報。惡有惡報。不是不報。時辰未到。天若不降嚴霜。松柏不如蒿草。神明若不報應。積善不如作惡。莫瞞天地。莫瞞心。心不瞞時。禍不侵。十二時中行好事。災星變做福星臨。【做揮手科云】賈仁。你休推睡裏夢裏。【並下】。【賈仁做醒科云】哎呀。一覺好睡也。原是南柯一夢。恰纔上聖分明的對我說。曹州曹南周家莊上的福力。借與我二十年。我如今便做財主。財主也。知他在那裏。便好道夢是心頭想。信他做甚麼。還有半堵牆兒不曾打的哩。我可去打那半堵牆兒去。天那兀的不窮殺賈仁也。

【下】

第一一折

【外扮陳德甫上。詩云】耕牛無宿料。倉鼠有餘糧。萬事分已定。浮生空自忙。小可姓陳雙名。



德甫乃本處曹州曹南人氏。幼年間攻習詩書頗親文墨。不幸父母雙亡。家道艱難。因此將儒業廢棄。與人家做個門館先生。度其日月。此處有一人是賈老員外。有萬貫家財。鴉飛不過的田產物業。油磨坊解典庫。金銀珠翠。綾羅緞疋。不知其數。他是個巨富的財主。這裏可也無人。一了他一貧如洗。專與人家挑土築牆。和泥托坯。擔水運漿。做盆工生活。常是喫了那早起的無那晚夕的人。都叫他做窮賈兒。也不知他福分生在那裏。這幾年間暴富起來。做下潑天也似家私。只是那員外雖然做個財主。爭奈一文也不使。半文也不用。別人的東西恨不得孽手奪將來。自己東西捨不的與人。若與人呵。就心疼殺了也。小可今日正在他家坐館。這館也不是教學的館。無過在他解典庫裏上些帳目。那員外空有家私。寸男尺女皆無。數次家常與小可說街市上。但遇着賣的。或男或女。尋一個來與我兩口兒喂眼。小可已曾分付了店小二。着他打聽着。但有呵便報我知道。今日無甚事。到解典庫中看看去。〔下〕

〔淨扮店小二上。詩云〕酒店門前三尺布。人來人往圖主顧。做下好酒一百缸。倒有九

十九缸似頭醋。自家店小二的便是。俺這酒店是賈員外的。他家有個門館先生。叫做陳德甫。三五日來算一遭帳。今日下着這般大雪。我做了一缸新酒。不供養過不敢賣。待我供養上三盃酒。〔做供酒科云〕招財利市土地。俺這酒一缸勝是一缸。俺將這酒帘兒掛上。看看有甚麼人來。〔正末周榮祖領旦兒傑兒上云〕小生周榮祖嫡親的三口兒家屬。渾家張氏孩兒長壽。自應舉去後。命運未通。功名不遂。這也罷了。豈知到的家來。事事不如意。連我祖遺家財。埋在牆下的。都被人盜去。從此衣食艱難。只得領了三口兒去洛陽探親。圖他救濟。偏生這等時運。不遇而回。正值暮冬天道。下着連日大雪。這途路上好苦楚也呵。〔旦兒云〕秀才似這等大風大雪。俺每行動些兒。〔傑兒云〕爹爹凍餓殺我也。〔正末唱〕

【正宮端正好】赤緊的路難通。俺可也家何在。休道是乾坤老山也頭白。似這等凍雲萬里無邊屆。肯分的俺三口兒離鄉外。

〔帶云〕大嫂。你看好大雪也。〔唱〕

【滾繡毬】是誰人碾瓊瑤。往下篩。是誰人翦冰花。迷眼界。恰便是玉琢成。六街三陌。恰便似粉粧。就殿閣樓臺。【帶云】似這雪呵。【唱】便有那韓退之。藍關前冷。怎當。便有那孟浩然。驢背上也跌下來。【帶云】似這雪呵。【唱】便有那剡溪中。禁回他子猷。訪戴。則俺這三口兒。兀的不凍倒塵埃。【做寒戰科。帶云】勿勿勿。【唱】眼見的一家受盡千般苦。可甚麼十謁朱門九不開。委實難捱。

【旦兒云】秀才似這般風。又大雪。又緊俺且去那裏避一避。可也好也。【正末云】大嫂俺到那酒務兒裏避雪去來。【做見科。云】哥哥支揖。【店小二云】請家裏坐喫酒去。秀才你那裏人氏。【正末云】哥哥我那得那錢來買酒喫。小生是個窮秀才。三口兒探親去來。不想遇着一天大雪。身上無衣。肚裏無食。一逕的來這裏避一避兒。哥哥怎生可憐見咱。【店小二云】那一個頂着房子走哩。你們且進來避一避兒。【正末做同進科。云】大嫂你看這雪越下

的緊了也〔唱〕

〔倘秀才〕餓的我肚裏饑失魂喪魄。凍的我身上冷無顏落色。這雪呵偏向俺窮漢身邊亂灑來。〔帶云〕大嫂〔唱〕你看雪深埋脚面。風緊透人懷。我忙將這孩兒的手揣。

〔店小二做歎科云〕你看這三口兒身上無衣。肚裏無食。偌大的風雪。到俺店肆中避避。那裏不是積福處。我早晨間供養的利市酒三鍾兒。我與那秀才鍾喫。兀那秀才俺與你鍾酒喫。〔正末云〕哥哥。我那裏得那錢鈔來買酒喫。〔店小二云〕俺不要你錢鈔。我見你身上單寒。與你鍾酒喫。〔正末云〕哥哥說不要小生錢。則這等與我鍾酒喫。多謝了哥哥。〔做喫酒科云〕好酒也。〔唱〕

〔滾繡球〕見哥哥酒斟着磁盞臺。香濃也勝琥珀。哥哥也。你莫不道小人現錢多賣。問甚麼新釀茅柴。〔帶云〕這酒呵。〔唱〕賽中山宿醞開。笑蘭陵高

價擡不枉了喚做那鳳城春色。〔帶云〕我飲一盃呵。〔唱〕恰便似重添上一件  
綿帛。〔帶云〕這雪呵。〔唱〕似千團柳絮隨風舞。〔帶云〕我恰纔嚙下這盃酒去呵。〔唱〕  
可又早兩朵桃花上臉來。便覺的和氣開懷。

〔旦兒云〕秀才恰纔誰與你酒喫來。〔正末云〕是那賣酒的哥哥。見我身上單寒。可憐見我  
與了我鍾酒喫。〔旦兒云〕我這一會兒身上寒冷不過。你怎生問那賣酒的討一鍾酒兒與  
我喫可也好也。〔正末云〕大嫂羞人答答的教我怎生問他討酒喫。〔做對店小二揖科云〕  
哥哥我那渾家問我那裏喫酒來。我便道賣酒的哥哥。見我身上單寒。與了我一鍾酒兒喫。  
他便道我身上冷不過。怎生再討得半鍾酒兒喫。可也好也。〔店小二云〕你娘子也要鍾酒  
喫來來來。俺捨這鍾酒兒與你娘子喫罷。〔正末云〕多謝了哥哥。大嫂我討了一鍾酒來你  
喫你喫。〔俵兒云〕爹爹我也要喫一鍾。〔正末云〕兒也。你着我怎生問他討那。〔又做揖科  
云〕哥哥。我那孩兒道。爹爹。你那裏得這酒與妳妳喫來。我便道那賣酒的哥哥。又與了我

一鍾兒喫我那孩兒便道。怎生再討的鍾兒我喫可也好也。【店小二云】這等你一發搬在俺家中住罷。【正末云】哥哥那裏不是積福處。【店小二云】來來來俺再與你這一鍾兒酒。【正末云】多謝了哥哥。孩兒你喫你喫。【店小二云】比及你這等貧呵。把這小的兒與了人家可不好。【正末云】我怕不肯。但未知我那渾家心裏何如。【店小二云】你和你那娘子商量去。【正末云】大嫂恰纔那賣酒的哥哥道。似你這等饑寒。將你那孩兒與了人可不好。【旦兒云】若與了人倒也強似凍餓死了。只要那一分人家養的活。便與他去罷。【正末做見店小二云】哥哥俺渾家肯把這個小的與了人家也。【店小二云】秀才你真個要與人。【正末云】是與了人罷。【店小二云】我這裏有個財主要我如今領你去。【正末云】他家裏有兒子麼。【店小二云】他家兒女並沒一個兒哩。【正末唱】

【倘秀才】賣與個有兒女的是孩兒命衰。賣與個無子嗣的是孩兒大采。撞着個有道理的爹娘呵。是孩兒修福來。【帶云】哥哥【唱】你救孩兒一身

苦強似把萬僧齋越顯的你個哥哥敬客。

【店小二云】既是這等。你兩口兒則在這裏。我叫那買孩兒的人來。【做向古門叫科云】陳先生在家麼。【陳德甫上云】店小二。你喚我做甚麼。【店小二云】你前日分付我的事。如今有個秀才要賣他小的。你去看去。【陳德甫云】在那裏。【店小二云】則這個便是。【陳德甫做看科云】是一個有福的孩兒也。【正末云】先生支揖。【陳德甫云】君子恕罪。敢問秀才那裏人氏。姓甚名誰。因何就肯賣了這孩兒。【正末云】小生曹州人氏。姓周名榮祖。字伯成。因家業凋零。無錢使用。將自己親兒情願過房與人爲兒。先生。你可作成小生咱。【陳德甫云】兀那君子。我不要這孩兒。這裏有個賈老員外。他寸男尺女皆無。若是要了你這孩兒。他有潑天也似家緣家計。久後都是你這孩兒的。你跟將我來。【正末云】不知在那裏住。我跟將哥哥去。【旦兒同僚兒下】。【店小二云】他三口兒跟的陳先生去了也。待我收拾了鋪面。也到員外家看看去。【下】。【賈仁同卜兒上云】兀的不富貴殺我也。常言道。人有七貧八富。

信有之也。自家賈老員外的便是。這裏也無人。自從與那一分人家打牆。鉋出一石槽金銀來。那主人家也不知道。都被我悄悄的搬運家來。蓋起這房廊屋舍。解典庫。粉房。磨房。油房。酒房。做的生意。就如水也似長將起來。我如今旱路上有田。水路上有船。人頭上有錢。那一個敢叫我做窮賈兒。皆以員外呼之。但是是一件。自從有這家私。娶的個渾家。也有好幾年了。爭奈寸男尺女皆無。空有那鴉飛不過的田產。教把那一個承領。【做歎科云】我平昔間一文也不使。半文也不用。我可不知怎生來這麼慳吝苦尅。若有人問我要一貫鈔呵。哎呀。就如挑我一條筋相似。如今又有一等人。叫我做慳賈兒。這也不必題起。我這解典庫裏有一個門館先生。叫做陳德甫。他替我家收錢舉債。我數番家分付他。或兒或女。尋一個來。與我兩口兒喂眼。【卜兒云】員外你既分付了他。必然訪得來也。【賈仁云】今日下着偌大的雪。天氣有些寒冷。下次小的。每少少的釀些熱酒兒來。則撕隻水鷄腿兒來。我與婆婆喫一鍾波。【陳德甫同正未旦兒傑兒上云】秀才。你且在門首等着。我先過去與員外說知。【做見



科【賈仁云】陳德甫我數番家分付你教你尋一個小的怎這般不會幹事【陳德甫云】員外且喜有一個小的哩【賈仁云】有在那裏【陳德甫云】現在門首【賈仁云】他是個甚麼人【陳德甫云】他是個窮秀才【賈仁云】秀才便罷了甚麼窮秀才【陳德甫云】這個員外有那個富的來賣兒女那【賈仁云】你教他過來我看【陳德甫出云】兀那秀才你過去把體面見員外者【正末做揖科云】先生你須是多與我些錢鈔【陳德甫云】你要的他多少這事都在我身上【正末云】大嫂你看着孩兒我見員外去也【做入見科云】員外支揖【賈仁云】兀那秀才你那裏人氏姓甚名誰【正末云】小生曹州人氏姓周名榮祖字伯成【賈仁云】住了我兩個眼裏偏生見不的這窮廝陳德甫你且着他靠後些餓虱子滿屋飛哩【陳德甫云】秀才你依着員外靠後些他那有錢的是這等性兒【正末做出科云】大嫂俺這窮的好不氣長也【賈仁云】陳德甫噲要買他這小的也索要立一紙文書【陳德甫云】你打個稿兒【賈仁云】我說與你寫立文書人周秀才因爲無錢使用口食不敷難以

度日情願將自己親兒某人年幾歲賣與財主賈老員外爲兒。【陳德甫云】誰不知你有錢。只叫員外勾了。又要那財主兩字做甚麼。【賈仁云】陳德甫是你擡舉我哩。我不是財主。難道叫我窮漢。【陳德甫云】是是是財主財主。【賈仁云】那文書後頭寫道當日三兩言定。付價多少。立約之後。兩家不許反悔。若有反悔之人。罰寶鈔一千貫。與不悔之人使用。恐後無憑。立此文書。永遠爲照。【陳德甫云】是了。反悔之人。罰寶鈔一千貫。他這正錢可是多少。【賈仁云】這個你莫要管我。我是個財主。他要的多少。我指甲裏彈出來的。他可也喫不了。【陳德甫云】是是是。我與那秀才說去。【做出科云】秀才員外着你立一紙文書哩。【正末云】哥哥可怎生寫那。【陳德甫云】他與你個稿兒。今有過路周秀才。因爲無錢使用。將自己親兒。年方幾歲。情願賣與財主賈老員外爲兒。【正末云】先生。這財主兩字也不消的上文書。【陳德甫云】他要這等寫。你就寫了罷。【正末云】便依着寫。【陳德甫云】這文書不。打緊。有一件要緊。他說後面寫着。如有反悔之人。罰寶鈔一千貫。與不反悔之人。【正末云】先

生那反悔的罰寶鈔一千貫。我這正錢可是多少。【陳德甫云】知他是多少。秀才你則放心。恰纔他也曾說來。他說我是個巨富的財主。要多少。他指甲裏彈出來的。着你喫不了哩。【正末云】先生說的是將紙筆來。【旦兒云】秀才。啗這恩養錢。可會議定多少。你且慢寫着。【正末云】大嫂。恰纔先生不說來。他是個巨富的財主。他那指甲裏彈出來的。俺每也喫不了。則管裏問他多少。怎的。【唱】

【滾繡球】我這裏急急的研了墨濃。便待要輕輕的下了筆劃。【傑兒云】爹爹你寫甚麼哩。【正末云】我兒也。我寫的是借錢的文書。【傑兒云】你說借那一個的。【正末云】兒也。我寫了可與你說。【傑兒云】我知道了也。你在那酒店裏商量。你敢要賣了我也。【正末唱】呀。兒也。這是我不得已無如之奈。【傑兒做哭科云】可知道無奈。則是活便一處活。死便一處死。怎下的賣了我也。【正末哭云】呀。兒也。想着俺子父的情呵。【唱】可着我班管難擡。這孩兒情性乖。是他娘腸肚摘下來。今日將俺這子父情可都

撇在九霄雲外。則俺這三二口兒生挖扎兩處分開。【旦兒云】怎下的撇了我這親兒兀的不痛殺我也。【正末哭唱】做娘的傷心慘慘刀剗腹。做爹的滴血簌簌淚滿腮。恰便似郭巨般活把兒埋。

【做寫科云】這文書寫就了也。【陳德甫云】周秀才你休煩惱。我將這文書與員外看去。【做入科云】員外他寫了文書也。你看。【賈仁云】將來我看。今有立文書人周秀才。因為無錢使用口食不敷。難以度日。情願將自己親兒長壽年七歲。賣與財主賈老員外為兒。寫的好寫的好。陳德甫你則叫那小的過來。我看看咱。【陳德甫云】我領過那孩兒來與員外看。【見正末云】秀才員外。要看看你那孩兒哩。【正末云】兒也。你如今過去。他問你姓甚麼。你說我姓賈。【傑兒云】【我姓周】【正末云】姓賈。【傑兒云】便打殺我也。則姓周。【正末哭科云】兒也。【陳德甫云】我領這孩兒過去。員外。你看好個孩兒也。【賈仁云】這小的是好一個孩兒也。我的兒也。你今日到我家裏。那街上人問你姓甚麼。你便道我姓賈。【傑兒云】我姓周。

【賈仁云】姓賈。【傑兒云】我姓周。【做打科云】這弟子孩兒養殺也不堅。婆婆你問他。【卜兒云】好兒也。明日與你做花花襖子你穿。有人問你姓甚麼。你道我姓賈。【傑兒云】便做大紅袍與我穿。我也則是姓周。【卜兒打科云】這弟子孩兒養殺也不堅的。【陳德甫云】他父母不會去哩。可怎麼便下的打他。【傑兒叫科云】爹爹他每打殺我也。【正末做聽科云】我那兒怎生這等叫。他可敢打俺孩兒也。【唱】

【倘秀才】俺兒也差着一個字千般的見責。【云】那員外好狠也。【唱】那員外伸着五個指十分的便搥打的他連耳通紅半壁腮。說又不敢高聲語。哭又不敢放聲來。他則是偷將那淚揩。

【做叫科云】陳先生。陳先生。早打發俺每去波。【陳德甫出見云】是我着員外打發你去。【正末云】先生。天色漸晚。誤了俺途程也。【陳德甫入見科云】員外。且喜且喜。有了兒也。【賈仁云】陳德甫。那秀才去了麼。改日請你喫茶。【陳德甫云】哎呀。他怎麼肯去。員外還不會

與他恩養錢哩。【賈仁云】甚麼恩養錢。隨他與我些便罷。【陳德甫云】這個員外他爲無錢賣這個小的。怎麼倒要他恩養錢那。【賈仁云】陳德甫你好沒分曉。他因爲無飯的養活兒子。纔賣與我。如今要在我家喫飯。我不問他要恩養錢。他倒問我要恩養錢。【陳德甫云】好說他也辛辛苦苦養這小的。與了員外爲兒。專等員外與他些恩養錢做盤纏回家去也。【賈仁云】陳德甫他若不肯。便是反悔之人。你將這小的還他去。教他罰一千貫寶鈔來與我。【陳德甫云】怎麼倒與你一千貫鈔。員外你則與他些恩養錢去。【賈仁云】陳德甫那秀才敢不要。都是你搗鬼。【陳德甫云】怎麼是我搗鬼。【賈仁云】陳德甫看你的面皮。待我與他些。下次小的每開庫。【陳德甫云】好了。員外開庫哩。周秀才你這一場富貴不小也。【賈仁云】拏來你兜着。你兜着。【陳德甫云】我兜着與他多少。【賈仁云】與他一貫鈔。【陳德甫云】他這等一個孩兒。怎麼與他一貫鈔。忒少。【賈仁云】一貫鈔上面有許多的寶字。你休看的輕了。你便不打緊。我便似挑我一條筋哩。倒是挑我一條筋也熬了。要打發出這一貫

鈔更覺艱難。你則與他去。他是個讀書的人。他有個要不要。也不見的。【陳德甫云】我便依着你。且拏與他去。【做出見科云】秀才。你休慌。安排茶飯哩。這個是員外打發你的一貫鈔。【旦兒云】我幾盆兒水洗的孩兒。偌大。可怎生與我一貫鈔。便買個泥娃娃兒也買不的。【正末云】想我這孩兒呵。【唱】

【滾繡球】也曾有二年乳十月胎。似珍珠掌上擡。甚工夫養得他偌大。須不是半路裏拾的嬰孩。【做歎科唱】我雖是窮秀才。他覷人忒小哉。那些三個公平買賣。量這一貫鈔。值甚錢財。【帶云】員外。你的意思。我也猜着你了。【陳德甫云】你猜着甚的。【正末唱】他道我貪他香餌。終吞釣。我則道留下青山。怕沒柴。拚的個擗筆巡街。

【旦兒云】還了我孩兒。我們去罷。【陳德甫云】你且慢些。我見員外去。【正末云】天色晚也。休鬪小生耍。【陳德甫入科云】員外。還你這鈔。【賈仁云】陳德甫。我說他不要麼。【陳德甫

云。他嫌少。他說買個泥娃娃兒也買不的。【賈仁云】那泥娃娃兒會喫飯麼。【陳德甫云】員外不是這等說。那個養兒女的算飯錢來。【賈仁云】陳德甫也着你做人哩。常言道有錢不買張口貨。因他養活不過。方纔賣與人。我不要他還飯錢也勾了。倒要我的寶鈔。我想來都是你背地裏調唆他。我則問你怎麼與他鈔來。【陳德甫云】我說員外與你鈔。【賈仁云】可知他不要哩。你輕看我這鈔了。我教與你。你把這鈔高高的擡着道。兀那窮秀才。賈老員外與你寶鈔一貫。【陳德甫云】擡的高殺也。則是一貫鈔。員外。你則快些打發他去罷。【賈仁云】罷罷罷。小的每開庫再拏一貫鈔來與他。【做與鈔科】。【陳德甫云】員外。你問他買甚麼東西哩。一貫一貫添。【賈仁云】我則是兩貫。再也沒的添了。【陳德甫云】我且拏與他去。秀才。你放心。員外安排茶飯哩。秀才。那頭裏是一貫鈔。如今又添你一貫鈔。【正末云】先生可怎生只與我兩貫。我幾盆兒水洗的孩兒偌大。先生休鬪小生耍。【陳德甫云】嗨。這都是領來的不是了。我再見員外去。【做入科云】員外。他不肯。【賈仁云】不要閒說。白紙上寫



着黑字兒哩。若有反悔之人。罰寶鈔一千貫。與不悔之人使用。這便是他反悔。你着他拏一千貫鈔來。〔陳德甫云〕他有一千貫時。可便不賣這小的了。〔賈仁云〕哦。陳德甫。你是有錢的。你買麼。快領了去。着他罰一千貫鈔來與我。〔陳德甫云〕員外。你添也不添。〔賈仁云〕不添。〔陳德甫云〕你真個不添。〔賈仁云〕真個不添。〔陳德甫云〕員外。你又不肯添。那秀才又不肯去。教我中間做人也難。便好道。君子成人之美。不成人之惡。罷罷罷。員外。我在你家兩個月。該與我兩貫飯錢。我如今問員外支過。轉着你這兩貫。共成四貫。打發那秀才回去。〔賈仁云〕哦。要支你的飯錢。湊上四貫鈔。打發那窮秀才去。這小的還是我的。陳德甫。你原來是個好人。可則一件。你那文簿上寫的明白。道陳德甫先借過兩個月飯錢計兩貫。〔陳德甫云〕我寫的明白了。〔做出見科云〕來來來。秀才。你可休怪。員外是個慳吝苦尅的人。他說一貫也不添。我問他支過兩個月館錢。湊成四貫鈔。送與秀才。這的是我替他出了兩貫哩。秀才休怪。〔正末云〕這等可不難爲了你。〔陳德甫云〕秀才。你久後則休忘了我。陳德

甫【正末云】賈員外則與我兩貫錢。這兩貫是先生替他出的。這等呵。倒是先生齎發了小生也。【唱】

【倘秀才】如今這有錢的度量呵。做不的三江也。那四海便受用呵。多不到十年五載。我罵你個勒措窮民狠員外。或是有人家典段正。或是有人家當銀釵。你則待加一倍放解。

【賈仁做出瞧科云】這窮廝還不去哩。【正末唱】

【賽鴻秋】快離了他這公孫弘東閣門。程外。【旦兒云】秀才。俺今日撇下了孩兒。不知何日再得相見也。【正末云】大嫂去罷。【唱】再休想漢孔融北海開尊待。【陳德

甫云】秀才。這兩貫鈔是我與你的。【正末云】先生此恩。異日必當重報。【唱】多謝你范堯夫肯付舟中麥。【帶云】那員外呵。【唱】怎不學龐居士豫放來生債。【賈仁做揪住怒科云】這廝罵我好無禮也。【正末唱】他他他則待搯破我三思臺。【賈仁做推

正末科云。你這窮弟子孩兒還不走哩。正末唱。他他他。他便攛破我天靈蓋。賈仁云。下次小的每呼狗來咬這窮弟子孩兒。正末做怕科云。大嫂。我與你去罷。唱。走走走。早跳出了齊孫臆。這一座連環寨。

陳德甫云。秀才休怪。你慢慢的去。休和他一般見識。旦兒云。秀才。俺行動些兒波。正末唱。

隨煞。別人家便當的一周年。下架容贖解。帶云。這員外呵。唱。他巴到那五個月。還錢本利該。納了利。從頭兒再取索。還了錢。文書上廝混賴。似這等無仁義。愚濁的却有財。偏着俺有德行。聰明的嚼齏菜。這八個字窮通怎的排。則除非天打算。日頭兒輪到來。發背疔瘡。是你這富漢的災。禁口傷寒。着你這有錢的害。有一日賊打劫。火燒了您院宅。有一日人連累抄沒了舊錢債。恁時節合着鍋無錢買米柴。忍饑餓街頭做乞丐。這纔是你

家破人亡見天敗。【賈仁云】你這窮弟子孩兒還不走哩。【正末云】員外。【唱】你還這等苦尅瞞心罵我來。直待要犯了法遭了刑。你可便恁時節改。【同日見下】

【賈仁云】陳德甫那廝去了也。他去則去。敢有些怪我。【陳德甫云】可知哩。【賈仁云】陳德甫。生受你。本待要安排一盃酒致謝。我可也忙不得工夫。後堂中盒子裏有一個燒餅。送與你喫茶罷。【同下】

第二折

【小末扮賈長壽領興兒上。詩云】一生衣飯不曾愁。贏得人稱賈半州。何事老親能善病。教人終日皺眉頭。自家賈長壽的便是。父親是賈老員外。叫做賈仁。母親亡化已過。靠着祖宗福德。有潑天也似的家緣家計。俺父親則生的我一個人口順。都喚我做錢舍。豈知俺父親他一文也不使。半文也不用。這等慳吝的緊。俺枉叫做錢舍。不得錢在手裏。不會用的個快活。近日俺父親染病不能動止。興兒我許下東嶽泰安神州燒香去。與俺父親說知。多將些

錢鈔等我去還願興兒跟着我見父親去來【下】小末同興兒扶賈仁上云【哎呀害殺我也】做歎科云【過日月好疾也自從買了這個小的可早二十年光景我便一文不使半文不用這小的他却癡迷愚濫只圖穿喫看得那錢鈔便土塊般相似他可不疼怎知我多使了一個錢便心疼殺了我也】小末云【父親你可想甚麼喫那】賈仁云【我兒也你不知我這病是一口氣上得的我那一日想燒鴨兒喫我走到街上那一個店裏正燒鴨子油淥淥的我推買那鴨子着實的搥了一把恰好五個指頭搥的全全的我來到家我說盛飯來我喫一碗飯我唾一個指頭四碗飯唾了四個指頭我一會渴睡上來就在這板椽上不想睡着了被個狗舐了我這一個指頭我着了一口氣就成了這病罷罷罷我往常間一文不使半文不用我今病重左右是個死人了我可也破一破慳使些錢我兒我想豆腐喫哩】小末云【可買幾百錢】賈仁云【買一個錢的豆腐】小末云【一個錢只買得半塊豆腐把與那個喫興兒你買一貫鈔罷】興兒云【他則有五文錢的豆腐記下帳明日討還罷】賈

仁云。我兒你則依着我。【小末云】便依着父親只買十個錢的來。【賈仁云】我兒恰纔見你把十個錢都與那賣豆腐的了。【小末云】他還欠着我五文哩。改日再討。【賈仁云】寄着五文。你可問他姓甚麼。左隣是誰。右隣是誰。【小末云】父親你要問他隣舍怎的。【賈仁云】他假似搬的走了。我這五個錢問誰討。【小末云】直是這等。父親你孩兒趁父親在日。畫一軸喜經。着子孫後代供養着。【賈仁云】我兒也。畫喜神。特不要畫前面。則畫背身兒。【小末云】父親你說的差了。畫前面纔是。可怎麼畫背身的。【賈仁云】你那裏知道。畫匠開光明又要喜錢。【小末云】父親你也忒算計了。【賈仁云】我兒。我這病。覷天遠入地近。多分是死的人了。我兒你可怎麼發送我。【小末云】若父親有些好歹呵。您孩兒買一個好杉木棺材與父親。【賈仁云】我的兒。不要買杉木。價高。我左右是死的人。曉的甚麼杉木柳木。我後門頭不有那一個喂馬槽。儘好發送了。【小末云】那喂馬槽短。你偌大一個身子。裝不下。【賈仁云】哦。槽可短。要我這身子短。可也容易。拏斧子來把我這身子攔腰剝做兩段。折疊

着可不裝下了。我兒也。我囑付你。那時節不要嚼家的斧子。借別人家的斧子。剝。【小末云】  
父親。俺家裏有斧子。可怎樣問人家借。【賈仁云】你那裏知道。我的骨頭硬。若使我家斧子  
剝捲了刀。又得幾文錢鋼。【小末云】直是這等。父親。恁孩兒要上廟與父親燒香去。與我些  
錢鈔。【賈仁云】我兒。你不去燒香罷了。【小末云】孩兒許下香願多時了。怎好不去。【賈仁  
云】哦。你許下願來。這等與你一貫鈔去。【小末云】少。【賈仁云】兩貫。【小末云】少。【賈  
仁云】罷罷罷。與你三貫。可忒多了。我兒這一樁事要緊。我死之後。休忘記討還那五文錢  
的豆腐。【下】【興兒云】小哥。不要聽那老員外。你自去開了庫。拏着十個金子。十個銀子。一  
千貫鈔。我跟着你燒香去來。【小末云】興兒你說的是。我開了庫。取了十個金子。十個銀子。  
一千貫鈔。到廟上燒香去來。【同興兒下】【淨扮廟祝上。詩云】官清司吏瘦。神靈廟主肥。  
有人來燒紙。則搶大公雞。小道是東嶽泰安州廟祝。明日三月二十八日。是東嶽聖帝誕辰。  
多有遠方人來燒香。我掃的廟宇乾淨。看有甚麼人來。【正末同日兒上云】叫化唱。叫化唱。

可憐見俺無捱無倚無主無靠。賣了親兒無人養濟。長街市上可有那等捨貧的爹爹妳妳呵【唱】

【商調集賢賓】我可便區區的步行離了汴梁。【帶云】這途路好遠也。【唱】過了些三山隱隱更和這水茫茫。盼了些州城縣鎮。經了些店道村坊。遙望那東岱山嶽萬丈巔峯。怎不見泰安州四面兒牆匡。【云】婆婆這前面不是東嶽爺爺的廟哩。【唱】這不是仁安殿蓋造的接上蒼。掩映着紫氣紅光。正值他春和三月天。【帶云】婆婆。【唱】早來到仙闕五雲鄉。

【逍遙樂】這的是人間天上。燒的是御賜名香。蓋的是那勅修的這廟堂。我則見不斷頭客旅。經商還口願百二十行。聽的道是兒願爹爹壽命長。又見那校椅上頂戴着親娘。我這裏千般感歎。萬種徬徨。百樣思量。

【帶云】廟官哥哥俺兩口兒一徑來還願的。趕燒炷兒頭香。暫借一坵兒田地與我歇息咱。



【廟祝云】這老人家也好苦惱也。既是還香願的，我也做些好事。你老兩口兒就在這一場兒乾淨處安歇。明日絕早起來，燒了頭香去罷。【正末云】謝了哥哥婆婆，我和你在此安歇。明日趕一炷頭香咱。【旦兒云】佛囉，俺那長壽兒也。【小末同興兒上云】興兒，你看這廟上人好不多哩。【興兒云】小哥，咱每來遲，那前面早下的滿了也。【小末云】天色已晚，我們揀個乾淨處安歇。興兒，這搭兒乾淨處，被兩口叫化的倒在這裏，你打起那叫化的去。【興兒云】兀那叫化的，你且過一壁。【正末云】你是那個。【興兒云】這弟子孩兒，錢舍也不認的。【做打科】【正末云】哎呀，錢舍打殺我也。【廟祝云】這廝無禮，甚麼錢舍。家有家主，廟有廟主。他老子那裏做官來，叫做錢舍，徒弟拏繩子來綁了他送官去。【興兒云】廟官，你不要鬧。我與你一個銀子，借這場兒田地等俺歇息咱。【廟祝云】哦，你與我這個銀子，借這裏坐一坐。我正罵那老弟子孩兒，你便讓錢舍這裏坐一坐兒，自家討打喫。【正末云】俺這無錢的好不氣長也。【旦兒云】老的，咱每依着他那邊歇罷。【正末唱】

【金菊香】這的是雕梁畫棟聖祠堂。又不是錦帳羅幃你的臥房。怎這般廝推廝搶趕我在半壁廂。【興兒云】你這老弟子孩兒口裏嘮嘮叨叨的。還說甚麼哩。【正末唱】你你你全不顧我這鬢雪鬟霜。【云】你這廝還要打誰。婆婆你向前着我。不信。【唱】你可敢便打打打這個八十歲病婆娘。

【云】廟官哥哥。一個甚麼錢舍。將俺老兩口兒趕出來了。【廟祝云】他是錢舍。你兩個讓他些便了。俺明日要早起自去睡也。【下】【小末云】你這老弟子孩兒。你告訴那廟祝便怎的。我富漢打殺你這窮漢。只當拍殺個蒼蠅相似。【正末唱】

【醋葫蘆】你道是沒錢的好受虧。有錢的好使強。你和俺須同村共疇近隣莊。【興兒云】你這叫化的還強嘴哩。【正末唱】俺也是錢裏生來錢裏長。怎便打的俺一個不知方向。你須不是泰安州官府到此壓壇場。

【興兒云】官便不是官。叫做錢舍。【正末云】俺這無錢的好不氣長也。【旦兒云】老的你與

他爭甚麼俺每將就在那邊歇罷【正末唱】

【梧葉兒】這都是俺前生業。可着俺便今世當。莫不是曾燒着甚麼斷頭香。搵不住腮邊淚。撓不着心上痒。割不斷俺業情腸。【帶云】哎【唱】俺那長壽兒也。我端的可便纔合眼。又早眠思夢想。

【賈仁扮魂子上云】自家賈仁的便是。那正主兒來了。俺今日着他父子團圓。雙手交還了罷。【做歎科云】那小的那裏知道是他的老子。這老子那裏知道是他的兒子。我與他說知兀的老子。那個不是你的兒子。【正末做認科云】俺那長壽兒也。【小末打科】【賈仁又上云】兀那小的。那個不是你老子。【小末做叫科云】父親父親。【正末應云】哎哎哎。【小末云】興兒與我打這老弟子孩兒。【興兒云】這叫化的好無禮也。【正末云】你叫我三聲父親。我應你三聲。你怎生打我那。【唱】

【後庭花】你不肯冬三二月開暖堂。你不肯夏三二月捨義漿。則你那情狠身

中病則你那心平便是海上方。您爺呵休想道得安康。穩情取無人埋葬。淚汪汪甚人來守孝堂。急慌慌爲親爺來獻香。我痛殺殺身軀兒無倚仗。他絮叨叨還口願都是謊。

【柳葉兒】他也似個人模人樣。衝一片不本分的心腸。有一朝打在你頭直上。天開眼無輕放。天還報有災殃。穩情取家破人亡。

【小末云】天色明了也。與兒隨俺燒香去來。【做上香科云】東嶽爺爺。可憐見俺父親患病在床。但得神明保佑。指日平安。俺賈長壽情願燒三年香。望東嶽爺爺鑒察。【正末同旦兒打嚏科云】阿嚏。【小末云】則願俺的父親無病無痛。【正末又打嚏科云】阿嚏。【小末云】則願俺的父親無災無難。【正末又打嚏科云】阿嚏。【卜兒云】老的。咱們早些燒香去。【正末做拜科云】東嶽爺爺。則願俺長壽兒無病無痛。【小末做打嚏科云】阿嚏。【正末云】則願俺長壽兒無災無難。【小末又做打嚏科云】阿嚏。【正末云】則願俺長壽兒早早相見。

咱【小末又做打嚏科云】阿嚏【興兒上云】阿嚏阿嚏【廟祝上云】阿嚏阿嚏【小末云】興兒打那老弟子孩兒【興兒云】你這叫化的快走過一邊去【正末做哭科云】俺那長壽兒也【唱】

【高過浪來里煞】但得見親生兒俺可也不似這悽惶他他他明欺負俺無人侍養【做哭科云】俺那長壽兒也【唱】想着俺長壽年來也和他都一般家血氣方剛【帶云】婆婆【唱】則俺這受苦的糟糠賣兒呵也合將咱攔當俺可甚麼養小防備老栽樹要陰涼想着俺那忤逆的兒郎便成人也不認得爺娘有一日激惱了穹蒼要整頓着綱常你可怕那五六月的雷聲骨碌碌只在半空裏響【同日兒下】

【小末云】興兒燒罷香也隨俺回家去來【同下】

第四折

【店小二上詩云】不是自家沒主顧。爭奈酒酸長似醋。這回若是又酸香。不如放倒望竿做豆腐。自家店小二的便是。開開門面挑起望子。看有甚麼人來。【正末同日兒上云】婆婆俺燒罷香也。回家去來。【旦兒云】老的俺和你行動些兒咱。【正末唱】

【越調鬪鶴鶉】養五嶽靈神爲一人。聖慈總四海神州。受千年祭祀。護百二十河。掌七十四司。獻香錢。火醮紙。積善的長生。造惡的便死。

【紫花兒序】一個那顏回短命。一個那盜跖延年。一個那伯道無兒。人都道威靈有驗。正直無私。現如今神祠東岱嶽新添。一個速報司。大剛來禍無虛至。只要你惡事休行。擇其這善者從之。

【旦兒做心疼科正末云】婆婆你做甚麼。【旦兒云】老的也我一陣急心疼。你那裏討一杯兒酒來我喫。【正末云】你害急心疼。我去那酒店裏討一鍾酒去咱。哥哥俺這婆婆害急心疼。有酒麼。教化一鍾兒。【店小二云】老人家。你那婆婆害急心疼呵。對門那一家兒。有這急

心疼的藥。施捨與人。你問他討一服去。〔正末云〕是真個俺去對門討服兒。急心疼藥去來。〔同日兒下。〕〔店小二云〕大清早起。利市也不會發。這兩個老的就來教化酒喫。被我支他對門討藥去了。便心疼殺他。也不干我事。我自前後執料去也。〔下。〕〔陳德甫上云〕自家陳德甫的便是。過日月好疾也。自從賈老員外買了那個小的。今經可早二十年光景了。老員外一生慳吝。苦尅。今亡逝已過。那小的長立成人。比他父親在日。家私越增添了。他父親在日。人都叫他做錢舍。如今那小的仗義疎財。比老員外甚是不同。人都叫他做小員外。老夫一向在他家上些帳目。這幾年間。精神老憊。只得辭了館。開着一個小小藥鋪。施捨些急心疼的藥。雖則普濟貧人。然也有病好的。酬謝我些藥錢。我老夫也不敢辭。好將來做藥本。今日舖裏閒坐。看有甚麼人來。〔正末同日兒上見科。云〕先生可憐見。我那婆婆害急心疼。說先生施的好藥。老漢不揣求一服兒。咱〔做揖科。陳德甫云〕老人家免禮。有有有。我這一服藥。與你那婆婆喫了。登時間就好。則要你與我傳名。我叫做陳德甫。〔正末云〕多謝了先生。

叫做陳德甫。陳德甫婆婆。這陳德甫名兒好熟也。【旦兒云】老的嚙賣孩兒時。做保人的。不是陳德甫。【正末云】是真個。我過去認他波。【做認科云】陳德甫先生。元來你也這般老了也。【陳德甫云】這老兒就來詐熟也。【正末唱】

【小桃紅】你這般雪盈白髮鬢如絲。【陳德甫云】你說的是幾時的話。【正末唱】我說的是二十年前事。【陳德甫云】兀那老的你那裏人氏。姓甚名誰。【正末唱】你問我姓甚名誰。那裏人氏。【陳德甫云】你因何認得老夫來。【正末唱】說起來痛嗟咨。常言道。聞鍾始覺山藏寺。這搭兒裏曾賣了一個小廝。【陳德甫云】你莫不是賣兒子的周秀才麼。【正末唱】我常記的你個恩人名字。【陳德甫云】你還記的我齎發你那兩貫錢麼。【正末唱】我怎敢便忘了你那周急濟貧時。

【陳德甫云】秀才你歡喜咱。你那孩兒賈長壽。如今長立成人了也。【正末云】賈員外好麼。【陳德甫云】老員外亡化過了也。【正末云】死的好。死的好。打俺孩兒的那婦人有麼。【陳



德甫云。那婆婆又早些死了也。正末云。死的好。死的好。唱。

【鬼三台】則他這龐居士世做的虧心事。恨不把窮民勒死。滿口假悲慈。可曾有半文兒布施。帶云。想他兩貫鈔強買俺孩兒時節。還要與俺算飯錢哩。唱。空掌着精金嚼鈔百萬資。偏沒個寸男尺女爲繼嗣。俺倒不如郭巨埋兒。也強似明達賣子。

【云】陳先生。俺那長壽孩兒好麼。陳德甫云。賈員外的萬貫家財。都是你的孩兒賈長壽。掌把着人。皆叫他做小員外哩。正末云。陳先生可憐見着俺那孩兒來。廝見一面。可也好也。陳德甫云。你要見他。待我尋他去。小末上云。自家賈長壽的便是。自從泰安山燒香回來。父親亡逝過了。如今營葬已畢。無甚麼事。去望陳德甫叔叔走一遭。做撞見科云。叔叔。我一徑來望你也。陳德甫云。小員外你歡喜咱。小末云。俺喜從何來。陳德甫云。我老實的說與你知。你當初元不是賈老員外的兒子。你父親是周秀才。偶然打員外家經。

過我是保見人將你賣與那員外爲兒。你今日長立成人。現有你的。一雙父母在這裏。要與你相見。我說兀的做甚。二十年來把你瞞。老夫說着尙心酸。可憐你生身父母。饑寒死直與陌路傍人做一般。【做見科云】則這兩個便是你的父親母親。你拜他咱。【小末做認科云】這是我父親母親。住住住。泰安神州我打的不是你來。【正末云】婆婆。泰安神州打俺的不是這廝麼。【旦兒云】俺認的他。正叫做錢舍哩。【正末唱】

【調笑令】俺待和這廝廝。揀的見官司。不徠俺只問你這般。毆打親爺甚意思。無非倚恃着錢神。把俺相輕視。【小末云】俺實是不認的你。【正末云】噤聲。到今日呵。【唱】可早知一家無二。父子們廝見非同造次。【帶云】婆婆。【唱】想他也只是個忤逆的孩兒。

【陳德甫云】端的是怎生來。老人家請息怒。【正末云】我告他去。【陳德甫云】小員外似此怎了也。【小末云】叔叔。你不知道我在泰安神州打了他來。他如今要告我去。我如今與他

些東西買囑他罷。〔陳德甫云〕與他甚麼東西。〔小末出砌末科云〕我與他一匣子金銀。只買一個不言語。〔陳德甫云〕怎麼買個不言語。〔小末云〕他若不告我。我便將這一匣子金銀都與他。若告我。我拚的把這金銀官府上下打點使用。我也不見的輸與他。〔陳德甫云〕小員外你放心。我和他說去。〔見正末云〕老人家。你見這一匣金銀麼。那小員外要與你買個不言語。〔正末云〕怎生是買個不言語。〔陳德甫云〕你若是不告他呵。把這匣金銀與你。你若告他呵。將這金錢去官府上下打點使用。他也沒事。兩樁兒隨你自揀去。〔正末云〕婆孩兒在秦安神州打俺時節。他也不認的俺。〔旦兒云〕你個愛錢的老弟子孩兒。〔正末云〕將鑰匙來開了這鎖。待我看這銀子咱。〔做有驚科云〕這銀子上鑿着周奉記。周奉記可不原是俺家的來。〔陳德甫云〕怎生是你家的。〔正末云〕俺祖公公正叫做周奉記哩。

【唱】

【幺篇】猛覷了這字。是俺正明師。想祖上留傳到此時。是兒孫合着俺兒

孫使若不沙怎題着公公名氏。【帶云】賈員外賈員外。【唱】虧了他二十年用心把鑰匙也。則是看守俺祖上的金貲。

【店小二上云】聞得小員外認着他親爺親娘我去看咱。【做見科云】老人家你那婆婆害急心疼可好了麼。【正末云】多謝哥哥俺婆婆好了也。想起二十年前曾在你店裏你不捨與我三鍾兒酒喫麼。【店小二云】小子沒記性這遠年的帳都忘了也。【正末云】孩兒你依着我者。陳德甫先生二十年前曾爲你齋發俺兩貫鈔俺如今將這兩個銀子謝他。【陳德甫云】我則是兩貫鈔怎好換你兩個銀子。那賈老員外一生愛錢也不曾賺得這等厚利。這個我老夫決不敢當。【正末唱】

【天淨紗】若不是陳先生肯把恩施俺周榮祖爭些三兒雪裏停屍。則這兩貫鈔俺念茲在茲常恐怕報不得你故人之賜。又何須苦苦推辭。

【陳德甫云】多謝了老員外。【正末云】賣酒的哥哥我當日喫了你三鍾酒如今還你這一

個銀子。【店小二云】這個小子也不敢受。【正末唱】

【禿廝兒】論你個小本錢茶坊酒肆。有甚麼大度量仗義輕施。你也則可憐俺饑寒窮路不自支。如今這銀一個。酬謝你酒三卮。也見俺的情私。

【店小二云】這等小子收了。多謝老員外。【正末云】孩兒。這多餘的銀子。你與我都散與那貧難無倚的。可是爲何。這二十年來俺罵的那財主每多了也。【唱】

【聖樂王】爲甚麼罵這廝。罵那廝。他道俺貧兒到底做貧兒。又誰知彼一時。此一時。這家私原是俺家私。相對喜孜孜。

【小末云】父親。您孩兒都依你便了。【旦兒云】俺一家兒同到秦安神州回香去來。【正末唱】

【收尾】這的是貧窮富貴皆輪至。【做笑科】【陳德甫云】老員外。你笑甚的來。【正末云】俺不笑別的。【唱】笑則笑賈員外一文不使單爲這口嚼墊背幾文錢。險

送了拽布拖麻孝順子。

【靈派侯上云】周榮祖你如今省悟了麼。這二十年光景你可都看見了也。【正末同衆拜伏科云】是那方神聖降臨。愚民不知乞賜指示。【靈派侯云】吾神乃靈派侯是也。你一行人都跪者聽吾神分付。【詞云】想爲人稟命生于世。但做事不可瞞天地。貧與富前定不能移。笑愚夫枉使欺心計。周秀才賣子受艱難。賈員外慳吝貪財賄。若不是陳德甫仔細說分明。怎能勾周奉記父子重相會。【同下】

題目 窮秀才賣嫡親兒男

正名 看錢奴買冤家債主

看錢奴買冤家債主雜劇終

# 崔府君斷冤家債主

楔子

【冲末扮崔子玉上詩云】天地神人鬼五仙。盡從規矩定方圓。逆則路路生顛倒。順則頭頭  
身外玄。自家晉州人氏。姓崔名子玉。世人但知我滿腹文章。是當代一箇學者。却不知我秉  
性忠直。半點無私。以此奉上帝敕旨。屢屢判斷陰府之事。果然善有善報。惡有惡報。如同影  
響。分毫不錯。真可畏也。我有一箇結義兄弟。叫做張善友。平日儘肯看經念佛。修行辦道。我  
曾勸他早些出家。免墮塵障。爭奈他妻財子祿。一時難斷。如何是好。【歎科云】嗨。這也何足  
怪也。便是我那功名兩字。也還未能忘情。如今待上朝取應去。不免到善友宅上。與他作別  
走一遭。正是勸人出世偏知易。自到臨頭始覺難。【下】  
【正末扮張善友同老旦扮卜兒上云】  
自家姓張。是張善友。祖居晉州古城縣居住。渾家李氏。俺有箇八拜交的哥哥。是崔子

玉他要上朝進取功名。說在這幾日間過來。與我作別。天色已晚。想是他不來了也。渾家你且收拾歇息者。【卜兒云】是天色晚了。俺關了門戶。自去歇息咱。【做睡科】【淨扮趙廷玉上。詩云】釜有蛛絲甑有塵。晉州貧者獨吾貧。腹中曉盡世間事。命裏不知天下人。自家姓趙。雙名廷玉。母親亡逝已過。我無錢殯埋。罷罷罷。我是箇男子漢家。也則出於無奈。學做些兒賊。白日裏看下這一家人家。晚間偷他些錢鈔埋葬我母親。也表我一點孝心。天阿。我幾曾慣做那賊來。也是我出於無奈。我今日在那賣石灰處。拿了他一把兒石灰。你說要這石灰做甚麼。晚間掘開那牆。撒下些石灰。若那人家不驚覺。便罷。若驚覺。呵。叫道。拏賊。我望着這石灰道上飛跑。天阿。我幾曾慣做那賊來。我今日在蒸作鋪門首過。拿了他一箇蒸餅。你說要這蒸餅做甚麼。我尋了些亂頭髮折針兒。放在這蒸餅裏面。有那狗叫。丟與他蒸餅吃。簽了他口叫不得。天阿。我幾曾慣做那賊來。來到這牆邊也。隨身帶着這刀子。將這牆上剜一箇大窟籠。我入的這牆來。【做撒石灰科云】我撒下這石灰。【做瞧科云】關着這門哩。



隨身帶着這油罐兒。我把些油傾在這門柏裏。開門呵便不聽的响。天呵。我幾曾慣做那賊來。【內云】你是賊的公公哩。【趙做聽科】【正末云】渾家。試問你咱。我一生苦掙的那五箇銀子。你放在那裏。【卜兒云】我放在床底下金剛腿兒裏。你休問。只怕有人聽的。【正末云】渾家。你說的是。啗歇息咱。【趙做偷銀子出門科云】我偷了他這五箇銀子。不知這家兒姓甚麼。今生今世還不的他。那生那世做驢做馬填還你。【做叫科云】有賊。地方快起來。拏賊呀。【下】【正末驚科云】渾家兀的不有賊來。你看那箱籠咱。【卜兒云】箱籠都有。【正末云】看啗那銀子咱。【卜兒做看科云】呀。不見了銀子。可怎了也。【正末云】我說甚麼來。天色明了也。且不要大驚小怪的。悄悄裏去緝訪賊人便了。【外扮和尚上。詩云】積水養魚終不釣。深山放鹿願長生。掃地恐傷螻蟻命。爲惜飛蛾紗罩燈。貧僧是五臺山僧人。爲因佛殿崩摧。下山來抄化了這十箇銀子。無處寄放。此處有一箇長者。是張善友。我將這銀子寄與他家去。這是他門首善友在家麼。【正末云】誰喚門哩。我試去看咱。【做見科云】師父

從那裏來。【和尚云】我是五臺山僧人抄化的十箇銀子。一向聞知長者好善。特來寄放你家。待別處討了布施。便來取也。【做交砌末科】【正末云】寄下不妨。請師父吃了齋去。【和尚云】不必吃齋。我化布施去也。【下】【正末云】渾家替師父收了這銀子。【卜兒云】我知道。【背云】我今日不見了一頭錢物。這和尚可送將十箇銀子來。我自有的分曉。【正末云】渾家恰纔那師父寄的銀子。與他收的牢着。我今日到東嶽聖帝廟裏燒香去。倘或我不在家。那和尚來取這銀子。渾家有我無我。你便與他去。他若要齋吃。你就整理些蔬菜齋他。一齋也是你的功德。【卜兒云】我知道。【正末云】我燒香去也。【下】【卜兒云】豈不是造化。我不見了五箇。這和尚倒送了十箇。張善友也不在家。那和尚不來取便罷。若來呵。我至死也要賴了他的。那怕他就告了我來。【和尚上云】貧僧抄化了也。我可去張善友家中取了銀子。回五臺山去。張善友在家麼。【卜兒云】敢是那和尚來了也。我出去看咱。師父那裏去來。【和尚云】善友在家麼。【卜兒云】俺家裏無甚麼善友。你來怎的。【和尚云】我恰纔寄

下十箇銀子。特來取去。〔卜兒云〕這箇師父你敢錯認了也。俺家裏幾時見你甚麼銀子來。〔和尚云〕我早起寄在你家大嫂。你怎麼要賴我的。〔卜兒云〕我若見你的呵。我眼中出血。我若賴了你的呵。我墮十八重地獄。〔和尚云〕大嫂你聽者。我是十方抄化來的布施。我要修理佛殿。寄在你家裏。你怎麼要賴我的。你今生今世賴了我這十箇銀子。到那生那世。少不得填還我。你聽者。我本爲修因化得十錠銀。我着你念彼觀音力。久已後還着與本人。哎。喲。這一會兒害起急心疼來。我且尋太醫調理去也。〔下〕〔卜兒云〕和尚去了也。等善友來家呵。我則說還了他銀子。善友敢待來也。〔正末上云〕渾家。我燒香回來也。那和尚曾來取銀子麼。〔卜兒云〕你剛去了。那和尚就來取。我兩手交付與他去了。〔正末云〕既是還了他呵。好好好。渾家安排下茶飯。則怕俺崔子玉哥哥來。〔崔子玉上云〕轉過隅頭。抹過裏角。可早來到張家了。善友兄弟在家麼。〔正末出云〕哥哥。請家裏來。〔做見科。崔子玉云〕兄弟。我觀你面色。敢是破了些財。〔正末云〕雖是破了些。也不打緊。〔崔子玉云〕你媳婦兒氣色

倒像得些外財的。〔卜兒云〕有甚麼外財那。〔崔子玉云〕兄弟我今日要上朝求官應舉去。一徑的與你作別來。〔正末云〕哥哥兄弟有一壺水酒就與哥哥餞行到城外去來。〔做行科云〕渾家斟過酒來送哥哥一杯。〔做送酒崔子玉回酒科云〕兄弟我和你此一別。又不知幾年得會。我有幾句言語勸諫兄弟你試聽者。〔詩云〕得失榮枯總在天。機關用盡也徒然。人心不足蛇吞象。世事到頭螳捕蟬。無藥可延卿相壽。有錢難買子孫賢。甘貧守分隨緣過。便是逍遙自在仙。〔正末云〕多承哥哥勸戒。只是你兄弟善緣淺薄。出不得家也。有幾句兒言語誦與哥哥聽。〔詞云〕也不戀北曠南主。也不戀高堂邃宇。但容膝便是身安。目下保寸男尺女。冷時穿一領布袍。饑時餐二盂粳粥。除此外別無狂圖。張善友平生願足。

【唱】

【仙呂憶王孫】麤衣淡飯且淹消。養性修真常自保。貧富一般緣分了。任白髮不相饒。但得箇稚子山妻我。一世兒快活到老。〔同卜兒下〕

【崔子玉云】兄弟同媳婦兒回家了也。俺自登途去咱。【詩云】此行元不爲功名。總是塵根未得清。傳語山中修道侶。好將心寄白雲層。【下】

### 第一折

【正末同卜兒淨扮乞僧丑扮福僧二旦上】【正末云】老夫張善友。離了晉州古城縣。搬到這福陽縣。一住三十年光景也。自從被那賊人偷了我五箇銀子去。我這家私火焰也似長將起來。婆婆當年得了大的箇孩兒。喚做乞僧。年三十歲也。以後又添的這廝。是第二箇。喚做福僧。年二十五歲也。這箇媳婦兒是大的孩兒的。這箇媳婦是第二箇的。這大的箇孩兒。披星戴月。早起晚眠。這家私多虧了他。老夫不知造下什麼孽來。輪到這小的箇孩兒。每日則是吃酒賭錢。不成半分兒器。兀那廝。我問你咱。恁的呵幾時是了也。【福僧云】父親。你孩兒幼小。正好受用。有的是錢。使了些打什麼緊。【乞僧云】兄弟。你怎生這等把錢鈔不着疼熱使用。可不疼殺我也。【正末歎科云】這都是命運裏招來的。大的箇孩兒。你不知道聽我

說與你咱【唱】

【仙呂點絳脣】濁骨凡胎。遞生人海。三十載。也是我緣分合該。【帶云】正爲這潑家私呵【唱】我也曾捱淡飯黃蘗菜。

【混江龍】俺大哥一家無外。急巴巴日夜費籌劃。營辦着千般活計。積儻下萬貫貲財。俺大哥儘半世幹家私。強掙起。也是我在前生種陰德。苦修來。俺大哥爲人本分。不染塵埃。衣不裁綾羅段匹。食不揀好歹。安排爹娘行十分孝順。親眷行萬事和諧。若說着這禽獸。知他是甚情懷。每日向花門柳戶。舞榭歌臺。鉛華觸眼。酒肉堆頭。但行處着人罵。惹人嫌。將家私可便由他使。由他敗。這的是破家五鬼。不弱如橫禍非災。

【乞僧云】父親。這家私費了我多少辛苦積儻。就的到那兄弟手裏多使去了。兀的不疼殺我也。【正末云】大哥。這家私都虧了你兀那廝。我問你咱。你這幾時做什麼買賣來。【福僧

云。偏我不曾做買賣。我打了一日雙陸。曲的腰節骨還是疼的。你可知道我受這等苦哩。  
【正末唱】

【油葫蘆】賊也你搭手在心頭。自監解。這家私端的是誰闌闌。則你那二十年何曾道覓的半文來。你你你則待要抹着的當了拿着的賣。也不管鬆時節做了急時節債。你你你無花呵眼倦開。無酒呵頭也不擡。引着些箇潑男潑女相扶策。你你你則待每日上花臺。

【福僧云】父親你孩兒趁着如此青年。受用快活也還遲哩。【乞僧云】可知你受用快活。單只苦了誰也。【正末唱】

【天下樂】賊也這的是安樂窩中且避乖。這廝從來會放歹。我若不官司行送了你和姓改。【云】我老夫還不曾道着。俺婆婆便道老子他好囉。【唱】做爹的道不才做娘的早喝采。慣的這廝千自由百自在。

【云】兀那厮你會少人的錢鈔來麼。【福僧云】吓。長進阿我並不曾少人錢鈔。【淨扮雜當上云】張二舍你少我五百瓶的酒錢。快些拿出來還我。【乞僧云】父親兄弟欠了人家酒錢在門首討哩。【正末云】你說不少錢。門首有人索酒錢那。【福僧云】還了他使罷。打什麼不緊。【乞僧云】還有什麼不還了他。只虧了你。【卜兒云】大哥你還了他罷。【乞僧云】罷罷罷。我還我還兀的不心疼殺我也。【做發付科】【雜當下】【丑扮雜當上云】張二舍你少我爺死錢。只管要我討。還不拿出來。【乞僧云】父親門首討什麼爺死錢在那裏。【正末云】什麼爺死錢。【福僧云】你看這老頭兒這些也不懂的。父親在日問他借了一千貫鈔。父親若死了還他兩千貫鈔。堂上一聲舉哀。塔下本利相對。這不是爺死錢。【正末歎科云】嗨。有這樣錢借與那厮使來。【唱】

【那吒令】你看這倚勢口囉巷拽街。氣的我老業人亡魂喪魄。你看這少鈔臉無顏落色。【福僧云】這也只使得自己錢。有什麼妨礙。【正末云】禽獸。你道是使了



錢是自己的。【唱】怎做的自己錢無妨礙兀的不氣夯破我這胸懷。

【鵲踏枝】一會家上心來怎生出這癡騃。氣的我手脚酸麻。東倒西歪。賊也你少不的破了家宅。倒不如兩下裏早早分開。

【福僧云】就分開了倒也乾淨。隨我請朋友耍子。【正末唱】

【寄生草】你引着些幫閒漢。更和這喫劍才。你只要殺羊造酒將人待。你道是使錢撒漫令人愛。你怎知囊空鈔盡招人怪。氣的我老業人日下一身亡。【帶云】我死了呵。【唱】恁時節可也還徹你冤家債。

【云】大哥這也沒奈何。你還了者。【乞僧云】父親你孩兒披星戴月。做買做賣。一文不使。半文不用。怎生償下這家私。都着他化費了也。【卜兒云】大哥你還他罷。【乞僧云】我還我還。【做發付科云】還了你去罷。【雜當云】還了我錢。我回家去也。【下】。【正末云】婆婆趁俺兩口兒在。將這家私分開了罷。若不分開呵。久已後吃這廝凋零的無了。【卜兒云】老的這

家私分他怎麼。還是着大哥管的好。【正末云】只是分開了罷。大哥。你將應有的家私都搬出來。和那借錢鈔的文書也拿將出來。【乞僧云】理會的。【正末云】婆婆家私都在這裏。三分兒分開者。【福僧云】分開這家私倒也好省的絮絮聒聒的。【卜兒云】老的怎生做三分兒分開。【正末云】他弟兄每兩分。我和你留着一分。【卜兒云】這也說的是。都依着你便了。

【正末唱】

【賺煞】你待耍沙暖睡鴛鴦。我則會歲寒知松柏。你將我這逆耳良言不採。這家私虧煞俺爺娘生受來。我便是釋迦佛也惱下蓮臺。想這廝不成才。因此上各自分開。隨你商量做買賣。常言道山河易改。本性兒還在我。則怕你有朝福過定生災。【同下】

第一一折

【崔子玉冠帶引祇候上詩云】滿腹文章七步才。綺羅衫袖拂香埃。今生坐享皇家祿。不是

讀書何處來。小官崔子玉是也。自與兄弟張善友別後。到於京都闕下。一舉狀元及第。所除磁州福陽縣令。誰想兄弟也搬在這縣中居住。聞說他大的孩兒染了一箇病證。未知好歹。若何。今日無甚事。張千將馬來。小官親身到兄弟家中探病。走一遭去。〔詩云〕駿馬慢乘騎。兩行公吏隨。街前休喝道。跟我探親知。〔下〕〔淨扮柳隆卿丑扮胡子轉上。詩云〕不養蠶來不種田。全憑說謊度流年。爲甚閻王不勾我。世間刷子少我錢。小子叫做柳隆卿。這箇兄弟是胡子轉。在城有張二舍。是一箇真傻廝。俺兩箇幫着他賺些錢鈔使用。這幾日家中無盤纏。俺去茶坊裏坐下。等二舍來。有何不可。〔胡淨云〕你在菜坊裏坐的。我尋那傻廝去。這早晚敢待來也。〔福僧上云〕自家張二舍。自從把家私分開了。好似那湯潑瑞雪。風捲殘雲。都使的光光蕩蕩了。如今則有俺哥哥那分家私也。吃我定害不過。俺哥哥如今染病哩。好幾日不曾見我兩箇兄弟。到茶坊裏問一聲去。〔做見。二淨科云〕兄弟這幾日不見你想殺我也。〔胡淨云〕小哥。我正尋你哩。茶坊裏有柳隆卿在那裏等你。我和你去來。〔相見科〕

【福僧云】兄弟好麼。【柳淨云】小哥一箇新下城的小娘子生的十分有顏色。俺一徑的來尋你。你要了他罷。不要等別人下手先搶去了。【福僧云】你去總承別人罷。我可無錢了。

【胡淨云】你哥哥那裏有的是錢。俺幫着你到那裏討去來。【福僧云】這等我與你去。【同下】。【正末引雜當上云】自從將家私做三分兒分開了。二哥的那一分家私早凋零的沒有一點兒了。大哥見二哥是親兄弟。又將他收留在家中住。不想那厮將大哥的家私又使的無了。大哥氣的成病。一臥不起。求醫無效。服藥無靈。看看至死。教我沒做擺佈。小的。咱和你到佛堂中燒香去來。【雜當云】爹咱就燒香去。【正末唱】

【商調集賢賓】自分開近併來。百事有這的是。爲兒女報官囚。閃的箇老業人不存不濟。則俺這養家兒。千死千休。這的是天網恢恢。果然道疎而不漏。【帶云】若俺大哥有些好歹呵。【唱】怎發付這無主意的老業人。張善友。三。十年一夢莊周。恰便似俞陽般服藥酒。恰便似莊子歎骷髏。

【逍遙樂】我則索仰神靈保佑。爲孩兒所事存心。我怎肯等閒罷手兒也。閃的我來有國難投。忍不住兩淚交流。莫不是我前世裏燒香不到頭。我則索把神靈來禱呪。只願的滅罪消災。絕慮忘憂。

【云】來到這佛堂前也。我推開佛堂門。【做跪科云】小的每將香來。家堂菩薩。有這大的個孩兒。多虧了他。早起晚眠。披星戴月。掙揣下這箇家私。今日可有病。小的箇孩兒吃酒賭錢。不成半器。他可無病。家堂爺爺。怎生可憐見老漢着俺大的箇孩兒。這病痊可咱。【做拜科】

【唱】

【梧葉兒】小的箇兒何曾生受。他則待追朋趁友。每日家無月不登樓。大的箇孩兒依先如舊。常則待將無做有。巴不得敗子早回頭。【帶云】聖賢也。【唱】你怎生則揀着這箇張善友。心疼處倒下手。

【雜當報云】爹爹。大哥發昏哩。【正末云】既然大哥發昏。小的跟着我看大哥去來。【同下】

【大旦扶乞僧同卜兒上。乞僧云】娘也。我死也。【卜兒云】大哥。你精細着。【乞僧云】我這病。覷天遠入地近。眼見的無那活的人也。【卜兒云】孩兒。你這病可怎生就沉重了也。【乞僧云】娘也。我這病你不知道。我當日在解典庫門前。適直那賣燒羊肉的走過。我見了這香噴噴的羊肉。待想一塊兒吃。我問他多少鈔。一斤。他道兩貫鈔一斤。我可怎生捨的那兩貫鈔買吃。我去那羊肉上將兩隻手捏了兩把。我推嫌羊瘦。不曾買去了。我却袖那兩手肥油。到家裏盛將飯來。我就那一隻手上油。啣幾口吃了一碗飯。我一頓吃了五碗飯。吃得飽飽兒了。我便瞌睡去。留着一隻手上油。待吃晌午飯。不想我睡着了。漏着這隻手。却走將一箇狗來。把我這隻手上油都吮乾淨了。則那一口氣就氣成我病。我昨日請一箇太醫把脈。那廝也說的是道我氣裏了食也。【卜兒云】孩兒。既是這等起的病。你如今只不要氣。慢慢的將養。【乞僧云】喚的我父親來。我分付他咱。【正末同雜當上云】婆婆。大哥病體如何。【乞僧云】父親。我死也。【正末做悲科云】兒。則被你痛殺我也。【唱】

【醋葫蘆】你胸脯上着艾灸。肚皮上用手揉。俺一家兒燒錢烈紙到神州。請法師喚太醫疾快走。將那俺養家兒搭救。則教我腸慌腹熱似澆油。

【乞僧云】父親我顧不得你。我死也。【做死科】【正末同卜兒哭科云】兒也。你忍下的便丟了。我去教我兀的不痛殺了也。【唱】

【么篇】我則見他直挺挺僵了脚手。冷冰冰禁了牙口。俺一家兒那箇不啼啼哭哭破咽喉。則俺這養家兒半生苦受。【帶云】天那。【唱】常言道好人俵不長壽。這一場煩惱怎乾休。

【云】婆婆大哥死了也。將些什麼供養的來。一壁廂着人報與崔縣令知道者。【雜當云】理會的。【崔子玉上云】小官崔子玉。去看張善友的孩兒。可早來到也。張千接了馬者。【見科云】呀。元來善友的孩兒死了也。兄弟。你可省煩惱波。【正末云】哥哥。大的箇孩兒已死。眼見兄弟的老命也不久了也。【崔子玉云】兄弟。常言道死生有命。富貴在天。這也是箇大數。

且省煩惱。〔福僧同二淨上。〕〔柳淨云。〕小哥說你哥哥死了。到家中看有什麼東西。你拿與俺兩箇拿着先走。〔福僧云。〕說的是。你跟將我來。拿着壺瓶臺盞便走。我可無眼淚。怎麼啼哭。〔柳淨云。〕我手帕角頭都是生薑汁浸的。你拏去睛眼邊一抹。那眼淚就尿也似流將出來。〔做遞砌末。福僧哭科云。〕我那哥哥也。你一文不使。半文不用。可不乾死了你。我那爹也。你不偏向我那哥哥也。我那娘也。你如今只有的我一箇也。我那嫂嫂也。我那老婆也。〔做怒科云。〕怎生沒箇睬我的。看起來我是傻廝那。〔正末唱。〕

〔么篇〕只見那兩箇幫閒的花滿頭。這一箇敗家的面帶酒。你也想着一家兒披麻帶孝爲何由。故來這靈堂裏尋鬪毆。直恁般見死不救。莫不是你和他沒些三瓜葛。沒些三憂。

〔云。〕兀那廝大哥死了。消受不的你奠一盞兒酒。〔福僧云。〕老人家不要絮話。等我澆奠。〔做奠酒。〕〔將臺盞與淨。〕〔卜兒奪科云。〕你將的那裏去。〔福僧推卜兒科云。〕你們自去。



【柳淨云】有了東西也俺跑跑跑。【同胡下】【卜兒云】兀的不氣殺我也。【做死科】【乞僧做起叫科云】我那臺盞也。【正末云】孩兒你不死了來。【乞僧云】被那兩箇光棍搶了我臺盞去。我死也怎麼捨得。【正末云】婆婆由他將的去罷呀。婆婆死了也。天那。可是老漢造下什麼孽來。大的箇孩兒死了。婆婆又死了。天那。兀的不痛殺老漢也。【崔子玉云】兄弟少煩惱。這都是前生註定者。【正末做悲科】【唱】

【窮河西】你道死和生都是天數周。怎偏我子和娘拔著短壽。我如今備棺槨將他殯。不知我這業屍骸又著那箇收。

【云】下次小的每將婆婆和大哥扶在一壁廂。買兩箇棺槨埋殯了者。【雜當云】理會的。【做扶下】【正末悲科唱】

【鳳鸞吟】怎不著我愁。這煩惱甚日休。天那。偏是俺好夫妻不到頭。怎不著我愁。這煩惱甚日休。天那。偏是俺養家兒沒福留。【崔子玉云】兄弟。你的壽

算也還遠哩。這家私便破散了些。打甚麼不緊且省煩惱波。【正末唱】想人生到中年以後。這光陰不久。還望甚家緣成就。隨你便攢黃金過北斗。只落的乾生受。天那。早尋箇落葉歸秋。

【云】老漢大的箇孩兒死了。婆婆又死了。我老漢不知造下甚麼孽來。【崔子玉云】兄弟。你休煩惱者。【正末唱】

【浪來里煞】這煩惱神不知鬼不覺。天來高地來厚。本指望一家兒相守。共白頭。到如今夫妻情父子恩都做了一筆勾。落得箇自憊自憊。【做悲科云】天那。【唱】則除非向來生重把那生修。【下】

【崔子玉歎科云】嗨。誰想他大的孩兒連婆婆都亡化了。我那兄弟還不省哩。【詩云】善友今年命運低。妻亡子喪兩重悲。前生註定今生業。天數難逃大限催。【下】

【正旦扶福僧上】福僧云：「哎呀，害殺我也，怎麼不見父親來？」  
【二旦叫云】大娘，你與我請將父親來者。  
【大旦做應請正未領雜當上云】自從大的箇孩兒死了，婆婆又死了，家私又散盡了，如今小的箇孩兒又病的重了，教老漢好生煩惱也呵。  
【唱】

【中呂粉蝶兒】活計蕭疎，正遭逢太平時序，偏是我老不著暮景桑榆，典了庄宅，賣了田土，銷乏了幾多錢物。委實的不曾半霎兒心舒，一天愁將我這兩眉攢聚。

【醉春風】恨高似萬重山，淚多似連夜雨，眼見的兒亡妻喪，又有箇病着床。老業人你暢好是苦苦，則俺這小的箇孩兒，倘有些好歹，可著我那塢兒發付。

【做見科云】二哥，你這病證如何？  
【福僧云】父親，我死也。  
【正未云】老漢則有這小的箇孩兒，可又病的重，天呵，怎生可憐見老漢，留下小的箇孩兒，送老漢歸土，可也好那。  
【唱】

【紅繡鞋】禱祝了千言萬語。天阿。則願的小冤家百病消除。兒也便使的  
我片瓦根椽一文無。但存留的孩兒在。就是我護身符。又何必滿堂金纔  
是福。

【云】二哥。你這早晚面色不好。你有什麼遺留言語。分付我咱。【福僧云】父親。你不知道。我  
這病。別人害的是氣蠱。水蠱。我害的是米蠱。【正末云】如何是米蠱。【福僧云】若不是米蠱。  
呵。怎生偌大一箇栲栳。父親。我顧不的你也。【做死伏科。】【正末做哭科。云】兒。噤。則被你痛  
殺我也。【唱。】

【迎仙客】還只道沉沉的臥著床褥。誰知他悠悠的赴了冥途。空把我孩  
兒叫道有千百句。閻君也你好狠心腸。土地也你好歹做處。閃的我鰥寡  
孤獨。怎下的便撇了你這爹先去。

【云】二哥也死了。下次小的每買一具棺木來埋葬了者。【雜當云】理會的。【扶福僧下。】

【正末云】兩箇媳婦兒。你來。兩箇孩兒都亡了我的婆婆又亡了我無兒不使婦。你兩箇可也有爺和娘在家裏。不如收拾了一房一臥。各自歸宗去罷。要守孝也由的你。便要嫁人也由的你。【兩旦做悲科云】哎呀。痛殺俺也。俺妯娌二人收拾一房一臥。且回爺娘家守孝去。男兒也。只被你痛殺我也。【詩云】俺妯娌命運低微。將男兒半路拋離。拚的守孤孀一世。斷不肯向他人再畫蛾眉。【同下】【正末做悲科云】兩箇孩兒死了。兩箇媳婦兒又歸宗去了。我婆婆又亡了。則撇下老業人獨自一箇。我仔細想來。不干別人事。都是這當境土地和這閻神勾將俺婆婆和兩箇孩兒去了。我如今待告那崔縣令哥哥。着他勾將閻神土地來。我和他對證。有何不可。不免拽上這門。我首告他走一遭去。【下】【崔子玉引張千祇候上】  
【詩云】瑟瑟衙鼓響。公吏兩邊排。閻王生死殿。東岳嚇魂臺。小官崔子玉是也。今日升廳坐起早衙。張千喝攔廂。【張千云】在衙人馬平安。擡書案。【正末上跪科】【崔子玉云】塔下跪着的。不是張善友兄弟。你告什麼。【正末云】哥哥。與老漢做主咱。【崔子玉云】是誰欺侮

你來你說那詞因我與你做主。【正末云】我不告別人。我告這當境土地和閻神。哥哥。你差人去勾將他來。等我問他俺兩箇孩兒和婆婆做下什麼罪過。他都勾的去了。【崔子玉云】兄弟。你差了也。這是陰府神祇。你告他怎的。【正末起科】【唱】

【白鶴子】他本是聰明正直神。掌管著壽夭存亡簿。怎不容俺夫婦到白頭。【帶云】我那兩箇孩兒呵。【唱】也著他都死因何故。

【崔子玉云】兄弟。陽世間的人。我便好發落他。陰府神祇。我如何勾的他來。便勾了來。我也斷不的。【正末云】哥哥。你斷不的他。從古以來有好幾箇人都也斷的。怎生哥哥便斷不的。【崔子玉云】兄弟。那幾箇古人斷的。你試說與咱聽。【正末唱】

【么篇】哎。想當日有一箇狄梁公會斷虎。有一箇西門豹會投巫。又有箇包待制白日裏斷陽間。他也曾夜斷陰司路。

【崔子玉云】兄弟。我怎比得包待制日斷陽間。夜斷陰間。你要告到別處告去。【正末云】俺

婆婆到這年紀便死也罷了。難道俺兩箇孩兒留不的一箇【唱】

【上小樓】俺孩兒也不曾訛言謊語。又不曾方頭不律。俺孩兒量力求財。本分隨緣。樂道閒居。閻神也有向順。土地也不胡突。可怎生將俺孩兒一時勾去。害的俺張善友牽腸割肚。

【崔子玉云】你兩箇孩兒和你的渾家必然有罪犯註定該死的。你要問他也好癡哩。【正末云】俺那婆婆和兩箇孩兒呵【唱】

【么篇】又不曾觸忤著那尊聖賢。躋踐了那座廟宇。又不曾毀謗神佛。冒犯天公。墮落酆都。合著俺子共母。妻共夫。一家兒完聚。【做悲科云】俺兩箇孩兒死了。婆婆又死了。兩箇媳婦兒也歸宗去了。【唱】可憐見送的俺滅門絕戶。

【做跪科云】望哥哥與我勾將閻神土地來。我和他折證咱。【崔子玉云】兄弟。我纔不說來。假如陽世間人我便斷的。這陰府神祇我怎麼斷的他。你還不省哩。快回家中去。【正末起

科唱。

【耍孩兒】神堂廟宇偏誰做。無過是烈士忠臣宰輔。但生情發意運機謀。早明彰報應非誣。【云】哥哥。這樁事你不與我斷誰斷。【唱】難道陽世間官府多機變。陰府內神靈也混俗。把森羅殿都做了營生鋪。有錢的免了他輪迴六道。無錢的去受那地獄三塗。

【一煞】我如今有家私誰管顧。有錢財誰做主。我死後誰澆茶誰奠酒。誰啼哭。誰安靈位。誰齋七。誰駕靈車。誰挂服。只幾箇忤作行送出城門去。又無那花棺彩輦。多管是蓆捲椽舁。

【煞尾】天那。最苦的是清明寒食時。別人家引兒孫祭上祖。只可憐撇俺在白楊衰草空山路。有誰來墓頂上與俺重添半杯兒土。【下】

【崔子玉笑云】張善友去了也。此人雖是箇修行的。却不知他那今生報應。因此愚迷不省。



且待他再來告時。我着他親見閻君。放出兩箇孩兒和那渾家。等他廝見說知就裏。【詩云】  
方信道暗室虧心。難逃他神目如電。今日箇顯報無私。怎倒把閻君埋怨。【下】

#### 第四折

【正末上云】老漢張善友。昨日到俺哥哥崔子玉跟前告狀來。要勾他那土地閻神和俺折  
證。怎當俺哥哥千推萬阻。只說陰府神靈勾他不得。今日到那城隍廟裏再告狀去。有人說  
道城隍也是泥塑木雕的。有甚麼靈感在那裏。你哥哥不比他人。日斷陽間。夜理陰間。還賽  
過那包待制。你怎麼不告去。因此只得又往這福陽縣裏走一遭去來。【下】【崔子玉引祇  
從上。詩云】法正天須順。官清民自安。妻賢夫禍少。子孝父心寬。我崔子玉爲何道這幾句。  
只因我兄弟張善友錯怨土地閻神。屈勾了他妻兒三命。要我追攝前來。與他對證。我只說  
一箇斷不得回他去了。料他今日必然又來。我自有一箇主意。張千今日坐早衙。與我把放告  
牌擡出去者。【祇從云】理會的。【正末上云】哥哥。可憐與兄弟做主咱。【崔子玉云】兄

弟。你說那詞因上來。〔正末云〕我老漢張善友。一生修善。便是俺那兩箇孩兒和婆婆都也不會做什麼罪過。却被土地閻神屈屈勾將去了。只望哥哥准發一紙勾頭文書。將那土地閻神也追的他來。與老漢折證一箇明白。若是果然該受這業報。我老漢便死也得瞑目。〔崔子玉云〕兄弟。你好葫蘆提也。我昨日不會說來。陽世間的人。我便斷的。陰府神祇。我怎麼斷的。〔正末云〕哎喲。一陣昏沉。我且暫睡咱。〔做睡科〕〔崔子玉云〕此人睡了也。我著他這一番似夢非夢。直到森羅殿前。便見端的。〔虛下〕〔鬼力上云〕張善友。閻神有勾。〔正末驚起科云〕怎生閻神有勾。我正要問那閻神去哩。〔下〕〔閻神引鬼力上。詩云〕蕩蕩威靈聖勅差。休將閒事惱心懷。空中若是無神道。霹靂雷聲那裏來。吾神乃土地閻君是也。今有陽間張善友爲兒亡妻喪。告着俺土地閻神。鬼力與我攝將那張善友過來。〔鬼力云〕理會的。〔鬼力做拿正末上科〕行動些。〔正末唱〕

【雙調新水令】一靈兒監押見閻君。閃的我虛飄飄有家難奔。明知道空

撒手怕甚麼業隨身託賴著陰府靈神得見俺那陽世間的兒孫便死也亦無恨。

【駢馬聽】想人生一刻的錢親呆癡也豈不聞有限光陰有限的身啣死後只落得半坵兒灰襯這的是百年誰是百年人都被那業錢財無日夜費精神到如今這死屍骸雖富貴誰埋殯活時節不肯使半文死了也可有那一些兒分。

【鬼力云】過去跪着【正末見跪科】閻神云【張善友你知罪麼】【正末云】上聖我張善友不知罪【閻神云】你推不知你在陽間告著誰來【正末云】我告閻神土地他把我婆婆和兩箇孩兒犯下甚麼罪過都勾的去了我因此上告他【閻神云】兀那張善友你要見你兩箇孩兒麼【正末云】可知要見哩【閻神云】鬼力將他兩箇孩兒攝過來者【鬼力云】理會的【喚乞僧福僧上】【正末見驚科云】兀的不是我兩箇孩兒大哥你家去來【乞僧云】我是

你甚麼孩兒。我當初是趙廷玉不合偷了你家五箇銀子。我如今加上幾百倍利錢還了你家的。和你不親不親。【正末云】兒也。我爲你呵哭的我眼也昏了。你今日刻的道和我不親兒也。你好下的也呵。【唱】

【沽美酒】你怎生直恁的心性狠。全無些舊情分。可便是親者如同那陌路人。只爲你哭的。我行眠立盹。【見福僧科云】二哥。嗒家去來。【福僧云】誰是你孩兒。【正末云】你是我第二的孩兒。【福僧云】我是你的兒。老的。你好不聰明。我前身元是五臺山和尚。你少我的來。你如今也加倍還了我的也。【正末做歎科】【唱】兩下裏將我來不揪問。

【云】這生忿忤逆的賊也罷了。大哥。你也須認的我。【唱】

【太平令】他平日裏常只待尋爭覓釁兒也。你怎的也學他背義忘恩。這忤逆賊從來生忿。你須識一箇高低遠近。【云】大哥。跟我家去來。【乞僧云】我填

還了你的俺和你不親了也。【正末唱】你道我不親。強親。嗜須是你父親呀。好教我一言難盡。

【閻君云】着這兩箇速退。【鬼力引乞僧福僧下】【閻君云】你要見你那渾家麼。【正末云】可知要見哩。【閻君云】鬼力與我開了酆都城。拿出張善友的渾家來。【鬼力押卜兒上見科】【正末云】婆婆。你爲什麼來。【卜兒做哭科云】老的也。我當初不合混賴了那五臺山和尚十箇銀子。我死歸冥路。教我十八層地獄都遊遍了也。你怎生救我咱。【正末做歎科云】那五臺僧人的銀子。我只道還他去了。怎知賴了他的來。【唱】

【水仙子】常言道莫瞞天地莫瞞人。莫作瞞心與禍隣。你如今苦也囉。刀山劍嶺都遊盡。怎做的閻羅王有向順。擺列着惡鬼能神。【卜兒云】我受苦不過。你好生超度我咱。【閻君云】鬼力還押入酆都去。【正末唱】纔放出森羅殿。又推入地獄門。哎。你暢好是下的波閻君。

【鬼力押卜兒哭下】【閻君云】張善友。你有一箇故人。你可要見麼。【正末云】可知要見哩。【閻君云】我與你去請那尊神來與你相見。【下】【崔子玉上】【正末做見科云】何方聖者。甚處靈神。通名顯姓。咱。【崔子玉云】張善友。休推夢裏睡裏。【正末做覺科云】好睡也。

【崔子玉云】兄弟。你適纔看見些甚麼來。【正末云】哥哥。你兄弟都見了也。【唱】

【鴈兒落】我也曾有三年養育恩。爲甚的沒一箇把親爺認。元來大的兒。是他前生少我錢。小的兒是我今世償他本。

【得勝令】這都是我那婆婆也。作業自殃身。遺累及兒孫。再休提世上無恩怨。須信道空中有鬼神。【崔子玉云】兄弟。你省悟了麼。【正末云】哥哥。張善友如今纔省悟了也。【唱】總不如安貧落一箇身。困心無困。這便是修因。也免的錢親人不親。


【崔子玉云】兄弟。你直待今日方纔省悟。可是遲了。兄弟。你聽者。聽下官從頭細數。犯天條

合應受苦。則爲你奉道看經。俺兩人結爲伴侶。積儻下五箇花銀。爭奈你命中沒福。小孩兒本姓趙。做賊人將銀偷去。第二箇是五臺山僧。寄銀兩在你家收取。他到來索討之時。你婆婆混賴不與。撚指過三十餘春。生二子明彰報復。大哥哥幹家做活。第二箇荒唐愚魯。百般的破敗家財。都是小孩兒填還你那債負。兩箇兒命掩黃泉。你那腳頭妻身歸地府。他都是世海他人。怎做得妻財子祿。今日箇親見了陰府閻君。纔使你張善友識破了冤家債主。【下】

題目 張善友告土地閻神

正名 崔府君斷冤家債主

崔府君斷冤家債主雜劇終





# 跋

鄭廷玉，彰德人。太和正音譜評其曲如佩玉鳴鑾。所作都二十四種，今存於臧晉叔元曲選者五種。所譜多折獄事，開後代龍圖公案之先聲。許之衡謂其能樸實見長，不事雕琢，用筆老辣，亦似斷獄吏也。盧前記。



鄭廷玉雜劇存目

齊景公駟馬奔陣

宋上皇御斷鳳凰釵

采石渡漁父辭劍

吹簫女悔教鳳凰兒

冷臉劉斌料到底

尉遲恭鞭打李道煥

父子夢秋夜變城驛

孟鼎宰因禍致福

賣兒女沒興王公綽

風月郎君雙叫化

一百二十行貶揚州

冤報冤貧兒乍富

曹伯明復勘賊

漢高祖哭韓信

風月七真堂

蕭丞相復勘賊

孟姜女送寒衣

奴殺主因禍折福

孫恪遇猿

馬

致

遠

雜

劇



馬致遠雜劇

破幽夢孤雁漢宮秋

半夜雷轟薦福碑

呂洞賓三醉岳陽樓

太華山陳搏高臥

邯鄲道省悟黃梁夢

江州司馬青衫淚

馬丹陽三度任風子

劉阮誤入桃源

馬致遠雜劇 八種





# 破幽夢孤鴈漢宮秋

楔子

【冲末扮番王引部落上。詩云】氈帳秋風迷宿草。穹廬夜月聽悲笳。控弦百萬爲君長。款塞稱藩屬漢家。某乃呼韓耶單于是也。久居朔漠。獨霸北方。以射獵爲生。攻伐爲事。文王曾避俺東徙。魏絳曾怕俺講和。獯鬻獫狁逐代易名。單于可汗隨時稱號。當秦漢交兵之時。中原有事。俺國強盛。有控弦甲士百萬。俺祖公公冒頓單于。圍漢高帝于白登七日。用婁敬之謀。兩國講和。以公主嫁俺國中。至惠帝呂后以來。每代必循故事。以宗女歸俺番家。宣帝之世。我衆兄弟爭立不定。國勢稍弱。今衆部落立我爲呼韓耶單于。實是漢朝外甥。我有甲士十萬。南移近塞。稱藩漢室。昨曾遣使進貢。欲請公主。未知漢帝肯尋盟約否。今日天高氣爽。衆頭目每向沙堤射獵一番。多少是好。正是番家無產業。弓矢是生涯。【下】

【淨扮毛延壽上。頭目每向沙堤射獵一番。多少是好。正是番家無產業。弓矢是生涯。【下】

【淨扮毛延壽上。

詩云。爲人鵬心鴈爪。做事欺大壓小。全憑詔佞姦貪。一生受用不了。某非別人。毛延壽的便是。見在漢朝駕下。爲中大夫之職。因我百般巧詐。一味諂諛。哄的皇帝老頭兒十分歡喜。言聽計從。朝裏朝外。那一個不敬我。那一個不怕我。我又學的一個法兒。只是教皇帝少見儒臣。多昵女色。我這寵幸。纔得牢固。道尤未了。聖駕早上。〔正末扮漢元帝引內官宮女上。詩云。〕嗣傳十葉繼炎劉。獨掌乾坤四百州。邊塞久盟和議策。從今高枕已無憂。某漢元帝是也。俺祖高皇帝。奮布衣起豐沛。滅秦屠項。拚下這等基業。傳到朕躬。已是十代。自朕嗣位以來。四海晏然。八方寧靜。非朕躬有德。皆賴衆文武扶持。自先帝晏駕之後。宮女盡放出宮去了。今後宮寂寞。如何是好。〔毛延壽云。〕陛下。田舍翁多收十斛麥。尙欲易婦。况陛下貴爲天子。富有四海。合無遣官徧行天下。選擇室女。不分王侯宰相。軍民人家。但要十五以上。二十以下者。容貌端正。盡選將來。以充後宮。有何不可。〔駕云。〕卿說的是。就加卿爲選擇使。齎領詔書一通。徧行天下。刷選將選中者。各圖形一軸送來。朕按圖臨幸。待卿成功回時。別有

區處【唱】

【仙呂賞花時】四海平安絕土馬。五穀豐登沒戰伐。寡人待刷室女選宮娃。你避不的驅馳困乏。看那一個合屬俺帝王家【下】

第一折

【毛延壽上詩云】大塊黃金任意搥。血海王條全不怕。生前只要有錢財。死後那管人唾罵。某毛延壽領着大漢皇帝聖旨。徧行天下。刷選室女。已選勾九十九名。各家儘肯餽送所得金銀。却也不少。昨日來到成都秭歸縣。選得一人。乃是王長者之女。名喚王嬙。字昭君。生得光彩射人。十分豔麗。真乃天下絕色。爭奈他本是莊農人家。無大錢財。我問他要百兩黃金。選爲第一。他一則說家道貧窮。二則倚着他容貌出衆。全然不肯。我本待退了他。【做忖科云】不要倒好了他。眉頭一縱。計上心來。只把美人圖點上些破綻。到京師必定發入冷宮。教他受苦一世。正是恨小非君子。無毒不丈夫【下】。【正旦扮王嬙引二宮女上詩云】一日

承宣入上陽。十年未得見君王。良宵寂寂誰來伴。惟有琵琶引興長。妾身王嬙。小字昭君。成  
都秭歸人也。父親王長者。平生務農爲業。母親生妾時。夢月光入懷。復墜于地。後來生下妾  
身。年長一十八歲。蒙恩選充後宮。不想使臣毛延壽問妾身索要金銀。不會與他。將妾影圖  
點破。不會得見君王。現今退居永巷。妾身在家頗通絲竹。彈得幾曲琵琶。當此夜深孤悶之  
時。我試理一曲消遣咱。【做彈科】。【駕引內官提燈上云】。某漢元帝自從刷選室女入宮。多  
有不曾寵幸。煞是怨望咱。今日萬幾稍暇。不免巡宮走一遭。看那個有緣的得遇朕躬也呵。

【唱】

【仙呂點絳脣】車碾殘花玉人月下。吹簫罷未遇宮娃。是幾度添白髮。

【混江龍】料必他珠簾不掛。望昭陽一步一天涯。疑了些無風竹影。恨了

些有月窗紗。他每見絃管聲中巡玉輦。恰便似斗牛星畔盼浮槎。【旦做彈

科】。【駕云】是那裏彈的琵琶響。【內官云】是。【正末唱】是誰人偷彈一曲。寫出嗟呀。

【內官云】快報去接駕。【駕云】不要。【唱】莫便要忙傳聖旨報與他家。我則怕乍蒙恩把不定心兒怕。驚起宮槐宿鳥。庭樹栖鴉。

【云】小黃門。你看是那。一宮的宮女彈琵琶。傳旨去教他來接駕。不要驚唬着他。【內官報科云】兀那彈琵琶的是那位娘娘。聖駕到來。急忙迎接者。【旦趨接科】【駕唱】

【油葫蘆】恕無罪吾當親問咱。這裏屬那位下。休怪我不曾來往乍行踏。我特來填還你這淚搵濕鮫綃帕。溫和你露冷透凌波襪。天生下這豔姿合是我寵幸他。今宵畫燭銀臺下。剝地管喜信爆燈花。

【云】小黃門。你看那紗籠內燭光越亮了。你與我挑起來看咱。【唱】

【天下樂】和他也弄着精神射絳紗。卿家你覷咱。則他那瘦岩岩影兒可喜殺。【旦云】妾身早知陛下駕臨。只合遠接接駕不早。妾該萬死。【駕唱】迎頭兒稱妾身。滿口兒呼陛下。必不是尋常百姓家。

【云】看了他容貌端正。是好女子也呵。【唱】

【醉中天】將兩葉賽宮樣眉兒畫。把一個宜梳裏臉兒搽。額角香鈿貼翠花。一笑有傾城價。若是越勾踐姑蘇臺上見他。那西施半籌也不納。更敢早十年敗國亡家。

【云】你這等模樣出衆。誰家女子。【旦云】妾姓王名嬙。字昭君。成都秭歸縣人。父親王長者。祖父以來。務農爲業。閭閻百姓。不知帝王家禮度。【駕唱】

【金盞兒】我看你眉掃黛。鬢堆鴉。腰弄柳。臉舒霞。那昭陽到處難安插。誰問你一犁兩壩做生涯。也是你君恩留枕簟。天教雨露潤桑麻。既不沙。俺江山千萬里。直尋到茅舍兩三家。

【云】看卿這等體態。如何不得近幸。【旦云】妾父王長者。當初選時。使臣毛延壽。索要金銀。妾家貧寒無湊。故將妾眼下點成破綻。因此發入冷宮。【駕云】小黃門。你取那影圖來看。

【黃門取圖看科】【駕唱】

【醉扶歸】我則問那待詔別無話。却怎麼這顏色不加搽。點得這一寸秋波。玉有瑕。端的是卿眇目他雙瞎。便宜的八百姻嬌比並他。也未必強如俺娘娘帶破賺丹青畫。

【云】小黃門傳旨說與金吾衛。便拏毛延壽斬首報來。【旦云】陛下。妾父母在成都見隸民藉望陛下恩典寬免。量與此恩榮。咱【駕云】這個煞容易。【唱】

【金盞兒】你便晨挑菜夜看瓜。春種穀夏澆麻。情取棘針門粉壁上除了差法。你向正陽門改嫁的倒榮華。俺官職頗高如村社長。這宅院剛大似縣官衙。謝天地可憐窮女婿。再誰敢欺負俺丈人家。

【云】近前來聽寡人旨。封你做明妃者。【旦云】量妾身怎生消受的陛下恩寵。【做謝恩科】

【駕唱】

【賺煞】且盡此宵情。休問明朝話。【旦云】陛下明朝早早駕臨。妾這裏候駕。【駕唱】

到明日多管是醉臥在昭陽御榻。【旦云】妾身賤微。雖蒙恩寵。怎敢望與陛下同榻。

【駕唱】休煩惱吾當且是耍。鬪卿來便當真假。恰纔家輦路兒熟滑。怎下

的真個長門再不踏。明夜裏西宮閣下。你是必悄聲兒接駕。我則怕六宮

人攀例撥琵琶。【下】

【旦云】駕回了也。左右且掩上宮門。我睡些去。【下】

第一折

【番王引部落上云】某呼韓單于。昨遣使臣款漢請嫁公主與俺。漢皇帝以公主尚幼爲辭。

我心中好不自在。想漢家宮中無邊宮女。就與俺一個打甚不緊。直將使臣趕回。我欲待起

兵南侵。又恐怕失了數年和好。且看事勢如何。別做道理。【毛延壽上云】某毛延壽。只因刷

選宮女。索要金銀。將王昭君美人圖點破。送入冷宮。不想皇帝親幸。問出端的。要將我加刑。



我得空逃走了。無處投奔。左右是左右。將着這一軸美人圖。獻與單于王。着他按圖索要。不怕漢朝不與他。走了數日。來到這裏。遠遠的望見人馬浩大。敢是穹廬也。【做問科云】頭目你啓報單于王知道。說漢朝大臣來投見哩。【卒報科】【番王云】着他過來。【見科云】你是甚麼人。【毛延壽云】某是漢朝中大夫毛延壽。有我漢朝西宮閣下美人王昭君。生得絕色。前者大王遣使求公主時。那昭君情願請行。漢主捨不的不肯放來。某再三苦諫。說豈可重女色。失兩國之好。漢主倒要殺我。某因此帶了這美人圖。獻與大王。可遣使按圖索要。必然得了也。這就是圖樣。【進上看科】【番王云】世間那有如此女人。若得他做闕氏。我願足矣。如今就差一官率領部從。寫書與漢天子求索王昭君。與俺和親。若不肯與。不日南侵。江山難保。就一壁廂引控甲士。隨地打獵。延入塞內。偵候動靜。多少是好。【下】【旦引宮女上云】妾身王嬙。自前日蒙恩臨幸。不覺又旬月。主上昵愛過甚。久不設朝。聞的升殿去了。我且向妝臺邊梳妝一會。收拾齊整。只怕駕來好伏侍。【做對鏡科】【駕上云】自從西宮閣

下得見了王昭君使朕如痴似醉。久不臨朝。今日方才升殿。等不的散了。只索再到西宮看  
一看去【唱】

【南呂一枝花】四時雨露勻。萬里江山秀。忠臣皆有用。高枕已無憂。守着  
那皓齒星眸。爭忍的虛白晝。近新來染得些證候。一半兒爲國憂民。一半  
兒愁花病酒。

【梁州第七】我雖是見宰相似文王施禮。一頭地離明妃早宋玉悲秋。怎  
禁他帶天香着莫定龍衣袖。他諸餘可愛。所事兒相投。消磨人幽悶。緣伴  
我閒游。偏宜向梨花月底登樓。芙蓉燭下藏鬪。體態是二十年挑剔就的  
溫柔。姻緣是五百載該撥下的配偶。臉兒有一千般說不盡的風流。寡人  
乞求他左右。他比那落伽山觀自在無楊柳。見一面得長壽。情繫人心早  
晚休。則除是雨歇雲收。

【做望見科云】且不要驚着他待朕悄地看咱【唱】

【隔尾】恁的般長門前抱怨的宮娥舊怎知我西宮下偏心兒夢境熟愛他晚妝罷描不成畫不就尙對菱花自羞【做到旦背後看科】【唱】我來到這粧臺背後元來廣寒殿嫦娥在這月明裏有

【旦做見接駕科】【外扮尙書丑扮常侍上詩云】調和鼎鼐理陰陽秉軸持鈞政事堂只會中書陪伴食何曾一日爲君王某尙書令五鹿充宗是也這個是內常侍石顯今日朝罷有番國遣使來索王嬙和番不免奏駕來到西宮閣下只索進去【做見科云】奏的我主得知如今北番呼韓單于差一使臣前來說毛延壽將美人圖獻與他索要昭君娘娘和番以息刀兵不然他大勢南侵江山不可保矣【駕云】我養軍千日用軍一時空有滿朝文武那一個與我退的番兵都是些畏刀避箭的恁不去出力怎生教娘娘和番【唱】

【牧羊關】興廢從來有干戈不肯休可不食君祿命懸君口太平時賣你

宰相功勞。有事處把俺佳人遞流。你們乾請了皇家俸。着甚的分破帝王憂。那壁廂鎖樹的怕彎着手。這壁廂攀欄的怕顛破了頭。

【尚書云】他外國說陛下寵昵王嬙。朝綱盡廢。壞了國家。若不與他興兵弔伐。臣想紂王只爲寵妲己國破身亡。是其鑒也。【駕唱】

【賀新郎】俺又不曾徹青宵高蓋起摘星樓。不說他伊尹扶湯。則說那武王伐紂。有一朝身到黃泉後。若和他留侯留侯廝遘。你可也羞那不羞。您臥重裯。食列鼎。乘肥馬。衣輕裘。您須見舞春風嫩柳宮腰瘦。怎下的教他環珮影搖青塚月。琵琶聲斷黑江秋。

【尚書云】陛下嗜這裏兵甲不利。又無猛將與他相持。倘或疎失。如之奈何。望陛下割恩與他。以救一國生靈之命。【駕唱】

【鬪蝦蟆】當日個誰展英雄手。能梟項羽頭。把江山屬俺炎劉。全虧韓元

帥九里山前戰鬪。十大功勞成就。恁也丹墀裏頭。枉被金章紫綬。恁也朱門裏頭。都寵着歌衫舞袖。恐怕邊關透漏。及家人奔驟。似箭穿着鴈口。沒個人敢咳嗽。吾當僝僽。他也他也紅妝年幼。無人搭救。昭君共你每有甚麼殺父母冤讎。休休。少不的滿朝中都做了毛延壽。我呵空掌着文武三千隊。中原四百州。只待要割鴻溝。陡恁的千軍易得一將難求。

【常侍云】見今番使朝外等宣。【駕云】罷罷罷。教番使臨朝來。【番使入見科云】呼韓耶單于。差臣南來奏大漢皇帝。北國與南朝。自來結親和好。曾兩次差人求公主不與。今有毛延壽將一美人圖獻與俺單于。特差臣來單索昭君爲關氏。以息兩國刀兵。陛下若不從。俺有百萬雄兵。刻日南侵。以決勝負。伏望聖鑒不錯。【駕云】且教使臣館驛中安歇去。【番使下】

【駕云】您衆文武商量。有策獻來。可退番兵。免教昭君和番。大抵是欺娘娘軟善。若當時呂后在日。一言之出。誰敢違拗。若如此久已後。也不用文武。只憑佳人平定天下便了。【唱】

【哭皇天】你有甚事疾忙奏。俺無那鼎鑊邊滾熱油。我道您文臣安社稷。武將定戈矛。您只會文武班頭。山呼萬歲舞蹈揚塵。道那聲誠惶頓首。如今陽關路上昭君出塞。當日未央宮裏女主垂旒。文武每我不信你敢差排呂太后。枉以後龍爭虎鬪。都是俺鸞交鳳友。

【旦云】妾既蒙陛下厚恩。當效一死以報陛下。妾情願和番得息刀兵。亦可留名青史。但妾與陛下闈房之情。怎生拋捨也。【駕云】我可知捨不的卿哩。【尚書云】陛下割恩斷愛。以社稷爲念。早早發送娘娘去罷。【駕唱】

【烏夜啼】今日嫁單于。宰相休生受。早則俺漢明妃。有國難投。它那裏黃雲不出青山岫。投至兩處凝眸。盼得一鴈橫秋。單注着寡人今歲攬閒愁。王嬙這運添憔悴。翠羽冠香羅綬。都做了錦蒙頭煖帽。珠絡縫貂裘。

【云】卿等今日先送明妃到驛中。交付番使。待明日朕親出灞陵橋送餞。一盃去。【尚書云】

只怕使不的惹外夷恥笑【駕云】卿等所言我都依着。我的意思如何不依。好歹去送一送。我一會家只恨毛延壽那廝【唱】

【二煞】我則恨那忘恩咬主賊禽獸。怎生不畫在凌烟閣上頭。紫臺行都是俺手裏的衆公侯。有那樁兒不共卿謀。那件兒不依卿奏。爭忍教第一夜夢迤逗。從今後不見長安望北斗。生扭做織女牽牛。

【尚書云】不是臣等強逼娘娘和番。奈番使定名索取。况自古以來多有因女色敗國者【駕唱】

【二煞】雖然似昭君般成敗都皆有。誰似這做天子的官差不自由。情知他怎收那臙滿的紫驂騮。往常時翠轎香兜。兀自倦朱簾揭繡。上下處要成就。誰承望月白空明水自流。恨思悠悠。

【旦云】妾身這一去雖爲國家大計。爭奈捨不的陛下【駕唱】

【黃鍾尾】怕娘娘覺饑時吃一塊淡淡鹽燒肉。害渴時喝一杓兒酪和粥。我索折一枝斷腸柳。餞一盃送路酒。眼見得趕程途。趁宿頭。痛傷心。重回首。則怕他望不見鳳閣龍樓。今夜且則向灞陵橋畔宿。【下】

第二折

【番使擁旦上奏胡樂科旦云】妾身王昭君自從選入宮中。被毛延壽將美人圖點破。送入冷宮。甫能得蒙恩幸。又被他獻與番王形像。今擁兵來索。待不去。又怕江山有失。沒奈何將妾身出塞和番。這一去胡地風霜。怎生消受也。自古道紅顏勝人多薄命。莫怨春風當自嗟。

【駕引文武內官上云】今日灞橋餞送明妃。却早來倒也。【唱】

【雙調新水令】錦貂裘生改盡漢宮妝。我則索看昭君畫圖模樣。舊恩金勒短。新恨玉鞭長。本是對金殿鴛鴦。分飛翼。怎承望。

【云】您文武百官計議。怎生退了番兵。免明妃和番者。【唱】



【駐馬聽】宰相每商量。大國使還朝。多賜賞。早是俺夫妻悒快。小家兒出外也搖裝。尙兀自渭城衰柳助淒涼。共那灞橋流水添惆悵。偏您不斷腸。想娘娘那一天愁都撮在琵琶上。

【做下馬科】【與旦打悲科】【駕云】左右慢慢唱者。我與明妃餞一盃酒。【唱】

【步步嬌】您將那一曲陽關休輕放。俺咫尺如天樣。慢慢的捧玉觴。朕本意待尊前捱些時光。且休問劣了宮商。您則與我半句兒俄延着唱。

【番使云】請娘娘早行。天色晚了也。【駕唱】

【落梅風】可憐俺別離重。你好是歸去的忙。寡人心先到他李陵臺上。回頭兒却纔魂夢裏想。便休題貴人多忘。

【旦云】妾這一去再何時得見陛下。把我漢家衣服都留下者。【詩云】正是今日漢宮人明朝胡地妾。忍着主衣裳。爲人作春色。【留衣服科】【駕唱】

【殿前歡】則甚麼留下舞衣裳。被西風吹散舊時香。我委實怕宮車再過青苔巷。猛到椒房。那一會想菱花鏡裏妝。風流相兜的又橫心上。看今日昭君出塞。幾時似蘇武還鄉。

【番使云】請娘娘行罷。臣等來多時了也。【駕云】罷罷。罷。明妃。你這一去。休怨朕躬也。【做別科。駕云】我那裏是大漢皇帝。【唱】

【鴈兒落】我做了別虞姬。楚霸王。全不見守玉關。征西將。那裏取保親的。李左車。送女客的。蕭丞相。

【尙書云】陛下不必掛念。【駕唱】

【得勝令】他去也不沙架海紫金梁。枉養着那邊庭上鐵衣郎。您也要左右人扶持。俺可甚糟糠妻下堂。您但提起刀鎗。却早小鹿兒心頭撞。今日央及煞娘娘怎做的男兒當自強。

【尙書云】陛下咱回朝去罷。【駕唱】

【川撥棹】怕不待放絲韁。咱可甚鞭敲金鐙响。你管變理陰陽。掌握朝綱。治國安邦。展土開疆。假若俺高皇。差你個梅香。背井離鄉。臥雪眠霜。若是他不戀恁春風畫堂。我便官封你一字王。

【尙書云】陛下不必苦死留他。着他去了罷。【駕唱】

【七弟兄】說甚麼大王不當。戀王嬙。兀良怎禁他臨去也。回頭望。那堪這散風雪旌節影悠揚。動關山鼓角聲悲壯。

【梅花酒】呀。俺向着這迴野悲涼。草已添黃色。早迎霜。犬褪得毛蒼。人撈起纓鎗。馬負着行裝。車運着餼糧。打獵起圍場。他他他。傷心辭漢主。我我我。攜手上河梁。他部從入窮荒。我鑿輿返咸陽。過宮牆。過宮牆。遶迴廊。遶迴廊。近椒房。近椒房。月昏黃。月昏黃。夜生涼。夜生涼。泣寒螿。泣寒

螢綠紗窗。綠紗窗。不思量。

【收江南】呀。不思量。除是鐵心腸。鐵心腸也。愁淚滴千行。美人圖。今夜掛昭陽。我那裏供養。便是我高燒銀燭照紅妝。

【尙書云】陛下回鑾罷。娘娘去遠了也。【駕唱】

【鴛鴦煞】我煞大臣行說一個推辭謊。又則怕筆尖兒那火編修講。不見他花朵兒精神。怎趁那草地裏風光。唱道。竚立多時。徘徊半晌。猛聽的塞鴈南翔。呀呀的聲嘹唳。却原來滿目牛羊。是兀那載離恨的氈車半坡裏响。【下】

【番王引部落擁昭君上云】今日漢朝不棄舊盟。將王昭君與俺番家和親。我將昭君封爲寧胡閼氏。坐我正宮。兩國息兵。多少是好。衆將士傳下號令。大衆起行。望北而去。【做行科】

【旦問云】這裏甚地面了。【番使云】這是黑龍江。番漢交界去處。南邊屬漢家。北邊屬我番

國【旦云】大王借一盃酒。望南澆奠。辭了漢家長行去罷。【做奠酒科云】漢朝皇帝。妾身今生已矣。尙待來生也。【做跳江科】【番王驚救不及。歎科云】嗨。可惜可惜。昭君不肯入番。投江而死。罷罷罷。就葬在此江邊。號爲青塚者。我想來人也死了。枉與漢朝結下這般讎隙。都是毛延壽那廝搬弄出來的。把都兒將毛延壽拿下。解送漢朝處治。我依舊與漢朝結和。永爲甥舅。却不是好。【詩云】則爲他丹青畫誤了昭君。背漢主暗地私奔。將美人圖又來哄我。我要索取出塞和親。豈知道投江而死。空落的一見消魂。似這等姦邪逆賊。留着他終是禍根。不如送他去漢朝哈喇。依還的甥舅禮兩國長存。【下】

#### 第四折

【駕引內官上云】自家漢元帝。自從明妃和番。寡人一百日不曾設朝。今當此夜景蕭索。好生煩惱。且將這美人圖掛起。少解悶懷也呵。【唱】

【中呂粉蝶兒】寶殿涼生。夜迢迢六宮人靜。對銀臺一點寒燈。枕席間臨

寢處越顯的吾身薄倖。萬里龍廷。知他宿誰家。一靈真性。

【云】小黃門。你看鑪香盡了。再添上些香。【唱】

【醉春風】燒盡御鑪香。再添黃串餅。想娘娘以竹林寺。不見半分形。則留下這個影影。未死之時。在生之日。我可也一般恭敬。

【云】一時困倦。我且睡些兒。【唱】

【叫聲】高唐夢苦難成。那裏也愛卿愛卿。却怎生無些三靈聖。偏不許楚襄王枕上雨雲情。

【做睡科】【旦上云】妾身王嬙。和番到北地。私自逃回。兀的不是我主人陛下。妾身來了。

也。【番兵上云】恰纔我打了個盹。王昭君就偷走回去了。我急急趕來進的漢宮。兀的不是

昭君。【做拏旦下】【駕醒科云】恰纔見明妃回來。這些兒如何就不見了。【唱】

【剔銀燈】恰纔這搭兒單于王使命。呼喚俺那昭君名姓。偏寡人喚娘娘

不肯燈前應。却原來是畫上的丹青。猛聽得仙音院鳳管鳴。更說甚簫韶九成。

【蔓青菜】白日裏無承應。教寡人不曾一覺到天明。做的個團圓夢境。【鴈叫科唱】却原來鴈叫長門兩三聲。怎知道更有箇人孤另。

【鴈叫科】【唱】

【白鶴子】多管是春秋高。勛力短。莫不是食水少。骨毛輕。待去後愁江南。網羅寬。待向前怕塞北。雕弓硬。

【么篇】傷感似替昭君思漢主。哀怨似作薤露哭田橫。淒愴似和半夜楚歌聲。悲切似唱三疊陽關令。

【鴈叫科】【云】則被那潑毛團叫的淒楚人也。【唱】

【上小樓】早是我神思不寧。又添個冤家纏定。他叫得慢一會兒。緊一聲。

兒和盡寒更。不爭你打盤旋。這搭裏同聲相應。可不差訛了四時節令。  
【么篇】你却待尋子卿。覓李陵。對着銀臺。叫醒咱家。對影生情。則俺那遠鄉的漢明妃。雖然得命。不見你個潑毛團也。耳根清淨。

【鴈叫科】云。這鴈兒呵。唱。

【滿庭芳】又不是心中愛聽。大古似林風瑟瑟。啾溜冷冷。我只見山長水遠。天如鏡。又生怕誤了你途程。見被你冷落了瀟湘暮景。更打動我邊塞離情。還說甚過留聲。那堪更瑤堦夜永。嫌殺月兒明。

【黃門云】陛下省煩惱。龍體爲重。駕云。不由我不煩惱也。唱。

【十二月】休道是咱家動情。你宰相每也生憎。不比那雕梁燕語。不比那錦樹鶯鳴。漢昭君離鄉背井。知他在何處愁聽。

【鴈叫科】唱。



【堯民歌】呀呀的飛過蓼花汀。孤鴈兒不離了鳳凰城。畫簷間鐵馬响丁丁。寶殿中御榻冷清清。寒也波更蕭蕭落葉聲。燭暗長門靜。

【隨煞】一聲兒遶漢宮。一聲兒寄渭城。暗添人白髮成衰病。直恁的吾家可也勸不省。

〔尚書上云〕今日早朝散後。有番國差使命綁送毛延壽來。說因毛延壽叛國敗盟。致此禍。釁今昭君已死。情願兩國講和。伏候聖旨。〔駕云〕既如此。便將毛延壽斬首祭獻明妃。着光祿寺大排筵席犒賞來使回去。〔詩云〕葉落深宮鴈叫時。夢回孤枕夜相思。雖然青塚人何在。還爲蛾眉斬畫師。

題目 沉黑江明妃青塚恨

正名 破幽夢孤鴈漢宮秋

破幽夢孤鴈漢宮秋雜劇終



# 半夜雷轟薦福碑

## 第一折

【沖末扮范仲淹。同外扮宋公序上。詩云】龍樓鳳閣九重城。新築沙堤宰相行。我貴我榮君莫羨。十年前是一書生。老夫姓范名仲淹。字希文。累蒙擢用。頗有政聲。今謝聖恩可憐。除老夫爲天章閣學士之職。這個是老夫幼年朋友。姓宋名公序。還有一個同堂小弟。姓張名鎬。字邦彥。老夫自登仕路以來。與兄弟張鎬數載不能相會。未知進取功名也。流落四方。老夫常切切於心。拳拳在念。今奉聖人命。着老夫江南採訪賢士。宋公序所除揚州爲理。只今日俺兩個便索登程去也。【宋公序云】哥哥。您兄弟已行。別無他事。止有一女未曾許聘他人。哥哥可有甚麼好親事舉保將來。就勞哥哥主婚。成就這門親事。【范仲淹云】相公放心。我有一同堂小弟張鎬。論此生的才學不在老夫之下。我若有書呈到於相公跟前。便成就了。

這門親事。〔宋公序云〕多謝哥哥。您兄弟謹領。則今日辭了哥哥。便住揚州之任。走一遭去。〔先下。〕〔范仲淹云〕宋公序去了也。老夫不敢久停。久住。則今便往江南探訪賢士。走一遭去來。〔下。〕〔淨扮張浩上。詩云〕段段田苗接遠村。太公莊上戲兒孫。莊農只得鋤鉤力。答賀天公雨露恩。自家是個莊家。姓張名浩。字仲澤。在張家莊居住。廣有莊田。牛羊孳畜。不知其數。我做個大戶。近新來有一個秀才。到我這莊上。我問他名字。他也姓張。名鎬。字邦彥。此人滿腹文章。留在莊兒上教些學生讀書。我偷聽他幾句言語。知之爲知之。不知爲不知。我今日無甚事。看了田禾。我去書房裏望那秀才走一遭去。〔下。〕〔正末扮張鎬引學生上云〕小生汴京人氏。姓張名鎬。字邦彥。幼小父母雙亡。我有八拜至交的哥哥。乃是范仲淹。他爲翰林學士之職。數載不曾相見。小生飄零湖海。流落天涯。在於潞州長子縣張家莊上。有一人姓張名浩。字仲澤。他見我和他同名同姓。留我在他莊上教着幾個蒙童度日。張鎬幾時是你那發達的時節也呵。〔唱〕

【仙呂點絳脣】我本是那一介寒儒。半生理沒紅塵路。則我這七尺身軀。可怎生無一個安身處。

【混江龍】常言道七貧七富。我便似阮籍般依舊哭窮途。我住着半間兒草舍。再誰承望三顧茅廬。則我這飯甑有塵生計拙。越越的門庭無徑舊游疎。【帶云】常言道三寸舌爲安國劍。五言詩作上天梯。【唱】既有這上天梯可怎生不着我這青霄步。我可便望蘭堂畫閣。剗地着我瓮牖桑樞。

【范仲淹上云】老夫范學士自離了汴京。隨路採訪賢士。來到這潞州長子縣。打聽的我那兄弟張鎬在於張家莊上教學。老夫直來到此處。探望我那兄弟走一遭去。可早來到也。祇候人接了馬者。學童。你師父在家麼。【學生云】師父家裏有。【范仲淹云】你報復去。道有。范學士特來相訪。【學生報云】有范學士在於門首。【正末云】道有請。【范仲淹云】賢弟別來無恙。【正末云】哥哥請坐。受您兄弟兩拜。【唱】

【後庭花】哥哥也。啗可便相別了數載餘。哎。你個故人音信疎。遠阻隔。二千里。你可便近新來安樂無。【云】比及哥哥來。我早知道了也。【范仲淹云】兄弟。我又不曾有書信來。你如何知道。【正末唱】我昨夜看文書。猛擡頭。疑怪他這燈花兒結聚。今日個果門迎你個長者車。

【范仲淹云】賢弟。論你高才大德。博學廣文。爲何不進取功名。剗地在此教學爲生。可是主何意。【正末云】哥哥。你兄弟一言難盡。【唱】

【油葫蘆】則這斷簡殘編。孔聖書。常則是養蠹魚。我去這六經中。枉下了死工夫。凍殺我也。論語篇。孟子解毛詩註。餓殺我也。尙書云。周易傳春秋。疏比及道河出圖。洛出書。怎禁那水牛背上。喬男女。端的可便定害殺。這一個漢相如。

【天下樂】這世裏難乘駟馬車。想賢也波愚。不並居。我干受了漏星堂半

世活地獄。【范仲淹云】你積攢下些甚麼囊篋。【正末唱】我渾攢下到六七斤家麻。四五斗家粟。幾時能勾播清風一萬古。

【范仲淹云】賢弟受窘。你肯謁托一兩個朋友呵。必有濟惠。得些盤費。進取功名。可不好那。【正末云】哥哥。如今難投托人。今人與古人不同。【唱】

【那吒令】當日個結交有周瑜魯肅。當日個量寬有王陽貢禹。今日個義讓無管仲鮑叔。則我這運未通。時難遇。枉了狂圖。

【鵲踏枝】我如今帶儒冠。着儒服。知他我那命裏有公侯也。伯子男乎。我左右來無一個去處。天也。則索閣落裏韞匱藏諸。

【范仲淹云】兄弟也。你是看書的人。便好道富家不用買良田。書中自有千鍾粟。安居不用架高堂。書中自有黃金屋。出門莫恨無人隨。書中車馬多如簇。娶妻莫恨無良媒。書中有女顏如玉。前賢遺語道的不差也。【正末唱】

【寄生草】想前賢語。總是虛。可不道書中車馬多如簇。可不道書中自有千鍾粟。可不道書中有女顏如玉。則見他白衣便得一個狀元郎。那裏是綠袍兒賺了書生處。

【幺篇】這壁攔住賢路。那壁又擋住仕途。如今這越聰明越受聰明苦。越癡呆越享了癡呆福。越糊突越有了糊突富。則這有銀的陶令不休官。無錢的子張學于祿。

【六幺序】我想那今世裏真男子。更和那大丈夫。我戰欽欽撥盡寒鱸。則這矢志鴻鵠。久困鰲魚。倒不如那等落落之徒。枉短檠三尺挑寒雨。消磨盡這暮景桑榆。我少年已被儒冠誤。羞歸故里。懶覩鄉閭。

【幺篇】則這寒儒。則索村居。教伴哥讀書。牛表描硃。爲甚麼怕去長安應舉。我伴着夥士大夫。穿着些三百納衣服。半露皮膚。天公與小子何辜。問黃



金誰買長門賦。好不直錢也者也之乎。我平生正直無私曲。一任着小兒  
簸弄山鬼挪揄。

【范仲淹云】賢弟似此訓蒙呵。幾時是你發達時節也。【正末云】你兄弟吃這些學生每定  
害殺我也。【唱】

【金盞兒】出來的越頑愚。忒乖疎。便有文宣王哲劍難拘束。一個個拴縛  
着紙筆子。一個個粧畫悶葫蘆。一個撮着那布裙踏竹馬。一個舒着那臙  
朋跳灰驢。他每那裏省的鴉窩裏出鳳雛。您兄弟常則是油瓮裏捉鮎魚。

【范仲淹云】兄弟。請你那東道出來。我和他廝見。【請科淨上云】我如今無甚事。學堂裏望  
那張鎬去。【正末云】老兄。我哥哥范學士來在此。你和他廝見咱。【做見科】【范仲淹云】

老兄。賢弟在此多蒙垂顧。【淨云】知之爲知之。不知爲不知。【正末云】小生往常曾說。此便  
是小生的哥哥范學士。【淨云】多勞相公遠降。有失迎迓。知之爲知之。不知爲不知。【范仲

淹云】賢弟。這廝也是個愚魯之人。〔正末云〕哥哥。量他何足道哉。〔唱〕

【醉扶歸】這廝蠢則蠢。家豪富。富則富。腹中虛。〔帶云〕哥哥。〔唱〕便道東道和門館德不孤。他純經義不詞賦。他識字呵不抵死。十分看書。他則是個中選的鋤田戶。

【淨云】老相公請坐。我執料些茶飯去。知之爲知之。不知爲不知。〔下〕〔范仲淹云〕兄弟。你身邊有何功課。〔正末云〕您兄弟積下萬言長策。哥哥。你試看咱。〔范仲淹云〕兄弟。我將此萬言長策獻上聖人。保舉你爲官。意下如何。〔正末云〕此處豈你兄弟久遠安身之地。

【范仲淹云】兄弟。既然你要轉動。我與你三封書投托三個人去。頭一封書洛陽黃員外。你投托他去。他見我書呈。你那衣食盤費都在此封書上。第二封書是黃州團練副使劉仕林。他見我書呈。必有厚贈。這第三封書最要緊。是揚州太守宋公序。你下到這封書呵。休說你那盤纏鞍馬。就是前程事都在此封書上。兄弟也。你着意者。你若不得第時。權在張家莊上。

住我着人來取你爲官。你意下如何。【正末云】多謝哥哥。賜我這三封書。我辭別東家。便索長行也。【淨上云】這弟子孩兒不中用。燒着一隻鵝。却揭開鍋蓋。可被他飛的去了。【正末云】長者小生在此。多多混踐。着衆學生各自還家去。等我回時。可教他再來讀書。哥哥小。弟收拾了琴劍書箱。便索起程也。【唱】

【賺煞】您兄弟先謁信安君。後訪揚州牧。看小子今番命福。恁兄弟一片功名心更速。豈不聞光陰如過隙白駒。我將這護身符。你着我變幾貫青蚨。【帶云】長者【唱】我投人須投大丈夫。則這新豐一旅。將着馬周來不遇。【帶云】哥哥。你可放心也。【唱】你看我專等常何的那一紙薦賢書。【下】

【范仲淹云】兄弟去了也。長者恕罪。老夫就將着萬言長策去獻與聖人。保舉兄弟爲官。不敢久停久住。祇候將馬來。別處採訪賢士。走一遭去來。【同下】

楔子

【旦上云】妾身是黃員外的渾家。是好煩惱人也。昨日有個秀才投下一封書。俺員外接過書呈看罷。不知怎生當夜晚間員外害急心疼亡了。兀的不痛殺我也。【正末上云】自從張家莊上與哥哥約別之後。小生一徑的來到洛陽投遞那黃員外。昨日下了書呈在店肆中安下。今日無甚事。黃員外宅上走一遭去。哦。可怎生門首掛着紙錢那。【做喚門科云】門裏有人麼。【旦云】是誰。【正末云】小生是昨日下書的張秀才。【旦云】你是那下書的兀那秀才。你聽者。自從你昨日下了書呈將俺員外急心疼一夜妨殺了。今日有甚臉上我門來。你若入門時抓了你那臉。卒風暴雨不入寡婦之門。你快回去。【正末云】誰死了。【旦云】員外死了。【正末做哭科云】張鎬。你好命薄也。呵。哥哥與我三封書。頭一封書投與洛陽黃員外。昨日下了書。一夜急心疼死了那員外也。小生不避驅馳。索往黃州投着團練副使劉仕林走一遭去罷。【唱】

【仙呂賞花時】我恰做訪戴山陰王子猷。身似飄飄沒纜舟。爲活計拙如

鳩。則這客僧投寺宿。措大謁儒流。

【幺篇】投至得千里書回碧樹秋。則怕這一夜霜天白髮愁。王粲謁荊州。我想那朝中故友休教我空倚定仲宣樓【下】

第一折

【范仲淹同使官上云】老夫范學士。自從江南採訪賢士。到於朝中。老夫就將兄弟張鎬所作萬言長策獻與聖人。謝聖恩可憐。就加張鎬爲吉陽縣令。老夫本待親身自去。爭奈公事冗雜。老夫差一使命去加官賜賞。使命你近前來。我囑付你。你去潞州長子縣張家莊上。有一人是張鎬。爲他獻了萬言長策。聖人的命加他爲吉陽縣令。教他走馬到任。小心在意。疾去早來【下】

【使官云】領了老相公言語。直至潞州長子縣張家莊上。加官賜賞。走一遭去【下】

【淨上云】自家張浩。自從那張秀才散了學生去了。許多時也。我今日看了田禾回來。無甚事。且閒坐些兒。則箇【使官上云】來到也。左右接了馬者。張浩聽聖人的命【淨云】

呀。快裝香來。知之爲知之。不知爲不知。〔做跪科。使官云。〕張浩爲你獻了萬言長策。聖人見喜。加你爲吉陽縣令。教你走馬上任謝恩。〔淨拜科云。〕待茶飯了去。〔使官云。〕不必了。小官事忙。將馬來回聖人話去。〔下。〕〔淨云。〕知之爲知之。不知爲不知。嗨。我幾曾有那萬言長策來。是那張鎬的錯。加了官也。且由他有誰知道。我如今不可久停久住。收拾鞍馬。便索理任去也。〔下。〕〔正末上云。〕小生張鎬。收拾琴劍書箱。且往黃州投遼練團使劉仕林走一遭去。

呵〔唱〕

〔正呂端正好〕恨天涯空流落。投至到玉關外。我則怕老了班超發了願。青霄有路終須到。剗地着我又上黃州道。

〔滾繡球〕這一遭下不着孔融好。等你那禰衡一鶚哥也。我便似望鵬搏。萬里青霄你搬的我散了學。置下袍去這布衣中莽跳空。着我遶朱門恰。便似燕子尋巢。比及見這四方豪士頻插手。我爭如學五柳的先生懶折。

腰。枉了徒勞。

【云】小生幼年間攻習儒業。學成滿腹文章。指望一舉狀元及第。崢嶸發達。誰想今日波波碌碌。受如此般辛勤也。【唱】

【叨叨令】往常我青燈黃卷學王道。剗地來紅塵紫陌尋東道。如今十個九個人都道。都道是七月八月長安道。兀的不困殺人也麼哥。困殺人也麼哥。看書生何日得朝聞道。

【云】貧乃士之常。聖人道。君子固窮。小人窮斯濫矣。【唱】

【滾繡球】雖然我住破窰。使破瓢。我猶自不改其樂。後來便爲官也富而無驕。洛陽書坐化了黃州書。白窰約比及到那時節。有一個秀才來投托。這世裏誰似晏平仲。善與人交。【云】到那財主門首報復將去。有個秀才下書那財主便道。着他們首等者。【唱】他腆着胸脯。眼見的昂昂傲。【帶云】要他那賣發呵。【唱】

將我這羞臉兒。懷揣着慢慢的熬。〔帶云〕投至得他那幾貫錢呵。〔唱〕輕可等半月十朝。

〔云〕這裏是個三叉路。不知那條路往黃州去。天色暄熱。就在柳陰直下歇一歇。等一個來往的人問路咱。〔正末坐地科。〕〔行者上云。〕好熱也。晒殺我也。〔正末云。〕一個出家人來了。我問訊咱。〔唱。〕

〔倘秀才〕敢問你個禪師長老。〔行者云。〕問甚麼。〔正末唱。〕這條路去黃州也。不錯。〔行者云。〕正是黃州大路。〔正末唱。〕長老也。則他這鐘不宜時爲甚敲。〔行者云。〕是無常鐘。死了人便撞這鐘。〔正末唱。〕我道死了人的。不是個鋤田漢。〔行者云。〕不是。〔正末唱。〕必然是個富官僚。〔行者云。〕可知裏。〔正末云。〕這官人姓甚名誰。〔行者云。〕我說與你死了的官人。是黃州團練使劉仕林。〔正末唱。〕我聽的他道了。

〔做歎氣科。〕〔唱。〕



【醉太平】爭些兒把我撞着。可着我心痒難揉。揚州太守聽消耗。你這其間莫不害倒。第一封書已自無着落。第二封書打發誰行要。我將這第二封扯做紙題條。【帶云】張鎬【唱】則好去深村裏教學。

【行者云】說我這一跳。秀才你閒也。是忙忙便罷。閒便來寺裏吃酸餛來。【正末云】長老恕罪。張鎬也怎生如此般命蹇。哥哥與了三封書。妨殺了兩個人。第三封書謁托揚州刺史罷罷。罷。我不往揚州去。我則回那潞州長子縣張家村上。等哥哥消耗。可不好那。【下】【龍神上。詩云】獨魁南海作龍神。興雲降雨必躬親。曾因悞受天公罰。至今不敢借凡人。吾神乃南海赤鬚龍是也。奉玉帝勅旨。着吾神行雨。身體困倦。在於廟中歇息片時。有何不可。【正末上云】好大雨也。兀的是龍神廟。我那裏避雨去咱。【唱】

【倘秀才】則他這香火冷。把他庄家賽倒。莫不是雨雪少。把這黎民來瘦。却古廟荒涼。餓鬼嚎。我權捻土做香燒。怨書生的命薄。

【云】供桌上有一個玟兒。我試問神道。咱小生張鎬。流落在潞州長子縣張家庄。教着幾個村學。當時一日有我的哥哥范學士來訪。小生將我萬言長策進了。保舉我爲官。又與我三封書。兩封書妨殺兩個人。第三封書小生不曾往揚州去。如今則回潞州長子縣。去張家庄上等待哥哥。消耗小生若是能勾爲官。便與三個上上大吉。若是不能勾爲官。便與我三個下下不合神道。【唱】

【滾繡毬】將碑玟兒咒愿了。香鑪上度了幾遭。【做擲玟科云】元來是個下下不合神道。【三科】【唱】可怎生一擲一個不合神道。和這塊臭芹泥也折貴攀高。遮莫是角木蛟。氏土貉。大古裏是今秋水落。你下下下。滄了我大段田苗。將我些三有金銀富漢都亡過。我和你無祭享。泥神兩個廝撞着。【帶云】我罵你呵。【唱】那裏也雨順風調。

【云】這披鱗的曲嶠帶甲的泥鳅。我歹殺呵。是國家白衣卿相。你豈敢戲弄。我怎生出的這

惡氣我則題破這廟宇。便是我平生之願。取出我這筆墨來。有這簷間滴水磨的這墨濃。蘸的這筆飽。就這搗椒壁上寫下四句詩。【做寫科云】詩寫就了。我表白一遍。【詩云】雨暘詩若在仁君。鼎鼐調和有大臣。同舍若能知此事。謾將香火賽龍神。我題罷這詩也。覺一陣昏沉。就這殿角邊歇息。【末做睡科】【龍神云】叵耐張鎬無禮。你自命塞福薄。時運未至。却怨恨俺這神祇。將吾毀罵。題破我這廟宇。更待乾罷。你行一程。我趕一程。行兩程。我趕兩程。張鎬你聽者。【詩云】你虧心折盡平生福。行短天教一世貧。古廟題詩將俺這神靈罵。你本是儒人。我着你今後不如人。【下】【正末做醒科云】天色晴了。日影兒出來也。我趕程途去。使索長行。【下】【淨騎馬上云】自家張浩的便是。托賴祖宗餘蔭。得了這官。如今去赴吉陽縣令。萬言長策。不是我的。是那個張鎬的。我就混賴了他的。有誰知道。今日走馬赴任。行動咱知之爲知之。不知爲不知。【正末上云】兀的不是張仲澤。仲澤。【淨云】不中。我索走走。【下】【正末唱】

【呆骨朵】我這裏高阜處不住的呀呀叫。【曳刺上云】一匹好馬也。【正末唱】見一個帶牌子的曳刺隨着。【云】敢問麼。【曳刺云】你問甚麼。【正末唱】這人姓甚名誰。【曳刺云】姓張是張浩。【正末唱】他那年紀兒是大小。【曳刺云】三十歲也。【正末唱】莫不在長子縣村中住。【曳刺云】是長子縣居住。【正末唱】因甚上爲官爵。【曳刺云】爲他獻了萬言長策來。【正末云】他那裏有萬言長策。【唱】我則道舊相知張仲澤。【帶云】哥哥休怪。【唱】管是我眼睛花將他錯認了。

【曳刺云】傻屌放手。我趕相公去。【下】。【正末云】他那裏取萬言長策來。世上多有同名同姓的。我則回潞州長子縣張家庄上。等待哥哥消耗便了。【下】。【淨騎馬上云】知之爲知之。不知爲不知。天色晴了也。我走了這一日。覺的有些困倦。且下這馬來拴在柳樹上。在這綠陰之下暫歇息咱。【曳刺上云】好塊子馬脚。打着腦杓子走趕不上。兀的不是那塊子馬。相公敢在這裏。【曳刺見淨科】。【淨云】兀那厮是甚麼人。【曳刺云】洒家是個曳刺。接相公來。

則被那塊子馬走的緊。洒家緊趕着，跟不上，接着相公。〔淨云〕你知道你那罪過麼？〔曳刺云〕洒家不知道。〔淨云〕你要饒你那罪過麼？〔曳刺云〕可知要饒哩。〔淨云〕你路上曾見個秀才麼？〔曳刺云〕洒家見來。〔淨云〕你殺了他去，我便饒了你罪過。〔曳刺云〕洒家知道我殺那傻廝去，且慢者乞個罪名。〔淨云〕他拐了我梅香，偷了我壺瓶臺盞，你殺了他去。〔曳刺云〕我便去。〔淨云〕你回來，倘若你不殺他呵，你休瞞了我，要你三件信物，要他那衣衫襟子，刀上有血，掙命的土刻灘子，三件都有，你便來回話。〔下〕〔正末上云〕天色暄熱，打破了我這脚，我慢慢的行波。〔曳刺趕上云〕兀的不是那傻廝兀那秀才，你住者，我和你說話。〔正末云〕那騎馬的可正是張仲澤麼？〔曳刺云〕俺那相公認的你着，我與你十兩棗穰金，在我這腿曲褲子裏打着，你自取去。〔正末云〕在那裏？〔做低頭取科〕〔曳刺云〕你黃泉做鬼，休怨我。〔做殺末科〕〔正末云〕哥哥饒俺性命，小生其實冤屈，死於九泉之下，我不告張仲澤，我則告着你。〔曳刺放末科云〕兀那秀才，他道你拐了他梅香，偷了他壺瓶臺

蓋教我來殺你。你可說你怎生冤屈。你試慢慢說一遍咱。〔正末云〕哥哥。你停嗔息怒。聽小生從頭至尾告訴得來。小生姓張名鎬。字邦彥。他姓張名浩。字仲澤。因與俺同名同姓。他留小生在他庄兒上教着幾個村童。當初一日。有我的哥哥是范學士來相訪小生。將我的萬言長策收了。又與了我三封書。兩封書妨殺了兩個人。有第三封書。小生不曾往揚州去。眼見的小生離了那庄上。哥哥着人來宣喚我爲官。小生可不在。他也姓張名浩。我也姓張名鎬。同名同姓。賴了我這官爵。他恐怕久後白破。他這事故意着哥哥來殺壞小生。他自封妻廕子。哥哥你沒來由替別人做甚麼。〔曳刺云〕恁的呵。是俺那傻屁的不是。〔正末云〕小生到不怪那張仲澤。則怪我那范學士哥哥。〔曳刺云〕兀那秀才。你休胡說那范學士。你怎生怨他。〔正末唱〕

〔倘秀才〕我則爲他三封書。把我這前程來誤却。萬言策被別人賴了。大道上肯分的軸頭兒廝抹着。他請我在庄兒上教村學。也曾看成的我至

好。

【曳刺云】兀那秀才他也姓張名浩。你也姓張名鎬。他是那一個浩字。你是那一個鎬字。你試說我聽咱。【正末云】哥哥不知聽小生說。【唱】

【滾繡毬】我是金字邊着個高。【曳刺云】可他呢。【正末唱】他是點水邊着個告。因此上一般名號。【曳刺云】那加官的管着甚麼來。【正末唱】誰想這送宣的再也不辨個根苗。他道是蓋世豪。我道是兒女曹。嚙兩個非同管鮑。哥也則你那十兩棗穰金。是鞘裏藏刀。俺兩個一時本是知心友。不想道半路裏番爲刎頸交。他怎肯將我就饒。

【曳刺云】兀那秀才你不說呵。我怎麼知道。既然這等饒你性命不殺你。【正末云】謝了哥哥。【做行科】【曳刺云】兀那秀才轉來問你要三件信物。【正末云】那三件信物。【曳刺云】要你那衣衫襟。刀子有血。掙命的土刻灘子。你與我這三件兒。你便去。【正末云】哥哥。

你要衣服可割一塊去。〔曳刺云〕將來。〔做割科云〕衣襟有了也。這刀子上要有血。〔正末云〕怎麼能勾這刀子有血。〔曳刺云〕兀那秀才。揀你那不痛處我札一刀子。〔正末做怕科云〕哥哥。那答兒是不疼的。〔曳刺云〕兀那秀才。你打破鼻子。〔正末做打鼻科〕〔曳刺云〕你重些打。〔正末云〕哥哥怎麼打。〔曳刺自做打鼻出血科云〕這般打。〔正末云〕哥也。打破你的鼻子。就着那血抹在那刀子上罷。省的我打。〔曳刺云〕倒好了。你也。那秀才你躲了。〔做跌倒科〕〔正末云〕哥也。你做甚麼。〔曳刺云〕傻屌也。可是那拚命的土刻灘子。〔正末云〕感謝哥哥。此恩念異日必當重報。敢問哥哥姓甚名誰。〔曳刺云〕我姓趙。是趙實。你久後得官呵。休忘了趙實。〔正末云〕哥哥是趙實。我勞記着哩。小生一句話敢說麼。〔唱〕

【煞尾】你是必興心兒再認下。這搭沙和草。哥也。你可休不挂意揩抹了。這把帶血刀。〔帶云〕張浩。〔唱〕休想天公把你饒。鞭牛漢平白的賴了官爵。採桑婦沒來由受了郡誥。我空向他鄉走一遭。千里投人怕的是到。若不



是吾兄義氣高。若不是哥哥怎生了。山海也似恩臨。決然報。異日峻嶒。廝撞着。請一個傳神巧待詔。一幅丹青寫容貌。堂上鋪陳掛幔幙羅列。盃盤置椅桌。百味珍羞不教少。一炷明香日暮燒。將你那救我命的恩人。【帶云。你是趙實哥哥。】唱。直供養到老。【下。】

【曳刺云。】秀才去了也。三件信物都有了。我回相公話去。【下。】【淨上云。】這廝好不幹事。這早晚不來回話。【曳刺上見淨云。】相公。酒家回來了也。【淨云。】你殺了那秀才也不曾。【曳刺云。】我趕上只一刀殺了那秀才。三般驗證都有。衣衫襟。刀子有血。相公怕不信呵。去看那拚命的土刻灘子。【淨云。】這廝好男子。我饒了你。接不着的罪過。【背云。】秀才也殺了。這廝久後說出來可怎了。則除是這般兀那曳刺你去了。一日光景。馬不會飲水。兀那裏有井。你那裏打些水飲馬去。【曳刺云。】酒家知道。【曳刺做打水。】【淨推科。】【曳刺云。】有人推我。【做轉身按倒淨科。云。】叫有殺人賊也。【宋公序引隨從冲上云。】小官宋公序。今取回

京師去也。來到此處。是甚麼人鬧炒。拿近前來。你是甚麼人。你說。〔曳刺云〕洒家是吉陽縣伺候。教小人接新官去。接着這個傻屌。他道你怎麼誤了接待我。洒家便道。那馬走的緊。小人趕不上。他便道你要饒你麼。洒家便道。可知要饒哩。他便道你路上曾見一個秀才來。我便道見來。他道你去殺了他去。我便道乞個罪名。這個傻屌便道。他拐了我梅香。偷了壺瓶臺蓋。他又怕我不肯殺他。問我要三件信物驗證。要衣衫襟。刀子有血。拚命的土刻灘子。洒家趕上秀才。說了他項上事。那秀才姓張名鎬。這傻屌也姓張名浩。他兩一般名字。他混賴了他萬言長策。得了他官爵。洒家聽的說。我放的秀才去了。回這傻屌的話。他久後怕我說出來。着我飲馬去。我到井邊。恰待打水。這傻屌便要推我在井裏。相公。我死呵。不打緊。我有八十歲的母親。可着誰人侍養。說兀的做甚。〔詞云〕小人從頭至尾說的來不差。半米殺了秀才。又渰死洒家。傻屌也你做的個損人利己。〔宋公序云〕我多聽的范學士哥哥說。一個張鎬的名兒。這個未知是不是。祇候人拿住這兩個人。跟隨我去。到於京師。見了范學

士親問明白。我自有個主意。左右那裏將馬來。赴京師走一遭去。【淨云】知之爲知之。不知爲不知。【同下】

### 第二折

【范仲淹上云】老夫范學士。自從將兄弟張鎬加爲吉陽縣令。至今音信皆無。老夫今奉聖人的命。差老夫饒州公幹。收拾行裝。便索往饒州走一遭去來。【下】【外扮長老上詩云】澗水煎茶燒竹枝。袈裟零落任風吹。看經只在明窗下。花落花開總不知。貧僧乃薦福寺長老。自幼出家。剃度爲僧。經文佛法。無不通曉。我這寺中碑亭內。有一統碑文。是顏真卿寫的就。是他親手鐫的。書法精妙。寺中以爲至寶。等閒人不得見。近日有一人。姓張名鎬。是范學士的朋友。因持三封書。投托人妨殺了兩個人。流落在此。貧僧每日齋食管待。今日無甚事。請到方丈中。與此人攀話。這早晚敢待來也。【正末上云】打聽的范學士哥哥在此。饒州爲刺史。小生一徑的投到饒州來。不想哥哥又宣的回去。將小生淹留在此。這薦福寺中安下。多

多的定害。這長老早間使人來請。小生須索方丈中走一遭去呵。【唱】

【中呂粉蝶兒】千里而來。早則不興闌了子猷訪戴。乾賠了對踐。紅塵踏路的芒鞋。則俺那守饒州范學士故人安在。哥也不爭你日轉千階。我便【是第二番又劫着個空寨】

【醉春風】行殺我也客路遠如天。閃殺我也侯門深似海。趁着這木魚聲。每日上堂齋。秀才也更做甚麼客。客謝長老慈悲。爲小生貧困。將我做上賓看待。

【見長老科云】長老。小生在此多混踐。長老也。【長老云】不敢請坐。敢問先生學成滿腹文章。爲何不進取功名。剗地流落四方。是何主意。【正末云】長老不問呵。小生不敢說。休嫌絮煩聽。小生說一遍。咱。【長老云】先生慢慢說一遍。【正末唱】

【石榴花】小生可便等二年一度選場開。守村院看書齋。【長老云】當初范學

士可怎生相訪來。【正末唱】不想俺那月明千里故人來。他見我便困在萬丈塵埃。【長老云】說道與了你三封書去投遼人如何。【正末唱】倚仗着他三封書還了我這饑寒債。【帶云】好處托生也。【唱】先妨殺一個洛陽的員外。遼黃州早則無方礙。半路裏先引的一個旋風來。

【長老云】先生但肯謁托一兩個朋友呵。必有濟惠。【正末唱】

【鬪鷓鴣】只爲他財散人離。閃的我天寬地窄。抵死待要屈脊低腰。又不曾巧言令色。況兼今日十謁朱門九不開。休道有七步才。他每道十二金釵。強似養三千劍客。

【長老云】先生何不進取功名。自甘流落。【正末云】小生待要往京師去。爭奈缺少盤纏。

【長老云】既然如此。你若進取功名呵。我無物相贈。我這碑亭中有一通碑文。乃是顏真卿書法。我將一千張紙。幾錠墨。教小和尚打做法帖賣。一貫錢一張。往京師去。一路上做盤纏。

意下如何【正末唱】

【普天樂】謝吾師傾心愛。有田文義氣趙勝的胸懷。打一統法帖碑。去向京師賣。到處裏書生都相待。誰肯學有朋自遠方來。那裏取鳴時的鳳麟。則別些個喧檐的燕雀。當路的狼豺。

【長老云】先生今日天色晚了。到來日着行者與你打法帖。老僧回方丈中去也。【下】【正末云】我閉上這門。就方丈中宿過一夜。明日五更前後。打了這碑文。慢慢的上路便了。【內做雷响科】【云】兀的雷啊。不下雨也。我開了這們。試看咱好大雨也呵。【唱】

【紅繡鞋】本待看金色清涼境界。霎時間都做了黃公水墨樓臺。多管是角木蛟當直聖親差。把黃河移得至和東海。取將來抵多少長江風送客。【帶云】這雨越下的大也。【唱】

【上小樓】這雨水平常有來。不似今番特煞這場大。雨非爲秋霖不是甘

澤遮莫是箭杆雨過雲雨可更淋漓辰靄。〔帶云〕我今夜不讀書。〔唱〕看你怎  
生飄麥。

〔帶云〕兀的不誑殺我也。〔唱〕

〔幺篇〕振乾坤雷鼓鳴。走金蛇電影開。他那裏撼嶺巴山攪海。翻江倒樹  
摧崖。這孽畜更做你這般神通廣大。也不合佛頂上大驚小怪。

〔龍神上云〕鬼力轟碎了碑文。這張鎬你聽者。〔詩云〕莫瞞天地昧神祇。禍福如同燭影隨。  
善惡到頭終有報。只爭來早與來遲。〔下〕。〔正末云〕天色明了。我看那碑文呀。一夜雷轟。碎  
了這碑文也。〔唱〕

〔滿庭芳〕粉碎了閻浮世界。今年是九龍治水。少不的珠露成災。將一統  
家丈二碑。霹靂做了石頭塊。這的則好與婦女搥帛。把似你便逞頭角欺  
負。俺這秀才把似你便有牙爪。近取那澹臺。周處也曾除三害。我若得那

魏徵劍來。我可也敢驅上斬龍臺。

【云】怎生不見長老到來。【長老上云】張先生。一夜雷雨不住。可是怎生。【正末云】長老。一夜雷轟。碎了這碑文也。【長老云】你因甚惱着雷神來。【正末唱】

【快活三】你不去五臺山裏且逃乖。乾把個梵王宮密雲埋。則待要倒天河。淹沒了講經臺。那裏取日月光琉璃界。

【鮑老兒】當日個七箇女思凡。養着俺這秀才。那其間可不好霹碎了天靈蓋。古廟裏題詩是我罵來。我不曾學了煮海張生怪。我腹懷錦繡。劍揮星斗。胸捲江淮。饒你衝開海嶽磨昏日月。崩蹋山崖。

【云】長老。小生命運如此。是天不容小生也。這殿角邊有株槐樹。要我這性命做甚麼。倒不如撞槐身死。【范仲淹冲上。拖末云】螻蟻尙且貪生。爲人何不惜命。【正末唱】

【十二月】我爲甚的做鉏麀觸槐。拚捨了這土木形骸。【范仲淹云】孔子有言。



吾豈匏瓜也哉。想你滿腹文才。一時未遇。何便不振如此。【正末唱】想吾豈匏瓜也哉。好着我無處安排。【范仲淹云】我不曾與你三封書來。【正末唱】再休題三封書。與我添些兒氣概。怎知道救不得我月值年災。

【堯民歌】做了場蒺藜沙上野花開。【范仲淹云】指望你金榜標名。【正末唱】但占着龍虎榜。誰思量這遠鄉牌。那裏是揚州車馬五侯宅。今日個洛陽花酒一齊來。哀也波哉。西風動客懷。空着我流落在天涯外。

【范仲淹云】兄弟也。你則今日跟的我往京師。見聖人去來。【正末云】小生情愿跟的哥哥走一遭去。【唱】

【耍孩兒】更怕我東南倦上紅塵陌。空惹的行人賽色。可不騎鶴人枉沉埋。把着個顏回瓢也。叫化的回來。未曾結廬山長老白蓮社。正遇着東海龍王大會垓。他共我冤仇大。將這座藥師佛海會都變做趙太祖凶宅。

【一煞】若不是八金剛護着寺門。險些兒四天王值着水災。偏這條龍不受佛家戒。恰纔禪燈老衲開青眼。可又早薦福碑文臥綠苔。空悲嘅。他風雲已遂。我日月難捱。

【二煞】雖然相公回百姓安。則怕小生行雨又來。也是我曾經着蛇咬。自驚怪。我則見一株松影橫僧舍。錯認做個千尺蒼龍臥殿堦。真無奈。今日貴神迎見。喜我問甚麼青龍洞求財。

【煞尾】相公文章欺董仲舒。詩才過李太白。則爲這三封書齎發我做十年客。你則休教八輔相。葫蘆提了那萬言策。【同下】

【長老云】貧僧無甚事。陪着范學士同赴京師。走一遭去來。【下】

第四折

【范仲淹上云】老夫范學士。自與兄弟張鎬同到京師。見了聖人。日不移影。對策百篇。聖人

見喜加爲頭名狀元。今日驛亭中安排茶飯管待狀元。令人請去了。這早晚敢待來也。〔正末上云〕張鎬怎想有今日也呵。〔唱〕

〔雙調新水令〕往常我望長安心急馬行遲。誰承望坐請了一個狀元及第。恕面生也白象笏。少拜識也紫朝衣。今日個列鼎而食。煞強如淡飯黃齏。到今日恰回味。

〔駐馬聽〕當日個廢寢忘食。鑄鐵硯長分磨劍的水。到今日攀蟾拆桂步金階。纔覓着上天梯。得青春割斷管寧席。險白頭擲却班超筆。謝罷禮君恩。勅賜平身立。

〔做見科〕〔范仲淹云〕兄弟崢嶸有日。奮發有時。若不是這一番舉薦呵。豈有今日。〔正末云〕不干哥哥事。〔范仲淹云〕果然不干我事。是兄弟的才學過人。〔正末云〕也不是。〔范仲淹云〕都不是呵。憑甚麼得這官來。〔正末唱〕

【雁兒落】都則爲范張雞黍期。今日得龍虎風雲會。你休誇舉薦心。我非  
得文章力。

【得勝令】都則爲那平地一聲雷。今日對文武兩班齊。想當初在古廟裏  
題詩句。誰承望老龍王劈破面皮。其實驅逼的我無存濟。誰知可元來運  
通也有發跡。

【長老云】貧僧來到這京師。聽知的張鎬中了頭名狀元。在於驛亭中。我望相公走一遭去。  
【做進見科】【范仲淹云】長老間別無恙。【正末云】長老勿罪。【長老云】恭喜相公已得美  
除。【正末唱】

【落梅風】當日個薦福碑多謝你。老禪師倒賠了紙墨。不想那避乖龍肯  
分的去碑上起。可早霹靂做粉零麻碎。

【宋公序上云】小官宋公序。聽知的范學士哥哥在驛亭中。我先去見哥哥去。趙實。你休着

走了那張浩。只在這裏等着。來到門首。我自過去。〔做見范科云〕哥哥一別許久。〔范仲淹云〕相公。你與這相公廝見。〔宋問科云〕敢問哥哥。這位是誰。〔范仲淹云〕則這個便是張鎬。〔看張云〕兄弟。這個便是揚州太守宋公序。〔正末唱〕

〔水仙子〕枉自有三封書札袖中攜。我則索撥盡寒鑪一夜灰。眼睜睜現放着傍州例。我則去那菜饅頭處拖狗皮。早兩樁兒送的來路絕人稀。〔范仲淹云〕兄弟。那死的死了。揚州爲何不去。〔正末唱〕便道你揚州牧能意氣。我則怕又做了死病難醫。

〔宋公序云〕哥哥不知。您兄弟路上拿住一個假張浩也。〔范仲淹云〕在那裏拿將過來。〔正末云〕張仲澤。我和你。有甚冤仇。着人殺壞我來。〔淨云〕知之爲知之。不知爲不知。〔正末唱〕

〔川撥棹〕你道你便老實。你不知爲不知。你只會拽耙扶犁。抱甕澆畦。萬

言策誰人做的。你待要狐假虎威。哎。你個賈長沙省氣力。

【七弟兄】就裏端的現放着試金石。這是萬邦取則魚龍地。對金鑿壯志吐虹霓。不比你那看青山滿眼騎驢背。

【梅花酒】呀。張仲澤你忒下得說。小生當日正波迸流移。無處可也依棲。他倚恃着黃金浮世。在我險些兒白髮故人稀。當日在村庄裏。村庄裏教學的。教學的。謝天地。謝天地。遂風雷。遂風雷。脫白衣。脫白衣。上丹墀。上丹墀。帝王知。帝王知。我身虧。我身虧。那一日。那一日。便心裏。便心裏。得便宜。得便宜。【收江南】呀。你今日討便宜。翻做了落便宜。你待將漚麻坑。索換我那鳳凰池。【淨云】可憐見我父親年紀高大。又有疾病哩。【正末唱】你道你父親年老更殘疾。他也不是個好的。常言道老而不死是爲賊。

【云】只不見我那大恩人在那裏。【曳刺云】相公認的洒家麼。只我便是趙實。【正末云】哥

哥受張鎬兩拜。【曳刺云】洒家不敢。相公請起。【范仲淹云】兄弟。你爲甚麼拜他。【正末云】哥哥不知。我當此一日。若不是他饒了我性命呵。豈有今日。【范仲淹云】元來有這等事。你一行人聽我下斷。假張浩暗賴了萬言長策。詐圖官爵。殺壞平人。市曹中明正典刑。趙實見義當爲。不行邪徑。就加你爲吉陽縣令。薦福寺長老。加爲紫衣太師。宋公序選吉日良辰。就招女婿張鎬過門。老夫殺羊造酒。做一個慶喜的筵席。【衆謝科】【正末唱】

【鴛鴦煞】則這遠公休結白蓮會。謝安却被蒼生起。誰知也有這日成就了宰相薦賢心。纔趁了男兒仗義膽。白破了賊漢拖刀計。倒招了個女嬌娃。結眷姻。和你這老禪師爲交契。大都來是書生命裏。不爭將黃閣玉堂臣。幾乎的做了違宣抗勅鬼。

題目 三封書謁揚州牧

正名 半夜雷轟薦福碑

半夜雷轟薦福碑雜劇終





# 呂洞賓二醉岳陽樓

## 第一折

【淨扮酒保上。詩云】俺家酒兒清。一貫買兩餅。灌得肚兒脹。溺得膝兒疼。自家店小二。是也。在這岳陽樓下。開着一個酒店。但是南來北往。經商客旅。做買做賣。都來這樓上飲酒。今日早晨間。我將這鑊兒燒的熱了。將酒望子挑起來。招過客。招過客。【正末扮呂洞賓提墨籃上云】貧道姓呂。名巖。字洞賓。道號純陽子。先爲唐朝儒士。後遇鍾離師父。點化得成仙道。貧道在蟠桃會上飲宴。忽見下方一道青氣。上徹雲霄。此下必有神仙出現。貧道視之。却在岳州岳陽郡。不免按落雲頭。扮做一個賣墨的先生。長街市上來往。君子都來買貧道好墨也。【唱】

【仙呂點絳脣】這墨光照文房。取烟在太華頂上仙人掌。更壓着五季二

張入硯松風響。

【混江龍】梭頭琴樣。助吟毫清徹。看書窗。恰行過一區道院。幾處齋堂。竹几暗添龍尾潤。布袍常帶麝臍香。早來到洞庭湖畔。百尺樓傍。【做上樓科云。】是好一座高樓也。【唱。】端的是憑凌雲漢。映帶瀟湘。俺這裏躡飛梯凝望眼。離人間似有三千丈。則好高歡避暑。王粲思鄉。

【酒保云】我在這門首觀者。看有甚麼人來。【正末唱。】

【油葫蘆】俺只見十二欄干接上蒼。【酒保云】招過客。招過客。【正末云】休叫。休叫。

【酒保云】你怎生着我休叫。【正末唱。】我則怕驚着玉皇。誰着你直侵北斗建槽

坊。【酒保云】你看我這樓上有牌。牌上有字。上寫着世間無此酒。天下有名樓。【正末唱。】寫

道是岳陽樓。形勝偏雄壯。更壓着你洞庭春。好酒新炊盪。【酒保云】老師父。

你看這邊景致。【正末唱。】翠巍巍當着楚山。【酒保云】休道是楚山連太山。華山都看見

了。師父你看這邊景致。【正末唱】浪淘淘臨着漢江。【酒保云】不要說漢江連洞庭湖。鄱陽湖青草湖都看見了。【正末云】正是雞肥蟹壯之時。【唱】正菊花秋不醉倒陶元亮。【酒保云】師父你來遲了。我這酒都已賣盡。無了酒也。【正末云】你道是無酒呵。【唱】怎發付團齊蟹一包黃。

【酒保云】這裏有酒呵。把甚麼與我做酒錢。【正末云】至如我無有錢呵。【唱】

【天下樂】我則待當了環絛醉一場。【酒保云】說便這等說。實是無了酒也。【正末云】你道無酒你聞波。【唱】那裏這般清甘滑辣香。【酒保云】酒有。只你醉了不好下樓去。【正末唱】但將老先生醉死不要你償。【酒保云】師父。這樓上好涼快哩。【正末唱】我特來趁晚涼。趁晚涼入醉鄉。【酒保云】老師父。天色將晚了。【正末云】還早哩。【唱】爭知俺仙家日月長。

【云】小二哥。你供養的是一尊甚麼神道。【酒保云】這是初造酒的杜康。我供養着他。這酒

客日日常滿【正末唱】

【那吒令】我待和你喚上那登真的伯陽。你覷當更懸壺的長房。不强似你供養那招財的杜康。【酒保云】師父我買活魚來做按酒。【正末唱】更休說釣錦鱗。菊新釀。待邀留他過往經商。

【鵲踏枝】自隋唐數興亡。料着這一片青旗。能有的幾日秋光。對四面江山浩蕩。怎消得我幾行兒醉墨淋浪。

【酒保云】師父我這酒賽過瓊漿玉液哩。【正末唱】

【寄生草】說甚麼瓊花露。問甚麼玉液漿。想鸞鶴只在秋江上。似鯨鯢吸盡銀河浪。飲羊羔醉殺銷金帳。這的是燒猪佛印待東坡。抵多少騎驢魏野逢潘鬪。

【酒保云】小人聽得說王弘送酒。劉伶荷鍾。李白摸月。也不似先生這等貪杯。【正末唱】

【幺篇】想那等塵俗輩。恰便似糞土牆。王弘探客在籬邊望。李白捫月在江心喪。劉伶荷鍤在墳頭葬。我則待朗吟飛過洞庭湖。須不曾搖鞭誤入平康巷。

【云】小二哥。打二百長錢酒來。【酒保云】先交了錢。然後吃酒。【正末云】你也說的是。與你這一錠墨。便當二百文錢的酒。【酒保云】笑殺我也。量這一錠墨。有甚麼好處。那裏便值二百文錢。【正末云】我這墨非同小可。便當二百文錢。也不多哩。【唱】

【後庭花】這墨瘦身軀無四兩。你可便消磨他有幾場。萬事皆如此。【帶云】酒保也。【唱】則你那浮生空自忙。他一片黑心腸。在這功名之上。【酒保云】我不要這墨。你則與我錢。【正末云】墨換酒。你也不要。【唱】敢糊塗了紙半張。

【酒保云】他是個出家人。我那裏不是積福處。留下這墨寫帳。也有用處。罷罷。打二百文錢酒。與他老師父。酒便與你自己吃不了。請幾個道伴來吃。【正末云】小二哥。你也說的是。你

看着我請幾個道伴來者疾。你來你來。【酒保云】在那裏。【正末云】疾。你也來。你也來。【酒保云】你看這先生風了。【正末云】一個舞者。一個唱者。一個把盞者。直吃的盡醉方歸。【酒保云】我說這先生風了。當真風了。把袍袖往東一拂道。你來你來。往西一拂道。你也來。你也來。一個舞者。一個唱者。一個把盞者。都在那裏。【正末云】可知你不見哩。【唱】

【金盞兒】我這裏據胡牀。望三湘。有黃鶴對舞仙童唱。主人家寬洪海量。醉何妨。直吃的捲簾邀皓月。再誰想開宴出紅粧。但得一尊留墨客。【帶云】我困了也。【唱】我。可。是。兩。處。夢。黃。梁。

【正末做睡科】【酒保云】如何。我說你吃不了。二百錢的酒。我說你請幾個道伴來吃。你不肯兀的不醉了。他睡着了。可怎生是好。我這樓上妖精鬼魅極多。害了他性命。怎生是好。我索喚起他來。【做喚科】師父你起來。這樓上妖精極多。鬼魅極廣。枉害了你性命。【正末不醒科】【酒保云】他睡着了。叫不醒。怎生是好。且下樓去收了鏟鍋兒。落了這酒望子。上了

這板闔。我再上樓去叫他去。可撲可撲。老師父。你不起來。妖精出來吃了你。不干我事。我自去也。〔下〕〔外扮柳樹精上〕〔詩云〕翠葉柔絲滿樹枝。根科榮茂正當時。爲吾屢積陰功厚。上帝加吾排岸司。小聖乃岳陽樓下。一株老柳樹是也。我在此千百餘年。又有杜康廟前。一株白梅花在此作祟。我上樓巡綽一遭。可是爲何恐怕他傷害了人性命。今日天晚。須索上樓巡綽一遭。好奇怪。我往常間上這樓來。坦然而上。今日如何心中懼怯。旣來難道回去。須索上去。〔做見科〕呀。上仙在此。須索回避咱。〔正末喝云〕業畜那裏去。回來。〔柳云〕早知上仙在此。只合遠接。接待不着。勿令見罪。〔正末云〕好可憐人也。〔唱〕

【醉中天】我見他拄着條過頭杖。恰便似老龍王。〔柳云〕早知上仙在此。合當參拜。〔正末唱〕你這般曲脊駝腰。來我跟前。有甚勾當。〔帶云〕我看你本相。〔唱〕我這裏斜倚定闌干望。〔柳云〕師父望甚麼。〔正末云〕你道我望甚麼。〔唱〕原來是掛望子門前老楊。〔柳云〕小聖在此千百餘年也。〔正末云〕噤聲。〔唱〕你道是埋根

千丈。你如今絮沾泥。則怕泄漏春光。

【云】柳也。你有幾般兒歹處哩。【柳云】師父。我有甚麼歹處。【正末唱】

【憶王孫】亞夫營裏晚天涼。煬帝宮中春晝長。按舞罷。楚臺人斷腸。你只是爲春忙。【柳云】再有甚麼歹處。【正末唱】餓得那楚宮女。腰枝一捻香。

【云】兀那老柳。這岳陽樓上。作祟的元來是你。【柳云】不干小聖事。是杜康廟前。一株白梅花。在此作祟。【正末云】待我看來。真個是杜康廟前。一株白梅花。在此作祟。好好兀那老柳。你跟我出家去罷。【柳云】師父。我去不得。【正末云】你爲何去不得。【柳云】我根科茂盛。枝葉繁多。去不得。【正末云】他是土木形骸。到發如此之語。【唱】

【金盞兒】我是個呂純陽。度你個綠垂楊。你則管伴烟伴雨。在溪橋上。舞東風。飄蕩弄輕狂。如今人早晨栽下樹。到晚來要陰涼。則怕你滋生下些小業種。久已後。乾撇下你箇老孤椿。



【云】老柳你跟我出家去來【柳云】既領師父訓教。情愿跟師父出家。但我土木形骸。未得人身。怎生成的仙道。【正末云】你也說的是。土木之物。未得人身。難成仙道。兀那老柳。你聽者。你往下方岳陽樓下賣的郭家的爲男身。名爲郭馬兒。着那梅花精。往賀家托生爲女身。着你二人成其夫婦。三十年後。我再來度脫你。【做與墨籃科云】你與我將着這物。【柳做頭頂科云】師父。我這般將着是麼。【正末云】不是再將者。【三科】【正末云】都不是將來。將來他是土木之物。未曾得人身。如何便能知道。你看者。【正末抱籃科唱】

【賺煞】似我般抱定墨籃兒。【柳抱籃科云】師父。這般將着可好麼。【正末唱】兀的不纔似一箇人模樣。【柳云】師父。你怎生識的小聖來。【正末唱】我底根兒把你來看生見長。【柳云】師父。仙鄉何處。【正末唱】我家住在白雲縹緲鄉。【柳云】那裏幽靜麼。【正末唱】俺那裏無亂蟬鳴聒噪斜陽。【柳云】徒弟去則去。則是捨不的這一派水也。【正末唱】量湖光不大似半畝芳塘。【柳云】徒弟省了也。【正末唱】你嶮做了

長亭繫馬椿。〔柳云〕敢問師父兩句言語。合道不合道。是怎麼說。〔正末云〕你一句句問將來。〔柳云〕師父。合道是怎生。〔正末唱〕合道在章臺路傍。〔柳云〕師父。不合道可是怎生。〔正末唱〕不合道。你則在灞陵橋上。〔云〕你若肯跟我出家。教你學取一個。〔柳云〕學取那一個。〔正末唱〕我着你學取那呂岩前松柏耐風霜。〔同下〕

第一折

〔柳改扮郭馬兒引旦兒上〕〔詩云〕龍團鳳餅不尋常。百草前頭早占芳。採處未消峯頂雪。烹時猶帶建溪香。自家郭馬兒是也。這是我渾家賀臘梅。在這岳陽樓下。開着一座茶坊。但是南來北往。經商客旅。都來我茶坊中吃茶。我聽得老的曾說來。三十年前。這岳陽樓上賣酒。如今輪着俺這一輩賣茶。俺兩口兒自成夫婦。已經數載。寸男尺女皆無。但是那過往的人。剩下的殘茶。我都吃了他的。可是爲何這個喚做偷陰功。積福力。但生得一男半女。也不絕了郭氏門中香火。今日開開茶坊。我燒的鑊鍋兒熱了。我昨日多飲了幾杯。今日有些害

酒大嫂茶客也未來哩。我且在這閣子裏歇一歇。若有茶客來時。着我知道。【旦兒云】理會的。【郭馬睡科】【正末上云】徐神翁。你與我纜住小舟。我度脫了郭馬兒。啗兩個同舟而歸。貧道當初在這岳陽樓下。度了一株柳樹。因他是土木之物。不得成道。教他托生爲人。如今岳陽樓下賣茶。郭馬兒便是。又着白梅花精。托生在賀家爲女。他兩個配爲夫婦。可又早三十年矣。過往君子。吃剩的殘茶。此人便吃了。雖然如此。爭奈濁骨凡胎。無人點化。常言道。玉不琢不成器。人不磨不成道。休道他至如呂岩。當初是個白衣秀士。未遇書生。上朝求官。在邯鄲道王化店。遇着鍾離師父。再三點化。纔得成仙了道。假如遇不着鍾離師父呵。【唱】

【南呂一枝花】猶兀自騎着箇大肚驢。吃幾頓黃梁飯。則今日有緣游闖苑。可正是無夢到邯鄲。【云】有人說道。你這等醉生夢死的。那神仙大道。却怎生得來。【唱】休笑我行步艱難。無證候。粧些殘患。如今便岳陽樓來了。兩番空聽的駭浪驚濤。【帶云】呆漢子。【唱】洗不淨愚眉肉眼。

【云】我這般東倒西歪。前合後偃的。【唱】

【梁州第七】我爲甚不帶酒。佯推着醉裏。【帶云】人間先生塵世時何。【唱】我可甚點頭來會盡人間。休笑我形骸。土木脂腠。扮強如紫綬。勝但白襪。袖藏着寶劍。腹隱着金丹。消磨盡綠鬢朱顏。恰離了雲幌星壇。【帶云】世俗人休笑俺神仙無定也。【唱】早來到綠依依。採靈芝。徐福蓬萊。恰行過高聳聳。臥仙臺。陳搏華山。又過了勃騰騰。來紫氣。老子函關。把船彎。此間正江樓茶罷人初散。你這郭上竈。喫人讚。則俺乞化先生左右難。來尋你下榻陳蕃。

【正末尋郭科云】這個閣子裏無有。這個閣子裏也無有。【做見科云】這廝在這裏。馬兒也。

如今桃花放徹。柳眼未開。【打郭科】郭驚云。倒說我一跳。早是不曾打着我的耳朵。【正末云】打了你耳朵。不會傷着你六陽魁首馬兒。你看波。【郭云】你着我看甚麼。【正末云】

兀的不是烏江岸。【郭云】烏江岸在那裏。【正末云】兀的不是華容路。【郭云】華容路在那

裏【正末哭笑科】【郭云】這師父風僧狂道着我看兀的不是烏江岸兀的不是華容路哭了又笑笑了又哭正是個風魔的哩【正末云】古人英雄今安在哉華容路這壁是曹操遺跡烏江岸那壁是霸王故址曹操姦雄夜眠圓枕日飲鳩酒三分霸王有啗啞叱咤之勇舉鼎拔山之力今安在哉【唱】

【賀新郎】你看那龍爭虎鬪舊江山【郭云】你笑甚麼【正末唱】我笑那曹操姦雄【郭云】你哭甚麼【正末唱】我哭呵哀哉霸王好漢【郭云】老師父你怎麼哭了又笑了又哭【正末唱】爲興亡笑罷還悲嘆不覺的斜陽又晚想想這百年人則在這撚指中間【郭云】不爭老師父在樓上玩賞可不攪了我茶客【正末唱】空聽得樓前茶客鬧爭似江上野鷗閒百年人光景皆虛幻【正末看科】【郭云】我也學你看一看【正末唱】我覷你一株金線柳猶兀自閒凭着十二玉闌干【郭云】老師父你來我這裏有甚勾當【正末云】我來問你化一盞茶吃【郭云】化一盞茶

吃。你可是甜言美語的。出家人那裏不是積福處。大嫂造一個茶來與師父吃。【正末云】我不這般吃。你則依着我。丁字不圓八字不正。深深的打個稽首。上告我師。吃個甚茶。我便說與你茶名。【郭云】你看麼。我見他是出家人。則這般與他個茶吃。他又這般饒舌也罷。依着他左右茶客未來哩。他又風我又九伯。俺大家耍一會。我依着他。丁字不圓八字不正。深深的打個稽首。上告我師。吃個甚茶。【正末云】我吃個木瓜。【郭云】哎喲。好大口也。吊了下巴。我說道。你吃個甚茶。說道。我吃個木瓜。【正末云】郭馬兒。你學誰哩。【郭云】我學你哩。【正末云】但學的我儘勾了也。【郭云】學你暗暗頭一世罷罷。大嫂造個木瓜來。【正末吃茶科】【郭云】將盞兒來。【正末云】我不與你盞兒。【郭云】怎生不與我盞兒。【正末云】你則依着我。丁字不圓八字不正。深深的打個稽首。上告我師。茶味如何。我便與你盞兒。【郭云】罷罷。我便依着你這些。不必說了。師父稽首茶味如何。【正末云】這茶敢不好。【郭云】好波。你與我貼招牌哩。【正末云】罰一個。【郭云】怎生罰一個。【正末云】依舊的問

將來【郭云】我依着你依舊打個稽首。師父要吃個甚茶。【正末云】我吃個酥餛。【郭云】好緊脣也。我說道師父吃個甚茶。他說道吃個酥餛。頭一盞吃了個木瓜。等二盞吃了個酥餛。這師父從來一口大一口小。【正末云】郭馬兒我是一口大一口小。【郭云】一口大一口小。不是個呂字。傍邊再一個口。我這茶絕品高茶。罷罷。大嫂造個酥餛來與師父吃。【正末接茶科】郭馬兒你這茶裏面無有真酥。【郭云】無有真酥都是甚麼。【正末云】都是羊脂。【郭云】羊脂昨日澆了燭子。那裏得羊脂來。【正末云】插上你呵。多少羊脂哩。【郭云】怎麼樣說。我是柳樹了。【正末吃茶科】【郭云】將盞兒來。【正末云】我不與你盞兒。依舊的問將來。【郭云】我依着你師父茶味如何。【正末云】這茶敢又不好。【郭云】可早兩遭兒了。【正末云】再罰一個你依舊問將來。【郭云】就依你問師父要吃個甚茶。【正末云】我吃個杏湯。【郭云】這師父倒會吃頭一盞吃了個木瓜。第二盞吃了個酥餛。第三盞吃個杏湯。再着上些乾糧。倒飽了半日。【正末云】馬兒你若不是我呵。是做了乾梁也。【郭云】看將起來。

我是塊木頭罷罷。大嫂造個杏湯來與這師父吃。【旦兒云】杏湯便有無有板兒也。【郭云】師父杏湯便有無有板兒也。【正末云】你說杏湯便有無了板兒。三十年前解開你都是板兒。【郭云】師父我怎當的你這一句。那一句。大嫂造一個杏湯來。【正末吃茶科】【郭云】將盞兒來。【正末云】我不與你盞兒。依舊的問將來。【郭云】我依着你師父茶味如何。【正末云】郭馬兒你這茶。【郭云】敢又不好。【正末云】你怎生攙了我的。【郭云】我學你道哩。【正末云】則要你學我道哩。【郭添茶盞科】【正末云】郭馬兒我見你兩次三番添。【郭云】添甚麼。【正末云】添我這茶盞底是何緣故。【郭云】師父你不知我與渾家賀臘梅自做夫妻數載有餘。寸男尺女俱無。但是南來北往。經商客旅。做買做賣。都來我這樓上吃茶。剩下殘茶我都吃了。却是爲何。這是偷陰功積福德。但得一男半女。也絕不了郭氏門中香火。【正末云】原來如此。我着你大積些陰功如何。【郭云】恁的呵。更好。【正末云】將盞兒來。郭馬兒你吃了我吐的殘茶。教你有子嗣。【正末吐科】【郭做意不吃科】【背云】看了他那嘴



臉我吃他吐的茶就絕戶了也成不的。我哄他一哄。看他說甚麼。師父。你肯吃我的剩飯。我便吃你的殘茶。【正末云】將你那剩飯來。【唱】

【梧桐樹】你道是兩碗通輕汗。獨不聞一粒度三關。管甚麼。餛飩皮饅頭。餛飩和剩飯。總是個有酒食先生饌。

【正末又吐科】【郭云】可彀殺我也。【正末云】你吃了我的殘茶。我便吃你的剩飯。【郭云】我和你說。我也不吃你殘茶。也不要你吃我的剩飯。你披着半片羊皮。乞兒模樣。好嘴臉。【

正末唱】

【隔尾】你休笑這丐兒。披定羊皮。你不會首休猜做大臥單。【云】馬兒。我吃了三盞茶。無一盞真的。【郭云】怎生無有一盞真的。【正末唱】我吐與你木瓜裏棗酥。僉裏脂。杏湯裏瓣。【云】馬兒。你喫了者。【郭云】喫不得。【正末唱】只恁般左難右難。【云】馬兒。吃了者。【郭云】其實吃不得。【正末云】你不吃。接了盞者。【正末哄科云】打碎了盞

兒也。【郭云】倒說我一驚。【正末唱】我看你怎發付松兔風毛蓋。

【帶云】馬兒你看我吐的不小可也。【唱】

【牧羊關】這吐也無那竹葉雲濤泛。也無那石鐺雪浪翻。這吐呵。但開口。滿簾香散。更壓着仙酒延年。更壓着蟠桃般駐顏。也不索採蒙頂山頭雪。也不索茶點鷓鴣斑。比及你吸取楊子江心水。【帶云】馬兒也。【唱】可強似湯生螃蟹眼。

【云】馬兒吃了者。【郭云】吃不得。【正末云】賀臘梅你吃了者。【旦兒吃科云】稽首弟子省了也。【正末云】你怕不省也。郭馬兒還不省哩。將盞兒來。【正末抹盞底殘茶與郭科】。【郭云】好東西也。吃下去。醍醐灌頂。甘露洒心。好東西也。師父纔抹到我口裏。是甚麼東西。【正末云】我恰纔抹到你口裏的。可是那殘茶。【郭云】在那裏再與我些吃。【正末云】都無了。【郭云】往那裏去了。【正末云】賀臘梅吃了也。【郭云】他吃了。可怎麼說。【正末云】他吃了。

先得了道也。【郭云】我呢。【正末云】你還在道傍邊哩。【郭云】看起來我是柳樹。【正末云】誰說你是榆樹來。【郭云】我吃了你這殘茶，怎麼說。俺渾家吃了你這殘茶，怎麼說。【正末云】你吃了我這殘茶，你是我的道伴。你渾家吃了我這殘茶，他是我的仙友。【郭云】且住着。我吃了他的殘茶，我是他道伴。俺渾家吃了他的殘茶，倒和他爲仙友。道伴也罷。這仙友可難爲。看起來俺老婆養着你哩。【做怒打正末科】。【正末唱】

【紅芍藥】把一片歲寒心，燒做了火炎山。哎，你弟子好是兇頑。【郭扯袍科】

【正末唱】把一領布袍襟，扯住不容還。碎紛紛，直似靈幡。【郭打科】。【正末唱】打的我比春牛少片板，總是我，不合勸修行。吐盡心肝。【云】郭馬兒，你休惱了我也。【郭云】惱了你可怎麼的。我。【正末唱】把岳陽樓，翻做鬼門關。休只管賣弄拳。儂。

【郭打科】。【正末唱】

【菩薩梁州】打的我死狗兒彎。跽青泥也腐爛。頭披也髻散呀。葫蘆裏澆了此三靈丹。【郭云】甚麼靈丹。都是些羊屎彈子。【正末唱】扭回頭遙望北邙山。【郭云】正是個風僧狂道。【正末唱】知他是你痴呆。我是風魔漢。【郭云】大嫂鑪中添上些炭。【旦兒云】理會的。【正末唱】鑪中有火休添炭。大都來有幾年限。打打打。打先。生不動憚。更怕甚聖手遮攔。

【末做架住起身科云】郭馬兒跟我出家去來。【郭云】這師父打不改的。【正末唱】

【哭皇天】我着你早尋個香火新公案。煞強似久墮風塵大道間。只爲你瘦伶仃無人盼。纔長大。便爭攀。若不是我把長條自挽。則你在洞庭湖上。楊子江邊。受了些風吹日炙。雪壓霜欺。嶮些兒做了這岳陽樓。岳陽樓酒望竿。【郭云】我就跟你出家去。有甚麼好處。【正末唱】我着你逍遙散誕。你自待偃。

慵惰懶

【烏夜啼】愁甚麼楚王宮。陶令宅。隋堤岸。我已安排下玉砌雕闌。則要你  
早回頭。靜坐把功程辦。參透玄關。勘破塵寰。待學他嚴子陵。隱在釣魚灘。  
管甚麼張子房。燒了連雲棧。競利名爲官宦。都只爲半張字紙。却做了一  
枕槐安。

【三煞】想人能克己身無患。事不欺心睡自安。便百年能得幾時間。去向  
那石火光中急措手。如何迭辦。你何不早回看。直到落日桑榆暮景殘。方  
纔道倦鳥知還。

【二煞】爭如我蓋間茅屋臨幽澗。披片麻衣坐法壇。倒也躲是非。忘寵辱。  
無牽絆。不强似你在人我場中。把個茶博士終朝淘渲。【做笑科云】郭馬兒你  
及早省悟也是遲了。【唱】我笑你忒愚頑。枉了我度你親身三兩番。還不省也。  
天上人間。

【云】郭馬兒跟我出家去來。【郭云】我跟你出家去。你那裏有甚麼道伴。【正末云】你若肯出家。我着你看兩個道伴。【郭云】那兩個道伴。【正末唱】

【黃鍾尾】我着你看藍采和舞。春風六扇雲陽板。【郭云】那一個呢。【正末唱】

我着你看韓湘子開冬雪。雙莖錦牡丹。疾回頭莫怠慢。【郭云】師父。我送你下樓去。【正末唱】下江樓近水灣。【云】呀。徐神翁等不的我先去了也。【郭云】在那裏。【正

末唱】你與我撐開船掛起帆。【云】郭馬兒上船來。【郭云】你先上船。【正末云】我先上

船。【郭推正末科云】推他娘在這水裏。【正末云】呀。這廝險些兒不閃我在水裏。【唱】行至

蓬萊宮。方丈山。俺那火送行人世。不曾西出陽關。早則不凝望渭城和淚眼。【下】

【郭云】那師父去了也。今日茶也不會賣的。被他打攪了一日。天色已晚了。收拾了鑊鍋兒。閉了茶肆。大嫂。咱還家中去來。【下】

楔子

〔郭馬上云〕自家郭馬兒自從見了那個師父。但合眼便見他道郭馬兒跟我出家去來。我可怎生出的家。我如今不賣茶了。在這岳陽樓下賣酒。我今日打點些按酒去。我不往前街上去。怕撞着那師父。我往這後街裏去。〔正末冲上云〕郭馬兒你往那裏去。〔郭云〕我躲他正撞在懷裏。師父我如今不賣茶了。在岳陽樓下賣酒。請師父吃三鍾。〔正末云〕你請我吃三鍾。我在你這樓上醉了兩醉也。你再請我吃一醉。〔做行科〕〔郭云〕上的這樓來。師父你吃一碗。〔正末云〕你也吃一碗。〔郭云〕師父你再吃一碗。〔正末云〕你也再吃一碗。〔郭云〕師父你再吃一碗。〔正末云〕你送我下樓去。〔郭云〕我送師父下樓去。〔正末云〕郭馬兒跟我出家去來。〔郭云〕我怎生出的家。我若跟你出家。可把我媳婦發付在那裏。〔正末云〕你殺了你媳婦者。〔郭云〕殺了我媳婦。可着誰償命。〔正末云〕敢是你償命。〔郭云〕可知哩。我便要殺俺媳婦。可也無兵刃。〔正末云〕兀的不是。一口劍。〔郭云〕師父。是一口好劍。

【正末唱】

【仙呂賞花時】這劍曾伴我三十年來海上遊。夜夜光芒射斗牛。【云】郭馬兒。我與你這一口劍。要些回答的禮物。【郭云】可要甚麼回奉的禮物。【正末唱】要一顆血漣漣婦人頭。【郭云】好容易也。【正末唱】爲你箇牆花路柳。【帶云】若不是恁兩箇呵。【唱】誰肯三醉岳陽樓。【下】

【郭云】這師父正是風僧狂道。好沒生與我一口劍。教我殺了俺媳婦兒。我怎生捨的。這一口劍。拿到家中切菜也有用處。今日又被他歪死纏。不會賣的酒。且回家中去來。【下】

第二折

【郭馬兒上云】自從那師父與了我一口劍。拿到家中三更前後。不知甚麼人把我媳婦殺了。劍上寫着四句詩道。朝游北海暮蒼梧。袖裏青蛇膽氣粗。三醉岳陽人不識。朗吟飛過洞庭湖。後面寫着洞賓作。我如今先告知社長。然後見官去也。未遲哩。可早來到社長門首。我



試喚他一聲。社長在家麼。【丑扮社長上云】誰叫門哩。我開開這門看。【見科】。【郭云】社長拜揖了。昨日有個不知姓名的胡先生。與了我一口劍。着我拿到家裏。三更前後。不知甚麼人把俺媳婦殺了。劍上寫着四句詩道。朝游北海暮蒼梧。袖裏青蛇膽氣粗。三醉岳陽人不識。朗吟飛過洞庭湖。後面寫着洞賓作。【社長云】你媳婦殺了麼。【郭云】殺了。【社長云】殺了罷。干我臊兒事。【郭云】你是個當坊社長。不和你說和誰說。【社長云】馬兒。我和你說洞賓作。想必是洞中一塊寶鐵。拿來打成這口劍。則怕是這個殺了你媳婦兒。【郭云】不是。【社長云】既然不是。依着你怎麼說。【郭云】我如今和你告官去。討一紙勾頭文書。長街市上尋那個道人去。但有人念這四句詩的。便是他殺了俺媳婦兒。【社長云】這也說的是。【郭詩云】我如今先去爪尋他。慢慢的告請差官捕。【社長詩云】便縱然尋着胡先生。也當不得你這醜媳婦。【同下】。【正末愚鼓簡子上】。【詞云】披篋衣。戴箬笠。怕尋道伴。將簡子。揜愚鼓。閒看中原。打一回。歇一回。清人耳目。念一回。唱一回。潤俺喉咽。穿茶房。入酒肆。牢拴意。

馬踐紅塵。登紫陌。繫住心猿。跨彩鸞。先飛到西天。西裏駕青牛。後走到東海。東邊靈芝草。長生草。二三萬歲娑羅樹。扶桑樹。八九千年白玉樓。黃金殿。烟霞靄靄紫微宮。青霄閣。環珮翩。翩鸚鵡杯。鳳凰杯。滿斟玉液。獅子鑪。猊鑪。香噴龍涎。吹的吹。唱的唱。仙童拍手彈的彈。舞的舞。劉衰當先做廝兒。做女兒。水煎火燎。或雞兒。或鵝兒。醬炒油煎。來時節。剛纔得安眉待眼。去時節。只落得赤手空拳。勸賢者。勸愚者。早歸大道。使老的。使小的。共給良緣。人身上明放着四百四病。我心頭暗藏着三十三天。風不着。雨不着。豈知寒暑。東不管。西不管。便是神仙。船到江心。牢把柁。箭安弦。上謾張弓。今生不與人方便。念盡彌陀。總是空。【唱】

【正宮端正好】我勸你世間人。休爭氣。及早的歸去來兮。可乾坤做一牀。黃紬被單。搦着陳搏睡。

【滾繡球】我穿着領布懶衣。不吃烟火食。淡則淡。淡中有味。又不是坐崖頭。打當牙椎。人問我姓甚的。住那裏。要尋我煞時容易。酒排沙。緊對着鍾

離。怕你虎狼叢吃。閃呆獐般看是非。海滄着死馬兒醫。樹倒風吹。

【郭同社長上云】兀的不是那道人來了。聽他念甚的。【正末云】朝游北海暮蒼梧。袖裏青蛇膽氣粗。三醉岳陽人不識。朗吟飛過洞庭湖。【郭云】好也。可是你殺了我媳婦。你逃走到

那裏去。【做扯末科】【正末唱】

【倘秀才】你在當街上把師父扯曳。這是我勸弟子修行的氣力。【郭打科云】我打你個弟子孩兒。【正末云】你打不的。【唱】打打打。今世饒人不是痴。天生下這頑皮壯吃。

【正末頓脫郭手科】【唱】

【滾繡毬】好生地放了者。我爲甚不惹你赤緊的簡子。喚做惜氣。但行處愚鼓相隨。愚是不省的。鼓是沒眼的。柳呵。今日蘊葱般人脆。一口氣不回。來教你落絮沾泥。則俺那洞中有客。鶴來早抵多少。秋後無霜葉落遲。看

那箇便宜。

【云】郭馬兒。你當街截住我是怎的。【郭云】你因何殺了我媳婦兒。我如今撞見你有甚話說。【正末唱】

【叨叨令】則爲這潑家私。滿鏡裏白髭髯熬煎得鐵湯餅一肚皮長吁氣。一頭把老先生推在荒郊內。哎。你箇浪婆娘。又攬着別人睡。不殺了要怎麼也波哥。不殺了要怎麼也波哥。爭如我夢周公。高臥在二竿日。

【郭云】你賴不過。我今告着你哩。【正末云】你憑甚麼勾我。【郭云】我憑勾頭文書勾你。

【正末云】你文書那裏。【郭出文書科】。【正末云】你念我聽。【郭念云】奉州官台旨。卽勾喚殺人賊。一名胡道人。是你不是你。【正末云】將來我看。【做換文書科云】疾你再讀。看是誰就拿誰。【郭云】是讀看是誰就拿誰。【念科云】奉州官台旨。勾換殺人賊。一名郭馬兒。【驚科】這上面可怎麼寫着我。【正末唱】

【倘秀才】我不信那官人敢斷誰。則爲你愚不省。將勾頭來弔你。正是俺自有心猿百字碑。哎。村物事潑東西。怎到得那裏。

【滾繡毬】俺那裏白雲自在飛。仙鶴出入隨。俺那裏洞門不閉。【郭云】師父。則怕那裏有俺媳婦兒麼。【正未唱】你可也再休題。家有賢妻。【郭云】師父。這裏是那

裏。【正未云】馬兒。你看波。【唱】這壁銀河織女機。那壁洞中玉女扉。怎發付你

那酒色財氣。則你那送行人。何曾道展眼舒眉。你是箇紅塵道上千年柳。

你覷波。白玉堂前一樹梅。【旦兒上郭見科云】兀的不是我渾家賀臘梅哩。【正未云】

疾。【旦下】【郭云】師父。俺媳婦那裏去了。纔在這裏。怎生不見了。【正未唱】怎知道這就

裏玄機。

【郭云】我也道花枝般好。媳婦被你殺了不成。快教他出來還了我罷。【正未唱】

【伴讀書】你道是花枝兒媳婦天然美。又道是筍條兒一對青年紀。端的

誰遣來兩個成匹配。到今日又誰拆散你這芳連理。可怎生不解其中意。還認做兒女夫妻。

【郭云】你藏了我媳婦兒。我便肯干罷社長。你也幫我。一幫扭他見官去來。【社長云】勾頭文書元着我協同着你拿這胡道人。我幫你。我幫你。【正末唱】

【笑和尚】我我我。要你媳婦兒做甚的。你你你。扭住我欲何爲。敢敢敢。挾着這一紙文書的勢。看看看。你媳婦兒在那裏。有有有。誰是個殺人賊。來來來。嚙和你去當官對。

【郭云】社長適纔我那媳婦。你也看見的。到官去。你與我做箇質證。【社長云】你不要等他。唱曲只拿他到官司去。【正末唱】

【煞尾】再休想一枝逗漏春消息。則要你三島追隨路不迷。拜辭了瀟湘洞庭水。同去蟠桃赴仙會。酒泛天漿滋味美。樂奏雲璈音調奇。絳樹青琴。

左右立。都是玉骨冰肌。世無比。我勸這片凡心。早收拾。莫爲嬌妻苦縈繫。  
【郭云】你拐了我媳婦兒。更待干罷。社長。你幫我拖他到官去。好歹要還我媳婦來。【正末云】  
這呆漢昏迷不省。枉了我三遭兒也。【唱】以這等呆腦呆頭。勸不回。吓可不乾賺  
了我奔走紅塵九千里。【做頓袖脫科下】

【郭云】好兩個後生。拿一個先生。被他擲了。我不問。那裏趕上去。【社長云】這裏有兩條路。  
你往這頭。我往那頭。兩路抄將來。不怕他會飛上天去。【郭云】說的是。趕趕趕。【同下】

#### 第四折

【正末打愚鼓簡子上云】羅浮道士誰同流。草衣木食輕王侯。世間甲子管不得。壺裏乾坤  
只自由。數着殘碁江月曉。一聲長嘯海門秋。飲餘回首話歸路。笑指白雲天際頭。【郭馬兒  
冲上拿科云】拿住。我如今再不等你擲了。和你見官去來。【正末唱】

【雙調新水令】則這殺人賊。須是你護身符。教你做神仙悟也不悟。你看

承我做酒布袋。請看這藥葫蘆。不是村夫還有三卷天書。〔郭云〕甚麼天書。敢是化緣的疏頭。〔正末唱〕你休猜做化緣疏。

〔郭扯末云〕告官去來。〔正末唱〕

〔駐馬聽〕你將我袍袖揪摔。誤了你龍麝香茶和露煑。將我環縈扯住。怎教鳳城春色典琴沽。建溪別館覓錢篋。蓬萊仙島休家去。〔郭云〕你殺了人。往那裏去。〔正末唱〕我若是欠人債負。俺那裏白雲滿地無尋處。

〔郭云〕我的媳婦兒。你送的那裏去了。〔正末云〕不是你的媳婦。〔郭云〕倒是你的媳婦。〔正末唱〕

〔沉醉東風〕是我縮角兒宿緣伴侶。垂髫時兒女妻夫。是我的媳婦兒潑男女。尙古自參不透野花村務。〔郭云〕你是個出家人。如何要老婆。〔正末唱〕道士須當配道姑。〔帶云〕呆漢。〔唱〕則俺兩口兒先生姓呂。



【郭云】你不要強。和你告官去來。【正末唱】

【七弟兄】由你到大處告去。只揀愛的做。你道是踏破鐵鞋無覓處。算來全不費工夫。可乾喫了半碗臍臍吐。

【梅花酒】想您箇匹夫不識賢愚。蠢蠢之物。落落之徒。休猜俺做左道術。俺自拿着捩鼻木。您拽着我布道服。俺急切裏要回去。您當街裏纏師父。俺爲甚的不言語。您心兒下自躊躇。

【收江南】俺則待朗吟飛過洞庭湖。您在茶坊中說甚蜜和酥。【外扮孤一行上云】甚麼人嚷亂。與我拿過來者。【正末唱】扇圈般一部落腮鬚。更狠似道錄。馬頭前不慌殺了賀仙姑。

【郭云】這個道人殺了我的媳婦兒。大人與我做主咱。【孤云】兀那道人。清平世界。浪蕩乾坤。你怎敢殺人。【正末云】郭馬兒告我殺了他媳婦兒。他媳婦賀臘梅。見在不曾死。【孤云】

賀臘梅在那裏。叫來我看。【正末云】現在此處疾。【旦兒上云】師父喚你徒弟那廂使用。

【正末云】這不是他媳婦兒。【孤云】郭馬兒。你告這道人殺了你媳婦兒。如今你媳婦兒現在做的個告人徒。自己徒左右推出去殺壞了者。【孤一行下】。【郭云】可怎了也。【正末云】郭

馬兒。你告着我殺了你媳婦兒。如今你媳婦兒現在做了個誣告人死罪。自己反坐。如今要殺壞你。要我救你不救。【郭云】可知要救我哩。【外扮鍾離引衆仙上云】郭馬兒。你認你我麼。

【郭云】怎生官人也不見了。祇候也不見了。都是一火先生。敢是我錯走在五龍壇裏來了。

【正末云】郭馬兒。你認的這衆仙麼。【郭云】這位做官的鬍子是誰。【正末唱】

【水仙子】這一個是漢鍾離。現掌着羣仙錄。【郭云】這位拿着拐兒的不是阜隸。

【正末唱】這一個是鐵拐李。髮亂梳。【郭云】兀那位着綠襴袍的不是令史哩。【正末

唱】這一個是藍采和。板撒雲陽木。【郭云】這老兒是誰。【正末唱】這一個是張

果老。趙州橋騎倒驢。【郭云】這位背葫蘆的是誰。【正末唱】這一個是徐神翁。身

背着葫蘆。【郭云】這位攜花籃的是誰。【正末唱】這一個是韓湘子。韓愈的親姪。【郭云】這位穿紅的是誰。【正末唱】這一個是曹國舅。宋朝的眷屬。【郭云】敢問師父。你可是誰。【正末云】貧道姓呂。名岩。字洞賓。道號純陽子。【唱】則我是呂純陽。愛打的簡子愚鼓。

【郭云】是了。三十年前我是岳陽樓下老柳樹。俺渾家賀臘梅。就是杜康廟前白梅樹。後來託生下方配爲夫婦。直待師父三度點化。纔歸正道。稽首。我弟子早省悟了也。【鍾離云】你二人既得省悟。聽吾指示。【詞云】你本是人間土木之物。差洞賓將你引度。今日個行滿功成。跨蒼鸞同登仙路。【郭旦拜謝科】。【正末唱】

【收尾】則我向岳陽樓來往經三度。指引你雙歸紫府。方纔識仙家的日月長。再不受人間的斧斤苦。

題目 郭上竈雙赴靈虛殿

正名 呂洞賓三醉岳陽樓

呂洞賓三醉岳陽樓雜劇終

# 西華山陳搏高臥

## 第一折

〔冲末扮趙大舍引淨扮鄭恩上。詩云。〕志量恢弘納百川，遨遊四海結英賢。夜來劍氣衝牛斗，猶是男兒未遇年。自家趙玄朗是也。祖居洛陽夾馬營人氏。父乃洪殷，爲殿前點檢指揮使。某生時異香三月不絕，人皆呼爲香孩兒。某生來頗有奇志，幼年間略讀詩書，兼持鎗棒。逢場作戲，遇博爭雄，每縱酒路見不平，拔刀相助，頗生事端。因避難遠遊關之東西，河之南北也。結識了許多未遇的英雄。這個漢子乃是我義弟鄭恩表，字子明。此人雖是性子惡劣，倒也有些慷慨粗直。某與他患難相同，功名共保。不知這運幾時來到，我不免和兄弟向竹橋邊尋一個賣卦先生買一卦，可不是好也。〔問鄭恩科云。〕兄弟，我與你到竹橋邊走一會何如。〔鄭恩云。〕哥哥待要上天，我就隨着上天。哥哥待要探海，我就隨着探海。任哥哥那

裏去兄弟愿隨鞭鏡【趙云】既然如此我和你竹橋邊去來【下】【正末道扮陳搏上詩云】  
術有神功道已仙。閒來賣卦竹橋邊。吾徒不是貪財客。欲與人間結福緣。貧道姓陳名搏字  
圖南的便是。能識陰陽妙理兼精遁甲神書。因見五代間世路干戈生民塗炭。朝梁暮晉。天  
下紛紛隱居太華山中。以觀時變。這幾日于山頂上觀見中原地分旺氣非常。當有真命治  
世。貧道因下山到這汴梁竹橋邊。開個卦肆指迷。看有甚人到來【唱】

【仙呂點絳脣】定死知生指迷歸正。皆神應著。插方餅。香爇雷文鼎。

【混江龍】開壇講命。六爻搜盡鬼神驚。傳聖人清高道業。指君子暗昧前程。袍袖拂開八卦圖。掌中躔度一天星。也不論冠婚宅葬。也不論出入經  
營。日有那辨榮枯問吉凶。買卦的心尊敬我也。則全憑聖典。不順人情。

【趙同鄭上云】兀的那壁有個賣卦先生。咱且聽他說些甚的。【正末唱】

【油葫蘆】古聖傳留周易經。有幾人能窮究的精。誦讀如坐井不能明。【帶

云】這易呵【唱】伏羲以上無人定。仲尼之下無人省。俺下的數又真。傳的課又靈。待要避凶趨吉。知天命。試來簾下問君平。

【趙云】兄弟好個先生也。【鄭恩云】哥哥怎見的。【趙云】只消數言之間。包羅古今上下。參透陰陽表裏。【鄭恩云】是好先生也。咱再聽他說一會者。【正末唱】

【天下樂】憑着八字從頭斷。一生丁寧不教差半星。論旺相死囚。憑五行。似這般暗奪鬼神機。豫知天地情。堪教高士聽。

【趙云】這麼一個先生。無有人識他。咱過去買卦去來。【與末相見科】【趙云】有勞先生將我兩人賤造着。一看。【正末作失驚科】【唱】

【醉中天】我等你呵。似投吳文整。你尋我呵。似覓呂先生。教我空踏斷草鞋。雙帶鞵。你君臣每元來在這搭兒相隨定。這五代史裏胡廝殺。不曾住程。休則管理名隱姓。却教誰救那苦慊慊天下生靈。

【趙云】這是區區的八字先生仔細看一看莫要容情【正末算科】【唱】

【後庭花】這命幹是丙丁戊己庚乾元亨利貞正是一字連珠格三重坐  
祿星你休道俺不着情不應後我敢罰銀十錠未酬勞先早陪了幾瓶

【趙云】先生向後再推一推看我流年大運如何【正末唱】

【金盞兒】到這戊字上呵水成形火長生避乖龍大小運今年併後交的  
丙辰一連大崢嶸日犯空亡爲將相時逢祿馬作公卿你是南方赤帝子  
上應北極紫微星

【云】請二公到僻靜酒肆中間敘數句【趙云】先生有請【正末云】二公先行【入肆作接  
駕科云】早知陛下到來只合遠接接待不着勿令見罪【趙扯末云】先生休的呼皇道寡  
倘有人知反速罪戾【正末云】貧道閱人多矣平生未見此命他日必爲太平天子也【唱】

【後庭花】黃河一日清東方日已明有興處飲醪醕千鍾醉沒人處倒山



呼萬歲聲。貧道呵索是失逢迎。遇着這開基眞命。拚今朝醉不醒。

〔趙云〕先生實不相瞞。區區見五代之亂。天下塗炭極矣。常有撥亂反治之志。奈無寸土爲階。倘皇天不沒此心。成的些小基業。不知天下形勢何處爲可守。何處爲不可守。〔正末云〕陛下欲知興龍之地。莫如汴梁。聽貧道說來便見。〔唱〕

〔金盞兒〕左關陝。右徐青。背懷孟。附襄荆。用兵的形勢。連着唐鄧太行天險。壯神京。江山埋旺氣。草木助威靈。欲尋那四百年興龍地。除是這八十里臥牛城。

〔鄭恩云〕兀那先生。你也與我算上一算。〔正末唱〕

〔醉中天〕你是五霸諸侯命。一品大臣名。乾打哄胡廝。膿過了半生。〔鄭恩云〕你說我是個五霸諸侯。我如何瞎了一目。〔正末唱〕注定你不帶破。多殘病。命中有愁甚眼睛。兀那明朗朗羣星。雖盛怎如的孤月偏明。

【趙云】請問先先高名大姓。何處仙居。今日之言。他年倘或應口。必須物色以共富貴。不敢忘也。【正末云】貧道陳搏。隱居西華山中。不求人間富貴。無煩酬謝。但願二公保重者。【唱】

【金盞兒】投至我石枕上夢魂清。布袍底白雲生。但睡呵一年半載沒乾淨。則看您朝臺暮省。幹公名。我睡呵黑甜甜倒身如酒醉。忽嘍嘍酣睡似雷鳴。誰理會的五更朝馬。動三唱。曉雞聲。

【賺煞】治世聖人生。指日乾坤定。【趙云】天下果有平定之時。那時節拜請先生下山。共享太平之福。【正末唱】何須把山野陳搏拜請。【指鄭科唱】若久後休忘了

這青眼相看舊弟兄。不索重酬勞。賣卦先生。從今後罷刀兵。四海澄清且放閒人看太平。我又似出師的孔明。休官的陶令。則待學那釣魚臺下老嚴陵。【並下】

第一一折

【外扮使臣引卒子捧砌末上云】小官黨繼恩是也。乃太尉黨進之子。今奉官裏詔書。將着安車蒲輪幣帛玄纁。向西華山請那陳搏先生。此係王命。不可怠慢。須索走一遭去者。【下】

【正末上云】貧道自從汴梁竹橋邊。算了那兩個君臣之命。歸到山中。醒時煉藥。醉時高眠。倒大快活清閒也呵。【唱】

【南呂一枝花】我往常讀書求進身。學劍隨時混。文能匡社稷。武可定乾坤。豪氣凌雲似莘野。商伊尹。佐成湯。救萬民。掃盪了海內烽塵。早扶策溝中愁困。

【梁州第七】從逢着那買卦的潛龍帝主。饒了個算命的開國功臣。便即時拂袖歸山隱。全不管人間甲子。單則守洞裏庚申。降伏盡嬰兒姘女。將煉成丹汞黃銀。思飄飄出世離羣。樂陶陶禮聖參真。想他那亂擾擾紅塵。內爭利的愚人。更和那鬧攘攘黃閣上。爲官的貴人。爭如這閒搖搖華山。

中得道的仙人。一身駕雲。九垓八表神遊盡。覷浮世暗中晒。坐看蟠桃幾度春。歲月常新。

【隔尾】則與這高山流水同風韻。抵多少野草間花作近隣。滿地白雲掃不盡。你與我緊關上洞門。休放個客人。我待靜倚蒲團自在盹。

【末盹睡科使臣上云】這些時不覺來到華山端的是好山也。則見雲臺觀中一縷白雲上接丹霄。想必是那先生隱居的去處。我不免將金鐘撞動。使那先生知道。【撞鐘末醒接使

臣科】【唱】

【牧羊關】我恰才遊仙闕。謁帝閣。驚的我跨黃鶴飛下天門。爲甚的玉節忙持金鐘。煞緊。又不是紙窗明覺曉。布被暖知春。驚的那夢莊周蝶飛去。尙古自炊黃梁鍋未滾。

【相見科使臣云】下官黨繼恩奉官裏勅旨。領着安車蒲輪。幣帛玄纁。敬到仙山來請先生

下山。聖人甚是懷念。望先生蚤些收拾行者。【正末云】貧道物外之人。無心名利。望天使回朝方便奏咱。【唱】

【紅芍藥】開基創業聖明君。舜德堯仁。玉帛萬國盡來尊。一統乾坤。眼見得滅狼煙息戰氛。早則是澤及黎民。又待要招賢納士禮殷勤。幣帛降玄纁。

【菩薩梁州】特遣天臣把賢良訪問。當今至尊重酬勞。賣卦山人。雖然是前言不忘是君恩。爭奈我煙霞不憶風雷信。琴鶴自有林泉分。想名利有時盡。乞的田園自在身。我怎肯再入紅塵。

【隔尾】俺只待下碁白日閒消困。高枕清風睡殺人。世事無由惱方寸。則除你個繼恩。使臣方便向君王行奏得准。

【使臣云】方今聖人在上。乾坤一統。萬國來賓。山間林下。並無遺賢。況先生乃天子之故人。

天下之高士。自當歸朝。以慰聖人之意。【正末唱】

【牧羊關】既然海岳歸明主。敢放巢由作外臣。怎望您吊千年高塚麒麟。誰待要老去攀龍。則不如閒來臥雲。試看蓬萊尋藥客。商嶺採芝人。天下已歸漢。山中猶避秦。

【賀新郎】我往常雞鳴舞劍學劉琨。看三卷天書。演八門五遁。我也曾遍遊諸國。占時運。則爲賣卦處。逢着聖君。以此的入山來。專意修真。看猿鶴知導引。觀山水。爽精神。大都來性於遠。習於近。則這黃冠野服。一道士。伴着清風明月。兩閒人。

【使臣云】久聞先生有黃白住世之術。不知仙教可使凡夫亦得聞乎。【正末云】神仙荒唐之事。此非將軍所宜問也。【唱】

【牧羊關】則你這一身拜將懸金印。萬里封侯守玉門。現如今際明良千

載風雲。怎學的河上仙翁。關門令尹。可不道朝中隨聖主。却甚的林下訪閒人。既受了雨露九天恩。怎還想雲霞三市隱。

【使臣云】先生既如此說。何不仕于朝廷。爲生民造福者。【正末唱】

【哭皇天】酒醉漢。難朝覲。睡魔王。怎做的宰臣。穿着這紫羅袍。似酒布袋。執着這白象笏。似睡饑餓。若做官後。每日價行眠立盹。休休休。枉笑殺凌煙閣上人。有這般疎庸愚鈍。孤陋寡聞。

【烏夜啼】幸然法正天心順。索甚我橫枝兒治國安民。我則有住山緣。那裏有爲官分。樂道安貧。誰羨畫戟朱門。丹砂好煉。養閒身。黃金不鑄。封侯印。我其實戴不的幘頭緊。穿不的朝衣全。倒不如我這拂黃塵的布袍。漉渾酒的綸巾。

【使臣云】天恩不可辜負。請先生就車即便行者。【正末云】既蒙天使到來。聖恩不敢違背。

必須下山走一遭去也【唱】

【黃鍾煞】也不索雕輪冉冉登程進。也不索駿馬駸駸踐路塵。既然是聖旨緊。請將軍休固懇。儘教山列着屏。草展着裀。鶴看着家。雲鎖着門。只消的順天風坐一片白雲。煞強似你那宣使乘的紫藤兜轎穩。【同下】

第二折

【趙改扮駕引侍臣上詩云】兩手揩摩新日月。一番整理舊乾坤。殿廷聚會風雲氣。華夏沾濡雨露恩。寡人宋太祖是也。數年之前。曾與汝南王兄弟在竹橋邊買卦。遇見陳搏先生。被他撥開混沌乾坤。指出太平天子。寡人臨御以來。好生想他。昨差使臣物色訪問。喜的他不要寡人而來。今在寅賓館中。尙未朝見寡人。欲擬其官爵。然後召他入朝。他又百般不受。且先加他道號希夷先生。賜鶴氅金冠玉圭。待朝會間。那時再作計較。黃門官領旨去。寅賓館請那先生來者。【侍臣領旨科下】【正末上詩云】家舍久從方外地。布袍重惹陌頭塵。道人



原不求名利。名利何曾繫道人。貧道陳搏下的西嶽華山。來到東京汴國。見了塵世紛紛。浮生攘攘。想我此行。實非本意也呵。【唱】

【正宮端正好】下雲臺來朝會。不聽的華山裏鶴唳猿啼。道人非爲蒼生起。只是報聖主招賢意。

【滾繡毬】俺便是那閒雲自在飛。心情與世違。可又不貪名利。怎生來教天子聞知。是未發跡卦鋪裏。那時節相識。曾算着它南面登基。【使臣上云】陳先生恭喜。官裏賜來衣冠道號。望闕謝恩。【正末拜謝科唱】因此上將龍庭御寶。皇宣詔。賜與我鶴擎金冠。碧玉圭。道號希夷。

【使臣云】先生在那隱居處。山野荒涼。得如俺這朝署中。這般富貴麼。【正末唱】

【倘秀才】俺那裏草舍花欄藥畦。石洞松窗竹几。您這裏玉殿朱樓未爲貴。您那人間千古事。俺只松下一盤棋。把富貴做浮雲可比。

【使臣云】官裏一心等着先生。請先生早些入朝者。兀的又有使命到也。【駕上立住科】

【正末唱】

【滾繡毬】不住的使命催奉御逼。便教咯早趨朝內。只是野人般不知個遠近高低。至禁幃上鳳池近。臨寶砌。列鵷鸞。簾捲班齊。玉堦前風擺龍蛇影。金殿上風吹日月旗。天仗朝衣。

【見駕打稽首科】【唱】

【倘秀才】無那舞蹈揚塵體例。只打個稽首權充拜禮。【駕云】故人別來無恙。今蒙不棄。喜慰平生。就在殿廷賜坐。好叙間闊。【正末唱】愿陛下聖壽齊天萬萬歲。如今黃閣功臣在。白髮故人稀。見貧道自喜。

【駕云】希夷先生。今日得見仙顏。寡人喜不自勝。願侍同朝。以爲臣民之望。不知先生意下如何。【正末云】貧道山野懶人。不愿爲官。【唱】

【叨叨令】向那華山中已覓下終焉計。怎生都堂內纔看旁州例。議公事枉損了元陽氣。理朝綱怕攪了安眠睡。貧道做不的官也麼哥。做不的官也麼哥。不要紫羅袍。只乞黃紬被。

【駕云】先生如何做不的官。【正末云】聽貧道說來便見。【唱】

【倘秀才】我但睡呵。十萬根更籌轉刻。七八甕銅壺漏水。恨不的生扭死。窗前報曉雞。休想我惜花春起早。愛月夜眠遲。這般的道理。

【駕云】先生若肯做官。寡人與先生選一個閒散衙門。除一箇清要的官職。無案牘勞形。必不妨于政事。【正末云】貧道怎做得官也呵。【唱】

【滾繡球】貧道呵愛穿的部落衣。愛吃的藜藿食。睡時節幕天席地。黑嚙嚙鼻息如雷。二三年喚不起。若在那省部裏。敢每日畫不着卯曆。有句話對聖主先題。貧道呵貪閒身外全無事。除睡人間總不知。空教人貼眼舒。

眉。

【駕云】先生爲己則是矣。但未知大人之道。大人以四海爲家。萬物一體。無我無人。勿固勿必。所謂君子周而不比。先生當擴其獨樂之懷。普其兼善之量也。替寡人整理些朝綱。可不好。【正末唱】

【倘秀才】陛下道君子周而不比。貧道呵小人窮斯濫矣。俺須索志於道。依於仁。據於德。本待用賢。退不肖。怎倒做舉枉錯。諸直更是不宜。

【駕云】先生休要推辭。似這朝中爲官。却不強如山中學道也。【正末云】這爲官的好處。貧道也盡知了。【唱】

【滾繡毬】三千貫。二千石。一品官。二品職。只落的故紙上兩行史記。無過是重裊臥。列鼎而食。雖然道臣事君以忠。君使臣以禮。哎。這便是死無葬身之地。敢向那雲陽市血染朝衣。【帶云】貧道呵。【唱】本居林下絕名利。自

不合剗下山來惹是非。不如歸去來兮。

【駕云】你說爲官不好。可說那學仙的好處與朕聽者。【正末唱】

【倘秀才】道有個治家治國。索分個爲人爲己。不患人之不已。知石牀綿被煖。瓦鉢菜羹肥。是山人樂矣。

【二煞】身安靜宇蟬初蛻。夢遶南華蝶正飛。臥一榻清風。看一輪明月。蓋一片白雲。枕一塊頑石。直睡的陵遷谷變。石爛松枯。斗轉星移。長則是抱元守一。窮妙理。造玄機。

【三煞】雞蟲得失何須計。鵬鷃逍遙各自知。看蟻陣蜂衙。龍爭虎鬪。燕去鴻來。兔走烏飛。浮生似爭穴聚蟻。光陰似過隙白駒。世人似舞甕醯雞。便博得一階半職。何足算。不堪題。

【駕云】先生。你有甚麼便宜處。也說來者。【正末唱】

〔煞尾〕俺那裏雲間太華煙霞細。鼎內還丹日月遲。山上高眠夢寐稀。殿下朝元劍佩齊。玉闕仙階我曾履。王母蟠桃我曾吃。欲醉不醉酒數盃。上天下天鶴一隻。有客相逢問浮世。無事登臨嘆落暉。危坐談玄講道德。靜室焚香誦秋水。滴露研硃點周易。散誕逍遙不拘繫。赴召離山到朝裏。央及陳搏受宣勒。送上都堂入八位。掌管台衡總百揆。御史臺綱索省會。六部當該各詳細。攘攘垓垓不伶俐。是是非非無盡期。好教我戰戰兢兢睡不美。〔下〕

第四折

〔鄭恩扮汝南王引色旦上詩云〕平生潑賴曾爲盜。一運崢嶸却做官。使盡機謀常是飽。錦衣紈袴不知寒。自家鄭恩官封汝南王之職。便是某幼年間與今上聖人爲八拜之交。患難相同。鎗刀不避。不想今日也同享富貴。今奉官裏之命。領着御酒十瓶。御膳一席。宮中美女

十人去寅賓館管待希夷先生。他如今尙未出朝。不免打發美女進去安排供具。我且躲在  
一壁待那先生來時。再作計較。您每好生在意者。【色旦云】理會的。【同下】。【正末上詩  
云】上林無興看花開。春色何人送的來。處士不生巫峽夢。空煩雲雨下陽臺。貧道陳搏早  
朝見上。蒙聖人念舊待我。甚是歡喜。但是我雲水之身。山林之鳥。難在這等塵凡之中也呵。

【唱】

【雙調新水令】半生不識曉來霜。把五更寒打在老夫頭上。笑他滿朝朱  
紫貴。怎如我一枕黑甜鄉。揭起那翠巍巍太華山光。這一幅繡幃帳。

【色旦上侍直云】妾等官裏送來與先生作傳奉。愿侍枕席之懽。【正末唱】

【駐馬聽】白酒樽傍閒慰眼。金釵十二行。誤了我清風嶺上不番身。惡睡  
一千場。您則待泛桃花到處覓劉郎。我委實畫蛾眉不會學張敞。好沒酌  
量。出家兒怎受閒魔障。

【色旦粧醉戲末科云】先生休拿出那道人鐵面皮。怎麼臉上和刮霜的一般。俺每都是未放的官花。誰曾經這等折挫。望先生少要棄嫌。【正末云】你每靠後者。你怎知我出家人的道心。【唱】

【步步嬌】折末胡廝纏到晨鐘撞。休想我一點狂心蕩。【色旦云】你來。我與你有句話說。【正末唱】喚陳搏有甚勾當。命不快遭逢着這火醉婆娘。乾誤了我晚夕參聖一鑪香。半夜裏觀乾象。

【色旦云】俺與先生奉一盃酒咱。【正末云】俺道人每從來戒酒不用他。【色旦云】我與先生奉一盃茶。先生試嘗這茶味何如。【正末云】是好茶也。【唱】

【沉醉東風】這茶呵採的一旗半鎗。來從五嶺三湘。泛一甌瑞雪香。生兩腋松風响。潤不得七碗枯腸。辜負一醉無憂老杜康。誰信您盧仝健忘。

【云】您每各自安置。我待睡也。【做睡色旦扯末科云】俺每都陪先生。怎敢捨的先生孤孤。



恹恹淒淒冷冷的【正末唱】

【攪箏琶】你好是輕薄相。我又不寂寞恨更長。乾把那蝶夢驚回。多管葫蘆提害痒。早則是臥破月昏黃。直睡到日出扶桑慌忙。猛聽得淨鞭三下响。又待要顛倒衣裳。

【鄭恩上云】好個沒理會的先生。待我自家過去。【相見科云】下官退朝較晚。乞恕探望來遲之罪。【正末云】多謝大王不忘故舊。【鄭恩云】先生好神算也。當日竹橋邊先生曾許我。是個五霸諸侯。今日果應其言。【正末唱】

【鴈兒落】曾道你官封一字王。位列頭廳相。那裏是有官的我預知也。則是你沒眼的天將降。

【鄭恩云】那宮女每好生歌舞。我奉勸先生一盃。【正末云】又教這個大王僕倖殺我也。

【唱】

【川撥棹】恰離高唐。躲巫娥一壁廂。客舍淒涼。仙夢悠揚。只想着邯鄲道上。原來在佳人錦瑟傍。

【色旦勸酒科】【正末唱】

【七弟兄】這場廝。央不相當。你便有粉白黛綠粧。宮樣茜裙。羅襪縷金裳。則我這鐵臥單。有甚風流況。

【鄭恩云】先生。聖人有云。食色性也。好色之心。人皆有之。又云。吾未見好德如好色者。先生獨非人乎。獨無人情乎。【正末唱】

【梅花酒】你可也忒莽撞。則道你變理陰陽。却惜玉憐香。撮合山。錯了眼光。就兒裏我也倉皇。您休使着這智量。俺樂處是天堂。

【云】貧道從來貪眠。我且盹睡片時。大王休怪。【做睡科】【鄭恩與色旦背云】須索如此如此。【鄭作關門科云】我把這門兒來帶上者。隨時且作窗前月。付與梅花自主張。【下】【正

末驚覺科唱】

【收江南】呀你敢硬將咱送上雨雲場。則待高燒銀燭照紅粧。出家兒心地本清涼。怎禁得直恁般鬧攘。便是一千年不見也不思量。

【水仙子】我恰纔神遊八表放金光。禮拜三清朝玉皇。不爭你拽雙環呀的門關上。纏殺我也瞎大王。驚的那下三山鶴夢翱翔。俺只待丹鼎內降龍虎。誰教咱錦巢邊宿鳳凰。枉羞殺金殿鴛鴦。

【云】只因我輕易下山。惹起這番勾當。倒惹那山靈見笑也。【唱】

【太平令】現如今山鬼吹燈顯像。野猿掄筆題牆。怕腐爛了芒鞋竹杖。塵沒了蒲團紙帳。縱有那女娘豔粧。洞房早盹睡了都堂裏宰相。

【鄭恩上云】天已明了。我把這門來開者呀。好個古撇先生。還在那壁披衣據牀。秉燭待旦哩。【正末云】大王教你僕倖殺我也。【鄭云】慚愧慚愧。我卽奏官裏宮中。蓋一道觀。使先生

住持封爲一品真人【正末唱】

【離亭宴帶歇指煞】把投林高鳥西風裏放也。強如啣花野鹿深宮裏養。你待要加官賜賞。教俺頭頂紫金冠。手執碧玉簡。身着白鶴氅。昔年舊草庵。今日新方丈。貧道呵。除外別無伎倆。本不是貪名利世間人。則一個樂琴書林下客。絕寵辱山中相。推開名利關。摘脫英雄網。高打起南山吊窗。常則是煙雨外種蓮花。雲臺上看仙掌。

題目 識真主汴梁賣課

念故知徵賢勅佐

正名 寅賓館天使遮留

西華山陳搏高臥

西華山陳搏高臥雜劇終

# 邯鄲道省悟黃梁夢

## 第一折

【冲末扮東華帝君上。詩云】閨苑仙人白錦袍。海山銀闕宴蟠桃。三峯月下鸞聲遠。萬里風頭鶴背高。貧道東華帝君是也。掌管羣仙籍錄。因赴天齋回來。見下方一道青氣。上徹九霄。原來河南府有一人。乃是呂岩有神仙之分。可差正陽子點化此人。早歸正道。這一去使寒暑不侵其體。日月不老其顏。神鑪仙鼎。把玄霜降雪。燒成玉戶金關。使姪女嬰兒配定。身登紫府朝三清。位列真君。名記丹書。免九族不爲下鬼。閻王簿上除生死。仙吏班中列姓名。指開海角天涯路。引的迷人大道行。【下】

【正旦扮王婆上。云】老身黃化店人氏。王婆是也。我開着這個打火店。我燒的這湯鍋熱着。看有甚麼人來。【外扮呂洞賓騎驢背劍上。詩云】策蹇上長安。日夕無休歇。但見槐花黃。如何不心急。小生姓呂名岩。字洞賓。本貫河南府人。

氏自幼攻習儒業。今欲上朝進取功名。來到這邯鄲道黃化店。饑渴之際。不免做些茶飯吃。到的這店門首。將這蹇衛拴下。將這二百文長錢。糴些黃梁。兀那打火的婆婆。央你做飯與我吃。行人貪道路。你快些兒。〔王婆云〕客官你好急性也。饒一把兒火者。〔洞賓云〕我巴不的選場中去哩。〔正末上云〕貧道覆姓鍾離。名權。字雲房。道號正陽子。京兆咸陽人也。自幼學得文武雙全。在漢朝曾拜征西大元帥。後棄家屬。隱遁終南山。遇東華真人。授以正道。髮爲雙髻。賜號太極真人。常遺頌於世。〔頌云〕生我之門死我戶。幾箇惺惺幾箇悟。夜來鐵漢自尋思。長生不死由人做。今奉帝君法旨。教貧道下方度脫呂岩。來到這邯鄲道黃化店。見紫氣冲天。當必在此。我想世間人好不識賢愚也呵。〔唱〕

印。  
【仙呂點絳脣】混沌初分。生人廝。恩誰持論。旋轉乾坤。這都是太上傳心。

【混江龍】當日個曾逢關尹。至今遺下五千文。大剛來。玄虛爲本。清淨爲

門。雖然是草舍茅菴。一道士。伴着這清風明月。兩閒人。也不知甚的秋。甚的春。甚的漢。甚的秦。長則是習疎狂。耽懶散。佯粧鈍。把些個人間富貴。都做了眼底浮雲。

【云】想世人爭名奪利何苦如此。【唱】

【油葫蘆】莫厭追歡笑語頻。但開懷好會賓。尋思離亂可傷神。俺閒遙遙。獨自林泉隱。您虛飄飄半紙功名進。你看這紫塞軍。黃閣臣。幾時得個安閒分。怎如我物外自由身。

【天下樂】他每得到清平有幾人。何不早抽身出世塵。儘白雲滿溪鎖洞門。將一函經手自繙。一鑪香手自焚。這的是清閒真道本。

【笑云】原來神仙在這裏。【做入店見科】。【洞賓云】一箇先生好道貌也。【正末云】敢問足下高姓。【洞賓云】小生姓呂名岩字洞賓。【正末云】你往那裏去。【洞賓云】上朝應舉去。

【正末云】你只顧那功名富貴。全不想生死事急。無常迅速。不如跟貧道出家去。【洞賓云】你這先生。敢是風魔的。我學成滿腹文章。上朝求官應舉去。可怎生跟你出家。你出家人有甚好處。【正末云】俺出家人自有快活處。你怎知道。【唱】

【金盞兒】上崑崙摘星辰。觀東洋海。則是一掬寒泉滾。泰山一捻細微塵。天高二三寸。地厚一魚鱗。擡頭天外覷。無我一般人。

【洞賓云】這先生開大言。似你出家的有甚麼仙方妙訣。驅的甚麼神鬼。【正末云】出家人長生不老。煉藥修真。降龍伏虎。到大來悠哉也呵。【唱】

【後庭花】我驅的是六丁六甲神。七星七曜君。食紫芝草。千年壽。看碧桃花。幾度春。常則是醉醺醺。高談闊論。來往的盡是天上人。

【洞賓云】俺做了官。也有受用處。【正末云】你做官受用得幾多。俺這神仙的快樂。與你俗人不同。你聽我說那快活處。【唱】



【醉中天】俺那裏自潑村醪嫩。自斬野花新。獨對青山酒一尊。閒將那朱頂仙鶴引。醉歸去松陰滿身。冷然風韻。鐵笛聲吹斷雲根。

【云】你跟我出家去來。【洞賓云】爲官居蘭堂。住畫閣。你這出家人無過草衣木食。乾受辛苦。有甚麼受用快活處。【正末唱】

【金盞兒】俺那裏地無塵。草長春。四時花發常嬌嫩。更那翠屏般山色對柴門。雨滋棕葉潤。露養藥苗新。聽野猿啼古樹。看流水繞孤邨。

【洞賓云】我學成文武雙全。應過舉做官。可待富貴有期。你教出家去呵。怎生便得神仙做。【正末云】你自不知。你不是箇做官的。天生下這等道貌。是個神仙中人。常言道。一子悟道。九族生天。不要錯過了。【唱】

【醉鴈兒】你有那出世超凡神仙分。繫一條一抹條。帶一頂九陽巾。君敢着你做真人。

【洞賓云】俺爲官的身穿錦段輕紗。口食香甜美味。你出家人草履麻縑。餐松啖柏有甚麼好處。【正末云】功名二字。如同那百尺高竿上調把戲一般。性命不保。脫不得酒色財氣這四般兒。笛悠悠。鼓瑟瑟。人鬧炒。在虛空怎如的平地上來。平地下去。無災無禍。可不自在多哩。【唱】

【後庭花】酒戀清香疾病因。色愛荒淫患難根。財貪富貴傷殘命。氣競剛強損陷身。這四件兒不饒人。你若是將他斷盡。便神仙有幾分。

【洞賓云】我十年苦志。一舉成名。是荷包裏東西拿得定的。神仙事渺渺茫茫。有什麼准程。教我去做他。【正末唱】

【醉中天】假饒你手段欺韓信。舌辯賽蘇秦。到底個功名由命不由人。也未必能拿准。只不如苦志修行。謹慎。早圖個靈丹腹孕。索強似你跨青驢。躑躅風塵。

【洞賓云】聽他說甚麼。不覺神思困倦。且睡一會。唱【做睡科】。【正末云】正說着話。他就睡了。好蠢人也。【唱】

【一半兒】如今人宜假不宜真。則敬衣衫不敬人。題起修行耳怕聞。直恁的沒精神。一半兒應承一半兒盹。

【云】這人俗緣不斷。呂岩也。你既然要睡。我教你大睡一會去。六道輪迴中走一遭。待醒來時。早已過了十八年光景。見了些酒色財氣人。我是非。那其間方可成道。【詩云】氣爲強弱。志爲先。努力須當莫換肩。推出這番難境界。更添疾苦一番仙。【唱】

【金盞兒】比及你米淘了塵。水燒的滾。我教這一顆米內藏時運。半升鎗裏煮乾坤。投至得黃梁炊未熟。他清夢思猶昏。我教他江山重改換。日月一番新。

【云】您睡着了。貧道自赴蟠桃會去也。【唱】

【賺煞】羽衣輕。霓旌迅。有十二金童接引。萬里天風歸路穩。向蓬萊頂上朝真笑。欣欣袖拂白雲。宴罷瑤池酒半醺。爭奈你個唐呂岩性蠢。偏不肯受漢鍾離教訓。又則索跨蒼鸞飛上九天門。【下】

【洞賓夢上云】兀那王婆那先生去了也。【王婆云】去久了。【洞賓云】飯熟也未。【王婆云】還燒一把火兒。【洞賓云】王婆我也等不的你那飯了。誤了我程途。我上的蹇驢便索長行去也。【下】【王婆云】呂岩去了也。他那裏知道我非凡人。乃驪山老母一化上仙法旨。着呂岩看破了酒色財氣。人我是非。那其間纔得返本朝元。重回正道。【詩云】漢鍾離點化玄機。度呂岩省悟心回。待此人功成行滿。同共赴閬苑瑤池。【下】

楔子

【正末改扮高太尉同日兒兩條上云】老夫殿前高太尉的便是。嫡親的三口兒家屬。夫人早亡。止有箇女孩兒。喚做翠娥。自十七年前呂岩應過舉拜兵馬大元帥。老夫見他好武藝。

就招他爲婿。所生一兒一女。近日蔡州反了。吳元濟好生猖獗。朝廷着呂岩領兵征討。他如今辭別了老夫前去。我索丁寧囑付他幾句言語。這早晚敢待來也。〔洞賓扮元帥上詩云〕平生慷慨習陰符。秉鉞臨戎出帝都。男兒三十不得志。枉作堂堂大丈夫。某呂岩自到京都。棄文就武。加某爲兵馬大元帥。與高太尉作贅。可早十八年光景。得了一雙兒女。今有蔡州吳元濟反亂。聖人的命着某統兵征討。今日辭別了岳父。便索長行也。〔做見科云〕您孩兒點就人馬。則今日便行。父親好戲當一雙兒女者。〔高太尉云〕孩兒。你此一去。這妻子身上有我在。此再不必留心。你與國家好生出力。千經萬典。忠孝爲先。你須恤軍愛民。不義之財少要貪圖。豈不聞金玉滿堂。未之能守。富貴而驕。自遺其咎。我這般說呵。也只爲你執掌軍權。怕你重利而輕義。失了道心。你切記者。左右將酒來。我親手與孩兒把一盃送行。〔做把酒科唱〕

〔仙呂賞花時〕則我是皓首蒼顏高太尉。別無甚親人。則覷着你兒幼小。

女嬌癡想爲人在世最苦是生離。

【云】孩兒再飲一盃。【洞賓云】我吃不得了。【高太尉唱】

【么篇】滿飲陽關酒一盃。【洞賓做吐科云】您孩兒吃不得了。心中有些不好。吐了兩口血。這酒元來傷人。您孩兒再也不吃這酒了。【高太尉云】既是傷着你心。再也休吃這酒罷。【洞賓云】父親放心。您孩兒不吃了。辭別父親。便索長行。【高太尉云】你休忘了我的言語。着心記者。【唱】則要你在意扶持唐社稷。囑付了又重題。但願的功成破敵。早唱凱歌回。【下】

【洞賓云】則今日領本部人馬。收捕吳元濟。走一遭去。【詩云】賊寇無端逞兇頑。殺聲振地撼天關。託賴聖人洪福大。不得成功誓不還。【下】

第一一折

【旦兒上云】妾身翠娥。是高太尉的女兒。自從父親招了呂岩爲婿。又早十八年光景。他跟

得了一雙兒女。如今呂岩收捕吳元濟去了。我和魏尙書的兒子魏舍。有些不伶俐的勾當。約定今日相會。怎生不見來。【淨扮魏舍上云】湛湛青天不可欺。兩個碓嘴撥天飛。則有一箇飛不動。爭奈身上沒穿的。自家姓魏。我父親是魏尙書。人皆稱我爲魏舍。我和呂岩的渾家有些不伶俐的勾當。呂岩征西去了。他教我今日來他家走一走。來到這門首前後。沒一人。我叫一聲高大姐開門來。【做見科】【旦兒云】你來了也。我正等你哩。嚙兩個家裏吃幾杯酒。打開這弔窗。若有人來。便往這窗子裏出去。【淨云】正是。嚙且慢慢的飲酒耍子。【洞賓上云】某乃呂岩奉聖人的命。統領三軍收捕吳元濟。到的陣面上。賣了一陣。與了我三斗珍珠。一提黃金。領軍回還。來到家門首。接了馬者。老院公也不見。前後無一箇人。夫人也不知在那裏。進到這臥房門首。有人在那邊說話。我試聽咱。【旦兒云】嚙兩個正好吃酒哩。【淨云】若陣亡了呂岩。我就娶你。【旦兒云】呂岩死了。我不嫁你。嫁那個。【洞賓云】兀的不有姦夫了。我踏開這門咱。【做踏門科】【淨云】不好了。有人來也。我往弔窗裏跳出去。

走走走。【洞賓云】姦夫走了也。我問你吃酒的是誰。【旦兒云】沒人。【洞賓云】你說沒人。這頂帽子是誰弔下的。【淨上云】哥是我的。【下】。【洞賓云】好也。我現授大元帥之職。你是太尉的女兒。你這般羞辱我。我好歹殺了你個淫婦。【正末改扮院公拿拄杖慌上云】老漢是高太尉家一個院公。有俺姐夫呂岩。做了征西大元帥。收捕反賊去了一年。恰纔小的每道呂姐夫回來了。老漢不信。若是暗暗的回來。必定做下不公的勾當。既不是呵。怎生一個大將軍回來。可沒一個人來報知。也不差人迎接。這小的每眼見的說謊逗我耍哩。休問有無。我看一看去。【唱】

【商調集賢賓】報道前廳上侍長恰到來。【帶云】既是來到了呵。【唱】却怎生不聽的把玳筵排。【洞賓云】這婦人忒無禮。瞞着我做這等勾當。【正末做聽科云】真箇來了。【唱】有甚事炒炒七七。【旦兒哭科云】我是爲害眼。許下的願心來。【正末唱】沒來由怨怨哀哀。我這裏七林林轉過庭槐。慢慢騰騰行過廳堦。孤椿椿靠定



明亮隔。【洞賓云】好老婆。我不在家。你養着姦夫吃酒。老院公那老匹夫在那裏。【正末唱】聽說罷。掩耳揉腮。【洞賓云】我則殺了這婦人。【正末云】這事怎了。【唱】我這裏傷心空跌脚。低首自慚眩。

【逍遙樂】夫人也想着你那百年恩愛。半世夫妻。好也囉。你做下這一場醜態。【洞賓云】我吃這婦人氣殺我也。【正末唱】休道是濁骨凡胎。便是釋迦佛也。惱下蓮臺。早難道侯門深似海。兩步那爲一驀。【做推門科唱】我這裏一雙手到。半壁身挨。可早兩扇門開。

【洞賓云】這箇老匹夫。你來這裏做甚麼。【正末云】自從大人出征去後。老相公早亡化過了半年也。大人今日來家。爲甚這等惱躁。【洞賓云】我心中的事。你怎生知道。不干你事。你快去。【正末云】上項的事。老漢已聽的了。大人停嗔息怒。難道是老漢無罪。大人記的你臨行時。老相公囑付的話道。着老院公單管打掃花園。嚙後花園離前廳却是多遠。老漢無事。

也不到這前面來。有甚麼勾當。相公當初將這兩個孩兒和夫人交付在老漢身上。今日有這等是非。老漢八十五歲年紀。便死老漢也甘心去。〔洞賓掣劍科云〕不干你事。我只殺了這婦人。〔正末唱〕

〔金菊香〕這一個怒橫着三尺劍當懷。〔旦兒云〕兀的不屈殺我也。〔正末唱〕好也。囉那一個倚定門兒手托腮。似恁地怎生將手腕解。又不是少米無柴。是夫人自跳下捨身崖。

〔旦兒云〕老院公。你不知我爲他害眼來許下的願心。他說我養漢來。我做的不是了。老院公。你救我一命。咱。〔正末云〕教老漢怎生救你。〔唱〕

〔醋葫蘆〕又不是別人相唬嚇。廝展賴。是你男兒親自撞將來。你渾身是口難分解。赤緊的併賊拿賊。你看他死臨侵。不敢把頭擡。

〔旦兒做跪科云〕我實做的不是了。看着兩個孩兒面皮。饒了我性命者。〔正末唱〕

【么篇】夫人你便有隨何陸賈舌。張儀蘇季才。百般難免這場災。是你辱門敗戶。先自歪。做的來漏蓋搭菜。把花言巧語。枉鋪排。

【洞賓云】我做着天下兵馬大元帥。你和伴當私通欺壓兀的不氣殺我也。【正末云】夫人。你聽的元帥說來。想元帥頂天立地。鋪眉苦眼。做着個兵馬大元帥。你却做這等勾當。是何道理。【唱】

【么篇】你男兒有八面威。七步才。現帶者征西金印虎頭牌。他在那長朝殿前班部裏擺。你教他把屎盆兒頂戴。兀的不屈沉殺了拜將築壇臺。

【云】老漢有甚麼面皮。大人可憐見一雙兒女。饒過夫人者。【唱】

【么篇】大人見義爲夫人。知過改。不是中間老漢廝支割。若是外人知道來。休恁的大驚小怪。醜名兒出去怎生措。

【洞賓仗劍殺旦科】【正末跪云】你發慈心饒了夫人者。【唱】

【么篇】問甚你夫妻好共歹。覷孩兒瘦更駮。便怎生教磣可可血泊裏。倘着尸骸。男子漢那一個不妬色。【帶云】不爭夫人死呵。【唱】枉乞兩的兩個小冤家不快。那淒涼日月索耽捱。

【云】大人饒夫人一命。勝造七級浮屠。【唱】

【么篇】覷哥哥千般兒慷慨。道不的一聲叫善哉。只待劍光揮三尺水晶牌。你權做箇南海岸救苦難。觀自在。我這裏磕頭禮拜。【洞賓云】我看着老院公面皮。饒你這一命。【正末云】好慚愧也。【唱】聽言說教我笑哈哈。

【旦兒拜云】若不是老院公。誰救我一命。深謝你這厚恩。【正末唱】

【么篇】我見他掩了淚眼。改了面色。笑鬢兒攢破旱蓮腮。直從那針關兒透得命到來。恰便似九霄雲外。滴溜溜飛下一紙赦書來。

【末扮使命上云】小官天朝使命是也。因元帥呂岩賣了陣。受了錢。私自還家。某奉聖人的

命着我來取他首級。可早來到也。【做見科云】某奉聖人的命爲你賣陣受財。私自還家。着我來取你首級哩。【洞賓云】今日教誰人救我咱。【正末云】兀的怎了也。【唱】

【么篇】朝廷將使命差。前廳上把聖旨開。道是西邊上賣陣走回來。誰教你貪心兒愛他不義財。今日箇脫空須敗。惡支沙將這等罪名揣。

【旦兒云】呂岩。你要殺我。誰着你賣了陣。受了錢。私自還家。幹的好事也。【做叫街坊科】

【洞賓云】嗨。原來這錢真個害人。今日我對天發願。將這錢半分也不要。呂岩也。你怎生做讀書人來。顏子也曾一簞食。一瓢飲。居於陋巷。量這幾貫錢。值得甚麼。不想到今日。可着誰救我。想當日我臨行時。俺岳翁與我送行。我對天發願。斷了酒。今日斷了財。呂岩也。你有甚難見處。因我回家。我妻有姦夫。明明是他出首來的。罷罷罷。將紙筆來寫一紙休書。任從改嫁。並不爭論。寫休書。寫休書。我今日又斷了色也。【旦兒云】哎。喲。你今日休了。我。你早則管不着我了。你眼見的是死人也。【又使命上云】呂岩。本待要斬首。聖人的命。體上天好生。

之德饒你項上一刀。迭配遠惡軍州。解子何在。〔丑扮解子上云〕叫小的那裏使用。〔使命云〕着你押解呂岩。迭配沙門島去。〔使命下〕。〔旦兒云〕解子哥。呂岩是犯罪的人。你怎生教他自在。不上刑法。〔解子云〕這也說得是。將行枷來。〔做上枷科〕。〔旦兒云〕呂岩你如今還殺的我麼。兀的不歡喜殺我也。〔正末云〕夫人。你怎生沒些夫妻情分。說這等言語。做甚麼。〔唱〕

〔幺篇〕也是你慈悲生患害。俺哥哥除死無大災。何須你暢叫廝花白。〔旦兒云〕我是高太尉女兒。養漢來。養漢來。如今你休了我。誰管的我。〔正末唱〕鬧垓垓。幺喝十字街。〔帶云〕他今日聲聲說是高太尉女兒。養漢來。〔唱〕直恁的惡。乂白賴婆娘。家情性恁般乖。

〔解子云〕去罷。誤了程限。到幾時。〔正末唱〕

〔幺篇〕昨日上官時。似花正開。今日迭配呵。風亂篩。都是犯着年月日時。

該【帶云】休道嗒小民呵【唱】隋江山生扭做唐世界也則是興亡成敗怎禁那公人狠劣似狼豺

【旦兒云】呂岩你是死的人留下我的孩兒不要將去【洞賓云】我的兒女我不領着留下與誰【旦兒云】你犯下了罪干俺兒女甚麼事【奪科】【洞賓拖科云】解子哥你慢着些兒着這賊婦送了我。我和兩個孩兒死在一處【正末顧洞賓并傑科云】解子哥可憐見容俺哥哥和孩兒住一兩日去打甚麼不緊【解子云】誤了限期使不的【做打洞賓并傑正末勸科唱】

【後庭花】我則見颼颼的枷棒摔打的他紛紛的皮肉開見他可擦擦拖將去我與你氣不不趕上來痛哀哉身遭殘害他如何敢闐闐我其實無剖劃平白地招罪責從今日離院宅

【雙鴈兒】哥哥也恰如趙杲送燈臺便道不的山河易改恁時節和尚在

鉢盂在。今日箇福氣衰。看何時冤業解。

【解子推洞賓并傑行】【末扯住】【解子推末倒科云】老無知去罷。【正末唱】

【高過浪里來】俺如今鬢髮蒼白。身體囊揣。則恁的東倒西歪。推一交嶮  
顛破天靈蓋。【解子打二傑科】【正末云】哥哥息怒。【唱】我這裏割捨了老性命搭

救這兩個小嬰孩。空教我忿氣沖懷。雨淚盈腮。將兩隻手扛擡。【解子押洞

賓并傑下】【正末唱】把雙眼揉開。趁起身來。望不見嬌客。【旦兒云】呂岩去了。我

收拾一房一臥。嫁魏舍去來。【下】【正末云】哥哥去的遠了也。【做叫洞賓內應科】【正末唱】

又被這半凋謝的垂楊樹間隔。

【隨調煞】好教我回去艱難。誰似你步行的快。望不見走上望高臺。空日

斷一天殘照。不知俺哥哥安在。【做叫科云】哥哥。【洞賓遠應科】【正末唱】看時

節隔疎林。風送過哭聲來。【下】



第二二折

【洞賓帶枷引一俵隨解子上】【解子云】呂岩行動些。【洞賓云】念呂岩自賣了陣迭配我無影牢城。我死不爭。可憐見這一雙兒女。眼見的三口兒無那活的人也。解子哥。怎生可憐見方便一二。【解子云】兀那呂岩。我也是好義的人。到這深山曠野中。我回去也。你三口兒自逃你那性命去。【做開枷科】【洞賓云】謝了哥哥。小生口中銜鐵背上搭鞍。此恩必當重報。【解子云】你逃命去。我回去也。【下】【洞賓云】好苦也。你看紛紛下的那雪。越大了也。迷蹤失路。不知往那裏去。怎生得個指路的人來可也好。【正末改扮樵夫上云】小人是一個樵夫。砍的這柴回來。遇着這一天風雪。好凍人。天氣也呵。【唱】

【大石調六國朝】風吹羊角。雪翦鵝毛。飛六出海山白。凍一壺天地老。便有丹青巧。畫筆難描。俺這裏遙望千山表。是誰將粉黛掃。幽窗下寒敲竹葉。前村裏冷壓梅梢。撩亂野雲低微。茫江樹杳。

【歸塞北】爲甚春歸早。旣不沙可怎生蝶翅舞飄飄。梅蕊粉填合長安道。柳花綿迷却灞陵橋。山館酒旗遙。

【初問口】想那捕魚叟。蓑笠綸竿。他向那寒潭獨釣。和俺這採樵人迷却。歸來道。則見凍雀又飛。寒鴉又噪。古木林中。鶯聽的山猿叫。

【怨別離】園林無處不蕭條。春歸也。猶未覺。滿地梨花無人掃。寒料峭。遙望見一點青山兀良。却又早不見了。

【歸塞北】白雲島。則聽得孤鬼吼荒郊。九天女鼓風驅造化。六丁神揮劍。斬長蛟。旣不沙可怎生就地捲風濤。

【幺篇】孤邨曉。稚子道。猶自月明高。青女翦冰寒。不散黑雲噴雨凍難消。無處覓漁樵。

【洞賓云】孩兒行動些。如此大風大雪。又迷蹤失路。眼見的是死人也。【做椎胸科云】天嘍

這雪住一住可也好。越下的惡躁了。〔正末云〕這來的是呂岩。可也該省悟了。〔唱〕

【鴈過南樓】我則見凍剝剝一行老小。〔洞賓云〕凍殺我也。〔正末唱〕戰欽欽  
四體頻搖。這一個骨聳着肩。那一個拳聯着脚。正揚風攪雪天道。〔俚云〕爹  
爹我餓的慌。〔洞賓云〕兒也。行動些。到兀那裏就有飯吃。〔正末唱〕兒扯定老父。悲父  
對着孩兒告。那吃飯處。霎時間行到。

【六國朝】早是朔風凜冽。途路迢遙。〔二俚凍倒洞賓護科云〕俺三個都凍倒了。誰  
救孩兒咱。〔正末唱〕我則見三個人走將來。一時間撲地倒。〔做叫科云〕兀那君子  
你甦醒者。甦醒者。怎生好。〔唱〕我這裏用手忙扶策。緊搭住頭稍。這一個早直  
挺了軀殼。那一個又答刺了手脚。我這裏款款的把衣襟解放。只見悠悠  
的魄散魂消。〔二俚做醒科〕〔洞賓云〕慚愧醒轉來了。〔正末唱〕我救的這兩個心  
坎上恰溫和。〔又救洞賓科唱〕呀。那一個又把牙關緊噤了。

【洞賓醒云】險些兒凍死我也。兩個孩兒都醒了。是誰救活我來。【正末云】是我救你來。

【洞賓跪云】不是哥哥救了俺父子。那裏得俺性命來。【正末云】呂岩也。你那裏去。【洞賓

背云】好奇怪。他怎生認得我是呂岩。【回云】不瞞哥哥說。我如今披枷帶鎖。迭配沙門島

去。遇見這等大雪。凍倒在此處。若不是哥哥救活俺三口兒。那裏得我的性命來。如今我身

上無衣。肚裏無食。又迷蹤失路。哥哥這裏往那裏去。【正末云】早知這道你去了多時了也。

君子你迷了道也。我說與你道。傳與你道。指與你道。【洞賓云】哥哥說的話。小人不省的。

【正末云】君子這條道。我不知道。這山前有一個草團標。那裏面有個先生。他須知道。【洞

賓云】哥哥你說與我咱。【正末唱】

【歸塞北】過了這條抄直道。那裏一橫澗。搭着一橫橋。白茫茫雪迷山拽

脚。淡濛濛霧鎖草團標。松檜列周遭。

【洞賓云】那先生好歹。哥哥說與我聽。【正末云】君子你要見他。我說與你知道。【唱】

【搥鼓體】那先生浩歌拍手舞黃鶴。家住瑤池閬苑十洲三島。一曲橫笛  
秋氣高。數着殘棋江月曉。

【洞賓云】哥哥那先生是出家人。怎生有這本事。【正末唱】

【歸塞北】那先生服的是長生藥。不許外人學。三弄琴聲彈落葉。九重春色醉仙桃。白日上青霄。

【洞賓云】敢問哥哥那先生是怎生模樣。你再說一遍。【正末唱】

【淨瓶兒】那先生兩隻手搖山岳。一對眼睨邪妖。劍揮星斗。胸捲江濤。天  
教惡相貌。伏的虎。降的龍。德行高。他則是個活神道。也曾跨蒼鸞。親把玉  
皇朝。

【云】君子你過的山崦兒。你望見草團標。你問那先生路去。【唱】

【玉翼蟬煞】那先生自舞自歌。吃的是仙酒仙桃。住的是草舍茅庵。強如

龍樓鳳閣。白雲不掃。蒼松自老。青山圍繞。淡烟籠罩。黃精自飽。靈丹自燒。  
崎嶇峪道。凹答岩壑。門無綽楔。洞無鎖鑰。香焚石桌。笛吹古調。雲黯黯。水  
迢迢。風凜凜。雪飄飄。柴門靜。竹籬牢。過了那峻嶺尖峯。曲澗寒泉。長林茂  
草。便望見那幽雅仙庄。這些是道。〔帶云〕君子。你休迷了正道。你聽者。〔唱〕你可  
也休錯去了。〔下〕

〔洞賓云〕孩兒也。你纔聽的那哥哥說來。兀那山崦裏有一家人家。吃的也有。穿的也有。宿  
處也有。嚙直到那裏覓一宵宿去來。〔同下〕

第四折

〔旦扮卜兒上云〕老身終南山人氏。在此在家出家。蓋了一座團標。前後並無人家。我有箇  
孩兒。雖是出家人。性子十分躁暴。每日在山中打獵爲生。孩兒去了也。我安排下些茶飯。等  
他回來吃。〔洞賓引徠上云〕自家呂岩自從賣了陣。迭配無影牢城。到這深山裏。時遇冬天

大風大雪將俺三口兒爭些凍殺。多虧了打柴的樵夫救了俺性命。說這山峪裏有箇草庵。我到那裏尋些茶飯與兩個孩兒吃用。你看我那命。天色又晚來了。逢着個獨木橋。偌深的一個闊澗。怎生得過去。我將着兩個孩兒待先送過這小廝去。恐怕這狼虎傷着這女孩兒。我待先送過女孩兒去。又怕傷了小廝兒。罷罷罷。且放下女孩兒。先送過小廝兒去。【做送兒俵科】【女俵云】爹爹大蟲來咬我也。【洞賓悲科云】孩兒。我便來取你也。我放下這小廝。我可過去取女孩兒去。【做過澗科】【兒俵云】爹爹大蟲來咬我也。【洞賓云】端的教我顧誰的是。【又過澗科云】兀的真個是一個草團標兒。你跟着我去尋些茶飯與你吃。【做問科云】庵裏有人麼。【卜兒上云】誰叫我開開這門呀。原來是呂岩引着一雙兒女。這早晚怎生得到這裏來。【洞賓背云】好奇怪。這姑姑怎生也認的呂岩。既然姑姑認的。我也好。姑姑因爲我賣了陣。將我這三口兒迭配無影牢城。如今天色晚了。也有甚麼殘茶剩飯與俺兩個孩兒些吃。我就覓一宵宿。天明了便索長行。【卜兒云】君子不中。我怕不留

你在此處宿。爭奈我的孩兒性子利害。每日山中打獵爲生。他無酒還好。吃了酒便要殺人。  
【洞賓云】姑姑不知當日我征西時。我丈人與我送行。吃了三盃酒。吐了滿口血。當日斷了酒。次後到陣上賣了陣。聖人知道。饒我一命。將我迭配無影牢城。我因此斷了財。來到家中。我渾家瞞着我。有姦夫。被我親身拏住。我就將渾家休了。斷了色。今日到此處。若有師父來。便打我一頓。我也忍了。從今已後。我將氣也不爭了。  
【卜兒云】呂岩。你忍的麼。  
【洞賓云】我忍的。  
【卜兒云】既然你忍的。你且休進我家裏來。他若來時。再做個商量。  
【正末改扮邦老上云】適纔我多買幾杯酒。吃醉了回家。見母親去。這山中委實的好快活也呵。  
【唱】

【正宮端正好】路兜答。人寂寞。山勢惡。險峻嵯峨。俺不羨玉堂臣列。鼎食重裊臥。只願把猩猩血染頭巾裏。

【滾繡毬】尋思來。那快活。這半月多。遇幾箇濫官員經過。打劫下些金銀段疋綾羅。昨日共那幾箇。今日共這一火。從不曾離了側坐。仰天的大笑。



呵呵。將那潑醜酒灑灑連糟。噫。殺人劍。搗搗帶血磨。常則是爛醉無何。

【二傑云】爹爹餓殺我也。【洞賓云】姑姑有甚麼茶飯與這小的些吃。【卜兒云】無甚麼與他吃。【正末向前用手搥洞賓回看科云】哎。喲。說殺我也。是人。那是鬼。【正末唱】

【倘秀才】不索你絮叨叨。則管裏問他則這個。殺人的爺爺是我。【洞賓云】好個惡相也。【正末唱】你則管裏纏我娘親待怎麼。【洞賓云】師父。我討些茶飯與孩兒吃來。【正末唱】他懷裏又沒點點與孩兒每討。【末拿住男傑科唱】我揪住小子領窩。

【洞賓救科】【正末怒云】你這廝無禮。【打洞賓科唱】

【叨叨令】我一拳打的你牙關挫。【做丟男傑在澗科】【洞賓云】可憐見。【正末唱】這廝死屍骸也濟得狼蟲餓。【拖女傑科】【洞賓云】留下這箇小的者。【正末唱】至如將小妮子擡舉的成人大。也則是害爹娘不爭氣的陪錢貨。不摔殺要

怎麼也波哥。不摔殺要怎麼也波哥。覷着你潑殘生。我手裏難逃脫。

【洞賓云】你是箇出家人。怎生將我兩箇孩兒摔死了。我和你見官去。【正末唱】

【倘秀才】我爲賊盜呵殺人放火。不似你貪財呵披枷帶鎖。你得了斗來大黃金印一顆。爲元帥佐山河。倒大來顯豁。

【帶云】呂岩你貪財戀酒。誤了軍情。【唱】

【滾繡毬】你那罪過。怎過活做的來實難結末。自攬下千丈風波。誰教你向界河受財貨。將咱那大軍折挫。似這等不義財貪得如何。道不的殷勤過日災須少。僥倖成家禍。必多枉了張羅。

【洞賓云】不好了。我不問那裏逃命去來。【正末仗劍趕洞賓躲科】【正末唱】

【笑和尚】我我我。沒揣的猿臂綽。幹幹幹。禁聲的休回和。來來來。寶劍似吹毛過。【洞賓云】我這性命誰救我來。【正末唱】休休休。怎避躲。是是是。決難活。

呀呀呀。脖項上鋼刀剗。

【做殺洞賓倒科】正末下改扮鍾離。【卜兒下改扮王婆上】洞賓醒科云。有殺人賊也。  
【做摸頸科】正末唱。

【叨叨令】我這裏穩不丕土坑上迷飈沒騰的坐。那婆婆將粗刺刺陳米  
來喜收希和的播那蹇驢兒柳陰下舒着足乞留惡濫的臥。那漢子去脖  
項上婆婆沒索的摸。【洞賓云】一覺好睡也。【正末揲洞賓覷科云】洞賓也。【唱】你早  
則醒來了也麼哥。【洞賓云】我這一覺睡了幾時。【正末云】十八年了。【洞賓云】可怎生  
一覺睡十八年。【正末唱】你早則醒來了也麼哥。可正是窗前彈指時光過。

【洞賓云】飯熟了未。【王婆云】還饒一把火兒。【洞賓云】直恁般一覺好睡也。【正末云】呂  
岩我問你咱。你那岳父高太尉曾勸你麼。【洞賓云】曾勸我來教我休吃酒。【正末云】那裏  
是高太尉。是貧道一化。你臨行時老院公可曾勸你來。【洞賓云】他也曾勸我來。【正末云】

那裏是院公也是貧道一化。你可曾見樵夫指路來麼。【洞賓云】有個樵夫指與我道來。  
【正末云】那個樵夫也是貧道一化。怕你迷了正路。恰纔殺你的壯士也是貧道化來。這王婆和山中道姑是驪山老母。這十八年間酒色財氣你都見了也。【唱】

【倘秀才】你早則省得浮世風燈石火。再休戀兒女神珠玉顆。咱人百歲光陰有幾何。端的日月去似擲梭。想你那受過的坎坷。

【滾繡毬】你夢兒裏見了麼。心兒裏省得麼。這一覺睡早經了二十年兵火。覺來也依舊存活。瓢古自放在竈窩。驢古自映着樹科。睡朦朧無多。一和半霎兒改變了山河。兀的是黃梁未熟榮華盡。世態纔知髻髮皤。早則人事蹉跎。

【云】呂岩你省得了麼。【洞賓云】師父我弟子省了也。【正末詩云】漢朝得道一將軍。故來塵世度凡人。十八年來一夢覺。點化唐朝呂洞賓。【唱】

【煞尾】你正果。正是修行果。你災咎。皆因我度脫。早則絕憂愁。沒煩惱。行處行。坐處坐。閒處閒。陀處陀。屈着指。自數過。真神仙。是七座。添伊家。總八個道與哥哥。非是風魔。這箇愛吃酒的鍾離。便是我。

【東華帝君領羣仙上云】呂岩。你省悟了麼。【洞賓云】弟子省了也。【東華云】你既省悟了。一夢中十八年。見了酒色財氣人。我是非。貪嗔癡愛。風霜雨雪。前世面見分明。今日同歸大道。位列仙班。賜號純陽子。【詩云】你不是凡胎濁骨。迷本性。人間受苦。正陽子點化超凡。又差下驪山老母。一夢中。盡見榮枯。覺來時。忽然省悟。則今日證果。朝元拜三清。同歸紫府。

題目 漢鍾離度脫唐呂公

正名 邯鄲道省悟黃梁夢

邯鄲道省悟黃梁夢雜劇終



# 江州司馬青衫泪

## 第一折

〔冲末扮白樂天同外扮賈浪仙子孟浩然上〕〔白詩云〕宴游飲食漸無味。杯酒管絃徒繞身。賓客歡從童僕喜。始知官職爲他人。小生姓白。名居易。字樂天。太原人氏。見任吏部侍郎。這二位老兄。一位是賈浪仙。一位是孟浩然。他都是翰林院編修。方今大唐天下。憲宗卽位時。遇春三月。在公廨中悶倦。待往街市上私行一遭。更了衣衫。只作白衣秀士。聽的人說。這教坊司有個裴媽媽家一個女兒。小字興奴。好生聰明。尤善琵琶。是這京師出名的角妓。嚙三人同訪一遭去來。〔賈浪仙云〕嚙三人去來。〔詩云〕高興出塵外。攜尊翫物華。〔孟浩然詩云〕偷將休沐暇。去訪狹邪家。〔老旦扮卜兒上云〕老身姓李。是這教坊司裴五之妻。夫主亡化已過。止生下一個女兒。叫做興奴。生得顏色出衆。聰明過人。吹彈歌舞。詩詞書算。無

所不通。自小時曾拜曹善才爲師。學得一手琵琶。官員子弟聞名都來吃酒。只是孩兒養的嬌了。一來性兒好自在。二來有些揀擇人。這早晚還不起來。只怕有人來吃酒。孩兒起來罷。

【正旦扮裴興奴引梅香上云】妾身裴興奴是也。在這教坊司樂籍中。見應官妓。雖則學了幾曲琵琶。爭奈叫官身的無一日空閒。這門衣食好是低微。大清早母親來叫。只得起來。天色還早哩。【唱】

【仙呂點絳脣】從天未拔白。酒旗挑在歌樓外。呀。地門開早。送舊客迎新客。

【混江龍】好教我出於無奈。潑前程只辦的好栽排。想着這半生花月。知他是幾處樓臺。經板似粉頭排日喚。落葉似官身吊名差。【帶云】俺這老母呵。【唱】更怎當他銀堆裏捨命。錢眼裏安身。掛席般出。落着孩兒賣。幾時將纏頭紅錦。換一對插髻荆釵。



【做見科云】母親萬福。喚你孩兒有何話說。【卜兒云】沒甚麼話說。只是啗這等人家。要早起些。光頭淨面。打扮的嬌媚着些。倘有俊傑來。賺他幾文錢養家。你只管裏睡覺。誰送錢來與你。【正旦唱】

【油葫蘆】俺娘不帶酒時常鬢髻歪。一鼻凹衝是乖。看看兩鬢雪霜般白。我則道過中年。人老朱顏改。誰想他撲郎君。虎瘦雄心在。折倒的我形似鬼熬煎的。我骨似柴。似恁的女殘疾。不敢怨娘毒害。則嘆自己年月日時該。

【卜兒云】你則管裏說甚麼快。打扮了則怕有客來。【正旦唱】

【天下樂】則索倚定門兒手托腮。想別人家奴胎。也得個自在。輪到我跟脚裏。都世襲了烟月牌。他管甚桃李開。風雨篩。更問甚青春不再來。

【白樂天同賈孟上云】走了這半日。人說道這是裴媽媽家。不好進去。我咳嗽一聲。【卜兒

云。是誰在外邊。〔出見科。〕原來是三位進士公。請裏面坐。〔白樂天同賈孟云。〕媽媽祇揖。  
〔卜兒云。〕興奴孩兒來陪三位進士公。快擡桌兒看酒來。〔正旦覷科云。〕好是奇怪。娘見了  
三個秀才踏門。怎生便教看酒。〔唱。〕

〔醉扶歸〕送了幾輩兒茶員外。都是這一副兒酒船臺。俺娘吃不的葷腥。  
教酒肉攬待。覓厭飫的新黃菜。他手裏。怎容得這幾個酸寒秀才。〔帶云。〕我  
知道了也。〔唱。〕俺娘八分裏。又看上他那條烏犀帶。

〔正旦出見科。〕二位萬福。〔白樂天同賈孟云。〕大姐祇揖了。〔正旦唱。〕

〔後庭花〕這裏是風塵花柳街。又不是王侯宰相宅。我忙着笑臉兒迎將  
去。學士是甚風兒吹到來。〔白樂天云。〕我等久慕高名特來一拜。〔正旦唱。〕是幾個  
俊英才。偏他還咱一拜。怎做的內心兒不敬色。

〔云。〕敢問官人尊姓大名。〔白樂天云。〕小生是侍郎白居易。這二位是學士賈浪仙。孟浩然。

因此春日公衙無事換了衣服來街市閒行。久慕大姐德容一徑的來拜望。【正旦云】不敢不敢。學士大人不棄下賤。小酌三杯如何。【白樂天云】好便好。只是不當取擾。【正旦把酒科】【賈浪仙云】今日幸遇大姐。嚙多飲幾杯。【孟浩然云】我還有人求的幾首詩未了。少吃醉些。【正旦唱】

【金盞兒】一個笑哈哈解愁懷。一個酸溜溜賣詩才。休強波灞陵橋踏雪尋梅客。便是子猷訪戴。敢也凍回來。嚙這裏酥烹金盞酒。香搵玉人腮。不強如前村深雪裏。昨夜一枝開。

【賈孟做意科云】我醉了也。嚙回去罷。【白樂天云】再坐一會。怕做甚麼。【正旦唱】

【後庭花】你待賺鰲魚釣頰頰。怎想與劉伶粧布袋。我這怪臉兒姦如鬼。你酒腸寬似海。【賈孟云】我們都已醉了。不要過了酒戒。不吃罷。【正旦唱】暢開懷。都似你朦朧酒戒。那醉鄉侯安在哉。

【卜兒云】二位學士醉了侍郎再坐一坐。【賈孟云】樂天侍郎嚙且回去。明日再來。【白樂天云】平白裏打攪了一日。怎生就空去了。【正旦唱】

【金盞兒】我不曾流水出天台。你怎麼走馬到章臺。【樂天云】定害了你這一日。【正旦唱】更待要秦樓夜訪金釵客。索甚麼惡義白賴。鬧了洛陽街。兀那酒喪門臨本命。餓太歲犯家宅。雖是我管待。這兩個窮秀士。權當一百日血光災。

【賈孟云】啗去罷。則管纏甚麼。【卜兒云】白侍郎要住下着。這二位摧逼的慌。好生敗興。【白樂天云】下官有心待住下。二位醉了不好獨回。待下官送他回去。明日自己再來。只是大姐費了茶酒。定害這一日。容下官陪補。【正旦云】侍郎說那裏話。【唱】

【賺煞】稍似間有些錢。抵死裏無多債。權做這場折本買賣。若信着俺當家老。妳妳把惜花心。七事兒分開。哎。你個俏多才。不是我相擇。你更怕辱。

沒着俺門前下馬臺。俺娘山河易改。解元每少怪。〔帶云〕侍郎記者。〔唱〕怕你再行踏。休引外人來。〔同下〕

楔子

〔外扮唐憲宗引內官上〕〔詩云〕勵精圖治在勤民。宿弊都將一洗新。雖則我朝詞賦重。偏嫌浮藻事虛文。寡人唐憲宗皇帝是也。承祖宗基業。嗣守天位。自安史之亂。藩鎮強盛。寡人用裴度之謀。漸次削奪。爭奈文臣中多尙浮華。各以詩酒相勝。不肯盡心守職。中間白居易劉禹錫柳宗元等。尤以做詩做文。誤却政事。若不加譴責。則士風日漓矣。內侍每傳與中書省。可將白居易貶江州司馬。柳宗元柳州司馬。劉禹錫播州司馬。如勅奉行。〔內官云〕領聖旨。〔隨下〕〔白樂天上云〕小官白樂天。平生以詩酒爲樂。因號醉吟先生。目今主上圖治心切。不尙浮藻。將某左遷江州司馬。刻日走馬之任。別事都罷。只是近日與裴興奴相伴。頗洽。誰料又成遠別。須索與他說一聲我去的也放心。〔正旦引梅香上〕〔詩云〕世間好物

不堅牢。彩雲易散琉璃脆。妾身裴興奴。自從與白侍郎相伴。朝來暮去。又早半年光景。相公在妾身上十分留意。妾身也有終身之托。近日聞的人說。白侍郎左遷江州司馬。就要起行。天那。誰想有這一場惡別離也。梅香安排下酒餚。待侍郎來時。與他奉餞一杯。多少是好。梅香云。理會的。白樂天上云。早來到興奴門首。無人在此。我自過去。見旦科。大姐祇揖。正旦云。相公萬福。白樂天云。大姐實指望相守永久。誰想又成遠別。正旦云。妾之賤軀。得事君子。誓托終身。今相公遠行。兀的不閃殺人也。樂天云。下官這一去。多則一年。少則半載。回來再相會也。正旦云。只是一時間放心不下。梅香將酒來與相公奉餞一杯。把酒科。唱。

【仙呂端正好】有意送君行。無計留君住。怕的是君別後有夢無書。一尊酒盡。青山暮。我搵翠袖。泪如珠。你帶落日踐長途。情慘切。意躊躇。你則身去心休去。

【云】相公此別之後。妾身再不留人。專等相公早些回來。【白樂天云】大姐則要着志者。下官決不相負。我去也。【旦隨下】

### 第一折

【卜兒上云】自從白侍郎去了。孩兒與奴也不梳粧。也不留人。只在房裏靜坐。俺這唱的人家。再靠些甚麼。昨日茶坊裏。張小閒來說。有個浮梁茶客。劉一郎要來。和孩兒吃酒。孩兒百般不肯。今日他說要自來。等來時再做計較。【丑扮小閒引淨扮劉一郎上】【詩云】都道江西人。不是風流客。小子獨風流。江西最出色。小子劉一郎是也。浮梁人氏。帶着三千引細茶。來京師發賣。聽的人說。教坊司裴媽媽家。有個女兒。名興奴。昨日央張二哥說知。老媽叫我今日自去。走了一會。來到門首也。張二哥嚕進去。咱。【丑見卜科云】媽媽。劉員外來了也。【卜兒云】請進來。【淨見卜科云】媽媽拜揖。【卜兒云】客官拜了。【淨云】久聞令愛大姐大名。小子有三千引細茶。特來做一場子弟。【卜兒云】俺孩兒只爲白侍郎。再不留人。我如今

叫他出來好歹教他伴你若再不肯你寫一封假書只說白侍郎已死他可待肯了【丑云】此計大妙媽媽你叫大姐出來陪着我我就去做假書不要遲【下】【卜兒云】興奴孩兒有客在此快來快來【正旦上云】妾身裴興奴自從白侍郎別後儘着老虔婆百般啜哄我再不肯接客求食近日有一個茶客劉一郎待要與我作伴我那裏肯從爭奈老虔婆被他錢買轉了似這般怎生是好兀的不煩惱人也呵【唱】

【正宮端正好】命輕薄身微賤好人死萬萬千千世間兒女別離徧也敷不上俺那陽關怨

【帶云】侍郎不爭你去了教我倚靠何人【唱】

【滾繡球】你好下得白解元閃下我女少年道不得可憐而見他又不曾故違着天子三宣【云】人說白侍郎吟詩吃酒誤了政事前人也有這等的【唱】只那長安市李謫仙他向酒裏臥酒裏眠尙古自得貴妃捧硯常走馬在五鳳



樓前偏教他江州迭配三千里。可不道吏都文章一百年。甚些的納士招賢。

【見卜科云】母親叫你孩兒怎麼。【卜兒云】白侍郎一去杳無音信。咱家柴沒米沒怎生過活。如今浮梁劉官人有三千引茶。又標致。又肯使錢。你留下他賺些錢養家。【正旦云】母親我與白侍郎有約在前。我再不留人了。【卜兒云】我說你也不信。請劉官人自家來和你說。【淨見旦科云】大姐拜揖。小子久慕大名。拿着三千引茶。來與大姐焙脚。先送白銀五十兩。做見面錢。【正旦云】過一邊去。好不知高低。我做了白侍郎之妻。休來纏我。【卜兒云】你不肯陪伴劉員外。好個白侍郎夫人。如今白侍郎那裏敢頹氣了也。【正旦唱】

【倘秀才】這姻緣成不成在天。你休見兔兒起呵漾磚情。知普天下虔婆那一個不愛錢。【帶云】劉員外呵。【唱】他便是貴公子趙平原。你也要過遣。

【淨云】你家是賣俏門庭。我來做一程子弟。你不留我如何倒拒絕我。【正旦唱】

【滾繡毬】這的是我逆耳言。休廝纏。廝纏着舞裙歌扇。這兩般兒會風流。斷沒了家緣。劉員外你若識空便早動轉。倒落得滿門良賤。休覷着我這。陷人坑。似誤入桃源。我怕你兩尖擔脫了孤館。思鄉客。三不歸。翻了風帆。下水船。枉受熬煎。

【淨云】小子世來你家大姐不要說閒話。嚙兩個吃鍾酒兒。【做勸酒科】【正旦云】拿開我不吃。【卜兒怒科云】好賤人。上門好客。你怎生不順從。和錢賭鶩。打死你這奴才。【正旦唱】

【呆骨朵】我覷着眼前人。卽世裏休相見我。又不曾軀着你臉上直拳。好生地人也似揪他。他驢也似調塞他。着酒兒將咱勸。我索屎做糕糜。燕我須打是惜。罵是憐。娘呵。可休窮廝炒。餓廝煎。

【卜兒云】這小賤人不聽我說。只想白侍郎。他那裏想着你哩。左右是。左右員外多拿些錢。

來我嫁與你將去〔淨云〕隨老媽要多少錢。小子出的起。〔正旦云〕我心在那裏。你則管胡纏我。〔唱〕

〔倘秀才〕這些三時但合眼。早懷兒裏夢見。則是俺喫倒賺江州樂天。〔卜兒云〕見鐘不打。更去煉銅樂天。樂天在那裏。〔淨云〕小子也看的過。嚙做一程夫妻。怕做甚麼。〔正旦唱〕誰教你悶向秦樓列管絃。〔帶云〕劉員外。〔唱〕休信我醉中言說。則說在前。

〔云〕天那。怎生教我陪伴這樣人也。〔唱〕

〔滾繡球〕往常我春心寄錦箋。離情接斷絃。風流煞謝家庭院。到如今。剗地教共猪狗同眠。〔淨云〕大姐。仕路上大官都是我鄉親。小子金銀又多。又波俏。你不陪我。却伴那樣人。〔正旦唱〕那廝正拽大拳。使大錢。這其間。枉了我再三相勸。怎當他癡迷漢。苦死歪纏。想着那蒙山頂上春風細。肯分地揚子江心月正。

圓也是天使其然。

【丑扮寄書人上云】小人是江州一個皂隸。俺白司馬老爹在任。傷感病症。寫了這一封書。教我送與教坊司。裴興奴家寫下書。俺司馬相公就死了。小人不免稍與他去。走了半月。方到京師。問人說這裏是他家。不免進去。做見卜兒科云。【卜兒云】大哥是那裏來的。【丑云】我是江州白司馬老爹差來下書的。【卜兒云】你老爹好麼。【丑云】俺老爹打發了書。就死了也。【卜兒云】誰這等說。拿書來我看。【丑呈書科】【卜兒云】孩兒你看。

【正旦接書念云】寓江州知末白居易。書奉裴小娘子。向在宅上擾聒。自別來魂馳夢想。此心無時刻得離左右也。滿望北歸。以償舊約。不料偶感時疾。醫藥不効。死在旦夕。專人走告。勿以死者爲念。別結良姻。以圖永久。臨楮不勝哽咽。伏冀情亮。【旦悲科云】兀的不痛殺我也。閃殺我也。【卜兒云】孩兒白侍郎已死了。夫人也做不得了。再不必說。你如今可嫁劉員外去罷。【淨云】小子可等着了。【丑云】小人去罷。【正旦云】吃了飯去。【丑云】不必了。【下】

【正旦唱】

【叨叨令】我這兩日上西樓盼望二十遍空存得故人書不見離人面聽的行鴈來也我立盡吹簫院聞得聲馬嘶也目斷垂楊線相公呵你元來死了也麼哥你元來死了也麼哥從今後越思量越想的冤魂兒現

【淨云】媽媽既許了親事小子奉白銀五百兩爲聘禮小子歸家心切就請小娘子上船

卜兒云老身已許了你豈肯退悔就打發孩兒去罷【正旦云】罷罷罷劉員外既成親容我與侍郎灑一碗漿水燒一陌紙錢咱【淨云】這也使得【正旦燒紙灑酒科云】侍郎活時爲人死後爲神【哭科云】則被你閃得我苦也【唱】

【倘秀才】侍郎呵你往常出入在皇宮內院只合生死在京師帝輦也落得金水河邊好墓田【帶云】劉員外【唱】你且離了我根前他從來有些腩腆

【滾繡球】你文章勝賈浪仙詩篇壓孟浩然不能勾侍君王在九間朝殿  
怎想他短卒律命似顏淵今日撲通的餅墜井支楞的琴斷絃怎能勾眼  
前面死魂活現你苦有靈聖顯形影向月下星前則這半提淡水招魂紙  
侍郎也當得你一盞陰司買酒錢止不住兩泪漣漣

【做化紙起旋風科】【云】這一陣旋風兀的不是侍郎來了也【做悲科】【唱】

【醉太平】燒一陌兒紙錢敍幾句兒衷言待不啼哭夫乃婦之天拋閃殺  
我也少年只見一個來來往往旋風足律卽留轉諛的我慌慌張張手脚  
滴羞都蘇戰一個俏魂靈不離了我打盤旋我做人的解元

【淨云】大姐紙也燒了夫婦之情也盡了請上船罷【正旦唱】

【二煞】興奴也你早則不滿梳紺髮挑燈剪一炷心香對月燃我心下情  
絕上船恩斷怎捨他臨去時舌姦至死也心堅到如今鶴歸華表人老長

沙海變桑田。別無些掛戀。須索向紅蓼岸綠楊川。

【淨云】大姐去罷。這等哭。哭到幾時。【正旦唱】

【二煞】少不的聽那驚回客夢。黃昏犬聒碎人心。落日蟬止不過臨萬頃。蒼波落幾雙白鷺。對千里青山。聞兩岸啼猿。愁的是三秋鴈字。一夏蚊雷。二月蘆烟。不見他青燈黃卷。却索共漁火對愁眠。

【卜兒云】員外等久了去罷。【正旦唱】

【三煞】赤緊的大姨夫緣分咱身上淺。老太母心腸這壁廂。偏誰想司馬墳邊彩雲零落。茶客船頭明月團圓。娘呵。你早則皂裙兒拖地。柱杖兒過頭。鬢髻兒稍天。却下的這拳槌不善。教我空捱那沒程限的竇娥冤。

【云】母親。我是你親生之女。替你掙了一生。只爲這幾文錢。千鄉萬里。賣了我去。母親好很也。【唱】

【四煞】怎想他能捱磨扇似風車轉。更合着夢見槐花。要黃襖兒穿。我虛度三旬。是這婆娘親女。受用了十年。是這趙媽媽金蓮。我也曾前廳上待客。後閣內留賓。只不曾坐車上當轅。偌來大窮坑火院。只央我一身填。

【云】罷罷罷。母親我也顧不的你了。我去也。【淨云】媽媽。小子去也多承厚意。來年稍細茶來吃。【正旦唱】

【尾煞】不甫能一聲金縷辭。歌扇剗地。聽半夜鐘聲到客船。少年的人苦痛也。天狠毒呵。娘好使的錢。你好隨的方。就的圓。可又分的愚。別的賢。女愛的親娘。不顧戀。娘愛的鈔。女不樂願。今日我前程事已然。有一日你無常到九泉。只願火煉了你。教鑊湯滾滾煎。碓搗罷。教牛頭磨磨研。直把你作念到關津渡口前。活呪到天涯海角邊。都道這風塵是夙緣。明理會得窮神解不的冤。【帶云】娘呵。【唱】你只把我早嫁潯陽一二年。怎到的他乾



貶去江州四千里遠【同下】

第二折

【白樂天引左右上云】下官白居易。自左遷司馬。來此江州。又早一年光景。昨日驛中報來說。故人元微之。有事江南。打從這裏經過。不免分付左右。預備飲饌。伺候則個。【外扮元微之上云】小官姓元名稹。字微之。見任廉訪使之職。昨蒙聖恩。差來採訪民風。經過江州。我想此處司馬白樂天。乃某至交契友。不免上岸探望他。一遭來到這州衙門首。左右報復去。道有故人元稹來訪。【左右報科云】有故人元老爹來訪。【白樂天云】道有請。【左右云】請【進見科】【白樂天云】微之。甚風吹得你來。貴脚踏賤地。使下官喜從天降。【元微之云】樂天。久居江鄉。牢落殊甚。下官常切懷抱。奈拘職守。不得相從。今幸天假其便。再瞻眉宇。豈勝慶幸。【白樂天云】左右將酒馮來。微之少屈片時。【元微之云】不必留坐。下官行李俱在船上。下官正要與樂天文敘一會。可將這酒席移到船上。送我一程如何。【白樂天云】下官

亦有此心。略就同去。左右快攜酒餚來者。【同下】【淨上云】小子劉一郎。自從娶得裴興奴。又早半年光景。衆朋友日日置酒相招。無有虛日。今日又是王官人相邀。大姐好生看家。小子吃酒去來。【下】【正旦引梅香上云】妾身裴興奴。不想狠毒虔婆貪錢。爲我不肯留客求食。把我賣與茶客劉一郎爲妻。隨他茶船來到這裏。問人說來。這裏正是江州那單徠吃酒去了。不在船上。對着這般江天景物。想起那故人樂天。不由人不傷感也呵。【唱】

【雙調新水令】正夕陽天闊。暮江迷倚。晴空楚山疊。翠冰壺天。上下雲錦樹高低。誰倩王維寫愁入畫圖內。

【駐馬聽】常教他盡醉方歸。是他拂茶客青山。沽酒旗伴。着我死心搭地。是兀那隱離人。望眼釣漁磯。【帶云】這江那裏是江。【唱】則是遞流花草。武陵溪。幽囚風月。藍橋驛。直恁的天闊。鴈來稀。莫不是衝陽移在江州北。

【云】天色將晚。那廝吃酒去了。甚時回來。梅香拂了牀。我自家睡去罷。【唱】

【步步嬌】這個四幅羅衾初做起。本待招一個風流婿。怎知道到如今。命運低長。獨自托冰藍兩頭兒。兒。兒。恁的般受孤恓。知他是誰喚你做鴛鴦被。

【云】本待睡些兒。怎生睡得着。梅香將那琵琶過來。對此明月寫我愁懷。唱。【做抱琵琶科】

【唱】

【攪箏琶】都是你個琵琶罪。少歡樂。足別離。爲你引商婦到江南。送昭君出塞北。紫檀面拂金猊越。引的我傷悲。想故人何日回歸。生被這四條絃撥掩在兩下裏。到不如清夜聞笛。

【做彈琵琶科】【白樂天同元微之上云】來到這舟中。一江明月萬頃蒼波。秋光可人。微之。啗慢慢的飲幾杯。【做聽科】【元微之云】那裏琵琶响。【左右云】是那對過客船上有人彈的琵琶哩。【白樂天云】左右你將船棹近些。【做移船科】【白樂天云】這琵琶不是野調。好似裴興奴指撥。【元微之云】左右的。你去着他過來彈一曲。怕做甚麼。【左右見旦科】小

娘子那邊船上兩位老爹教請一見【正旦云】我就去【做見白樂天認科】【正旦唱】

【鴈兒落】我則道是聽琴鍾子期錯猜做待月張君瑞又不是歸湖的越范蠡却原來是遭貶的白居易。

【旦做怕迴避科】【白樂天云】興奴你躲我怎麼【正旦唱】

【小將軍】肯分的月色如白日他不說我的知是鬼相公呵怕你要做好事興奴儘依得你則休漸漸來跟底。

【白樂天云】興奴你是甚意思越躲的遠了【正旦唱】

【沉醉東風】我觀覷了衣服樣勢審察了言語高低你且自靠那邊俺須有生人氣退些兒個好生商議【做取錢投水科】【白樂天云】你丟錢怎的【正旦唱】我爲甚將幾陌黃錢漾在水裏便死呵也博個團圓到底。

【白樂天云】興奴你近前來【正旦又認科】【白樂天云】你如何來到這裏【正旦云】這等

看來想還是活的。【歎科云】相公你做得好勾當弄的我這等還推不知哩。【唱】

【撥不斷】但犯着喫黃齏者不是好東西。想着那引蕭娘寫恨書千里。搬倩女離魂酒一杯。攜文君逃走琴三尺。恁秀才每那一樁兒不該流遞。

【白樂天云】我自相別來此江州無時不思念大姐。只是無心腹人。不好寄書。你却等不的。我回家就跟着這商船來了。到說我的不是。【正旦悲科】苦死人也教我一言難盡。【白樂天云】你說。【正旦云】自從與相公分別之後。妾再不留人求食。專等相公回來以諧終身之托。不想老虔婆逐日嚷鬧百般啜哄。妾身只是不從。那一日走將那茶客劉一郎來帶的錢多。要來請我妾抵死不肯。老虔婆和那蠻子設計送到相公一封書。說相公病危死了。妾捱不過虔婆貪錢。把妾賣與他。來到這裏聽的人說是江州妾身正要打聽相公的消息。今日那單徠又吃酒去了。妾身思想無奈。對月彈一曲琵琶遺懷。不想得見相公實天賜其便也。這位相公是誰。【白樂天云】是我心友廉訪元微之。【做悲科】【元微之云】樂天不必

煩惱這廝捏寫假書妄稱人死。騙人之妾自有罪犯。慢慢治他。〔白樂天云〕適間我做了一篇琵琶行。寫在這裏。大姐試看咱。〔正旦接科念云〕潯陽江頭夜送客。楓葉荻花秋瑟瑟。忽聞水上琵琶聲。主人忘歸客不別。移船相近邀相見。添酒回燈重開宴。千呼萬喚始出來。猶抱琵琶半遮面。轉軸撥絃三兩聲。未成曲調先有情。絃絃掩抑聲聲思。似訴平生不得志。低眉信手續續彈。說盡心中無限事。經攏慢撚撥復挑。初爲霓裳後六么。曲終抽撥當心畫。四絃一聲如裂帛。自言家在京城住。名屬教坊第一部。曲罷常教善才服。妝成每被秋娘妬。今年歡笑復明年。秋月春花等閒度。門前冷落鞍馬稀。老大嫁作商人婦。我聞琵琶已歎息。又聞此語重唧唧。同是天涯淪落人。相逢何必曾相識。我從去年辭帝京。謫居臥病潯陽城。其間旦暮聞何物。杜鵑啼血猿哀鳴。豈無山歌與村笛。謳啞嗚嘶難爲聽。今夜聞君彈一曲。爲君翻作琵琶行。却坐促絃絃轉急。滿坐聞之皆掩泣。就中泣下誰最多。江州司馬青衫溼。〔正旦云〕相公好高才也。〔梅香慌上云〕姐姐員外回來了也。〔正旦唱〕

【掛搭沽】恰打算別離苦況味。見小玉言端的。又驚散鴛鴦兩處飛。嗒須索權迴避。我這裏淹粉泪懷愁戚。忙蹙金蓮緊蕩羅衣。

【白元虛下】【淨帶酒上云】大姐那裏。我醉了扶我一扶者。【正旦唱】

【沽美酒】我則道蒙山茶有價例。金山寺裏說交易。每日江頭如爛泥。把似撞不的少喫。則被你殃煞我喫敲賊。

【太平令】常教我羨鷓鴣鴛鴦貪睡。看落霞孤鷺齊飛。【淨云】大姐過來。扶着我睡去。【正旦唱】聽不上蠻聲撩氣。倒敢恁煩天惱地。樓只抱。只愛你。休醉漢。扶着越醉。

【淨云】我娶到的老婆。如何不伏侍我。我醉了。【正旦唱】

【川撥棹】廝禁持這。是誰根前撒帶滯。喫得來。眼腦迷希。口角涎垂。覷不的村沙樣勢。也是我前緣廝勘對。

【七弟兄】從早至晚夕。知他在那裏。恰是甚夫妻。撇得我孤孤另另。難存濟。我淒淒楚楚。告他誰。你朝朝日日。醺醺地。

【淨做醉睡科】【正旦云】這廝醉的睡着了。我如今就過白相公船上去罷。【唱】

【梅花酒】我子待便摘離把頭面收拾。倒過行李。休心意徘徊。正愁煩無了期。【白樂天上云】大姐叫我怎的。【旦云】單徠沉醉睡着。妾隨相公去罷。【唱】恰相逢在今夕。相公。你還待要候甚的。和俺有情人。一搭裏那單徠正昏睡。囹圄課你拿只江茶。引我擡起比及他覺來疾。

【收江南】我教他滿船空載月明歸。三更難撥棹歌齊。我把這畫船權做望夫石。便去波莫遲。却不道五湖西子嫁鴟夷。

【白樂天云】趁此秋清夜靜。咱過船撐將開去。他那裏尋我。【元微之云】樂天等小官回朝。奏知聖人取你上京。先奏辨此事。決得與與奴明白完聚。【白樂天云】微之若得如此。恰兩



個感恩非淺【正旦唱】

【水仙子】再不見洞庭秋月浸玻璃。再不見鴉噪漁村落照低。再不聽晚鐘烟寺催鷗起。再不愁平沙落鴈悲。再不怕江天暮雪霏霏。再不要山市晴嵐翠。再不被瀟湘暮雨催。再不盼遠浦帆歸。

【白樂天云】誰想今日又重相會。使初心得遂。實天所賜也。【正旦唱】

【太清歌】莫不是片帆飽得西風力。怎能勾謝安攜出東山妓。此行不爲鱸魚膾。成就了佳期。無個外人知。那廝正茶船上。和衣兒睡黑。婁婁地。鼻息如雷。比及楊柳岸。秋風喚起。人已過畫橋西。

【二煞】咱兩個離愁。雖似茶烟溼。歸心更比江流急。離江州謝天地。出烟波漁父國。遮莫他耳聽春雷。茶吐鎗旗。着那廝直趕到五嶺三湘。建溪乾。相思九萬里。

【白樂天云】開了船去罷。【正旦唱】

【鶯鶯煞】若不是浮梁茶客十分醉。怎奈河江州司馬千行泪。早則你低首無言。仰面悲啼。暢道情血痕多。青衫泪溼。不因這一曲琵琶成佳配。泪似杞推嶮。添滿潯陽半江水。【同下】

【淨做酒醒慌上云】喫的醉了。一覺睡着醒來。不見了大姐。可往那裏去了。只怕落在江中。怎麼箱籠開着。一定是走了地方。拏人拏人。【雜當扮地方上云】這船上。是甚麼人。半夜三更。大呼小叫的。【淨云】是小子新娶的個小娘子。不知逃走那裏去了。一定有個地頭鬼。拐着他去。你們與我拿一拿。【地方云】哇。胡說。這明月滿江。又靜悄悄無一隻船來往。只是你這船在此。走往那裏去。想是你致死了。故意找尋我。拿你到州衙裏見官去來。【地方鎖淨科】【淨詩云】我劉一郎。何曾搗鬼。小老婆多應失水。【地方詩云】這裏面定有欺心。送官去敲折大腿。【同下】

第四折

【元微之上云】小官元稹。前者江南採訪回來。面奏聖人說白居易無罪遠謫。蒙聖人可憐。已將他宣喚回朝。仍復舊職。他謝恩畢。使奏知劉員外計騙人妾假稱死亡。蒙聖人准歸本夫。今日旨意下來。御斷此事。只得先報樂天知道。【下】【唐憲宗引內官上云】寡人唐憲宗。昨日廉訪使元稹奏白居易無罪遠謫。朕也惜他才華。已取回京。復他侍郎之職。他又奏稱側室裴興奴原是樂籍。他去之任。被茶商劉某妄報他死。拐騙爲妻。昨在江州撞見奪回。於例該歸前夫。內侍們宣白居易來者。【內官云】領聖旨白居易安在。【白樂天上云】小官白居易。前蒙放逐江鄉。多虧故人元微之舉保。重得回京。復還原職。下官因將裴興奴之事。奏聞蒙聖恩許歸本夫。今日朝堂宣呼。須索走一遭去。【做見駕科云】侍郎臣白居易。欽取回京朝見。【駕云】卿在江州多有辛苦。爾所奏裴興奴被人計騙。例該歸從前夫。但中間緣故未詳。必須宣裴興奴問個端的。【內官云】領聖旨裴興奴安在。聖人呼喚哩。【正旦冠帔

【上云】誰想有今日來。與奴質本下賤。幸得瞻天仰聖。非同小可也呵。【唱】

【中呂粉蝶兒】秋月春花都出在侍郎門下。比及我博的個富貴榮華。恰便似盼辰勾逢大赦。得重回改嫁。今日裏聖旨宣咱吉和凶。索問天買卦。

【云】來到這朝前。好怕人也。【唱】

【醉春風】又不比順子弟意前行。就郎君心上打。只見兩行武士列金瓜。這裏敢不是耍耍。他教我與樊素齊肩受小蠻節制。聖機難察。

【內侍云】宣到裴興奴見駕。【正旦拜舞科】【唱】

【迎仙客】無禮法婦人家。山呼委實不會他。只辨得緊低頭忙跪下。願陛下海量寬納聽。臣妾說一套兒傷心話。

【駕云】那婦人是裴興奴麼。【正旦云】臣妾便是裴興奴。【駕云】你將始末緣由。細細說來。不可欺隱。【正旦唱】

【石榴花】妾自來楚雲湘水度年華。誰樂這生涯。俺娘把門兒倚定看甚人踏。當日見他放了句假。老虔婆意中只待頻搔刮。先陪了四餅酒。十餅香茶。其間一位多姦猾。只待要大雪裏探梅花。

【鬪鶴鶉】一個待咏月嘲風。一個待飛觴走罌。談些千古是今非。下學上達。一個毬子心腸到手滑。和賤妾勾勾搭搭。但得個車馬盈門。這便是錢龍入家。

【云】妾本教坊樂籍。曾師曹善才學成琵琶。忽一日侍郎白居易放假。同孟浩然賈浪仙到妾家吃酒。妾因留伴白侍郎。因此認的。【駕云】既如此。怎生又有後來這場說話。【正旦唱】

【上小樓】俺那白頭媽媽年紀高大。見他每帶繫烏犀衣。着白欄帽裏烏紗。怎生地使手法待席罷。敲他一下。倒噎的俺老虔婆。血糊淋刺。

【幺篇】從此日娘嗔女妾愛他。愛他那走筆題詩。出口成章。頂針續麻。是

他百般地妳妳行過從不下。怎當那撩姨夫物擡高價。

【云】妾身自從見了白侍郎。俺那虔婆見他是個官人。心中要敲他一下。不想又沒甚麼大錢。好生理怨妾見侍郎人品高。才華富。遂有終身之托。只是打發老虔婆不下。誰想又走將

這個茶客來。【駕云】這茶客來却怎生地。【正旦唱】

【紅芍藥】那廝每販的是紫草紅花。蜜蠟香茶。宜舞東風鬪蝦蟆。巾幘是青紗。聽不得蠻聲氣死勢煞。無過在客船中隨波上下。那廝分不的兩部鳴蛙。所事村沙。

【云】這茶客是江西人。拿着三千引茶。要來伴宿妾。因侍郎分上。堅意不從他。【唱】

【紅繡鞋】他有數百塊名高月峽。兩三船玉屑金芽。元來他準備下一場說謊天來大。本待要綠珠辭衛尉。則說道賈誼沒長沙。可不這寄哀書的該萬剛。

【云】老虔婆與茶客設計寄假書一封說侍郎死了使妾無倚逼令嫁與茶客【駕云】既有假書你如何張主【正旦唱】

【喜春來】既道是江州亡化白司馬因此上飛入尋常百姓家俺那愛錢娘一日坐八番衙不由妾不隨順他有分看些個駝腰柳釣魚槎

【云】那虔婆不由分說把妾嫁與茶客妾強不過只得隨他而去【駕云】既嫁茶客怎生又

歸白氏【正旦唱】

【普天樂】到潯陽無牽掛弔英魂何處渡口殘霞思往事空嗟訝半夜燈前長吁罷泪和愁付與琵琶寒波漾漾芳心脈脈明月蘆花

【駕云】元來你彈琵琶來那白居易可在那裏聽見得與你相會你再說咱【正旦唱】

【快活三】俺本侍蘭舟看月華見漁燈映蒹葭他便似莽張騫天上泛浮槎可原來不曾到黃泉下

【云】那一夜茶客不在。妾身對月理琵琶。忽見別船上二客細視之。乃是白侍郎。方知他不曾死。妾身就跟白侍郎來了。【唱】

【鮑老兒】秀才每入怪洞裏。妖精也覷上了他。那一個不色膽天來大。投到俺啼哭出煙村四五家。央及殺青衫袖香羅帕。故人見後潯陽怕甚水。地湫凹今日個君王召也。長安避甚道路兜搭。

【駕云】與奴你認這文武班中那個是白居易。【正旦做認科】【唱】

【叫聲】這都是一般兒的執象簡戴烏紗。好着我眼花眼花。只得偷睛抹。去向那文武班中試尋咱。

【做見三人科云】這是賈學士。這是孟學士。這是白侍郎。【唱】

【剔銀燈】舊主顧先生好麼。新女婿郎君煞驚諷。那翰林學士行無多話。則這白侍郎正是我生死的冤家。從頭認都不差。可怎生粧聾作啞。



【駕云】興奴你仔細認者。敢不是他麼。【正旦唱】

【蔓菁菜】他怎敢面欺着。當今駕他當日爲尋春色到兒家。便待強風情下榻。俺只道他是個詩措大。酒遊花。却元來也會治國平天下。

【駕云】一行人跪者。聽朕剖斷。【衆跪科】【詞云】自古來整齊風化。必須自男女幃房。但只看關雎爲首。詩人意便可參詳。裴興奴生居樂籍。知倫禮立志剛方。見良人終身有托。要脫離風月排場。老虔婆羊貪狼狠。逼令他改嫁茶商。裴興奴心堅不變。只等待司馬還鄉。老虔婆使姦定計。寫假書只說身亡。遂將他嫁爲商婦。一帆風送至潯陽。正值着江干送客。聞琵琶相遇悲傷。與故人生死相別。彈一曲清泪千行。放逐臣偏多感歎。兩悲啼泪溼衣裳。從前夫自有明例。便私奔這也何妨。今日個事聞禁闕。斷令您永效鳳凰。白居易仍復舊職。裴夫人共享榮光。老虔婆決杖六十。劉一郎流竄遐方。這賞罰並無私曲。總之爲扶植綱常。便揭榜通行曉諭。示臣民恪守王章。【衆謝恩科】【正旦唱】

【隨煞】恰纔來萬里天涯。早愁髩蕭蕭生白髮。俺把那少年心撇罷。再不  
去趁春風攀折鳳城花。

題目 潯陽商婦琵琶行

正名 江州司馬青衫泪

江州司馬青衫泪雜劇終

# 馬丹陽二度任風子

## 第一折

【冲末扮馬丹陽上。詩云】雪瓮冰盞滿筋黃。沙餅豆粥隔籬香。就中滋味無人識。傲殺羊羔乳酪漿。貧道祖居寧海萊陽人也。俗姓馬。名從義。乃伏波將軍馬援之後。錢財過萬倍之餘。田宅有半州之盛。家傳祕行。世積陰功。初蒙祖師點化。不得正道。把我魂魄攝歸陰府。受鞭笞之苦。忽見祖師來救。化作天尊。令貧道似夢非夢。方覺死生之可懼也。因此遂棄其金珠。拋其眷屬。身掛一瓢。頂分三髻。按天地人三才之道。正一髻。受東華帝君指教。去其四罪。是人我是非。右一髻。受純陽真人指教。去其四罪。是富貴名利。左一髻。受王祖師指教。去其四罪。是酒色財氣。方成大道。正授白雲洞主丹陽抱一無爲普化真人。陰符中道。人身難得。中土難逢。假是得生。正法難遇。貧道昨宵看見青氣冲天下。照終南山甘河鎮。有一人任屠。此

人有半仙之分。因而稟過祖師。前去點化他。若到的甘河鎮。將一方之地。都化的不吃腥葷。你道爲何。此人是屠戶之家。他見我化的一方之地。都吃了齋素。攪了他買賣。他必然來傷害我性命。他若來時。點化此人。歸于正道。【詩云】我與他閻王簿上除生死。紫府宮中立姓名。指開海角天涯路。引得迷人大道行。【下】【正末扮任屠同日李氏上云】自家終南山甘河鎮人氏。姓任。是個操刀屠戶。嫡親的兩口兒家屬。渾家李氏。近新來生了一個小廝兒。今日是我生辰之日。又是孩兒滿月。衆兄弟送些禮物來。大嫂。你去安排酒食茶飯。等待兄弟。每這早晚敢待來也。【旦云】理會的。【衆屠戶上云】俺都是甘河鎮屠戶。俺有一個哥哥。是任屠。俺的本錢是他的。近新來不知是那裏走的個師父來。頭挽着三個丫髻。化的俺這一方之人。盡都吃了齋素。俺屠行買賣都遲了。本錢消折。今日是任屠哥哥生辰之日。又是他孩兒滿月。一來與哥哥做生日。二來問哥哥借些本錢。說話中間。可早來到了也。【衆見正末科云】哥哥。你兄弟來遲也。【正末云】恰纔道罷。兄弟每早來了也。量任屠有何德能。動

勞列位請坐。【衆云】哥哥請坐。【正末云】大嫂將酒來。兄弟每慢慢飲一杯。【衆云】俺兄弟每又無厚禮。倒來定害哥哥嫂嫂。【正末云】兄弟一回相見一回老。能有幾年做弟兄也。

呵【唱】

【仙呂點絳脣】朋友相憐。弟兄錯見任屠面。今日何緣。因賤降來宅院。

【混江龍】俺屠家開宴。端的是肉如山。岳酒如川。都是些吾兄我弟等輩。齊肩直吃的。月上花稍傾盡酒。風吹荷葉倒垂蓮。客喧席上。酒到跟前。何曾摘厭。並不推言。一盞盞接入手。可都乾乾的。燕賣弄他掂斤播兩。撥萬輪千。

【衆云】酒勾了。俺吃不得了也。【正末云】衆兄弟可早醉也。【唱】

【油葫蘆】你着那些札手風喬人。酒量淺。他喫不的一謎裏。他將那喫不了的牛肉。着指頭填。恰便似餓狼般撞入肥羊圈。乞兒般鬧了悲田院。

吃的來眼又睜。撐的來氣又喘。都是豬腩臍。狗奶子。喬親眷。都坐滿一圓圈。

【天下樂】可正是畫戟門排見醉仙。【帶云】大嫂。【唱】則我這家緣不少了。你喫共穿。生下這魔合羅般好兒天。可憐花謝了花再開。月缺了月再圓。咱人老何曾再少年。

【衆云】你兄弟都折少本錢。問哥哥再借些鈔做本錢。【正末云】大嫂。兄弟每無本錢呵。借與他些。【旦云】嗒那裏得那錢來。你好忒自專也。【正末唱】

【那吒令】非任屠自專。大河裏有船。相知每共言囊橐裏有錢。【旦云】俺那裏有那錢來。【正末云】你這般惡義白賴的。【唱】哎。這婆娘不賢。頭直上有天。任屠非自誇。你親曾見做屠戶的。這些街衙。

【鵲踏枝】一箇道少人錢。一箇道缺盤纏。怕不待鼓腦爭頭。爭奈他赤手

空拳。俺這裏謝天葫蘆提過遣。恰比他稍有些水陸莊田。

【云】大嫂去後面看些茶飯來。【旦云】理會的。【下】【正末云】我開了這箱子。取出些錢鈔來。與你一家兩錠做本錢。兄弟也。我去年借與你許多本錢。都那裏去了。【衆云】哥哥不知。去年借的本錢都折了。近新來不知那裏走將一個先生來。化的這甘河鎮一方之地。都吃了齋素。因此上折了本錢。【正末唱】

【寄生草】你道他都修善不喫糴。你道是先生每鬧了終南縣。道士每住滿全真院。莊家每閒看神仙傳。姑姑每屯滿七真堂。我道來搖車兒擺滿二三清殿。

【衆云】哥哥似這等屠戶人家都吃了齋。着恰每怎生做買賣。【正末云】你休鬧。可不道攪人買賣。如殺父母。如今那個敢殺那先生去。【衆云】俺去。【正末云】你如今白廝打贏的。使殺那先生去。【衆云】說的是。話的是。俺衆人打你一個。【正末云】打將來。【做打科。衆倒科】

【正末云】你都近不的我【唱】

【金盞兒】一箇拳來到眼跟前。輕躲過臂忙搨。一箇被我搬的一似風車兒轉。一箇拳來先躲過似放過一蠶椽。這一箇明堂裏可早叉翻背。這一箇嘴縫上中直拳。這一箇撲的腮搵土。這一箇亨的脚稍天。

【衆云】哥哥。俺近不的。你是你去。【正末云】我去。【衆云】難然這等。還怕那先生有神通。你到那裏。小心在意者。【正末云】兄弟。每我明日五更前後便去殺那先生。你放心者。【唱】

【賺煞尾】想着我撲乳牛力氣全。殺劣馬心非善。但提起身輕體健。俺兩個若還廝撞見。不着那廝巧語花言。遮莫你駕雲軒。平地升仙。將我這摘膽剗心手段。展須直趕到玉皇殿前。撞入那月宮裏面。我把他死羊般拖下九重天。【下】

【衆云】哥哥醉了也。俺衆人回家去來。【下】



第一折

〔馬丹陽上云〕貧道馬丹陽。雜了仙鄉。來此終南縣甘河鎮。化一草庵居住。不勾半年。將此一方的人都化的。吃了齋素。果然這任屠殺生太衆。性如烈火。如今要殺貧道。或白晝而來。或黑夜而至。可用俺神通祕法。點化此人。俗說能化一羅刹。莫度十七斜。我教他眼前見些惡境頭。然後點化此人。這早晚敢待來也。〔正末同旦上云〕我昨日和衆兄弟每打賭賽。今日殺那先生去。我昨日吃的酒多了些。今日宿酒未醒。我索殺那先生走一遭去。〔唱〕

〔正宮端正好〕添酒力晚風涼。助殺氣秋雲暮。尙兀自脚趂起醉眼模糊。他化的俺一方之地。都食素。單則是俺這殺生的無緣度。

〔旦云〕你這早晚往那裏去。〔正末云〕我要殺那先生去。〔唱〕

〔滾繡球〕你可也休怕怖。我心中不恍惚。常言道避着不做。〔旦云〕他是個出家人和你往日無冤。近日無讎。你殺他怎的。〔正末云〕任大嫂。你莫不養着那先生來。〔旦

云。吓。你聽是甚言語。〔正末唱〕你莫不和馬丹陽是縮角兒妻夫。〔旦云〕我看你到那裏怎的。〔正末唱〕我到那裏一隻手揪住繫腰。一隻手摺住道服。把那廝輕輕擡舉。滴溜撲擲下街衢。我是箇敲牛宰馬任風子。〔旦云〕你休去帶累我也。〔正末唱〕帶累你抱姪攜男魯義姑。我言語無虛。

〔旦云〕我苦勸你不聽我言語。〔正末唱〕

〔倘秀才〕你道是苦勸着不依你箇婦女。那先生壞衣飯如殺父母。自古無毒不丈夫。〔云〕大嫂。嗒那孩兒在那裏。〔旦云〕孩兒在家睡哩。〔正末唱〕則那親生子快啼哭。你與我覷去。

〔旦云〕我好也要你家去。歹也要你家去。〔正末云〕大嫂。那先生和我往日無冤。近日無讎。我沒來由殺他怎的。那莊裏有幾個頭口兒。我則怕別的屠戶趕了去。我只推殺那先生。其實趕頭口去。你家去磨下刀。燒下湯。我便趕將頭口來也。〔旦云〕哦。可知道殺人償命。欠債

還錢。你這般說纔是我如今便去燒的湯熱磨的刀快。你早些兒來家。【下】【正末云】婆娘家姓如水。我三兩句話說的他回去了。我今去殺那先生去。可早來到也。我跳過這牆去。

【唱】

【滾繡球】我騙土牆騰的跳過來。轉茅檐厭的行過去。退身在背陰黑處。【帶云】兀的不有人來也。【唱】莫不是馬丹陽先有埋伏。我則見悄悄的有人言。原來是瀟瀟的風弄竹。晃的這月華明閃雲來雲去。似人行竹影扶疎。原來這害丹陽刺客心頭怕。殺劣馬賊人膽底虛。使不着膽大心麤。

【云】我自過去。【做見科】【丹陽云】任屠你來了也。【正末背云】好奇怪。他怎生認的我。【回云】我來了也。【丹陽云】你來做甚麼。【正末云】我來殺你哩。【丹陽云】我是個出家人。與你往日無冤。近日無讎。你如何來殺我。【正末云】我是個屠戶之家。你化的一方之地。都不吃葷腥。壞了俺屠行買賣。我因此來殺你。【丹陽云】你道我化的這一方之地。都不吃

葷腥壞了你這買賣。因此來殺貧道。是我攪了你買賣也罷。貧道受死。你與我快性者。

【正末云】你有甚麼神通。廣大使出來。【丹陽云】貧道那裏有神通。【正末唱】

【倘秀才】遮莫你攝伏下北極真武。便請下東華帝主。我道你敢是箇南方左道術。便有甚縮地法混天書。我與你箇快取。

【外扮神子仗劍上】【攤末科】【正末唱】

【窮河西】我這裏觀絕了悠悠的五魂也無。原來這丹陽師父領着一箇護身符。他不是跨鶴來。可怎生有這般翅羽。他把我當攔住。則我這潑性命向他跟前怎生過去。

【神子殺正末科下】【正末云】有殺人賊也。【丹陽云】任屠。你做甚麼。【正末云】哎。有殺人賊也。還我頭來。【丹陽云】你纔要殺我。肉問我要頭。你自摸你那頭去。【正末云】師父。放任屠回家去罷。【丹陽云】你要去。自去誰當着你哩。【正末云】師父。我來時一條路。如今

三條路不知往那條路去〔丹陽云〕你來處來去處去休迷了正道〔正末云〕是是是來處來去處去〔做尋思科云〕父母生我是來處來我若死了便是去處去他着我休迷了正道這先生敢教我跟他出家去罷罷罷稽首任屠情愿跟師父出家〔丹陽云〕你要出家你可是甚麼善男善女你恰纔提短刀越牆而過要殺我如今可要跟我出家你聽者〔詩云〕將你那嬌妻幼子都休顧便有玉海金山也不慕一心唯想你生身何處來我方纔指與你條大道長生路俺這神仙則許神仙做你那凡夫則尋凡夫去〔正末唱〕

〔叨叨令〕師父道神仙則許神仙做凡夫則尋你凡夫去爺娘枉說爺娘苦〔云〕則是我那魔合羅孩兒嗨父母恩養尙且報不的量他打甚麼不緊〔唱〕常言道兒孫自有兒孫福〔云〕兒女是金枷玉鎖歡喜冤家師父稽首〔唱〕任屠却須省得也麼哥却須省得也麼哥告師父指與我一道長生路

〔丹陽云〕任屠你堅心要出家麼〔正末云〕情愿與師父做個徒弟〔丹陽云〕任屠你既要

出家拋棄了你那妻子。方可出家。【正末云】你徒弟既要出家。量他打甚麼不緊。徒弟都捨了也。【丹陽云】你真個要出家。我與你十戒。一戒酒色財氣。二戒人我是非。三戒因緣好惡。四戒憂愁思慮。五戒口慈心毒。六戒吞腥啖肉。七戒常懷不足。八戒克己厚人。九戒馬劣猿顛。十戒怕死貪生。此十戒是萬罪之緣。萬惡之種。既要學道。必當戒之。將你俗衣盞都去了。身穿着道袍。腰繫着雜綵縵。每日在菜園中修行辦道。早晨打五百桶水。日中打五百桶水。天晚打五百桶水。繳轆轤。偃隴兒。撥畦兒。打勤勞。受辛苦。口誦道德經云。道可道。非常道。名可名。非常名。【詩云】你那氣無強弱志爲先。努力須行草換肩。離得這番凡境界。着你生身別上一重天。【正末云】師父着我早晨打五百桶水。午間打五百桶水。晚夕打五百桶水。一日一千五百桶水。量這眼小井。却不打的乾了那。【唱】

【三煞】從今後栽下這五株綠柳。侵門戶。種下這三徑黃花。近草廬。學師父伏虎降龍。跨鸞乘鳳。誰待要宰馬敲牛。殺狗屠驢。謝師父救了我這蠢

蠢之物。泛泛之才。落落之徒。雖然愚魯。從小裏看過文書。

【一煞】高山流水知音許。古木蒼烟入畫圖。學列子乘風。子房歸道。陶令休官。范蠡歸湖。雖然是平日凡胎。一旦修真。無甚功夫。撇下這砧刀什物。情取那經卷藥葫蘆。

【煞尾】再誰想泥猪疥狗。生涯苦。玉兔金烏。死限拘。修無量。樂有餘。朱頂鶴。獻花鹿。唳野猿。嘯風虎。雲滿窗。月滿戶。花滿蹊。酒滿壺。風滿簾。香滿鑪。看讀玄元道德書。習學清虛莊列術。小小茅庵。是可居。春夏秋冬。總不殊。春景園林賞花木。夏日山間避炎暑。秋天籬邊玩松菊。冬雪檐前看梅竹。皓月清風爲伴侶。酒又不飲。色又無。財又不貪。氣不出。我準備麻繩拽輓。轆提挈。荆筐擔糞土。鋤了田苗。種了菜蔬。老做莊家小做屠。【帶云】我兀的到這中年。做你一個徒弟。【唱】哎師父。我可也打的你那勤勞。受的你那苦。

【下】

【丹陽云】且喜任屠仙胎可在。便要出家。看他修行如何。再傳祕法。點化他成仙了道。【詞云】任屠不是我故意的磨滅經年。也只爲脩仙事。全要精專。待他時。有一日功成行滿。纔許你離塵世。證果朝元。【下】

第二二折

【旦上云】妾身任屠渾家是也。自從那日任屠吃了幾杯酒。被他衆人攬掇着打賭賽。殺那先生去了。至今不見來家。則怕他落在人殼中。又聽的說他出了家。我如今鎖了門。抱着孩兒去小叔叔家問一聲。早來到也。小叔叔開門來。【小叔上云】誰叫門哩。我開開這門呀。嫂嫂你那裏去來。【旦云】小叔叔。自從你哥哥任屠殺那先生去了。至今不見回來。【小叔云】俺哥哥往那裏去了。【旦云】聽的說道。跟着那先生出家去了。我如今抱着孩兒。不問那裏尋將他去。【小叔云】我和嫂嫂尋俺哥哥去來。【同下】【丹陽上云】貧道馬丹陽。自從



任屠跟我出家。可早數日光景了。今日任屠的魔頭至也。我且看他如何發付那。〔正末挑荆筐上云〕道可道。非常道。名可名。非常名。〔做放下擔子科云〕自從跟着師父出家。打水澆畦口裏念道。可道。非常道。名可名。非常名。脫離了酒色財氣。人我是非。倒大來好幽哉。快活也呵。〔唱〕

〔中呂粉蝶兒〕每日在園內修持。栽排下久長活計。若不是我參透玄機。則這利名場風波海虛耽了一世。喫的是淡飯黃齏。淡則淡淡中有味。  
〔醉春風〕石鼎內烹茶芽。瓦餅中添淨水。聽得一聲雞叫五更初。我又索起起。識破這貶眼流光。迅指急景轉頭浮世。

〔小叔同旦上云〕嫂嫂。敢在這個菜園兒裏。〔旦做見正末科云〕兀的不是任屠。好也。你怎生這般模樣。〔正末云〕稽首。你尋我做甚麼。〔唱〕

〔紅繡鞋〕我自撇下酒色財氣。誰曾離茶藥琴棋。〔旦云〕你住這裏做甚麼營

生【正末唱】聽杜鵑一聲聲叫道不如歸。【旦云】你莫不游園苑瑤池來。【正末唱】也不曾游園苑。又不曾赴瑤池。【旦云】你可在那裏。【正末唱】止不過在終南山色裏。

【小叔云】哥哥你想起甚麼來。真個在這裏。【旦云】任屠你在這裏做甚麼。嚼家去來。【正末云】大嫂我如今不比往日了。【唱】

【石榴花】每日把轆轤繩直繳到衆星稀。我可甚愛月夜眠遲。則我這春裏夏裏秋裏冬裏受驅馳。【旦云】你可休後悔。【正末唱】更怕甚後悔。又無人把我央及。【旦云】早是我哩。若是別人家婦人呵怎了。【正末唱】哎。你箇婆娘婦女誇強會。直尋到這搭兒田地。想當日范杞良築在長城內。乾迤逗的箇美女送寒衣。

【鬪鷓鴣】又不比那萬水千山。【旦云】我從來三從四德。【正末云】着別人說波。【唱】

賣弄他三從四德。〔旦云〕任屠你撇下嬌妻幼子家緣家計跟着那先生出家幾時能勾做神仙我好也要你去歹也要你去。〔正末云〕這婆娘好是無禮也你不家去我敢打你。〔唱〕我這裏便揚起我這拳頭。〔旦挨正末科云〕你打你打可又不敢打我。〔正末唱〕他那揣與我箇面皮。〔帶云〕稽首。〔唱〕常言道今世饒人不算癡。咯兩箇元是善知識。〔旦云〕任屠咱家去來。〔正末唱〕世來到林下山間再休想星前月底。〔旦云〕任屠可不道夫唱婦隨夫榮妻貴哩。〔正末唱〕

〔上小樓〕你道是夫唱婦隨夫榮妻貴我從那早起晚息撇菜挑葱打水澆畦。〔旦云〕你若不家去我就在這裏覓個死處。〔正末唱〕你待要向這裏撒滯殢尋個自縊。〔帶云〕不中。〔唱〕赤緊的菜園中擺葱般人脆。

〔旦云〕我和你一同家去來。〔小叔云〕哥哥依着嫂嫂我每家去來。〔正末唱〕

〔么篇〕往常時你勸我今日箇我勸你那時味已瞞心劈兩分星細切薄

批【小叔云】自從哥哥來了俺這買賣都折了本也【正末唱】你道是這幾日做屠的傷折了本利【帶云】兄弟嗜宰一個牲口兒與他個快性者要往人口裏過度酌茶飯打當的乾淨可不道個謹行儉用十年不富天之命也任屠也你出了家也【唱】你管他甚麼豬肥羊貴

【旦云】你在家裏則是宰的幾個牲口兒誰敢勞動着你挑着這等重擔子受這等苦楚【正末唱】

【滿庭芳】這擔兒便輕如您的你道我擔荆筐受苦比你那擔火院便宜

【帶云】擔着這的呵【唱】止不過兩頭來往一般興廢不強似你就是耽非【旦云】你敢待學張子房從赤松子脩仙學道那【正末唱】我雖不似張子房休官棄職

我待學陶淵明歸去來兮嗜兩箇都休罪我和你便今番廝離【旦云】你着我那裏去那【正末云】由你波【唱】遮莫你做張郎婦李郎妻

【旦云】你不家去呵。與我個倒斷。你休了我者。【小叔云】說的是哥哥。你若休了嫂嫂。我就收了罷。【正末云】你要休書。等我問師父去。【旦云】你當初娶我時。可不曾問師父。【小叔云】也罷。就着師父與我做個媒人。【正末見丹陽科云】師父。俺渾家問你徒弟要休書。我休呵。好不休呵。好。借問師父。紙墨筆硯。【丹陽云】你媳婦問你要休書。怎麼問我要紙墨筆硯。我這紙筆是寫黃庭道德經的。怎麼與你將經紙寫休書。從那裏起你那一念。妻是你的誰。誰是你的妻。休呵在的。你不休不在你。【正末云】師父說休呵便在我。不休呵不在我。罷罷罷。我知道了也。師父則是教我休了的是。【唱】

【普天樂】我世跳出虎狼叢。拜辭了鴛鴦會。【云】我要寫又無紙。【旦云】我這裏有手帕。【正末唱】這手帕中做布撚。好做鋪尺。菜園中無紙筆。將手帕鋪在田地。就着這水渠中插手在青泥內。打與你箇泥手模。便當休離。嗒兩箇恩斷義絕。花殘月缺。再誰戀錦帳羅幃。

【旦扯正末云】任屠你好下的也。【正末云】你休煩惱聽我說與你。【唱】

【耍孩兒】想咱人生在六合乾坤內。活到七十歲。有幾人身。幻化比芳菲。人愁老花怕春歸。人貧人富無多限。花落花開有幾日。則是這三寸元陽氣。貫串着凡胎濁骨。使作着肉眼愚眉。

【二煞】一來我女色再不貪。二來香醪再不吃。堆金積玉成何濟。人生一世心都愛。誰爲三般事不迷。世跳出紅塵內。我則尋泛游槎天浪下。爛斧柯仙棋。

【三煞】我則要仙鶴出入隨。誰戀你香腮左右偎。你那繡衾不如我這粗絢被。我閒彈夜月琴三弄。誰待細看春風玉一圍。嗜兩箇分連理。你愛的是百年姻眷。我怕的是六道輪迴。

【旦云】任屠你好下的也。【正末云】你回去了罷。【唱】

【四煞】我則見匆匆月出東。厭厭日落西。秋鴻春燕相催逼。〔小叔云〕哥哥你看這花朵兒渾家。怎生割捨的出了家。〔正末唱〕玉天仙妻兒你是你。〔旦云〕任屠你看這孩兒。〔正末唱〕將來魔合羅孩兒。〔做摔科〕知他誰是誰。〔旦哭云〕任屠你怎麼把孩兒摔殺了。〔正末唱〕我見他搵不住腮邊淚。休想他水泡般性命。顧不的你花朵似容儀。

【旦云】你休了我罷。怎生把孩兒摔死了。我兒也。〔正末唱〕

【五煞】由你待叫叮叮叫到明。哭啼啼哭到黑。打悲歌休想我有還俗意。〔旦云〕任屠。嗒家去罷。〔正末唱〕哎。你箇綠豆皮兒姐姐。疾忙退。〔小叔云〕哥哥。跟俺嫂嫂家去罷。〔正末唱〕哎。你箇無梁桶的哥哥。枉了提。休則管閒淘氣。絮的你口困。休想我心回。

【煞尾】由你死共死活共活。我二則二一則一。我休了嬌妻。摔殺幼子。你

便是我親兄弟。跳出俺那七代先靈。將我來勸不得。【下】

【旦云】小叔叔。任屠不肯回家去。把孩兒又摔殺了。可怎生了也。【小叔云】真個苦惱。你還不還俗便罷。又將孩兒摔死了。這般下的。嫂嫂你如今真個不好過日子。不如跟着我一同回去住罷。【同下】【丹陽云】此人省悟了。菜園中摔死了幼子。休棄了嬌妻。功行將至。再教他見妻子惡姻緣。然後引度他歸于正道。未爲遲也。【下】

第四折

【正末上云】自從跟着師父出家。在這菜園裏打勤勞。脩行辦道。可早十年光景也。【唱】

【雙調新水令】我雖不曾倒騎鶴背上青霄。今日箇任風子積功成道。編四圍竹寨籬蓋一座草團瓢。近着這野水溪橋。再不聽紅塵中是非鬧。

【駐馬聽】散誕逍遙。雖不曾閬苑仙家採瑞草。又無甚憂愁煩惱。海山銀闕。赴蟠桃。新種下黃花三徑。有誰澆。白雲滿地無人掃。人道我歸去。早春



花秋月何時了。

【六賊上云】奉師父法旨。魔障任屠。走一遭去。可早來到也。任屠開門來。【正末唱】

【川撥棹】那裏這般有賊盜。菴門前誰鬧炒。俺這裏松柏週遭。山川圍着。疎竹瀟瀟。落葉飄飄。有人來到。言語低高。則道是鶴鳴九臯。開開門觀觀。了。山菴中靜悄悄。

【六賊云】任屠。我問你要些金珠財寶。【正末云】俺出家人那裏得金珠財寶。【六賊云】兀的不是。【正末云】敢是俺師父的。你要將去。【六賊云】我問你要那猿。【正末云】俺出家人那裏得那猿來。【六賊云】兀的不是。【正末云】敢是俺師父的。你要將去。【六賊云】我問你要那馬。【正末云】我出家人那裏得那馬來。【六賊云】兀的不是。【正末云】敢是俺師父的。你要將去。【唱】

【鴈兒落】我只道人不知鬼不覺。却元來你空叫咱空鬧。【帶云】金珠財寶。

都將的去。師父來問我說些甚麼。哥哥你姓甚名誰。【六賊云】我名可名無姓名。【正末唱】你道是名可名無姓名。【帶云】俺出家的東西。你將的去。【唱】可正是道可道非常道。

【六賊云】任屠你怎生罵我。【做揪住科】。【正末唱】

【得勝令】呀。走將來揪住呂公綽。【六賊推倒正末科】。【正末唱】哎喲。險跌破許由瓢。鶴泣霜天表。猿啼夜月高。他將那駿馬牽着。【帶云】那馬嘶喊咆哮。回頭有顧主之心。【唱】可正是馬有垂韁報。【帶云】稽首。【唱】把性命相饒。怎生教人無刎頸交。

【六賊下】。【徠兒上云】自家是任屠的孩兒。十年前在菜園中摔殺了我。如今問他索命。走一遭去。任屠開門來。【正末云】又是誰叫門。我開開這門。小哥哥做甚麼。【徠云】我問你要件東西。【正末云】你要甚麼那。【徠云】我要你那縲兒。【正末云】你將的去了。我可繫甚麼

那【倅云】你不與我。我就殺了你。【正末云】你要將的去。【倅云】我再問你要件東西。【正末云】你又要甚麼那。【倅云】我要你那領袍。【正末云】你將的去了。我可穿甚麼那。【倅云】你不與我。我就殺了你。【正末云】你要呵將的去。【倅云】我再問你要件東西。【正末云】你又要甚麼那。【倅云】我問你要那顆頭。【正末云】哥哥也。連着筋哩。哥哥也。我和你有甚麼讎。【倅云】你記的十年前菜園中摔死了我。今日償我命來。快將頭來。【正末唱。

【川撥棹】誆的我五魂消。怎隄防笑裏刀。他待顯耀雄豪。亂下風颭。天也我幾時能勾金蟬脫殼。可不道家有老敬老。有小敬小。

【倅云】將頭來。【正末唱】

【七弟兄】我這裏勸着道着他。不採分毫。別人的首級他強要。他小心兒不肯自量度。可不道君子不奪人之好。

【俠云】將頭來。【正末唱】

【梅花酒】你敢忍不的也。我敢顯躁暴。我敢摺住你那頭稍。我敢爛臍臍。打碎你腦。我敢各支支。搥折你腰。【俠云】你搥波。【正末云】稽首。【唱】師父道且忍着我。又不曾宴蟠桃。又不曾煉丹藥。不死呵幾時了。

【收江南】呀。我則索咬着牙。又喫你這殺人刀。【俠殺正末科】。【下】。【正末云】有殺人賊也。【丹陽上云】任屠。你省也麼。【正末唱】原來是馬丹陽使的這圈套。險把箇潑殘生。傾在小兒曹。師父又撞着我。則索終朝每日打勤勞。


【丹陽云】任屠。你見了麼。那六個人是你身邊六賊。那小孩兒是你菜園中摔死的小的。今日見了酒色財氣人。我是非。你今日功成行滿。你聽者。【詩云】爲你有終始。救你無生死。貧道馬丹陽。三度任風子。【衆仙各執樂器迎科】。【正末唱】

【尾】衆神仙都來到。把任屠攝赴蓬萊島。今日箇得道成仙。到大來無是

無非快活到老。

題目 甘河鎮一地斷葷腥

正名 馬丹陽三度任風子



馬丹陽三度任風子雜劇終

# 劉晨阮肇誤入桃源

## 第一折

〔沖末扮太白星官引青衣童子上云〕吾乃上界太白金星是也。奉上帝勅命，遣臨下界，糾察人間善惡。有天台山桃源洞二仙子，係是紫霄玉女，只爲凡心偶動，降謫塵寰。又見天台县劉晨阮肇，此二人素有仙風道骨，向因晉室衰頹，姦讒竊柄，甘分山林之下，脩真煉藥，以度春秋。今日必上天台山採藥，不免將白雲一道，迷其歸路，却化一樵夫，指引他到那桃源洞去。與二仙子相見，成其良緣。多少是好，但可惜劉阮二人塵緣未斷，終有思歸之心。那時節，我再度他，未爲晚也。正是平空舒出擎雲手，指引山中採藥人。〔下〕

〔正末扮劉晨外扮阮肇各帶砌末上云〕某姓劉名晨，這位兄弟姓阮名肇，俱係天台縣人氏。幼攻詩書，長同志趣。因見姦佞當朝，天下將亂，以此潛形林壑之間，無志功名之會。現在天台山下，蓋一所

茅菴與兄弟修行辦道。豈不聞聖人之言。天下有道則見。無道則隱。倒大來達時務也呵。  
唱。

【仙呂點絳脣】嘯傲烟霞。寸心休把名牽掛。暗裏年華。青鏡添白髮。

【混江龍】山間林下。伴藥爐。經卷。老生涯。眼不見車塵馬足。夢不到蟻陣。蜂衙閒來時。靜掃白雲。尋瑞草。悶來時。自鋤明月種梅花。不想去上書北闕。不想去待漏東華。似這等鷓鴣掩翅。都只爲狼虎磨牙。怕的是斬身剛劍。愁的是碎腦金瓜。怎學他屈原湘水。怎學他賈誼長沙。情願做歸湖范蠡。情願做喫酒欒巴。攜閒客登山採藥。喚村童汲水烹茶。驚戰討駭征伐。逃塵冗。避紛華。棄富貴。就貧乏。學聖賢洗滌了是非心。共漁樵講論會興亡話。羨殺那知禍福塞翁失馬。堪笑他問公私晉惠聞蛙。

【阮肇云】兄長時當春暮。我和你上天台山去採種藥苗。似這景物。真堪玩賞也。  
【正末唱】



【油葫蘆】一上天台石徑滑。踐翠霞則見這竹籬茅舍兩三家。聽得那夕陽杜宇啼聲煞。這時節春風桃李花開罷。我雖不伴長沮事耦耕。學嚴陵理釣槎。常則是杖頭三百青錢掛。抵多少坐三日縣官衙。

【天下樂】也算個閒趁東風。數落花榮華誰戀。他敢則是瓦盆邊幾場沈醉殺。快清風袍袖寬倦。紅塵路徑狹。便休題相逢不下馬。

【云】登高履險。不覺困倦。就此松陰之下。拂石而坐。少憩片時。【做坐科】阮肇云。我和你。在山林下修行。不過窮居野處。升高望遠。想那朝中爲官的。利澤施于天下。聲名流于後世。其間孰得孰失。兄長所見若何。【正末云】兄弟。那爲官的。到底不如我閒居的好。【唱】

【那吒令】朝廷內怨煞薦賢的叔牙。林泉下傲煞操琴的伯牙。蟠溪上老煞釣魚的子牙。人情似啖馬肝。世味如嚼蜂蠟。嘆紛紛塵事搏沙。

【鵲踏枝】遠奢華近清佳。火煉丹砂。水煮黃芽。牢拴住心猿意馬。急疎開。

利銷名枷

【阮肇云】這幾年天下荒荒。干戈並起。不能勾風塵寧靜。若有英雄生於此時。覩事業如拾芥耳。【正末云】賢者避世。其次避地。其次避色。其次避言。兄弟還只是我們的見識高得多哩。【唱】

【寄生草】我情願棄軒冕。離人世。傍泉石度歲華。一任他英雄並起。圖王霸。烟塵並起。興戈甲。異端並起。傷風化。我和你韜光晦迹。老山中。煞強如齊家治國平天下。

【太白扮老人上云】那劉阮二人來了。吾先使白雲一道。迷其歸路。化作樵夫。立於路傍。他二人必來問路。却指引他到桃源洞去借宿。豈不與二仙子相遇。【正末同阮做起行科云】兄弟。天色漸晚。藥苗已採。便可下山回家去罷。【唱】

【么篇】去去山無盡。行行路轉差。則爲那白雲漸漸迷高下。不由咱寸心

悄悄耽驚怕見一個村翁遠遠來迎迓我這裏爲迷山路問樵夫抵多少  
因過竹院逢僧話

【做見科太白云】賢者何由經此【正末云】俺兄弟二人上山採藥信步遊玩至此【唱】

【醉中天】信脚山之下洗耳水之涯正失路迷蹤沒亂煞【帶云】得遇老人

呵【唱】抵多少買得龜兒卦【太白云】二位可通個姓名現居何處【正末唱】我兩

個本東莊措大【太白云】我看你二位生得齊整像個出仕的人【正末唱】休認做名

題科甲【太白云】二位可還有甚陪伴的麼【正末云】若問我陪伴的呵【唱】無非是麋

鹿魚蝦

【云】小生姓劉名晨兄弟姓阮名肇現在天台山下閒居修行【太白云】二位既是修行每

日在山中有甚生涯過遣【正末唱】

【金盞兒】你問我甚根芽甚生涯我那裏看家猿鶴年高大當門松檜樹

槎枒常則是道書堆玉案。仙帔疊青霞。端的個山中閒宰相。林下野人家。

〔太白云〕我看二位都是讀書君子。方今聖朝以賢良方正取士。二位不去求名應舉。却是隱遁山林。爲着何來。〔正末云〕小生與兄弟慕山林幽雅。遂有終焉之意。那爲官的。我怎麼學他〔唱〕

〔後庭花〕並不想有軒車。有駟馬。我則願無根椽。無片瓦。出來的一品職。千鍾祿。那裏有六韜書。三略法。他都是井中蛙。妄稱尊大。比周公不握髮。比陳蕃不下榻。空結實花木瓜。費琢磨水晶塔。斗筲器不足誇。糞土牆容。易塌。兒童見驚訝殺。

〔青歌兒〕空一帶江山。江山如畫。止不過飯囊。飯囊衣架。塞滿長安亂似麻。每日價大。燾高牙。冠蓋頭踏。人物不撐達。服色儘奢華。心行更姦猾。舉止少謙洽。紛紛擾擾。由他多多少少欺咱。言言語語參雜。是是非非交加。

因此上不事王侯。不求聞達。隱姓埋名。做庄家學耕稼。

【太白云】二位。此處到山下。還有數里之遙。天色已晚。若歸去。恐爲狼虎所傷。兀的青山那搭。紅輪直下。有個桃源洞人家。可投宿一宵去。【正末舉手做謝科云】多謝指引。【唱】

【賺煞】投至的山上採芝回。早難道江上踏青罷。眼見得路迢遙。芒鞋邈邊。抵多少古道西風鞭瘦馬。嘆明朝回首天涯。謾嗟呀那裏也。出入通達。不覺的枯木寒烟噪晚鴉。望青山那搭。紅輪直下。兀的是白雲深處有人家。【同阮下】

【太白云】吾指引他二人往桃源洞去了也。別遣青衣小童報知二仙子。與他成此夙緣。【詩云】尋真不覺路迢遙。蚤見斜陽轉樹梢。咫尺洞天風景異。碧桃花下鳳鸞交。【下】

### 第一折

【二旦扮仙子引侍女上云】子童二人。乃上界紫霄玉女。偶因有罪降謫人間。現居天台山。

桃源洞中今經日久。有太白星官。命青衣童子來報說。目下有天台縣劉晨阮肇二人。與童子有五百年仙契。今來採藥。必當相會。不免分付侍女們。安排酒果。親自出洞迎接去咱。  
【正末同阮肇上云】不想入山採藥。盤桓日夕。竟被白雲迷其歸路。遇一樵夫指引去桃源洞人家寄宿一宵。行來數里。尙未得到。兄弟似此路徑登高涉險。索受艱苦也呵。  
【唱】

【正宮端正好】風力緊。羽衣輕。露華濕。烏巾重。我本爲厭紅塵。跳出樊籠。只待耍撥開雲霧。登丘隴。身世外無擒縱。

【滾繡球】香濛濛。落松花。把山路迷密匝匝。長苔痕。將野徑封。靜巉巉。鎖烟霞。古厓深。洞高聳。聳接星河峭。壁巘峯。鬧炒炒。棲鴉噪。暮天悲切切。玄猿嘯。晚風絮叨叨。鷓鴣啼。轉行不動。磳磕踞。虎豹跨。上虬龍。白茫茫。徧觀山下雲深處。黃滾滾。咫尺人間路。不通。眼睜睜。難辨西東。

【倘秀才】我待學煉九轉丹砂。葛洪上萬丈岷崙赤松。因此上思入風雲。

變態中。【云】兄弟你看一溪流水。幾片落花。這山中必有人家也。【唱】則見一溪流水。綠幾片落花紅兀的把春光斷送。

【云】兄弟這般景物。暢是宜人。我且題詠幾句。【阮云】兄長正好題詠幾句。小弟拱聽。

【正末唱】

【滾繡毬】水呵。莫不黃河天上來。花呵。莫不碧桃天上種。水呵。索強如翠岩前。三千丈玉泉飛迸。花呵。乾閃下。鬧西園。一隊隊課蜜遊蜂。水呵。則是瀾漫。三月雨。花呵。可惜狼籍。一夜風。水呵。近滄波。濯塵纓。一溪光瑩。花呵。性輕薄。亂飄零。枉費春工。水呵。抵多少。長江後浪催前浪。花呵。早則一片西飛。一片東。歲月匆匆。

【倘秀才】我這裏長嘯時。草木振動。悵望處風濤怒湧。不覺的悄然而悲。悚然恐。【阮肇云】略兩個則傍這一道流水尋去。料的前面必有個漁家可以投宿。【正末

唱。盼不的漁家春水渡。〔阮肇云〕這山中敢有個寺兒麼。〔正末唱〕聞不見僧寺夕陽鍾。〔帶云〕兄弟呵。〔唱〕咱兩個莫不被樵夫調哄。

〔滾繡球〕我這裏度危橋。拄瘦筇。俯清流。靠古松。〔云〕兄弟。你看水上流出一杯飯來了。〔唱〕見一盃胡麻飯。綠波浮動。〔做取分食科〕〔唱〕想行廚只隔雲峯。進程途。一一里。見樓臺。三四重。勢嵯峨。走鸞飛鳳。晃分明。金碧玲瓏。〔內做奏樂科。正末云〕這是什麼響。〔唱〕又不是數聲仙犬鳴。天上又不是幾處樵歌起。谷中。〔帶云〕待我聽咱。〔做聽科〕〔唱〕只聽的環珮丁冬。

〔二仙子引侍女將砌末上云〕劉晨阮肇二人已到了。不免引着侍女將酒禮樂器出去迎接者。〔正末做見科〕〔詩云〕天和樹色藹蒼蒼。霞重嵐深路渺茫。雲竇滿山無鳥雀。水聲沿澗有笙簧。碧紗洞裏乾坤別。紅杏枝頭日月長。願得花間有人出。免教仙犬吠劉郎。兄弟。你看霞光鳳馭。羽蓋霓旌。笙歌繚繞。珠翡妖嬈。這都是那裏來的。〔阮肇云〕是好蹺怪好蹺怪。



【正末唱】

【呆骨朵】你便鐵石人也惹起凡心動。莫不是駕青鸞天上飛瓊。似這般花月神仙。晃動了文章鉅公。【做相見科。旦云】劉郎阮郎。請同到舍下。【正末云】他姑娘家怎知我們的名姓。便以劉郎阮郎呼之。兄弟。我和你莫非是夢中麼。【唱】沒揣的撞到風流陣。引入花衢衢。擺列着金釵十二行。敢則夢上他巫山十二峯。

【做行到科。】【正末云】到這境界。分外幽絕。令人翩翩然有出塵之想。不知生等何緣得至於此。【唱】

【脫布衫】光閃閃貝闕珠宮。齊臻臻碧瓦朱甍。寬綽綽羅幃繡櫳。鬱巍巍畫梁雕棟。

【醉太平】注金波碧筒燒銀燭。紗籠笙歌引至畫堂中。紅遮翠擁。人心此會應相重。人情今夜初相共。人生何處不相逢。早忘却更長漏永。

【二旦做意把盞科云】草草杯盤。不足以待賢者。惶恐惶恐。【正末謝云】生等不才。多承錯愛。何以克當。【唱】

【倘秀才】則見他喜孜孜。幽歡密寵。便一似悄悄促促。私期暗通。怎消得翠袖殷勤。捧玉鍾。屏開金孔雀。褥隱繡芙蓉。兀的般受用。

【小旦扮金童玉女上云】咱兩個奉王母仙旨。將這仙桃來獻桃源洞二仙子。兼賀得婿之喜。【正末云】兄弟。這話那裏說起。【阮肇云】兄長。豈不聞酒中得道。花裏遇仙。也是常事。

【正末唱】

【滾繡毬】真乃是羅綺叢。錦繡中。出紅妝。主人情重。玳筵開。炮鳳烹龍。受用些細腰舞。皓齒歌。琉璃鍾。琥珀醲。抵多少文字。飲一觴。一詠。列兩下進仙桃。玉女金童。不覺的舞低楊柳樓心月。歌盡桃花扇底風。筵宴將終。

【叨叨令】記不的軒轅一枕華胥夢。學不的淳于一枕南柯夢。盼不的文

王一枕非熊夢。成不的莊周一枕蝴蝶夢。倒大來福分也麼哥。恰做了襄王一枕高唐夢。

【三煞】帽簷偏側簪花重。衫袖淋漓污酒濃。品竹調絲移商換羽。搯粉搏酥走罽飛觥。一個個濃粧艷裹。一對對妙舞清歌。一聲聲慢撥輕攏。贏得我忘懷昆仲。拚却醉顏紅。

【二煞】一杯未盡笙歌送。兩意初諧語話同。效文君私盃相如。比巫娥願從宋玉。似鶯鶯暗約張生。學孟光自許梁鴻。他年不騎鶴。何日可登鰲。今夜恰乘龍。說甚的隻鸞單鳳。天與配雌雄。

【隨煞尾】色籠芡光潏灩。山環水繞天台洞。勢周旋形曲折。虎踞龍盤仙子宮。本意閒尋採藥翁。誰想桃源一徑通。謾嘆人生似轉蓬。猶恐相逢是夢中。月滿蘭房夜未扃。人在珠簾第幾重。結煞同心心已同。綰就合歡歡

正濃。焚盡金爐寶篆。空燒罷銀臺燭影紅。身在天台花樹叢。夢入陽臺雲雨蹤。準備着鳳枕鴛衾玉人共。成就了年少風流志誠種。【同下】

楔子

【小旦上云】小妾是桃源洞仙子侍從的。爲劉晨阮肇二人與俺仙子有五百年夙世姻緣。自去春與仙子成了姻眷。到今剛及一載。柰二人塵緣未斷。又早思歸。今日令我等先將酒果到十里長亭伺候。待仙子與劉阮相別。【正末同阮肇二旦乘車上云】咱兄弟二人自去春到桃源洞中。多感二位小娘子錯愛。倏忽一載。且莫說他溫香軟玉。恩意綢繆。只是繡閣蘭房。儘也受用不盡。怎柰心中只想回歸鄉里。目今又值暮春時候。聞得百禽鳴野。使我思歸之意。一倍加切。不免暫時告別回家。小娘子休得見怪。【二旦做打悲科云】我二人自謂終身已得所託。剛纔一載。乃遂別乎。常言道。心去意難留。賤妾便當相送。親至十里長亭。一杯餞別。【做把酒科】【正末回酒科。旦云】賤妾聊賦一詩相贈。【詩云】殷勤相送出天門。

仙境那能却再來。雲液既歸須強飲。玉書無事莫頻開。花當洞口應長在。水到人間定不回。  
惆悵溪頭從此別。碧山明月照蒼苔。【正末云】多謝小娘子厚意。這般眷戀。但此別非久。不  
過旬日之間。便當再會也。【唱】

【仙呂賞花時】我做甚三疊陽關愁不聽也。只爲一段傷心畫怎成。則不  
是人感慨別離。輕聽兀那流鶯樹頂。先啼出斷腸聲。

【么篇】抵多少綠暗紅稀出鳳城。拚得個倒盡沙頭雙玉餅。直到這十里  
短長亭。避不的登山驀嶺。便子索回首問前程。【正末同阮下】

【旦云】他二人去了也。我等本待和他琴瑟相諧。松蘿共倚。爭奈塵緣未斷。驀地思歸。雖然  
係是夙因。却也不無傷感。倘若天與之幸。再與他相見。亦未可知。【詩云】人間無路水茫茫。  
玉洞桃花空自香。只恐韶光易零落。何時重得會劉郎。【並下】

第二折

【淨扮劉德引沙三王留等將砌末上云】某姓劉名德現在天台縣十里莊居住時當春社輪着我做牛王社會首今日請得當村父老沙三王留等都在我家賽社猪羊已都宰下與衆人燒一陌平安紙就於瓜棚下散福受胙飲酒牛表伴哥你把柴門緊緊的閉上倘有撞席的人休放他進來【衆做打鼓燒紙飲酒科】【正未同阮肇上云】自到桃源洞中與那兩個小娘子結成姻眷不覺過了一載爲聞百鳥鳴春頓起思歸之念再尋舊路回家兄弟你也看見這前景物都更變不同了好傷感人也呵【唱】

【中呂粉蝶兒】兔走烏飛搬不盡古今興廢急回來物換星移成就了鳳鸞交鶯燕侶五百年夙緣仙契不多時執手臨岐倒攬下乾相思一場憔悴

【醉春風】則被這紅灼灼洞中花碧澄澄溪上水賺將劉阮入桃源暢好是美美受用他一段繁華端詳了一班人物別是個一重天地

【做行路科阮肇云】兄長。這一路上全不似舊時光景。却是何故。【正末唱】

【迎仙客】下坡如投地穿。驀嶺似上天梯。這的是蝴蝶夢中家萬里。不甫能雨纔收。沒揣的風又起。似這般風雨淒淒。早難道遲日江山麗。

【紅繡鞋】見了這三五搭人家。稀密過了這百千重山路。透迤那裏也新郎歸去馬如飛。愁的是林深禽語碎。怕的是路遠客行遲。呀。却原來鷓鴣啼烟樹裏。

【云】早來到這裏。望見那古寺。過了一座小橋。便是家中了也。【唱】

【醉高歌】望見那蕭蕭古寺投西行。過這泛泛危橋轉北。早來到二家曠上熟遊地。這搭兒分明記得。

【正末做意驚見科云】好怪。這兩株松樹。我去時親手栽下。與兄弟上天台山採藥。到今只有一年光景。這兩株樹怎麼就長得偌來大。不由我心中好生疑惑。【阮肇云】我也記得這

等大的快。敢則是地肥哩。【正末唱】

【普天樂】曾得個幾星霜。多年歲。爲甚麼松杉作洞。花木成蹊。往時節將嫩苗。跑土栽今日呵。見老樹衝天立。見了這景物翻騰。非前日。不由人幾般兒心下猜疑。修補了頽垣敗壁。整頓了明窗淨几。改換了茅舍疎籬。

【做打家喚門科】開門咱。我來家了也。【淨云】果是有撞席人來。休開門。【正末唱】

【石榴花】則見這野風吹起紙錢灰。瑟瑟的搗鼓響如雷。原來是當村父老衆相知。賽牛王社日。擺列着尊壘。【做叫云】劉弘開門來。開門來。【唱】到的這柴門前。便喚咱兒名諱。他那裏默無聲。弄盞傳杯。一個個緊低頭不睬。佯粧醉方信道人面逐高低。

【鬪鶴鶻】我今日衣錦還鄉兒呵。你也合開門倒屣。【云】劉弘快開門來。【淨

云】你則是個撞席的饞嘴。怎麼敢叫劉弘要討我打你。【正末唱】我這裏道姓呼名。他



那裏嗑牙料嘴。則道是舖啜之人來撞席饗饗。他酒共食似恁般妄作胡爲。敢欺侮咱浮蹤浪跡。

【淨云】今日當村衆父老在我家賽牛王社。燒一陌紙。祈保各家平安。那裏走將這兩個不知羞恥的人來。要我酒肉喫。倒覓鎮俺衆人一年不吉利。【正末唱】

【上小樓】則見他一時半刻。使盡了千方百計。喫緊的理不服人言。不諳典話。不投機。看不的。喬所爲。歹見識。刁天決地。早難道氣昂昂後生可畏。

【淨云】這等撞席的人。倒敢胡言亂語的。牛表沙三急忙打出去者。【衆做打科】【正末唱】

【幺篇】真乃是重色不重賢。度人不度己。使的這牛表沙三伴哥王留唱。叫揚疾。走將來。手便箠。脚便踢。將咱忤逆。這的是孩兒每。孝當竭力。

【云】我是劉晨同兄弟阮肇。去春上天台山採藥。今年歸家。你是何人。倒來打我。【淨云】你這兩個面生可疑之人。我那裏認的你。快去。快去。【正末唱】

【滿庭芳】你道我面生可疑。便待要揚威耀武。也合問姓甚名誰。那些三個吐虹霓。二千丈英雄氣。全不管長幼尊卑。【淨云】我父親劉弘在日。嘗說老爺劉晨上天台山採藥不歸。到今百餘年。知他是狼餐豹食。你還提他則甚。【正末唱】你道我上天台狼餐豹食。誰想我入桃源雨約雲期。休得要誇強會瞞神。說鬼大古裏人善得人欺。

【淨云】這兩個漢子是風魔。是九伯。我記的父親在日。對我說。老爺劉晨上天台採藥。那一年親手栽下門前這兩株松樹。到今百餘年。兀那松樹長的偌大。我父親劉弛也故許多年了。你道是上春採藥去的。你則看這樹。難道一年便長得這般大小。【正末做省悟科云】則這句話可將我提省了也。我適纔到得門首。見這兩株樹便覺有些疑惑。這等看來。當真去百餘年了。孩兒此非汝的罪過。也則是我的愚濁。方知道山中方七日。世上已千年。信有之也。【唱】

【十一月】嘆急急年光似水看紛紛世事如棋回首時今來古往傷心處物是人非若不遊嫦娥月窟必定到王母瑤池。

【堯民歌】呀生折散碧桃花下鳳鸞棲。端的個人生最苦是別離。倒做了伯勞飛燕各東西。早難道有情何怕隔年期。傷也波悲登高怨落暉。添幾點青衫淚。

【正末做打悲科云】你父親劉弛已死。你又是他孩兒。却是我一家骨肉。我當年同兄弟阮肇上天台山採藥。只爲日暮迷其歸路。遇一樵者指引到桃源洞去投宿。行至數里。忽見金釘朱戶似王者之居。有笙歌一部。簇擁二女子迎接我二人到家筵宴。成其夫婦。剛及一載。爲聞百鳥鳴春。思歸故里。早已物換星移。過了一百多歲。信知彼處乃是神仙之境。【阮肇云】兄長。這等看來。我和你便不歸家也罷了。【正末唱】

【耍孩兒】方信道洞天深處非人世。包藏着雲蹤雨跡。【帶云】我想臨行之時。

【唱】怎將斷腸詩句贈別離。分明是漏泄與肉眼愚眉。他道花當洞口應長在。水到人間定不回。參透了其中意。本是個神仙境界。錯認做裙帶衣食。

【淨云】聽了你這一篇話。你敢真是俺老爺。做了神仙回家來的。老爺則你一向在那裏受用。【正末唱】

【五煞】我受用淡氤氳香噴鵲尾。爐光潑灑酒傾蕉葉杯。脚趂起佳人錦瑟傍邊立。醉疎狂閒吟夜月詩。千首眼迷希細看。春風玉一圍。到今日歸何地。想殺我龍肝鳳髓。害殺我螭首蛾眉。

【四煞】也曾交頸睡。並手行。他曾重裊坐。列鼎食。不枉了百年三萬六千日。依舊索背將寶劍匣中去。再也不倒着接籬花下迷。成就了風流壻。匹配上鸞交鳳友。差排下蝶使蜂媒。

【三煞】他那裏一壺天地寬。兩輪日月遲。不比這彩雲易散。琉璃脆。但不  
知別來仙子今何在。從今后逢着仙翁莫看棋。回首更人世。我只怕泰山  
石爛。滄海塵飛。

【二煞】現如今桃源好結縈。問甚麼瓜田不納履。我和他武陵溪畔曾相  
識。寂寞了十二闌。瑤臺仙子吹簫伴。迢遞了五百里。芳草玉孫去路迷。闌  
珊了三千年。王母蟠桃會。生疎了日邊飛翠鸞。丹鳳。冷落了雲外鳴玉犬。  
金鷄。

【尾煞】折末你透關山千百重。進程途一萬里。我則怕春光去了難尋覓。  
【云】兄弟咱和你去來。【唱】趁着這幾瓣桃花半溪水。【同阮肇下】

【淨云】不想我老爺劉晨果然遇仙回來。已經隔世。方悟彼處非凡。急急的與阮肇復入山  
中去了。雖然如此。我又不認的。他知道是真是假。也不必去追尋他了。只是我這牛王社父

老每不曾勸的酒。如何是好。【衆云】今日天氣又好。酒席又盛。雖則被那兩個撞席的攪擾了。這一會然也喫得醉的。醉了飽的。飽了我們都散罷。待明年容在下還席。【並下】【淨云】父老每都散了也。這兩個畢竟是什麼人。非是俺喃喃薦薦爭奈他面生不熟。也不知這劉晨果然是俺爺爺也。又不知那阮肇當真是俺叔叔。又沒處辨他假真。任去來不須追逐。縱然在桃源洞煉藥燒丹。只不如俺牛王社醉酒飽肉。【下】

第四折

【大白引青衣童子上云】當日劉晨阮肇二人上天台山採藥。吾以白雲一道迷其歸路。化一樵者。指引入桃源洞中。與二仙子成就良緣。惜乎二人塵緣未斷。各動思鄉之念。比及回家。已經隔世。方悟仙凡有異。如今他再入山中尋訪桃源。渺無蹤跡。不免顯示真像。指引他到洞。再與二仙子相會。也是我救度他出世超凡的好事。必須先遣青衣小童去那洞中報知仙子出來迎接。他道猶未了。那劉阮二人早到。【正末同阮肇上云】自家與阮家兄弟急

到山中訪那桃源洞。往來來再不得其舊路。怎能勾與二仙子相見。豈非緣薄分淺。致有今日也呵。【唱】

【雙調新水令】滿襟情淚濕青袍。伴離人一竿殘照。行不上巖蠻臨澗絕。盼不到宮闕倚天高。一弄兒行色蕭條。恰便似游仙夢撒然覺。

【駐馬聽】四顧寂寥。緣樹依依雲渺渺。一聲長嘯。青山隱隱水迢迢。看花長在洛陽橋。休官不止長安道。歸路杳。也是我尋真誤入蓬萊島。

【沈醉東風】成就了東牀壻。伏低做小宴會了西王母。接貴攀高。引動這撩雲撥雨心。想起那閉月羞花貌。撇的似繞朱門。燕子尋巢。沒來由。北往南來走一遭。眼見的離多會少。

【做行科云】兄弟我和你走了這半日。但見高山流水。竟不知那桃源洞却在何處。【阮肇云】敢這桃源洞也似竹林寺。有影無形的。【正末唱】

【殿前歡】不覺的五魂消。則見這無媒徑路草蕭蕭。急煎煎似上蚰蜒道。一會價心痒難揉。這時節武陵溪怎暗約。桃花片空零落。胡麻飯絕音耗。做了個雲迷楚岫。水滄藍橋。

【做嘆科云】這等尋來尋去杳無蹤跡。使我進退無門。如之奈何。兄弟。我和你共賦一詩。聊以自遣。【阮肇云】兄長請先倡。【正末詩云】再到天台訪玉真。青苔白石已成塵。笙歌寂寞閒深洞。雲壑蕭條絕舊鄰。【阮肇詩云】草樹總非前度色。烟霞不是往年春。桃花流水依然在。不見當時勸酒人。【正末唱】

【鴈兒落】也是我一事差。百事錯。空惹的千人罵。萬人笑。本則合暮登天子堂。沒來由夜宿祆神廟。

【得勝令】這的是人怨語聲高。我今日得命也無毛。吉丁當掂碎連環玉。生可擦分開比翼鳥。夢斷魂勞。身未到心先到。分淺緣薄。有上梢沒下梢。



【二末做投崖科】太白現像急喝云。劃晨阮肇休胡尋思。吾乃上界太白金星。爲你二人與桃源仙子有夙世姻緣之分。你前日採藥迷路。吾曾化爲樵夫。指引入洞。今復來此。迷其舊路。聽吾指引。【正末同阮拜科云】愚民肉眼不識大仙。只望垂憫。指示前路。【唱】

【沽美酒】怎肯學鴟鵬飛。雜燕雀芝蘭長。混蓬蒿可正是忙處人多閒處少。早着我迷蹤失道。無處訪舊時樵。

【太平令】但得你天公指教。抵多少晏平仲善與人交。你若肯扶傾濟弱。我可便回嗔作笑。一會價記着想。念着。【帶云】休道是人呵。【唱】馬也有垂韁之報。

【太白云】那前面桃花開處。兀的不是洞門。你兩個此一去。休得忘了大道。只待功行完日。同登天府。【正末同阮謝科】【唱】

【落梅風】過了這蒼苔徑。獨木橋路崎嶇。寂無人到。劉郎這回歸去了。亂

山頭杜鵑休叫

【甜水令】元來是路轉峯回。林深樹密。猿啼虎嘯。知他在何處。教吹簫。二旦引侍從仙樂上科。正末唱。猛見這香霧空濛。祥雲縹渺。瑞烟籠罩。還怕咱沒福堪消。

【二旦云】不意今日又得相會也。【正末唱】

【折桂令】依然見桃源洞。玉軟香嬌。一隊隊美貌相迎。一個個笑臉擎着。今日也魚水和諧。燕鶯成對。琴瑟相調。玉爐中焚寶篆。沈烟細裊。絳臺上照紅妝。銀蠟高燒。人立妖嬈。樂奏簫韶。依舊有翠繞珠圍。再成就鳳友鸞交。

【太白云】衆仙近前聽我囑付。【詞云】紫霄仙謫來人世。修真在桃源洞內。有劉阮共慕清虛。厭浮榮。甘心韜晦。當暮春採藥入山。與二女夙稱仙契。被白雲迷失歸途。吾指引驀然相

會成就了兩姓姻緣。完結了百年伉儷。甫一歲二子思家。塵緣重。凡心未退。急歸來。物換星移。訪子孫已更百歲。見門前小樹參天。方省悟仙凡有異。再來時路徑全非。何處認舊遊之地。又是吾指引來歸。神仙眷依然匹配。三年后行滿功成。赴蓬萊同還仙位。

題目 太白金星降臨凡世

紫霄玉女夙有塵緣

正名 青衣童子報知仙境

劉晨阮肇誤入桃源

劉晨阮肇誤入桃源雜劇終



# 跋

馬致遠號東籬大都人江浙行省務官元人有兩馬致遠一爲馬文璧之父秦淮人父子善畫錢謙益列朝詩集有張以寧題爲致遠清溪曉渡圖非大都人之馬致遠也正音譜評其曲如朝陽鳴鳳又云其詞清雅典麗可與靈光景福相頡頏有振鬣長鳴萬馬皆瘖之意其推許蓋甚至美可作十五種今惟漢宮秋藏晉叔首列於元曲選薦福碑見丁集上岳陽樓見丁集下陳搏高臥黃梁夢見戊集或謂黃梁夢如致遠與李時中花李郎紅字李二合作青衫泪見己集任風子見癸集至壬集中之誤入桃源晉叔誤以爲王子一作茲從許之衡說歸馬氏然前案北門廣正譜所錄馬氏誤入桃源如筵前一派仙奇動又不見於此本姑存疑可耳諸劇演神仙之事者爲多太和正音譜列雜劇十二科有神仙道化一目此其類歟息機子雜劇選載孟浩然踏雪尋梅故未有燉雜劇不出東籬之手也與董氏誦芬室影刊十段錦本悉合自是

明劇無疑。王國維謂馬致遠於詩似義山。於詞似歐陽永叔。明寧獻王朱松曲品躋致遠於第一。蓋元中葉以後。曲家多以馬爲宗。其影響於令元雜劇者。誠非鮮也。盧前記。

馬致遠雜劇存目

陳吟詩踏雪尋梅

呂太后人姁戚夫人

大人先生酒德頌

王祖師三度馬丹陽

孟朝雲風雪歲寒亭

呂蒙正風雪飯後鐘

風雪騎驢孟浩然

馬致遠雜劇 存目





中國文學珍本叢書

第一輯 第二十二種

中華民國廿五年二月初版

# 元人雜劇全集

三冊

普及本實價六角  
特印本實價八角

編纂者

盧冀野

主編者

施蟄存


發行人

張靜廬

發行所

上海雜誌公司

上海總店：四馬路二二二四號  
 廣州支店：永漢北路一三三九號  
 南京支店：太平路一一四八號  
 開封支店：中山北街二八四號  
 雲南支店：土主廟街四十七號



初版本1——2500本







1100815

